

Zhuan Falun

prevod na bosanski

29.09.2015.

Li Hongzhi

O DAFA (LUNYU)

Dafa je mudrost Stvoritelja. On je osnova stvaranja, na kojoj su sagrađeni Nebesa, Zemlja i univerzum. On obuhvata sve stvari, od najsitnijih do najvećih, različito se manifestirajući na svakoj od ravni postojanja kosmičkog tijela. Iz dubina kosmičkog tijela, prvo se pojavljuju najsitnije čestice, nakon kojih slijede slojevi nad slojevima bezbrojnih čestica, od malih do velikih, dosežući sve do površinskih ravni koje čovječanstvo poznaje - onih od atoma, molekula, planeta i galaksija - i dalje do onih još većih, pri čemu čestice različitih veličina čine živote različitih veličina, kao i svjetove različitih veličina, koji se nalaze svuda u kosmičkom tijelu. Životi na svakoj od različitih ravni čestica sagledavaju čestice naredne veće ravni kao planete na njihovom nebu i to je tako na svakoj pojedinoj ravni. Životima svake ravni univerzuma se čini da to tako ide u beskonačnost. Dafa je takođe stvorio vrijeme i prostor, mnoštvo života i vrsta, i sve što je stvoreno; sve što postoji, postoji zahvaljujući njemu i ništa se ne nalazi izvan njega. Sve ovo su opipljive manifestacije osobina Dafa: Zhen, Shan, Ren na različitim ravnima.

Koliko god da su napredne ljudske metode za istraživanje prostora i ispitivanje života, stečeno znanje je ograničeno samo na određene dijelove ove jedne dimenzije na niskoj ravni univerzuma, na kojoj se nalaze ljudska bića. Ljudi su istraživali druge planete u vrijeme predistorijskih civilizacija. Ipak, kolike god bile dosegnute visine ili udaljenosti, čovječanstvo nikad nije uspjelo izaći iz dimenzije u kojoj postoji. Čovječanstvo nikad neće moći sagledati stvarnu sliku univerzuma. Ako ljudsko biće želi shvatiti misterije univerzuma, prostora-vremena i ljudskog tijela, ono se mora prihvatiti kultivacije ispravnog Puta, postići istinsko prosvjetljenje i povisiti nivo svoga postojanja. Kroz kultivaciju će se njegov moralni karakter uzdići, a jednom kad nauči da razlikuje ono što je zaista dobro od zla i vrline od poroka i kada prevaziđe ljudsku ravan, ono će moći vidjeti stvarnosti univerzuma i živote drugih ravni i dimenzija i s njima doći u dodir.

Iako ljudi često tvrde da je svrha njihovih naučnih istraživanja "poboljšavanje kvaliteta života", njih zapravo pokreće natjecanje u tehnologijama. I u većini slučajeva, ona su se pojavila tek nakon što su ljudi potisnuli božansko i odbacili moralne kodekse, čiji je cilj osigurati samokontrolu. Upravo iz ovih razloga su prošle civilizacije puno puta doživjele uništenje. Ljudska istraživanja su nužno ograničena na ovaj materijalni svijet, a metode su takve da se proučava samo ono što je priznato. Međutim, s fenomenima koji su neopipljivi ili nevidljivi u ljudskoj dimenziji, no koji zaista objektivno postoje i odražavaju se na realan način u ovom realnom svijetu - kao što su duhovnost, vjera, božanska riječ i čuda - ljudi se ne usuđuju doći u dodir, jer ljudi odbacuju božansko.

Ako ljudi budu u stanju poboljšati svoj karakter, ponašanje i razmišljanje, i utemeljiti ih na moralnim vrijednostima, onda će biti moguće da ljudska civilizacija dugo potraje, pa čak i da se čuda ponovo pojave u ljudskom društvu. Mnogo puta u prošlosti, u ljudskom društvu su se pojavljivale kulture koje su bile polu-božanske i polu-ljudske, pomažući ljudima da stignu do istinitijeg razumijevanja života i univerzuma. Kada ljudi pokazuju odgovarajuće poštovanje i uvažavanje prema manifestaciji Dafa ovdje u ovom svijetu, onda će ti ljudi, njihova rasa ili nacija uživati blagoslov, čast i slavu. Dafa - Veliki Put univerzuma - je taj koji je stvorio kosmičko tijelo, univerzum, život i sve što je stvoreno. Svaki život koji se okrene od Dafa je zaista iskvaren. Svaka osoba koja se može uskladiti s Dafa je zaista dobra osoba i

bit će nagrađena i blagoslovljena zdravljem i srećom. A svaki kultivator koji je u stanju postati jedno s Dafa je neko ko dobija Dao - božansko biće.

Li Hongzhi
24.05.2015.

Sadržaj

O DAFA (LUNYU)	3
Sadržaj	5
1. Lekcija	7
Istinski voditi ljude prema višim nivoima	7
Različiti nivoi imaju različit Fa	9
Zhen, Shan, Ren je jedini kriterij za prosuđivanje da li je čovjek dobar ili loš	12
Qigong je predistorijska kultura	13
Qigong je upravo kultura	16
Zašto gong ne raste uprkos prakticanju	17
Posebnosti Falun Dafa	22
2. Lekcija	27
O nebeskom oku	27
Natprirodna sposobnost gledanja na daljinu	34
Natprirodna sposobnost vidovitosti	35
Izvan pet elemenata, napustiti Tri sfere	38
O težnji	41
3. Lekcija	47
Ja sve praktikante smatram svojim učenicima	47
Qigong Buda škole i budizam	47
Kod kulture se mora koncentrisati na jednu školu	50
Natprirodne sposobnosti i gong potencija	52
Povratna kultura i posuđivanje gonga	53
Posjedujući duhovi (futi)	57
Kosmički jezici	61
Šta je Učitelj dao učenicima	62
Energetsko polje	67
Kako Falun Dafa učenici šire put kulture	67
4. Lekcija	70
Gubitak i dobitak	70
Transformacija karme	71
Povisiti xinxing	77
Guanding	80
Postavljanje misterioznog prolaza	82
5. Lekcija	87
Slika faluna	87
Neobični putevi kulture	88
Vježbanje heretičnog Fa	90
Dvostruka kultura muškarca i žene	91
Dvostruka kultura tijela i duha	93
Fašen	94
Otvaranje svjetla	94

<i>Zhuyouke</i>	99
6. Lekcija	100
Kultivacijsko ludilo	100
Demonske smetnje pri prakticiranju	106
Vlastito srce stvara demone	110
Glavna svijest treba biti jaka	113
Tvoje misli moraju biti ispravne	113
<i>Qigong</i> borilačkih vještina	117
Hvalisanje	120
7. Lekcija	123
Pitanje ubijanja	123
Pitanje ishrane mesom	125
Zavist	129
O pitanju liječenja bolesti	133
Bolničko liječenje i <i>qigong</i> liječenje	136
8. Lekcija	140
<i>Bigu</i>	140
Krađa <i>qija</i>	141
Sakupljanje <i>qija</i>	143
Onaj ko prakticira dobiće <i>gong</i>	145
Nebesko kolo	149
Oduševljenje	155
Kultivacija govora	156
9. Lekcija	159
<i>Qigong</i> i fizičke vježbe	159
Namjere	160
Čist i jasan um	164
Urođena osnova	167
Prosvjetljenje	169
Osoba sa odličnim urođenim kvalitetom	173
Lista nepoznatih riječi	180

1. Lekcija

Istinski voditi ljude prema višim nivoima

Za vrijeme čitavog toka širenja Fa i puta kultivacije, odgovoran sam za društvo, odgovoran sam za učenike. Pri tom ostvareni rezultati su dobri, uticaj na cijelo društvo je također veoma dobar. Prije nekoliko godina je bilo mnogo *qigong* majstora koji su širili metode kultivacije. Sve što su oni objašnjavali pripadalo je nivou odstranjivanja bolesti i održavanja zdravlja. Naravno, ne mislim da metode kultivacije drugih nisu dobre, ja samo kažem da nisu širili stvari na visokim nivoima. Također poznajem i stanje *qigonga* u cijeloj zemlji. Kako u Kini, tako i u inostranstvu, ja sam trenutno jedini koji stvarno širi put kultivacije ka višim nivoima. Zašto nema nikog drugog ko bi širio metodu kultivacije ka višim nivoima? Zato što to dotiče vrlo velike probleme, duboke istorijske razloge i jednu vrlo široku oblast, a i problemi koji su time dotaknuti su također veoma osjetljivi. To također ne može biti šireno od strane običnog čovjeka, jer pri tome moraju biti dotaknute stvari mnogih škola kultivacije. Pogotovo, imamo mnogo praktikanata koji danas uče ovaj *qigong*, sutra onaj *qigong* i time su svoja tijela doveli u strašan nered. Oni se sigurno više ne mogu kultivirati naviše. Dok se ostali velikim putem kultiviraju naviše, on ide samo sporednim putevima. Kad kultivira ovo, ometa ga ono, kad kultivira ono, ometa ga ovo, sve ga ometa. On se više ne može dalje kultivirati.

Sve ćemo to dovesti u red, dobro će biti sačuvano, loše odstranjeno, time će biti osigurano da se u budućnosti možeš kultivirati. Ali moraš stvarno biti ovdje da bi učio Dafa. Ako gajiš razne vezanosti, ako imaš namjeru steći natprirodne sposobnosti, liječiti bolesti, slušati teoriju, ili ako imaš bilo kakvu lošu namjeru, to onda neće ići. Jer, kao što sam rekao, ja sam jedini koji radi ovu stvar. Za takve stvari nema puno prilika i ja to također neću zauvijek ovako dalje širiti. Mislim da oni, koji me direktno mogu čuti kako širim put kultivacije i objašnjavam Fa, kažem vam, to je zaista... kasnije ćeš znati, smatraćeš ovo vrijeme vrlo dragocjenim. Mi naravno govorimo o sudbinskim vezama. To da svi vi sjedite ovdje je sudbinska veza.

Širiti put kultivacije ka visokim nivoima - razmislite, šta to znači? Nije li to zapravo spašavanje ljudi? Ako se radi o spasenju ljudi, znači da si pri istinskoj kultivaciji, onda se ne radi samo o odstranjivanju bolesti i održavanju zdravlja. Dakle, kod prave kultivacije se postavljaju visoki zahtjevi na učenikov *xinxing*. Jer smo svi došli učiti Dafa, moraš se smatrati istinskim kultivatorom i moraš se odreći vezanosti. Ako si sa raznim namjerama došao učiti put kultivacije i Dafa, ništa nećeš moći naučiti. Reći ću ti jednu istinu: cijeli proces kultivacije čovjeka je proces pri kojem se čovjekove vezanosti neprekidno odstranjuju. U društvu svakodnevnih ljudi, ljudi se bore jedni protiv drugih i varaju jedni druge, zbog malo ličnih koristi povrjeđuju druge. Takve misli moraju biti odbačene. Prije svega mi, koji danas učimo put kultivacije, moramo više nego ikad odbaciti takve misli.

Ja ovdje ne govorim o liječenju bolesti, niti mi liječimo bolesti. Ali ako ti kao istinski kultivator imaš bolesno tijelo, ne možeš se kultivirati. Ja ću za tebe očistiti tvoje tijelo. Čišćenje tijela je ograničeno samo na one koji su stvarno došli učiti put kultivacije i Fa. Jednu stvar naglašavam: Ako ne možeš odbaciti takve misli, ako ne možeš otpustiti svoje bolesti, ne možemo ništa uraditi i ne možemo ti pomoći. Zašto? Zato što u ovom univerzumu postoji ovaj princip: Sve stvari među svakodnevnim ljudima, prema učenju Buda škole, imaju sudbinsku vezu. Rođenje, starenje, bolest i smrt kao takvi postoje među svakodnevnim

ljudima. Karma, koja je u prošlosti proizvedena čovjekovim lošim djelima, uzrokuje bolesti ili teškoće. Trpiti patnju znači u stvari poravnati karmički dug, zato to niko ne smije promijeniti po volji. Ako bi se to promijenilo, značilo bi da se dug ne mora poravnati. To se također ne smije činiti po volji i proizvoljno, jer bi to inače značilo činiti nešto loše.

Neki misle da je dobro djelo liječiti druge, odstraniti njihove bolesti i održavati njihovo zdravlje. Po mom mišljenju, svi oni nisu stvarno izliječili bolesti, oni su svi samo odgodili bolesti ili ih transformisali u druge stvari, ali ih nisu odstranili. Da bi ta teškoća stvarno bila odstranjena, mora se odstraniti karma. Ako neko stvarno može liječiti bolesti i temeljito odstraniti karmu, ako on to stvarno može postići, onda nivo tog čovjeka više nije nizak. On je već shvatio princip koji glasi: Principi među svakodnevnim ljudima ne smiju se proizvoljno remetiti. Za vrijeme kultivacije jedan kultivator iz dobrodušnosti čini nešto dobro, liječi druge, odstranjuje njihove bolesti i održava ih zdravima, to je dozvoljeno, ali on ne može u potpunosti izliječiti druge. Kada bi bolesti običnog čovjeka stvarno iz korijena mogle biti odstranjene - običan čovjek, koji se ne kultivira, izašao bi odavde, a da više nema nikakvih bolesti; čim bi prešao prag, ostao bi još uvijek običan čovjek i borio bi se isto kao i svakodnevni ljudi za svoje lične interese - kako njegova karma bez daljnjeg može biti odstranjena? To apsolutno nije dozvoljeno.

Zašto se to onda može uraditi za kultivatore? Zato što je kultivator najdragocjeniji. On se želi kultivirati i zato je ta misao, koju on emituje, najvrijednija. U budizmu se govori o Buda-prirodi; čim se pojavi njegova Buda-priroda, prosvijetljeni mu mogu pomoći. Šta to znači? Kada govorim o tome, zato što širim put kultivacije na visokim nivoima i radi se o principima na visokim nivoima, time dotaknuti problemi su jako veliki. U ovom univerzumu, kao što vidimo, ljudski život nije nastao u običnom ljudskom društvu. Istinski ljudski život je nastao u kosmičkim prostorima. Jer, u ovom univerzumu postoji jako puno različitih supstanci koje mogu proizvesti život. Ove supstance mogu proizvesti život međusobnim kretnjama, dakle, to znači da najraniji ljudski život potiče iz kosmosa. Kosmički prostori su prvobitno već dobrodušni i posjeduju osobine *Zhen, Shan, Ren* (Istinitost, Dobrodušnost, Tolerancija), ljudi su rođeni sa istim osobinama kao i kosmos. Ali nakon što je nastalo više živih bića, stvorila se jedna vrsta društvenih odnosa. Neki od njih su možda postali sebični, zato je njihov nivo postepeno opao, zato oni više ne mogu ostati na tom nivou i moraju pasti dole. Ali i na ovom drugom nivou su ponovo postali lošiji i nisu mogli više ni tamo ostati, pa padaju dalje prema dole. Na kraju su pali na nivo ljudskih bića.

Cjelokupno ljudsko društvo se nalazi na istom nivou. Kad su pala do ovdje, sa gledišta natprirodnih sposobnosti ili u očima velikih prosvijetljenih, ova živa bića bi u stvari trebala biti uništena. Ali iz dobrodušnosti su im veliki prosvijetljeni dali još jednu priliku, zato je stvoreno takvo specijalno okruženje i takva specijalna dimenzija. Ali živa bića u ovoj dimenziji razlikuju se od živih bića u svim drugim kosmičkim dimenzijama. Živa bića u ovoj dimenziji ne mogu vidjeti živa bića u drugim dimenzijama, ona ne mogu vidjeti pravo lice kosmosa, zato je to kao da su ovi ljudi pali dole u maglu. Ako se žele osloboditi bolesti, izbjeći teškoće i odstraniti karmu, ovi ljudi se moraju kultivirati, vratiti se izvorištu, istinskom sebi. Tako se na to gleda u svim različitim metodama kultivacije. Čovjek se treba vratiti izvorištu, istinskom sebi, tek to je prava svrha ljudskog postojanja. Zato, čim se čovjek želi kultivirati, to se smatra pojavljivanjem Buda-prirode. Ta misao je najvrijednija, jer se on želi vratiti izvorištu, istinskom sebi, on želi napustiti nivo svakodnevnih ljudi.

Možda ste čuli ovu rečenicu iz budizma: "Čim se pojavi Buda-priroda, uzdrma se Svijet-deset-smjerova". Ko god to vidi, pomoći će mu, bezuslovno će mu pomoći. U Buda

školi se pri spašavanju ljudi ne govori o uslovima, ne traži se nadoknada, njemu se može bezuslovno pomoći. Zato možemo puno uraditi za učenike. Ali za običnog čovjeka, koji samo želi ostati običan čovjek i biti izliječen, to neće ići. Neki misle: Kad budem izliječen, kultiviraću se. Na kultivaciju se ne postavljaju nikakvi uslovi, ako se neko želi kultivirati, kultivira se. Ali tijela nekih ljudi su bolesna, ili neki još imaju prilično zamršene informacije na sebi, neki uopšte nisu prakticirali *qigong*, neki drugi prakticiraju doduše već decenijama, ali se još uvijek nalaze na nivou *qija* i nisu se kultivirali naviše.

Šta da radimo? Očistitićemo njegovo tijelo da bi se mogao kultivirati prema višim nivoima. Pri kultivaciji na najnižem nivou postoji jedan proces, pri kojem se tvoje tijelo temeljito čisti, sve loše stvari u mislima, polje karme oko tijela i faktori koji tijelo čine bolesnim biće u potpunosti uklonjeni. Ako ne budu uklonjeni, kako se sa takvim tmurnim, crnim tijelom i tako prljavim mislima može kultivirati ka višim nivoima? Ovdje kod nas se ne prakticira *qi*. Više ne moraš prakticirati stvari na nižim nivoima, poguraćemo te preko njih i učinimo da tvoje tijelo dostigne stanje bez bolesti. Istovremeno ćemo ti dati niz već gotovih stvari, koje na nižim nivoima moraju biti postavljene kao temelj, i na taj način mi već prakticiramo na veoma visokim nivoima.

Sa gledišta kultivacije, postoje tri nivoa, uključujući i vježbanje *qija*. Ali kod istinske kultivacije (vježbanje *qija* se ne ubraja u to) postoje ukupno dva velika nivoa: Prvi je kultivacija Fa-unutar-trostrukog-svijeta, drugi je kultivacija Fa-izvan-trostrukog-svijeta. Ovi Fa-unutar-trostrukog-svijeta i Fa-izvan-trostrukog-svijeta su drugačiji od onog što se u hramovima naziva "izaći iz zemaljskog" i "ući u zemaljsko", koji su samo nešto teoretsko. Kod nas se oni odnose na transformaciju dva velika nivoa istinske kultivacije ljudskog tijela. Tokom kultivacije Fa-unutar-trostrukog-svijeta, čovjekovo tijelo se neprekidno pročišćava i zato je njegovo tijelo već potpuno zamijenjeno visokoenergetskim supstancama, kada je dostiglo najvišu formu Fa-unutar-trostrukog-svijeta. A kultivacija Fa-izvan-trostrukog-svijeta je, sve u svemu, kultivacija Buda-tijela - tijela koje je sastavljeno od visokoenergetskih supstanci. Sve natprirodne sposobnosti će se ponovo pojaviti. To su dva velika nivoa o kojima mi govorimo.

Mi vjerujemo u sudbinske veze, svi ste vi sada ovdje i ja mogu za vas uraditi te stvari. Ovdje nas je sada svega nešto preko dvije hiljade, za više hiljada, čak za još više, i za desetine hiljada ljudi mogu to uraditi, što znači da na niskim nivoima više ne moraš vježbati. Nakon što je tvoje tijelo pročišćeno, bićeš poguran preko njih i ja za tebe postavljam potpun sistem kultivacije, tako da se već od početka kultiviraš na visokim nivoima. Ali to je ograničeno samo na učenike koji su stvarno došli kultivirati se. Samo to što ovdje sjediš još ne znači da si već kultivator. Tek nakon temeljite promjene tvojih misli, možemo ti to dati. I ne samo to, poslije ćete shvatiti šta sam vam u stvari dao. Mi ovdje također ne govorimo o liječenju, ali govorimo o cjelovitom regulisanju tijela učenika, da bi mogao prakticirati. Ako imaš bolesno tijelo, kod tebe se uopšte ne može razviti *gong*. Zato me ne trebate tražiti da bi vas liječio, ja to i ne činim. Glavni cilj mog pojavljivanja je uputiti ljude ka višim nivoima, ljude stvarno uputiti ka višim nivoima.

Različiti nivoi imaju različit Fa

Prije su mnogi *qigong* majstori govorili da postoje osnovni, srednji i napredni stepen *qigonga*. Sve je to *qi*, to su samo stvari na nivou vježbanja *qija*, i još se dijeli na osnovni, srednji i napredni stepen *qigonga*. Šta se stvarno nalazi na visokim nivoima, o tome u

glavama naših brojnih *qigong* kultivatora ostaje šupljina, jer oni to uopšte ne znaju. Ono što ćemo od sada objašnjavati je sve Fa na visokim nivoima. Osim toga, želim obnoviti reputaciju kultivacije. Za vrijeme kursa spomenuću neke negativne pojave u krugovima kultivatora. Objasniću kako trebamo gledati na njih i kako trebamo postupati s njima. Osim toga, pri širenju puta kultivacije i objašnjavanju Fa na visokim nivoima, sve dotaknute oblasti i problemi su relativno veliki, čak veoma osjetljivi. Ali ja vam želim reći sve ove stvari. Također želim govoriti o nekim smetnjama u našem ljudskom društvu, koje potiču iz drugih dimenzija, prije svega o smetnjama u krugovima kultivatora, istovremeno ću te probleme riješiti za naše učenike. Ako se ti problemi ne riješe, nećeš moći prakticirati. Da bi iz temelja riješili te probleme, moramo vas smatrati istinskim kultivatorima, tek tada to možemo uraditi. Naravno, nije lako odjednom promijeniti tvoje misli, tokom kursa ćeš postepeno promijeniti svoje misli, tako da se nadam da svi pažljivo slušate. Ja prenosim put kultivacije drugačije od drugih. Neki prenose svoj put kultivacije tako da samo ukratko objasne principe svog puta kultivacije, nakon toga učine da primiš neke informacije, nauče te par vježbi i to je sve. Ljudi su se već navikli na takav način prenošenja puta kultivacije.

Kod stvarnog prenošenja puta kultivacije mora se objasniti Fa, objasniti Tao. U ovih deset lekcija detaljno ću objasniti sve principe visokih nivoa, tek tada se možeš kultivirati; u suprotnom se uopšte ne možeš kultivirati. Sve što su drugi prenosili su stvari na nivou liječenja bolesti i održavanja zdravlja. Ako se želiš kultivirati ka višim nivoima, ali nisi vođen od strane Fa sa visokih nivoa, ne možeš se kultivirati. To je slično pohađanju škole: Ako sa udžbenicima osnovne škole ideš na fakultet, još uvijek ostaješ učenik osnovne škole. Neko misli da je naučio mnogo o *qigongu*, ovaj *qigong* i onaj *qigong*, on ima hrpu svjedočanstava, ali njegov *gong* još uvijek nije porastao. On vjeruje da je to suština i sve od *qigonga*. Ne, to je samo površina *qigonga*, stvari najnižeg nivoa. *Qigong* nije samo tako nešto, to je kultivacija, nešto veoma sveobuhvatno i duboko. Osim toga, na različitim nivoima postoji različit Fa, zato to nije isto kao stvari vježbanja *qija* koje sada poznajemo i koliko god toga učio, uvijek je isto. Jedan primjer: Učio si iz engleskih udžbenika osnovne škole, učio si iz američkih udžbenika osnovne škole, učio si iz japanskih udžbenika osnovne škole, iz kineskih udžbenika osnovne škole si također učio, ali još uvijek ostaješ učenik osnovne škole. Što više učiš od gradiva niskog nivoa *qigonga* i puniš se s tim, to je štetnije za tebe, na tvom tijelu je već sve zbrkano.

Još nešto želim naglasiti: u kultivaciji ti moramo objasniti Fa i podučavati te vježbama. Neki monasi u hramovima, pogotovo oni iz Zen škole, mogli bi imati drugačije mišljenje. Čim se govori o objašnjavanju Fa, ne žele slušati. Zašto? Zen škola smatra da se Fa ne može objašnjavati - čim se Fa objašnjava, to više nije Fa i ne postoji Fa koji se može objasniti, može se samo prepoznati srcem i shvatiti duhom. Zbog toga se u Zen školi do danas još ne može objasniti nikakav Fa. Stvari koje je prenosio Bodhidharma iz Zen škole temelje se na jednoj izjavi Bude Shakyamunija. Shakyamuni je rekao: "Nema definitivnog Fa." On je na bazi ove Shakyamunijeve izjave osnovao Zen školu. Mi kažemo da se ova škola "uvukla u bikov rog". Zašto se kaže "uvući se u bikov rog"? Kad je Bodhidharma na početku ušao, učinilo mu se još prilično prostrano; kada je drugi patrijarh ušao, nije više bilo tako prostrano; kod trećeg patrijarha je još išlo; kod četvrtog patrijarha je već bilo vrlo tijesno; za petog patrijarha jedva da je još bilo mjesta da uđe; kod šestog patrijarha, Huinenga, je dostignut kraj i tada više nije išlo dalje. Ako danas učiš Fa u Zen školi, radije ne pitaj; ako postaviš pitanje, dobićeš odmah udarac štapom po glavi, to se zove "buđenje štapom". To znači: Ne trebaš pitati, nego to sam spoznati. Ti kažeš: "Ja sam došao jer ništa ne znam, šta trebam spoznati? I ti me onda udaraš štapom po glavi?!" Dakle, to znači da je kraj bikovog roga već dostignut, nema više ništa za

objasniti. Bodhidharma je također rekao da može prenijeti svoje učenje samo do šestog patrijarha, nakon toga više neće ići. U međuvremenu je već prošlo više stotina godina, ali danas još uvijek ima ljudi koji se čvrsto drže učenja Zen škole i ne puštaju ga. Šta je istinsko značenje Shakyamunijevih riječi "nema definitivnog Fa"? Shakyamuni se nalazio na nivou Tathagata. Mnogi od kasnijih monaha nisu spoznali stanje srca, istinsko značenje Fa kojeg je Shakyamuni podučavao, niti istinsko značenje njegovih riječi na njegovom nivou, na njegovom duhovnom horizontu. Zato su nasljednici to tumačili jednom ovako, jednom onako, tumačenja su bila veoma zbrkana. Oni smatraju da "nema definitivnog Fa" znači da ga ne treba objašnjavati; ako se objašnjava, to više nije Fa. U stvari, to ne znači to. Nakon što je Shakyamuni pod Bodhi drvetom došao do otvaranja *gonga* i prosvjetljenja, nije odmah dostigao nivo Tathagata. Tokom svih 49 godina širenja Fa, on se stalno poboljšavao. Svaki put kad bi se povisio za jedan nivo, pogledao bi unazad i primjetio da Fa, kojeg je upravo podučavao, više nije tačan. Nakon što bi se dalje povisio, primjetio bi da Fa, kojeg je upravo podučavao, opet nije tačan. U svih 49 godina, neprekidno se poboljšavao na ovaj način. Svaki put kad se povisio za jedan nivo, primjetio je da je Fa, kojeg je prije podučavao, bio na veoma niskom stepenu spoznaje. On je također primjetio da je Fa svakog nivoa manifestacija Fa na tom nivou, svaki nivo ima Fa, ali to nije apsolutna istina u kosmosu. Osim toga, Fa višeg nivoa je, u poređenju sa Fa nižeg nivoa, bliži osobinama univerzuma, zato je rekao: "Nema definitivnog Fa."

Na kraju je Shakyamuni još rekao: "U cijelom svom životu nisam podučavao Fa." Zen škola je to opet tako shvatila da ne postoji Fa koji se može podučavati. Posljednjih godina svog života, Shakyamuni je već bio dostigao nivo Tathagata, zašto je onda rekao da nije podučavao Fa? Šta je u stvari time mislio? Mislio je: Iako sam već dostigao nivo Tathagata, još nisam vidio konačan princip, konačan Fa kosmosa. Zbog toga nije dopustio svojim sljedbenicima da njegove riječi drže za apsolutnu, nepromjenljivu istinu, jer bi inače sljedbenici bili ograničeni na nivo Tathagata ili ispod nivoa Tathagata i ne bi se mogli probiti na više nivoe. Sljedbenici nisu mogli razumjeti pravo značenje ovih riječi, oni su vjerovali da Fa više nije Fa, ako se podučava; tako su to shvatili. U stvari, Shakyamuni je time mislio: različiti nivoi imaju različit Fa, Fa svakog nivoa nije apsolutna istina u univerzumu, ipak Fa bilo kojeg određenog nivoa služi kao vodič na tom nivou. U stvari je on objasnio taj princip.

Prije su mnogi ljudi, posebno u Zen školi, stalno zadržavali takvu predrasudu i takvo, krajnje pogrešno shvatanje. Ako te niko ne podučava, šta će te onda voditi u praktikiranju, kako onda možeš praktistirati, kako se kultivirati? U budizmu postoji mnogo budističkih priča, neki su možda čitali: Neko je došao na Nebo i u nebeskom carstvu je ustanovio da se svaka riječ *Vajra sutre* tamo gore razlikuje od *Vajra sutre* ovdje dole, značenja su također različita. Zašto je ta *Vajra sutra* postala drugačija nego *Vajra sutra* među svakodnevnim ljudima? Neki drugi kažu: Sutre u Sukhavati svijetu se potpuno razlikuju od sutri tu dole, one uopšte više nisu iste, ne samo da su riječi drugačije, nego su i njihov smisao i značenje također postali drugačiji, sve se promijenilo. To zapravo znači: Isti Fa se razlikuje na svakom nivou i ispoljava se na različit način, on može različito voditi kultivatore na različitim nivoima.

Kao što znate, u budizmu postoji brošura koja se zove *Izveštaj sa putovanja u zapadni Sukhavati svijet*. U njoj se kaže da je jedan monah praktistirao u lotosovom položaju, njegova duša (*yuanshen*) je došla u Sukhavati svijet i vidjela je neke pojave, zadržala se tamo jedan dan, onda se vratila u ljudski svijet u kojem je prošlo već 6 godina. Da li je vidio ili ne? Da, ali ono što je vidio nije istinska pojava. Zašto? Jer njegov nivo nije bio dovoljno visok. Njemu se mogla prikazati samo manifestacija Buda Fa na njegovom nivou. Jer taj svijet je upravo

slika i manifestacija Fa i zato on nije mogao vidjeti istinsku pojavu. Kažem da "nema definitivnog Fa" ima upravo to značenje.

Zhen, Shan, Ren je jedini kriterij za prosuđivanje da li je čovjek dobar ili loš

U budizmu su ljudi uvijek diskutirali o tome šta je Buda Fa. Neki misle da je Fa, koji je podučavan u budizmu, cjelokupni Buda Fa. Ali ustvari nije. Fa, kojeg je Shakyamuni podučavao, podučavan je samo za obične ljude od prije 2.500 godina, koji su bili na krajnje niskim nivoima, znači za ljude koji su upravo izašli iz primitivnog društva i čije su misli bile relativno jednostavne. Vrijeme kraja Fa, o kojem je on govorio, je upravo danas. S tim Fa se današnji ljudi već više ne mogu kultivirati. U vremenu kraja Fa čak i monasi u hramovima jedva da mogu spasiti sami sebe, a kamoli spasiti druge. Shakyamuni je predavao Fa primjereno tadašnjim prilikama, osim toga, on nije objasnio sve od Buda Fa o kojem je znao na svom nivou. Također je nemoguće održati ga zauvijek nepromijenjenim.

Društvo se razvija, misli čovječanstva su također postajale sve komplikovanije, ljudima više nije tako jednostavno nastaviti kultivirati se na ovaj način. Fa u budizmu ne može obuhvatiti cjelokupni Buda Fa, on je samo veoma mali dio Buda Fa. Postoji još mnogo velikih Fa Buda škole koji su se prenosili u narodu, ili su se generacijama prenosili na jednog jedinog nasljednika. Različiti nivoi imaju različit Fa, različite dimenzije imaju različit Fa, sve ovo su različite manifestacije Buda Fa u različitim dimenzijama i na različitim nivoima. Shakyamuni je također rekao da postoji 84.000 škola za kultivaciju do Bude. U budizmu, međutim, postoji samo Zen škola, Jingu škola, Tiantai škola, Huayan škola, Tantrizam i tako dalje, nešto više od deset škola, one ne mogu obuhvatiti cjelokupnost Buda Fa. Također, sam Shakyamuni nije prenio sve od svog Fa, on je prenio samo jedan dio, primjereno tome koliko su tadašnji ljudi bili u stanju shvatiti.

Ali šta je u stvari Buda Fa? Najtemeljnije osobine ovog univerzuma *Zhen, Shan, Ren*, one su najviše utjelovljenje Buda Fa, one su najtemeljniji Buda Fa. Buda Fa na različitim nivoima ima različite forme manifestacije i na različitim nivoima ima različite uloge vodilje, što su nivoi niži, to su pojave različitije. U svim supstancama postoje osobine *Zhen, Shan, Ren*: u djelićima vazduha, kamena, drveta, zemlje, čelika, ljudskog tijela; u starim vremenima se govorilo da je sve u univerzumu sastavljeno od pet elemenata i da sve također ima osobine *Zhen, Shan, Ren*. Kultivatori mogu vidjeti određenu manifestaciju Buda Fa samo na nivou koji su dostigli kroz svoju kultivaciju. To je status dostignuća, nivo njihove kultivacije. Objašnjen naširoko, Fa je vrlo velik. Objašnjen sa najviše tačke, onda je vrlo jednostavan, jer Fa je kao piramida. Na krajnje visokim nivoima, može se sažeti u samo tri riječi, to su *Zhen, Shan, Ren*. Kada se manifestuje na svakom različitom nivou, izuzetno je komplikovan. Uzmimo čovjeka za primjer. U Tao školi se ljudsko tijelo smatra malim univerzumom. Čovjek ima materijalno tijelo, ali se samo od materijalnog tijela ne može napraviti potpun čovjek, uz to moraju postojati temperament, karakter, osobine i duša, tek tada se može napraviti potpun, samostalan čovjek sa sopstvenim karakterom. Isto važi i za ovaj naš univerzum: postoji Mliječni put, druge galaksije, postoje i život i voda, sve u ovom univerzumu pripada materijalnoj egzistenciji, ali istovremeno postoje i osobine *Zhen, Shan, Ren*. Ove osobine su sadržane u djelićima svake supstance, čak i krajnje mali djelići sadrže ove osobine.

Ove osobine *Zhen, Shan, Ren* kriterij su kojim se prosuđuje dobro i loše u univerzumu. Šta je dobro, šta je loše? Upravo s njima se to prosuđuje. Isto važi i za *de* o kojem smo prije

govorili. Naravno, moralni nivo današnjeg ljudskog društva se već promijenio, moralne norme su već iskrivljene. Onaj ko danas Lei Fenga uzima za uzor vjerovatno će biti proglašen mentalno bolesnim. Ali ko bi ga u 50-tim ili 60-tim godinama proglasio mentalno bolesnim? Moralni nivo čovječanstva brzo opada, društveni običaji se pogoršavaju iz dana u dan, ljudi samo misle na profit, zbog malo ličnog interesa povrijediće druge i boriće se jedni protiv drugih, ne prezajući pri tome ni od kakvog sredstva. Razmislite, može li biti dopušteno da se tako nastavi? Kada neko čini nešto loše i kada mu kažeš da čini nešto loše, on to čak neće ni vjerovati, on stvarno ne vjeruje da čini nešto loše. Neki se mjere sa već propalim moralnim standardima i misle da su bolji od drugih, jer su se norme već promijenile. Sasvim svejedno kako se moralne norme čovječanstva mijenjaju, osobine univerzuma ipak ostaju nepromijenjene, one su jedini kriterij za prosuđivanje da li je čovjek dobar ili loš. Znači, kultivator se mora voditi osobinama univerzuma, a ne kriterijima svakodnevnih ljudi. Ako se želiš vratiti izvoru, istinskom sebi, ako se želiš kultivirati naviše, moraš postupati po ovom mjerilu. Ako čovjek može biti u skladu sa osobinama univerzuma, *Zhen, Shan, Ren*, on je tek tada dobar čovjek, ako čovjek djeluje suprotno ovim osobinama, onda je on stvarno loš čovjek. Na radnom mjestu, ili u društvu, neki možda kažu da si loš, ipak, ti možda nisi stvarno loš; neki kažu da si dobar, ipak, ti možda nisi stvarno dobar. Ako se ti kao kultivator izjednačiš sa ovim osobinama, tada si čovjek koji je dostigao Tao. Princip je tako jednostavan.

Pri kultivaciji *Zhen, Shan Ren* u Tao školi, težište je na *Zhen*. Zato se u Tao školi govori o kultiviranju istine, usavršavanju urođene prirode, govoriti istinu, činiti istinite stvari, biti istinit čovjek, vratiti se izvoru, istinskom sebi i konačno se kultivirati u istinitog čovjeka. *Ren* i *Shan* se također kultiviraju, ali je težište kultivacije na *Zhen*. U Buda školi je težište kultivacije *Zhen, Shan, Ren* na *Shan*. Kroz kultivaciju *Shan-a* može se iskultivirati velika dobrodušnost. Kada se kod nekog pojavi dobrodušnost, on vidi da sva bića pate, zato se zavjetuje da spasi sva bića. *Zhen* i *Ren* se također kultiviraju, ali je težište kultivacije na *Shan*. Naša Falun Dafa škola se ravna prema najvišoj normi univerzuma - *Zhen, Shan, Ren* se istovremeno kultiviraju. Put kultivacije koji mi prakticiramo je vrlo velik.

Qigong je predistorijska kultura

Šta je *qigong*? Mnogi *qigong* majstori govore o tome, ali ja govorim drugačije od njih. Mnogi *qigong* majstori govore o tome sa svog nivoa, dok ja govorim o saznanjima o *qigongu* na još višim nivoima i to je potpuno drugačije od onog što su oni spoznali. Neki *qigong* majstori kažu da *qigong* u Kini ima istoriju od 2.000 godina; neki kažu da *qigong* ima istoriju od 3.000 godina; neki kažu da *qigong* ima istoriju od 5.000 godina i da je otprilike star kao i istorija civilizacije kineskog naroda; neki drugi kažu da, sudeći po arheološkim otkrićima, *qigong* ima istoriju od 7.000 godina i da je ona puno duža od istorije civilizacije kineskog naroda. Sasvim svejedno kako oni to shvataju, oni smatraju da on nije mnogo stariji od istorije ljudske civilizacije. Prema Darwinovoj teoriji evolucije, vodene biljke su se razvile u vodene životinje, zatim su ispuzale na kopno, poslije su se popele na drveće, zatim su opet došle na zemlju i postale majmuni i konačno su se razvile u moderno čovječanstvo s kulturom i mislima. Računajući po ovoj teoriji, stvarna civilizacija čovječanstva ne bi bila starija od 10.000 godina. Još prije toga ne bi bilo ni tako nečeg kao što je vezivanje čvorova na vrpci u svrhu zapisivanja. Oni bi još pokrivali tijelo lišćem i jeli sirovo meso, još prije toga možda čak ne bi znali ni koristiti vatru i bili bi potpuno divlji, primitivni ljudi.

Ali mi smo otkrili nešto, naime, na mnogim mjestima u svijetu ostavljeni su brojni tragovi drevnih civilizacija, koje daleko prevazilaze historiju naše ljudske civilizacije. Tehnološki gledano, svi ovi stari ostaci dostigli su jedan vrlo visok nivo. Što se tiče kulturnog nivoa, oni su izuzetni, izgleda kao da moderni ljudi jednostavno imitiraju umjetnost ljudi iz starih vremena. Oni su veoma zadivljujući. Ali oni potiču iz vremena od prije preko stotinu hiljada, više stotina hiljada, više miliona, pa čak i više stotina miliona godina. Razmislite, zar to ne zbija šalu na račun današnje historije? U stvari to i nije šala, jer se čovječanstvo neprekidno dalje usavršava i uvijek iznova samo sebe upoznaje. Upravo tako se društvo razvija, spoznaje na početku ne moraju nužno biti apsolutno tačne.

Vjerovatno su mnogi od vas čuli za "predistorijske kulture", koje se također nazivaju i "predistorijskim civilizacijama". Sada ćemo govoriti o ovim predistorijskim civilizacijama. Na Zemlji postoje Azija, Evropa, Južna Amerika, Sjeverna Amerika, Okeanija, Afrika i Antarktik, njih geolozi nazivaju kontinentalnim pločama. Od nastanka kontinentalnih ploča do danas prošlo je već više desetina miliona godina. To znači da su se mnoge kopnene mase izdigle iz mora, dok su mnoge druge potonule na dno mora i otkako su dostigle svoje sadašnje stanje prošlo je već nekoliko desetina miliona godina. Ali na mnogim mjestima na dnu okeana pronađene su velike građevine iz starih vremena, te građevine sa veoma elegantnim skulpturama nisu kulturno nasljeđe današnjeg čovječanstva, dakle morale su biti izgrađene prije nego što su potonule na morsko dno. Ko je onda stvorio ove civilizacije prije više desetina miliona godina? Tada ljudi čak još nisu bili ni majmuni, kako su mogli stvoriti te stvari tako visoke inteligencije? Svjetski arheolozi su otkrili jednu vrstu organizma zvanog trilobit, koji je živio u vremenu od prije 600 miliona godina do prije 260 miliona godina, nakon toga ta vrsta organizma više nije postojala. Jedan američki naučnik otkrio je fosil jednog trilobita, na njemu se nalazi još i otisak ljudskog stopala, vidi se vrlo jasno da je to otisak od nekog ko je nosio cipele. Zar to ne zbija šalu na račun historičara? Kako su po Darwinovoj teoriji evolucije prije 260 miliona godina mogli postojati ljudi?

U muzeju državnog univerziteta u Peruu postoji kamen sa uklesanom ljudskom figurom. Prema rezultatima ispitivanja, ova ljudska figura je uklesana prije 30.000 godina. Ali ova figura prikazuje odjevenog čovjeka sa šešikom, cipelama i čak sa teleskopom u ruci prilikom promatranja nebeskih tijela. Kako su ljudi prije 30.000 godina mogli tkati tkaninu i odjevati se? Još nezamislivije je da je teleskopom promatrao nebeska tijela i da je još imao izvjesno znanje astronomije. Mi smo uvijek mislili da je teleskop izumio evropljanin Galileo Galilej, a od tada do danas je prošlo tek nešto više od 300 godina. Ko je onda izumio taj teleskop prije 30.000 godina? Postoji još jako puno neriješenih zagonetki. Na primjer, postoji mnogo slika na stijenama u pećinama u Francuskoj, Južnoj Africi i u Alpama koje su veoma živopisne i vjerodostojne. Uklesane ljudske figure su visokog kvaliteta i čak su premazane jednom vrstom mineralne boje. Ali te ljudske figure su odjevene kao moderni ljudi, s odjećom malo sličnom zapadnjačkim odijelima, oni nose uske hlače. Neki od njih drže u ruci neke predmete koji izgledaju kao lule, neki drže štapove za hodanje i nose šešire. Kako su majmuni prije više stotina hiljada godina mogli dostići tako visok umjetnički nivo?

Nešto iz još ranijeg vremena: afrička republika Gabon posjeduje rudu uranijuma. Kako je ta zemlja relativno zaostala i ne može sama prerađivati uranijum, ruda se izvozi u razvijene zemlje. 1972. godine je jedna francuska fabrika uvezla tu rudu uranijuma. Laboratorijskom analizom je utvrđeno da je ta ruda uranijuma već bila prerađena i iskorištena. Oni su se veoma začudili i poslali su naučnike i tehničare tamo na istraživanje. Naučnici mnogih zemalja su otišli tamo na istraživanje. Na kraju je bilo dokazano da je taj rudnik uranijuma bio veliki nuklearni reaktor i to sa vrlo racionalnim rasporedom, čak ni mi današnji ljudi ga ne bi mogli

takvog izgraditi. Kad je bio izgrađen? Prije 2 milijarde godina i 500.000 godina je bio u pogonu. To su prave astronomske cifre i to se uopšte ne može objasniti Darwinovom teorijom evolucije. Postoji još mnogo takvih stvari. Ono što je otkriveno u krugovima nauke i tehnike već je sasvim dovoljno da se prerade današnji udžbenici. Kada sopstveni stari pogledi čovječanstva dovedu do niza načina rada i razmišljanja, postaje veoma teško prihvatiti nove spoznaje. Čak i kad istina izađe na svjetlost dana, ljudi se ne usuđuju prihvatiti je, instinktivno je potiskujući. Zbog uticaja tradicionalnih pogleda, trenutno nema nikog ko bi sistematizirao ove stvari, iz tog razloga pogledi ljudi jednostavno ne drže korak s razvojem. Čim govoriš o takvim stvarima, koje još nisu popularizirane, ali su već otkrivene, neko će jednostavno reći da je to praznovjerje i neće to moći prihvatiti.

Mnogo hrabrih naučnika iz inostranstva su već javno prihvatili da ove stvari potiču iz predistorijskih kultura i da su iz civilizacije, koja je postojala prije naše današnje civilizacije, što znači da su prije ove naše civilizacije postojali još i drugi civilizacijski periodi i to više od jednom. Sudeći po arheološkim nalazima, može se reći da oni nisu svi iz jednog civilizacijskog perioda. Zbog toga se vjeruje da je, nakon što je civilizacija mnogo puta doživjela razarajući udarac, samo mali broj ljudi preživio, oni su živjeli primitivno i onda su se postepeno razmnožili u novu ljudsku rasu i započeli novu civilizaciju. Zatim je ona ponovo išla prema uništenju i oni bi se ponovo razmnožili u novu ljudsku rasu. Na ovaj način su prošli kroz sve ove različite periodične promjene, jednu za drugom. Fizičari kažu da se kretanje materije odvija po određenim zakonitostima. Promjene našeg cijelog univerzuma također slijede zakonitosti.

Kretanje naše planete Zemlje u ovom neizmjernom univerzumu i za vrijeme rotacije Mliječnog puta ne može uvijek biti bez prepreke. Lako je moguće da Zemlja udari u neku drugu planetu ili da nastanu drugi problemi i da se time prouzrokuju vrlo velike katastrofe. Sa gledišta naših natprirodnih sposobnosti, to je upravo tako uređeno. Ja sam to jednom tačno provjerio i utvrdio da se čovječanstvo 81 put nalazilo u stanju potpunog uništenja, samo je vrlo mali broj ljudi preživio i bilo je ostavljeno malo naslijeđe predistorijske civilizacije, oni su kročili u sljedeći period i vodili su primitivan život. Ljudi su se razmnožili i na kraju je opet nastala civilizacija. Idući kroz 81 ovih ciklusa, još uvijek nisam stigao do izvora. Kinezi govore o nebeskoj vremenskoj konstelaciji, zemaljskim prednostima i ljudskoj harmoniji. Različite promjene nebeskih pojava, različite nebeske vremenske konstelacije vode ka različitim društvenim stanjima u društvu svakodnevnih ljudi. Prema fizici, kretanje materije je zakonito, i kod kretanja univerzuma je također tako.

Sa prethodno objašnjenom predistorijskom kulturom želim vam prije svega reći: *qigong* također nije izumljen od našeg današnjeg čovječanstva, on je također naslijeđen iz davnih vremena i također je jedna vrsta predistorijske kulture. U svetim spisima možemo naći neke zapise o tome. Shakyamuni je svojevremeno rekao da se već prije više miliona *jie* uspješno kultivirao i dostigao Tao. Koliko godina ima jedan *jie*? Jedan *jie* su više stotina miliona godina. Tako ogromna cifra je jednostavno nezamisliva. Ako je to tačno, zar se to ne poklapa sa istorijom čovječanstva i sa promjenama čitave planete Zemlje? Osim toga, Shakyamuni je još rekao da je prije njega postojalo još šest Pra-Buda i da je on sam još imao učitelje i tako dalje, svi su oni dostigli Tao kroz kultivaciju prije mnogo stotina miliona *jie*. Ako je sve to istina, da li onda danas postoje takve metode kultivacije, među onim, u društvu rasprostranjenim, istinski ortodoksnim putevima kultivacije i istinski predavanim putevima kultivacije? Ako na to odgovorim, sigurno ću reći da, ali se oni rijetko mogu naći. Broj lažnih *qigong* praksi, pseudo-*qigong* praksi i broj ljudi sa posjedujućim duhovima, koji varaju ljude

sa stvarima koje su sami sastavili, danas mnogostruko prevazilazi broj pravih *qigong* praksi, teško je razlikovati istinsko od lažnog. Istinski *qigong* nije lako prepoznati i također se ne da lako naći.

U stvari, nije samo *qigong* ostavljen u naslijeđe kroz nebrojena vremena. *Tai chi*, *Hetu*, *Luoshu*, *Knjiga promjena*, *Osam trigram* i tako dalje, svi su ostavljeni u naslijeđe iz predistorijskih vremena. Zbog toga, kada ih danas istražujemo i pokušavamo shvatiti sa stanovišta svakodnevnih ljudi, ne možemo ih shvatiti, svejedno koliko ih mnogo istražujemo. Na nivou svakodnevnih ljudi, sa njihovog gledišta i sa njihovog duhovnog horizonta, ono istinsko ne može biti shvaćeno.

***Qigong* je upravo kultivacija**

Čemu u stvari služi *qigong*, s obzirom da ima tako dugu istoriju? Reći ću vam, kod nas je on veliki put kultivacije Buda škole, pri tome se naravno kultivira do Bude. U Tao školi se naravno kultivira Tao, da bi se postigao Tao. Reći ću vam, riječ "Buda" nije ništa praznovjerno. Riječ "Buda" potiče iz sanskrita, staroindijskog jezika. Tada, kada je donesena u Kinu, imala je dva znaka, zvala se "Fo Tuo", a neki su riječ preveli i kao "Fu Tu". Prilikom prenošenja od čovjeka do čovjeka i predavanja od generacije u generaciju, mi Kinezi smo izostavili jedan znak i tako ga nazvali "Fo". Šta to onda znači, prevedeno na kineski? To znači prosvijetljeni, kroz kultivaciju prosvijetljen čovjek. Gdje je tu praznovjerje?

Razmislite, kroz kultivaciju se mogu pojaviti natprirodne sposobnosti. Trenutno su šest vrsta natprirodnih sposobnosti javno priznate u svijetu, ali to još nisu sve. Kažem vam, postoji preko deset hiljada istinskih natprirodnih sposobnosti. Kad neko tu sjedi i ne pomiče svoje ruke i noge, on može napraviti nešto, što drugi ne mogu ni s rukama i nogama; on može vidjeti istinske principe u različitim dimenzijama univerzuma i istinsko lice univerzuma; on može vidjeti ono što svakodnevni ljudi ne mogu vidjeti. Nije li taj čovjek onda neko, ko je kroz kultivaciju dostigao Tao? Nije li on onda veliki prosvijetljeni? Može li se reći da je on isti kao i običan čovjek? Nije li on kroz kultivaciju prosvijetljen čovjek? Zar onda nije ispravno nazvati ga prosvijetljenim? Prevedeno u staroindijski jezik zove se Buda. U stvari je upravo tako, upravo to je svrha *qigonga*.

Čim se govori o *qigongu*, neki kažu: "Ko uopšte vježba *qigong*, ako nije bolestan?" To zvuči kao da *qigong* služi samo za odstranjivanje bolesti. Ovakvo shvatanje je jako površno, jako površno. Ali to nije njihova krivica, jer mnogi *qigong* majstori rade stvari vezane za odstranjivanje bolesti i održavanje zdravlja, svi oni govore o odstranjivanju bolesti i održavanju zdravlja. Niko to nije objasnio na visokim nivoima. Time se ne misli da njihovi putevi kultivacije nisu dobri. Njihova misija je upravo širiti stvari na nivou odstranjivanja bolesti i održavanja zdravlja i popularizirati *qigong*. Mnogi ljudi su se htjeli kultivirati na viši nivo, imali su tu misao i tu želju, ali su se kultivirali bez Fa, tako da su na kraju naišli na velike poteškoće i još su nastali mnogi problemi. Naravno, kad se jedan put kultivacije stvarno širi na visokim nivoima, time su dodirnuti pitanja sa veoma visokih nivoa. Zato smo odgovorni za društvo, odgovorni smo za ljude, cjelokupni učinak širenja puta kultivacije je jako dobar. Neke stvari su stvarno vrlo visoke. Kad je o tome riječ, zvuči kao praznovjerje, ali mi ćemo to po mogućnosti objasniti uz pomoć moderne nauke.

Čim govorimo o nekim stvarima, neko će reći da je to praznovjerje. Zašto? Njegovo mjerilo je da je ono što nauka još nije spoznala, ili ono s čim on sam još nije došao u dodir, ili

o čemu misli da ne može postojati, on misli da je sve to praznovjerje i idealistično. On ima upravo takav način razmišljanja. Je li taj način razmišljanja ispravan? Ono što nauka još nije spoznala, ili ono što do tada još nije razvijeno, može li se to označiti praznovjermim i idealističnim? Zar ovaj čovjek nije upravo sam praznovjerman i idealističan? Može li se nauka na osnovu ovog razmišljanja još dalje razvijati i napredovati? Ni ljudsko društvo se onda više ne može dalje razvijati. Sve stvari koje su izumljene u krugovima nauke i tehnike prije nisu postojale. Da su sve one bile smatrane praznovjermem, ne bi se više ni trebale dalje razvijati. Ni *qigong* nije nešto idealistično. Mnogi ne poznaju *qigong* i zato uvijek smatraju *qigong* nečim idealističnim. Upotrebom mjernih uređaja, sada su na tijelima *qigong* majstora utvrđeni infrazvučni valovi, ultrazvučni valovi, elektromagnetni valovi, infracrveni zraci, ultraljubičasti zraci, gama zraci, neutroni, atomi, tragovi metalnih elemenata i tako dalje, zar sve to nije nešto što materijalno postoji? Sve je to također materija. Zar nisu sve stvari sastavljene od materije? Zar nisu i drugi vrijeme-prostori također sastavljeni od materije? Kako to može biti označeno praznovjermem? *Qigong* služi tome da se kultivira do Bude, onda to neizbježno dodiruje mnoga visoka i duboka pitanja. Mi ćemo ih sve objasniti.

Ako *qigong* služi tome, zašto ga nazivamo *qigong*? Zapravo se ne zove *qigong*. Kako se onda zove? Zove se "*xiu lian*" (kultivacija i prakticiranje), upravo *xiu lian*. Naravno, postoje i druga konkretna imena, ali se sve to u cjelosti naziva kultivacija. Zašto ga onda nazivamo *qigong*? Kao što znate, *qigong* se u društvu popularizira već više od 20 godina. To je počelo već sredinom kulturne revolucije, a pri kraju kulturne revolucije dostigao je svoj vrhunac. Razmislite, tada je ultraljevičarska struja još bila vrlo dominantna. Nećemo reći kako se *qigong* zvao u predistorijskoj kulturi. U procesu razvoja naše današnje ljudske civilizacije, prošao je kroz feudalno društvo i zato je obično imao veoma feudalno obojena imena. Kad je bio povezan s religijama, često je imao vrlo religiozno obojeno ime. Na primjer: *Veliki put kultivacije do Tao*, *Dijana Vajre*, *Put Arhata*, *Veliki put kultivacije do Bude*, *Zlatna alhemija devetostrukog kruga* i tako dalje. Takva su to bila imena. Da si u vrijeme kulturne revolucije govorio o njima, zar ne bi bio kritiziran i optuživan? *Qigong* majstori su tokom popularizacije *qigonga* imali dobre namjere, da odstrane bolesti naroda, da učine ljude zdravim i da poboljšaju njihovo tjelesno stanje. To je bilo dobro, ali nije išlo. Ljudi se nisu usuđivali tako ga nazivati. Zbog toga, da bi popularizirali *qigong*, mnogi *qigong* majstori su iz *Knjige eliksira* i *Taoističkih spisa* uzeli dva znaka i potpuno ih izvadili iz konteksta i tako je on nazvan "*qi gong*". Neki još žele istraživati stručni izraz *qigong*, ali se tu nema šta istraživati, prije se upravo zvao kultivacija. *Qigong* je samo novi, stručni izraz, koji je izumljen da bi odgovarao razmišljanju modernih ljudi.

Zašto gong ne raste uprkos prakticiranju

Zašto *gong* ne raste uprkos prakticiranju? Mnogi ljudi misle ovako: "Ja prakticiram, ali nisam dobio istinsko predanje. Kad bi mi neki majstor pokazao par posebnih zahvata ili par ručnih tehnika sa visokog nivoa, tada bi moja energija rasla." Sada 95% ljudi tako razmišlja. Smatram da je to vrlo smiješno. Zašto smiješno? Zato što *qigong* nije tehnika svakodnevnih ljudi, on je u potpunosti nešto neuobičajeno, znači o njemu se mora prosuđivati s principima visokih nivoa. Kažem vam, osnovni razlog zašto *gong* ne raste je sljedeće: Kod ova dva znaka "*xiu lian*", ljudi obraćaju pažnju samo na *lian* - prakticiranje, a zanemaruju *xiu* - kultivaciju. Ako težiš prema vani, nećeš moći dobiti ama baš ništa, sasvim svejedno na koje sve načine težiš. S tijelom običnog čovjeka i mislima običnog čovjeka, misliš li da možeš transformisati

visokoenergetsku supstancu u *gong*? Može li on tada već rasti? To nije tako jednostavno! Za mene je to vic. To nije ništa drugo nego težiti prema vani i tražiti vani, nikad to nećeš moći naći.

To nije kao neka vještina svakodnevnih ljudi: potrošiš nešto novca, naučiš malo tehnike i onda si to već naučio. Ali to nije tako. To je nešto što prevazilazi nivo svakodnevnih ljudi, zato se zahtijeva da se pridržavaš viših principa. Kako ih se pridržavati? Moraš se kultivirati prema unutra i ne možeš tražiti vani. Koliko ljudi teži prema vani, danas jedno, sutra drugo. Osim toga, oni svojeglavo teže natprirodnim sposobnostima, oni imaju sve moguće namjere. Neki čak žele postati *qigong* majstori i još se žele obogatiti liječenjem! Kod prave kultivacije moraš kultivirati svoje srce, to znači kultivirati svoj *xinxing*. Na primjer, u međuljudskim konfliktima trebamo olako uzeti sve ljudske osjećaje, uživanja i sve žudnje. Dok se još boriš i svadaš zbog ličnih koristi, želiš da ti *gong* raste, nije to tako jednostavno! Zar nisi isti kao i svakodnevni ljudi? Kako onda tvoj *gong* može rasti? Zbog toga moraš obratiti pažnju na kultivaciju svog *xinxinga*. Tek tada tvoj *gong* može rasti i tvoj nivo se može povisiti.

Šta je *xinxing*? *Xinxing* sadrži *de* (*de* je jedna vrsta supstance); on sadrži toleranciju; sadrži spoznaju; sadrži odricanje, odricanje od svih žudnji i svih vrsta vezanosti običnog čovjeka; i još uz to sposobnost izdržavanja patnje i tako dalje, on sadrži stvari iz mnogih oblasti. Čovjekov *xinxing* se mora povisiti u svim oblastima, tek tada se stvarno možeš povisiti, to je jedan od ključnih faktora za rast tvog *gonga*.

Neki ljudi misle: "Pitanje *xinxinga* o kojem govoriš ipak je nešto ideološko, nešto iz duhovne oblasti čovjeka, to nije isto kao *gong* koji mi oplemenjujemo." Zašto nije isto? U intelektualnim krugovima oduvijek je postojalo pitanje šta je primarno, materija ili duh. O tom pitanju se oduvijek diskutiralo i debatiralo. Kažem vam, u stvarnosti su duh i materija jedno. Kod istraživanja u nauci o ljudskom tijelu, današnji naučnici su mišljenja da su misli, koje se šalju iz ljudskog mozga, materija. Znači one materijalno postoje. Zar one onda nisu stvari u čovjekovom duhu? Zar onda nisu jedno? Kao i kosmos kojeg sam objasnio, koji ima svoje materijalno postojanje, a istovremeno i svoje osobine. Postojanje kosmičkih osobina *Zhen*, *Shan*, *Ren* svakodnevni ljudi ne mogu osjetiti, jer se svi svakodnevni ljudi nalaze na ovom nivou. Kad izađeš preko ovog nivoa svakodnevnih ljudi, već ćeš ih moći doživjeti. Kako doživjeti? Sve supstance u univerzumu, uključujući sve supstance koje posvuda ispunjavaju čitav univerzum, su inteligentna bića i imaju misli, sve one su forme postojanja kosmičkog *Fa* na različitim nivoima. One ti ne daju povisiti se, ti se želiš povisiti, ali ne možeš, one ti jednostavno ne daju doći gore. Zašto ti ne daju doći gore? Jer se tvoj *xinxing* nije povisio. Svaki nivo ima različite norme, ako želiš povisiti svoj nivo, moraš se odreći svojih loših misli i istresti svu svoju prljavštinu, da bi se izjednačio sa zahtjevima normi tog nivoa. Tek tada možeš doći gore.

Kad se tvoj *xinxing* povisi, tvoje tijelo će doživjeti veliku promjenu; kad se tvoj *xinxing* povisi, supstance na tvom tijelu će se garantovano promijeniti. Kakve su to promjene? Odbacićeš loše stvari za kojima težiš i kojih se čvrsto držiš. Na primjer: boca je puna prljavštine, ako se njen poklopac čvrsto zatvori i ona bude bačena u vodu, odmah će potonuti na dno. Ako istreseš prljavštinu, što više istreseš, to će boca više plivati prema gore; ako istreseš svu prljavštinu, isplivaće sve do gore. Tokom kultivacije moramo odstraniti sve različite loše stvari na ljudskom tijelu, tek će te onda pustiti da se povisiš, osobine ovog univerzuma imaju upravo takav učinak. Ako ne kultiviraš svoj *xinxing*, ne povisiš svoje

moralne norme, ne odstraniš svoje loše misli i loše supstance, onda ti neće dopustiti da se povisiš. Kaži, zašto ne bi bili jedno? Recimo u šali: kad neko još ima sve osjećaje i žudnje običnog čovjeka i dopusti mu se već takvom da dođe gore i postane Buda, razmisli, da li je to moguće? Kad on vidi da je ta velika Bodisatva tako lijepa, kod njega će se možda pojaviti loša misao. Ako zavist nije odstranjena, doći će u konflikt s Budama. Da li može biti dopušteno da se tako nešto desi? Dakle, šta da se radi? Ti moraš među svakodnevnim ljudima odstraniti sve različite loše misli, tek tada se možeš povisiti.

Dakle, to znači da moraš obratiti pažnju na kultivaciju svog *xinxinga*, kultivirati se u skladu s kosmičkim principima *Zhen, Shan, Ren*, odstraniti žudnje običnog čovjeka, loše nazore i misli da želiš raditi nešto loše. Čim se tvoj duhovni horizont malo povisi, već je odstranjeno malo lošeg s tvog tijela. Istovremeno moraš podnijeti još nešto patnji, pretrpjeti nešto teško, kako bi dio tvoje karme bio odstranjen, tada se možeš malo povisiti; to znači da ograničenja kosmičkih principa za tebe više nisu tako jaka. Kultivacija zavisi od nas samih, *gong* zavisi od Učitelja. Učitelj ti daje *gong* koji povisuje *gong* i taj *gong* onda počinje djelovati, on može izvan tvog tijela transformirati tvoju supstancu *de* u *gong*. Ako se stalno povisuješ i stalno kultiviraš naviše, stup tvog *gonga* će se također stalno probijati naviše. Kultivator se mora kultivirati u okruženju svakodnevnih ljudi, čelječiti se i postepeno otpuštati vezanosti i različite žudnje. Stvari koje čovječanstvo uobičajeno smatra dobrim, često su loše kada se gledaju sa visokih nivoa. Šta ljudi smatraju dobrim: što više osobnih koristi neko dobije među svakodnevnim ljudima, to je život bolji; sa gledišta velikih prosvijetljenih, ovaj čovjek je utoliko gori. U čemu je to loše? Što više on dobije, tim više šteti drugima, on dobija ono što ne treba dobiti, obraćaće pažnju na ugled i dobitak, onda će gubiti svoj *de*. Ako želiš povisiti *gong*, ali ne obraćaš pažnju na kultivaciju svog *xinxinga*, on uopšte ne može rasti.

U našem kultivacijskom okruženju se kaže da je čovjekova duša besmrtna. Ranije se govorilo o čovjekovoj duši, ljudi možda kažu da je to praznovjerje. Znae da se u fizici proučava naše ljudsko tijelo, postoje molekuli, protoni, elektroni i ako se dalje istražuje, postoje još i kvarkovi, neutrimi i tako dalje. Do tamo se više ne vidi s mikroskopom. Ali to je još vrlo daleko od izvora života i izvora materije. Znae da je kod cijepanja jezgre atoma potreban ogroman energetski udar i ogromne količine toplote da bi nastalo stapanje jezgri i cijepanje jezgre jednog atoma. Kad čovjek umre, kako atomi ljudskog tijela mogu bez daljnjeg izumrijeti? Ustanovili smo da se kod umiranja samo ovaj sloj najvećeg molekularnog sastavnog dijela u ovoj našoj dimenziji raspada, ali tijela u drugim dimenzijama nisu uništena. Razmislite, kako izgleda ljudsko tijelo pod mikroskopom? Čitavo tijelo čovjeka je u pokretu, ti doduše mirno sjediš ovdje i ne pomjeraš se, ali je čitavo tijelo u pokretu, molekularne ćelije se kreću, čitavo tijelo je labavo, kao da je sastavljeno od zrnaca pijeska. Gledajući pod mikroskopom, ljudsko tijelo izgleda tako i sasvim je drugačije od tijela koje naše oči vide. Razlog tome je što ti ovaj ljudski par očiju može stvoriti iluziju, ne daju ti vidjeti takve stvari. Kad je nebesko oko otvoreno, ono može vidjeti stvari uvećano, to je u stvari čovjekov instinkt, a sada se naziva posebna natprirodna sposobnost. Ako želiš dobiti posebne natprirodne sposobnosti, onda se moraš vratiti svom izvoru, vratiti se istini i kultivirati se natrag.

Govorimo sada o ovom *de*. Koje konkretne veze postoje? Mi ćemo ih iscrpno objasniti. U mnogim, mnogim dimenzijama mi ljudi imamo tijelo. Najveći sastavni dijelovi ljudskog tijela, koje mi sada vidimo, su ćelije, to je naše tijelo od krvi i mesa. Kada stupaš u prostor između ćelija i molekula, između molekula i molekula, tada ćeš iskusiti da si već u jednoj drugoj dimenziji. Kakva je forma postojanja tog tijela? Naravno, ne možeš ga shvatiti s

pojmovima ove dimenzije, tvoje tijelo se mora izjednačiti sa zahtjevima forme postojanja te dimenzije. Tijela u drugim dimenzijama se mogu povećati i smanjiti, tada ćeš primjetiti da je ta dimenzija također neizmjerljivo velika. Ovo se odnosi na jednu jednostavnu formu postojanja drugih dimenzija, u isto vrijeme i na istom mjestu postoje druge dimenzije. U mnogim drugim dimenzijama čovjek ima određeno tijelo, u određenoj dimenziji postoji jedno polje oko čovjekovog tijela. Kakvo polje? Ovo polje je naime *de* o kojem govorimo. *De* je jedna vrsta bijele supstance, ali nije tako kako se prije smatralo, da je to nešto čovjekovo duhovno ili ideološko, to je u potpunosti jedna vrsta materijalne egzistencije, zbog toga su stariji ljudi prije govorili o sakupljanju ili gubitku *de*-a, to je bilo vrlo tačno. Ovaj *de* se nalazi oko ljudskog tijela i gradi jedno polje. Prije se u Tao školi govorilo da učitelj traži učenika, a ne učenik učitelja. Šta to znači? On je upravo htio utvrditi da li je udio *de*-a, koji taj učenik nosi na sebi, velik ili ne. Ako je velik, onda se on može lako kultivirati, ako nije, onda nije lako, njegov *gong* može samo jako teško rasti ka višim nivoima.

Istovremeno još postoji jedna vrsta crne supstance, ovdje je nazivamo karma, u budizmu se ona naziva loša karma. Bijela i crna supstanca postoje istovremeno. Kakav je odnos između ove dvije supstance? Supstancu *de* dobijamo kada izdržimo patnje, prođemo kroz teškoće, ili uradimo nešto dobro; a crnu supstancu dobijamo kada učinimo nešto loše, nešto zlo, ili kada šikaniramo druge. Danas neki ljudi ne samo da su gladni za profitom, nego će učiniti svako zamislivo nedjelo, za novac će učiniti sve loše: ubistvo, kupovina ljudskog života novcem, homoseksualnost, ovisnost o drogama i tako dalje, sve moguće. Kad neko učini nešto loše, gubi *de*. Kako ga gubi? Kad psuje druge, osjeća da je u dobitku, misli da se izduvao. U ovom univerzumu postoji princip koji glasi: ko ništa ne izgubi, ništa ne dobija; ako neko nešto dobije, onda on mora nešto izgubiti; ako ništa ne izgubiš, bićeš prinuđen nešto izgubiti. Ko ima ovaj efekat? To su upravo kosmičke osobine koje imaju ovaj efekat, zato neće ići ako želiš samo dobiti. Šta da se radi? Kad on psuje ili šikanira nekog drugog, dobacuje mu svoj *de*; taj drugi je taj koji je povrijeđen, koji je nešto izgubio i pretrpio patnje, zato će mu šteta biti nadoknađena. On ga na ovoj strani psuje; dok psuje, komad *de*-a iz područja njegovog sopstvenog dimenzionalnog polja leti i pada kod drugog. Što on jače psuje, tim više *de*-a daje drugome. Isto je i kada udara ili šikanira druge. On ga jednom udari šakom ili nogom, jedan dio *de*-a, koji odgovara jačini udarca, leti do tog drugog. Običan čovjek ne prepoznaje ovaj princip, on misli da je šikaniran i ne može to otrpiti: "Ti me udaraš, onda moram uzvratiti." "Tres", uzvraća udarcem šakom i *de* je opet gurnut natrag, obojica nisu ništa izgubili, ništa dobili. On možda misli: "Udario si me jednom, ja ću te udariti dvaput, inače neću moći dati oduška svom bijesu." Onda on još jednom udara, ponovo jedan komad *de*-a leti od njega do tog drugog.

Zašto se *de* smatra nečim tako važnim? Kakve veze postoje kod transformacije *de*-a? U religiji se kaže: kad neko ima ovaj *de* i on u ovom životu nešto ne dobije, dobiće u idućem. Šta će dobiti? Ako je njegov *de* velik, postaće visoki činovnik, imaće puno novca; šta god poželi, dobiće, baš to je razmijenjeno sa ovim *de*-om. U religiji se još kaže, kad čovjek nema *de*-a, onda će njegovo tijelo i duh biti potpuno uništeni. Njegove duše će biti uništene, nakon smrti umire sasvim i potpuno, ništa više neće preostati. Ali u krugovima kultivatora se kaže da se *de* može direktno transformisati u *gong*.

Sad ćemo objasniti kako se *de* transformiše u *gong*. U krugovima kultivatora postoji izreka koja glasi: "Kultivacija zavisi od tebe, *gong* zavisi od učitelja". Neki govore o "stavljanju tignja na peć", "sakupljanju ljekovitih trava i oplemenjivanju eliksira" i o

misaonim aktivnostima, oni to smatraju jako bitnim. Kažem ti, to uopšte nije bitno; ako puno misliš na to, to je vezanost. Ako mnogo razmišljaš o tome, nisi li onda svojeglav i težiš za tim? Kultivacija zavisi od tebe, *gong* zavisi od učitelja. Dovoljno je da imaš tu želju. Učitelj je taj koji to stvarno radi, ti to uopšte ne možeš napraviti. S tijelom običnog čovjeka, možeš li razviti ta viša živa bića, koja se sastoje od ovih visokoenergetskih supstanci? Apsolutno nemoguće, čak i pričati o tome je smiješno. Procesi transformacije ljudskih tijela u drugim dimenzijama prilično su mistični i komplikovani, ti uopšte ne možeš napraviti takve stvari.

Šta će ti Učitelj dati? On će ti dati *gong* koji povisuje *gong*. *De* se nalazi izvan ljudskog tijela, istinski *gong* čovjeka nastaje upravo iz *de*-a. Visina nečijeg nivoa i jačina njegovog *gonga*, sve nastaje iz ovog *de*-a. On transformiše tvoj *de* u *gong*, koji onda u spiralnoj formi raste prema gore. *Gong*, koji stvarno određuje nečiji nivo, raste izvan tijela. Nakon što je u spiralnoj formi konačno narastao do tjemena, formira se stup *gonga*. Koliko je visok *gong* tog čovjeka, jednim pogledom se vidi visina njegovog *gong* stupa, to je njegov nivo, status dostignuća o kojem se govori u budizmu. Kod meditacije u lotosovom položaju, duša nekih ljudi može napustiti tijelo. Ona se odjednom uspinje do jednog određenog nivoa, još više ne može, više se ne usuđuje. Sjedeći na svom sopstvenom stupu *gonga*, penje se naviše i samo toliko visoko se može popeti. Jer je stup njegovog *gonga* samo toliko visok, ne može više ići naviše, to je pitanje statusa dostignuća o kojem se govori u budizmu.

Također postoji i jedno mjerilo za mjerenje visine *xinxinga*. To mjerilo i stup *gonga* ne nalaze se u istoj dimenziji, ali oni postoje istovremeno. Kultivirao si svoj *xinxing* naviše, ako te, na primjer, među svakodnevnim ljudima neko opsuje, ti ne kažeš ništa i srce ti ostaje mirno; kada dobiješ udarac šakom, opet ništa ne kažeš i okončaš to sa smješkom. *Xinxing* ovog čovjeka je već jako visok. Znači ti si praktikant, šta onda trebaš dobiti? Zar ne dobijaš *gong*? Kad se tvoj *xinxing* povisio, tvoj *gong* je također porastao. Koliko je visok *xinxing*, toliko je visok i *gong*, to je apsolutna istina. Prije je bilo ljudi, sasvim svejedno da li su prakticirali u parku ili kod kuće, bili su veoma koncentrisani i predani i nisu prakticirali loše. Ali čim bi izašli van, nisu više bili isti, radili bi šta su htjeli, među svakodnevnim ljudima bi se svađali i borili se s drugima za ugled i dobitak. Da li njihov *gong* onda može rasti? Ne, nikako, to je također razlog zašto ni njihove bolesti ne mogu biti izliječene. Zašto se neki ljudi ne mogu osloboditi svojih bolesti, iako su već duže vrijeme prakticirali *qigong*? *Qigong* je kultivacija, to je nešto neuobičajeno i nije gimnastika svakodnevnih ljudi, mora se obratiti pažnja na *xinxing*, tek onda bolesti mogu biti izliječene ili *gong* može rasti.

Neki ljudi misle da „eliksir“, koji se spominje u izreci: "stavljanje tignja na peć i sakupljanje ljekovitih trava i oplemenjivanje eliksira", predstavlja *gong*. Ali to nije tako. Taj eliksir pohranjuje samo dio energije, a ne cijelu energiju. Šta je eliksir? Kao što znate, kod nas postoje još neke druge stvari koje kultiviraju tijelo, na tijelu će se još pojaviti natprirodne sposobnosti i postoji još mnogo vrsta tehnika. Većina ih je zaključana, nije ti dozvoljeno primijeniti ih. Postoji mnogo natprirodnih sposobnosti, preko deset hiljada natprirodnih sposobnosti. Čim jedna nastane, biće zaključana. Zašto nije dozvoljeno da se pojave? To je zbog toga da ih ne bi upotrijebio da u ljudskom društvu uradiš nešto po volji. Ljudsko društvo ne smije biti remećeno po volji, ti svoje sposobnosti također ne smiješ svojevoljno pokazivati u običnom ljudskom društvu, jer bi to moglo poremetiti stanje društva svakodnevnih ljudi. Mnogi ljudi se kultiviraju kroz spoznaju; ako im sve pokažeš, vidjeće da je to istina, onda će svi doći i kultivirati se, čak i ljudi koji su učinili neoprostivo zlo, doći će i kultivirati se, to ne ide. Nije ti dozvoljeno da ih tako pokazuješ; osim toga, lako ćeš učiniti nešto loše, jer ne

možeš vidjeti sudbonosnu vezu, ono suštinsko. Misliš da si učinio nešto dobro, ali je to možda nešto loše, zato ti nije dozvoljeno upotrijebiti ih. Jer, čim uradiš nešto loše, tvoj nivo će pasti, tako da si se uzaludno kultivirao, zato su mnoge natprirodne sposobnosti zaključane. Šta da se radi? Na dan otvaranja *gonga* i prosvjetljenja, ovaj eliksir je bomba koja će eksplozijom otvoriti sve natprirodne sposobnosti i sve brave i *qiao* u tijelu. "Bum", jedan potres i sve će biti otvoreno, za to on služi. Nakon smrti monaha, kod kremiranja preostaje *sarira*, neki kažu da su to kosti ili zubi. Ali zašto svakodnevni ljudi to nemaju? To je upravo eliksir nakon eksplozije, njegova energija je oslobođena, on sadrži veliku količinu supstanci iz drugih dimenzija. Konačno, to je također nešto što materijalno postoji, ali je beskorisno. Današnji ljudi to smatraju veoma vrijednim, ima energiju, sjaj i jako je tvrdo, takva je to stvar.

Postoji još jedan razlog zašto *gong* ne raste, a to je: bez poznavanja Fa na visokim nivoima, ne može se kultivirati naviše. Šta to znači? Kao što sam upravo rekao, neki su prakticirali mnoge puteve kultivacije, kažem ti, koliko god ih učio, beskorisno je, ti si samo učenik osnovne škole, učenik osnovne škole u kultivaciji, sve su to samo principi niskih nivoa. Takvi principi niskih nivoa ne mogu voditi tvoju kultivaciju ka visokim nivoima. Ako sa knjigama osnovne škole učiš na univerzitetu, još uvijek ostaješ učenik osnovne škole, koliko god učio, beskorisno je, čak čitavu stvar čini još gorom. Na različitim nivoima postoji različit Fa. Na različitim nivoima, Fa vodi na različite načine, zato te principi niskih nivoa ne mogu voditi u kultivaciji ka visokim nivoima. Ono što ćemo poslije iscrpno objasniti, sve su principi kultivacije na visokim nivoima, ja to objašnjavam povezano sa stvarima sa različitih nivoa, zbog toga će te oni uvijek moći voditi kod buduće kultivacije. Postoji nekoliko mojih knjiga, postoje još audio kasete i video kasete. Utvrdićeš da, nakon što si ih jednom pročitao ili preslušao i nakon izvjesnog vremena ih opet pročitaš ili preslušaš, garantovano će te još voditi. Ti se stalno povisuješ i one te stalno vode, to je Fa. To su dva razloga zašto *gong* uprkos prakticiranju ne raste: bez poznavanja Fa na visokim nivoima, ne može se kultivirati; bez kultivacije prema unutra, bez kultivacije *xinxinga*, *gong* ne raste. Postoje samo ova dva razloga.

Posebnosti Falun Dafa

Naš Falun Dafa je jedan od 84.000 puteva kultivacije Buda škole. U istorijskim vremenima naše današnje ljudske civilizacije nikad nije bio javno širen, ali je u jednom od predistorijskih vremena spasio ljude u velikim razmjerama. U posljednjem periodu *završnog* *je* ga opet širim, zato je izuzetno vrijedan. Objasnio sam formu u kojoj se *de* direktno transformiše u *gong*. *Gong* zapravo ne nastaje kroz prakticiranje, nego kroz kultivaciju. Mnogi ljudi teže rastu svog *gonga*, oni obraćaju pažnju samo na prakticiranje vježbi, ali ne i na kultivaciju. Zapravo se *gong* potpuno i u cjelosti kultivira kultivacijom *xinxinga*. Zašto vas onda ovdje podučavamo i vježbama? Objasniću prvo zašto monasi ne rade vježbe. Oni prije svega meditiraju, recitiraju sutre i kultiviraju svoj *xinxing* i tada njihov *gong* već raste, znači *gong* koji određuje visinu njihovog nivoa. Zato što je Shakyamuni govorio o odricanju od svega svjetovnog, uključujući i *benti*, tjelesni pokreti nisu bili potrebni. Tao škola ne govori o sveobuhvatnom spasenju svih bića; pred njim ne stoje sve vrste ljudi sa raznim mentalitetima i na različitim nivoima, od kojih su neki više a neki manje egoistični. On bira svoje učenike. Kad je našao tri učenika, onda će samo jedan od njih dobiti instinsko predanje. Mora biti sigurno da taj učenik ima visok *de* i da je dobar i da se kod njega neće pojaviti problemi. Zato on uglavnom predaje stvari ručnih tehnika da bi se kultiviralo tijelo. Oni prakticiraju nešto kao božanske sposobnosti i tehnike, a za to su potrebni izvjesni pokreti.

Falun Dafa je također put dvostruke kultivacije tijela i duha, zato su pokreti neophodni. Pokreti, s jedne strane, služe tome da se pojačaju natprirodne sposobnosti. Šta znači pojačati? Sa svojim jakim *gongom* pojačavaš svoje natprirodne sposobnosti, one postaju sve jače. S druge strane, u tvom tijelu se još razvijaju i mnoga živa bića. Kod kultivacije na visokim nivoima u Tao školi govori se o rođenju besmrtnog djeteta (*yuanying*), u Buda školi se govori o neuništivom Vajra-tijelu, uz to se još razvija i jako mnogo vrsta tehnika. Sve ove stvari se razvijaju ručnim tehnikama, zato su pokreti tu. Kod jednog cjelovitog puta dvostruke kultivacije tijela i duha, čovjek se mora i kultivirati i raditi vježbe. Mislim da ste shvatili odakle dolazi *gong*. *Gong*, koji stvarno određuje visinu tvog nivoa, uopšte ne nastaje kroz prakticanje, nego kroz kultivaciju. Tokom kultivacije, ti si povisio svoj *xinxing* među svakodnevnim ljudima i izjednačio se sa osobinama univerzuma, osobine univerzuma te više neće ograničavati, onda se možeš povisiti. *De* se tada počinje transformisati u *gong*; dok se mjerilo tvog *xinxinga* povisuje, on raste, takav je odnos.

Naš put kultivacije stvarno spada u puteve dvostruke kultivacije tijela i duha. *Gong*, koji mi oplemenjujemo, pohranjen je u svakoj ćeliji tijela, *gong* od visokoenergetskih supstanci biva pohranjen sve do izvornih djelića materije na krajnje mikroskopskim nivoima. Dok tvoj *gong* raste, njegova gustoća će biti sve veća, a i njegova snaga će biti sve jača. Ova visokoenergetska supstanca ima inteligenciju. Zato što je pohranjena u svakoj ćeliji ljudskog tijela, sve do prvobitnog izvora života, ona postepeno dobija isti oblik kao tvoje tjelesne ćelije, ona također ima isti raspored molekula i istu formu kao sva atomska jezgra. Ali bit se promijenila, to više nije tijelo koje je prvobitno bilo sastavljeno od ćelija od krvi i mesa. Zar onda nije tako da se više ne nalaziš u pet elemenata? Naravno, tvoja kultivacija još uvijek nije završena, ti se još kultiviraš među svakodnevnim ljudima, zato spolja izgledaš kao običan čovjek, jedina razlika je što izgledaš puno mlađi nego tvoji vršnjaci. Naravno, prvo mora biti odstranjeno ono loše iz tvog tijela, uključujući bolesti. Ali mi ovdje ne liječimo bolesti, mi čistimo tijelo, to se ne naziva liječenje, kod nas se to zove čišćenje tijela, čistimo tijelo za one koji se istinski kultiviraju. Neki su samo došli da bi ih se izliječilo. Mi ne dopuštamo teško bolesnima da pohađaju naš kurs, jer oni ne mogu otpustiti vezanost da ih se izliječi i misao da su bolesni. On je teško bolestan i vrlo se loše osjeća, može li on to otpustiti? On se ne može kultivirati. Mi stalno ponavljamo da ne primamo teško bolesne, ovdje se radi o kultivaciji, to je veoma daleko od onoga na šta on misli. Za to se može obratiti drugim *qigong* majstorima. Naravno, mnogi učenici imaju bolesti; zato što si pravi kultivator, učinimo to za tebe.

Nakon što su se naši Falun Dafa učenici neko vrijeme kultivirali, promjena njihovog izgleda je vrlo velika, njihova koža će postati fina, nježna i rumena, kod starijih ljudi se također dešava da im se smanje bore, čak da ih bude vrlo malo, to je uobičajena pojava. Ja ovdje ne pričam bajke, mnogi ovdje prisutni dugogodišnji učenici to znaju. Osim toga, još se dešava da starije žene opet dobiju menstruaciju. Jer, put dvostruke kultivacije tijela i duha zahtijeva *qi* menstruacije, da bi se kultiviralo tijelo. Menstruacija ipak neće biti jaka, malo je već dovoljno za sadašnju fazu, to je dovoljno. To je također rasprostranjena pojava. Kako ćeš inače kultivirati svoje tijelo ako ti to fali? Kod muškaraca je isto tako, i stariji i mlađi, svi će se tjelesno osjećati lagano. Kao istinski praktikant, osjetićeš ove promjene.

U našem putu kultivacije prakticira se nešto veliko, on nije kao mnogi putevi kultivacije, kod kojih se oponašaju pokreti životinja. Ono što se kod ovog puta kultivacije prakticira jednostavno je vrlo veliko. Principi koje su Shakyamuni ili Lao Zi u svoje vrijeme objasnili svi spadaju u principe unutar područja našeg sistema Mliječnog puta. Šta se prakticira kod našeg Falun Dafa? Mi se kultiviramo prema principima razvoja univerzuma,

vođeni mjerilom najviših principa univerzuma: *Zhen, Shan, Ren*. Mi kultiviramo nešto tako veliko, to je kao da kultiviramo univerzum.

Naš Falun Dafa ima još jednu veoma veliku posebnost, koja je veoma specijalna i koja se razlikuje od svih drugih puteva kultivacije. Vrste *qigonga*, koje se danas šire u društvu, sve spadaju u one koji idu alhemističkim putem, kod kojih se oplemenjuje eliksir. Kod takvih vrsta *qigonga* je vrlo teško među svakodnevnim ljudima doći do otvaranja *gonga* i do prosvjetljenja. Naš Falun Dafa ne ide alhemističkim putem, kod našeg puta kultivacije se kultivira *falun* u području donjeg trbuha, ja ga za vrijeme kursa lično usađujem učenicima. Dok objašnjavam Falun Dafa, redom ćemo vam usaditi *falun*, neki će ga osjetiti, neki ne. Većina će ga osjetiti, jer je tjelesno stanje svakog čovjeka različito. Mi oplemenjujemo *falun*, a ne eliksir. *Falun* je minijatura univerzuma i ima sve funkcije univerzuma, on može automatski djelovati i obrtati se. On će se vječno obrtati u području tvog donjeg trbuha. Nakon što ti je usađen, on nikad neće stati, obrtaće se zauvijek. Dok se obrće u smjeru kazaljke na satu, on automatski upija energiju iz univerzuma, on može i sam transformisati energiju i snabdijeva sve različite dijelove tvog tijela energijom potrebnom za transformaciju. Istovremeno šalje energiju prema vani, dok se obrće u smjeru suprotnom od kazaljke na satu. Nakon što je izbacio iskorištene supstance, one će se rastvoriti oko tijela. Kad šalje energiju, ona dopijeva veoma daleko, a zatim ponovo unosi novu energiju. Energija, koju on šalje, koristiće svim ljudima koji se nalaze u tvojoj blizini. U Buda školi se govori o samospasenju i spasenju drugih, o sveobuhvatnom spasenju svih bića; ne samo sebe kultivirati, nego sveobuhvatno spasiti sva bića, drugi ljudi će pri tome imati koristi, tako što će njihova tijela bez direktne namjere biti dovedena u red i njihove bolesti biti izliječene i tako dalje. Naravno, energija se neće izgubiti; kada se *falun* obrće u smjeru kazaljke na satu, on će je sam sakupiti, jer se stalno obrće i nikad neće stati.

Neki misle: Zašto se *falun* neprestano okreće? Neki drugi su me pitali: Zašto se on može okretati? Kakav je to princip? Kada se sakupi puno energije, može se formirati eliksir, to je lako razumjeti; okretanje *faluna* je ipak nepojmljivo. Daću vam jedan primjer: Univerzum se kreće, sve galaksije, svi zvjezdani sistemi u univerzumu se kreću, devet planeta se okreću oko sunca, Zemlja se također obrće. Razmislite, ko ih gura? Ko im je dao pokretačku snagu? Ne možeš to pokušavati razumjeti s pojmovima svakodnevnih ljudi, to je jednostavno vrsta obrtnog mehanizma. Takav je i naš *falun*, on se jednostavno okreće. On rješava problem da običan čovjek prakticira u normalnim životnim okolnostima i produžava vrijeme prakticiranja. Kako je ono produženo? Tako što se on neprestano okreće i neprestano upija energiju iz univerzuma i transformiše je. Kad si na poslu, oplemenjuje te. Naravno, ne samo *falun*, mi ćemo također postaviti još jako puno drugih mehanizama na tvoje tijelo, koji se svi u vezi s *falunom* automatski okreću i razvijaju. Dakle, kod ovog puta kultivacije se čovjek potpuno automatski oplemenjuje i na taj način nastaje nešto tipa "*gong* oplemenjuje čovjeka", to se također naziva "*Fa* oplemenjuje čovjeka". Kad ne prakticiraš, *gong* te oplemenjuje; kada prakticiraš, također te oplemenjuje. Kad jedeš, kad spavaš ili kad si na poslu, stalno te oplemenjuje. Zašto onda prakticiraš? Prakticiraš da pojačaš *falun* i da pojačaš sve ove mehanizme i *qi*-mehanizme, koje sam usadio u tebe. Kod kultivacije na visokim nivoima je sve bez namjere, pokreti također slijede tok mehanizama, pri tome nema nikakvog vođenja mislima, niti se govori o disanju i tako dalje.

Mi također ne govorimo o mjestima ili vremenu za prakticiranje. Neki pitaju: koje vrijeme je dobro za prakticiranje? Vrijeme *zi* (ponoć), *chen* (rano ujutro) ili *wu* (podne)? Mi

ne govorimo o vremenu. Ako u vremenu *zi* nisi prakticao, *gong* te je oplemenjivao; ako u vremenu *chen* nisi prakticao, također te je oplemenjivao; kada spavaš, oplemenjuje te; kada hodaš, oplemenjuje te; kada radiš, također te oplemenjuje. Zar vrijeme prakticanja time nije značajno skraćeno? Mnogi od nas imaju želju u srcu da stvarno dostignu Tao, to je naravno cilj kulture, konačni cilj kulture je upravo dostići Tao i doći do Ispunjenja. Ali kod nekih je preostalo vrijeme života veoma ograničeno i možda više nije dovoljno; naš Falun Dafa može riješiti ovaj problem i skratiti proces kulture. Istovremeno, on je također put dvostruke kulture tijela i duha, ako se neprestano kultiviraš, tvoj život će se stalno produžavati; neprestano se kultiviraš, neprestano se produžava, za ljude sa dobrom urođenom osnovom, ali u poznim godinama, vrijeme prakticanja će onda biti dovoljno. Ali za to postoji jedan uslov: produženo vrijeme života, koje prevazilazi tvoj prijašnji predodređeni životni tok, dato ti je samo za kulturu; čim tvoje misli samo malo odstupe od ispravnog puta, dospijevaš u životnu opasnost, jer je tvoj život već odavno istekao. Ali ako si izašao iz kulture svjetskog Fa, onda ovo ograničenje više ne postoji, onda je to jedno drugo stanje.

Mi ne govorimo o nebeskim smjerovima, također ne govorimo o ponovnom sakupljanju *gonga*. Jer, *falun* se neprekidno okreće i ne može se zaustaviti. Kad telefon zazvoni ili neko pokuca na vrata, možeš odmah otići i srediti stvar i ne moraš ponovo sakupljati *gong*. Dok obavljaš tu stvar, *falun* će se odmah okrenuti u smjeru kazaljke na satu i jednim potezom će ponovo upiti energiju raspršenu izvan tvog tijela. Koliko god napora uložio da bi rukama hvatao *qi* i ulijevao u tjele, može se izgubiti. *Falun* je inteligentno biće, on sam zna obaviti tako nešto. Također se ne govori o nebeskim smjerovima, jer se čitav kosmos kreće, sistem Mliječnog puta se kreće, devet planeta kruže oko Sunca, a i Zemlja se još obrće. Mi prakticiramo prema tako velikim principima univerzuma, gdje su sjever, istok, jug i zapad? Nigdje. U kojem god smjeru prakticiramo, okrenuti smo svim smjerovima; u kojem god smjeru prakticiramo, to nije ništa drugo, nego istovremeno prakticirati prema sjeveru, istoku, jugu i zapadu. Naš Falun Dafa može štiti učenike od zastranivanja. Kako štiti? Ako si istinski kultivator, naš *falun* će te štiti. Ja sam ukorijenjen u kosmosu; ako bi neko mogao dirnuti tebe, mogao bi dirnuti i mene, jednostavno rečeno, on bi također mogao dirnuti ovaj kosmos. Moje riječi vam možda zvuče veoma mistično, ali ako dalje učiš, onda ćeš to razumjeti. Postoji još nešto drugo. Ono što je previše visoko, ne smijem reći. Mi ćemo sistematski objasniti Fa na visokim nivoima, od površine do u dubinu. Ali to ipak neće ići, ako tvoj *xinxing* nije ispravan. Ako nečemu težiš, onda se možda mogu pojaviti problemi. Ustanovio sam da je *falun* kod mnogih dugogodišnjih praktikanata ipak deformisan. Zašto? Pri prakticanju si umiješao nešto drugo, prihvatio si stvari od drugih. Zašto te *falun* nije zaštitio od toga? Ono što ti je dato pripada tebi i svojim mislima upravljaš s tim. Niko se neće umiješati ako sam želiš nešto imati, to je princip u ovom kosmosu. Ako se više ne želiš kultivirati, niko te ne može prisiliti da se kultiviraš, inače bi to značilo činiti nešto loše. Ko te može prisiliti da promijeniš svoje srce? Ti se sam moraš potruditi. Uzeti prednosti svih različitih škola: Uzeo si stvari od svakoga i danas vježbaš ovaj *qigong*, sutra onaj, cilj je osloboditi se svojih bolesti. Da li si se oslobodio svojih bolesti? Ne, one su za tebe samo odložene za kasnije. Kod kulture na visokim nivoima govori se o koncentraciji na jednu školu, čovjek se mora kultivirati koncentrisan na jednu školu. Kod kulture, svejedno u kojoj školi, srce se obavezno mora dati toj školi do otvaranja *gonga* i do prosvjetljenja u toj školi, tek onda se možeš dalje kultivirati u drugim putevima kulture, tada se radi o drugom nizu stvari. Jer takvi nizovi stvari, koji su ispravno preneseni, prenošeni su kroz nebrojena vremena i svi oni su prošli kroz prilično komplikovan proces transformacije. Neki prakticiraju prema osjećaju, šta je tvoj osjećaj? On nije ništa. Pravi procesi transformacije odvijaju se u

drugim dimenzijama, oni su krajnje komplikovani, mistični i prekrasni, ne smije se niti malo odstupiti od toga. Kao kod preciznih uređaja, ako upotrijebiš druge dijelove, uređaj će se odmah pokvariti. Sva tvoja tijela u različitim dimenzijama se mijenjaju, veoma mistično i prekrasno, ne smije se ni najmanje odstupiti od toga. Zar ti nisam objasnio: kultivacija zavisi od samog čovjeka, *gong* zavisi od učitelja. Ako po volji uzimaš stvari od drugih, umiješaš ih i nosiš druge informacije, to će ometati stvari ove škole, onda ćeš dospjeti na pogrešan put. Osim toga, to se može odraziti u običnom ljudskom društvu i donijeti sa sobom poteškoće svakodnevnih ljudi. Ti si sam to želio i niko se ne može umiješati, to je pitanje kvaliteta prosvjetljenja. Osim toga je to što si umiješao već pobrkalo tvoj *gong* i ti se već ne možeš više kultivirati, pojaviće se takav problem. Ali ja također ne tražim od vas da po svaku cijenu učite Falun Dafa. Ako ne učiš Falun Dafa, nego dobiješ istinsko predanje u drugim školama, također se slažem. Ali kažem ti: ako se istinski kultiviraš ka visokim nivoima, moraš se koncentrisati na jednu školu. Još jednu stvar ti moram reći: Trenutno nema nikog drugog, ko kao ja stvarno širi put kultivacije prema visokim nivoima. Kasnije ćeš znati šta sam uradio za tebe. Zato se nadam da nemaš prenizak kvalitet prosvjetljenja. Mnogi ljudi se žele kultivirati na visoke nivoe, ovo je sada pred tobom, ali ti možda još ne možeš na to reagovati. Svugdje tražiš učitelje, trošiš puno novca i ne možeš to naći. Danas ti je to stavljeno pred kućni prag i ti to možda još ne možeš prepoznati! To je pitanje spoznaje ili nespoznaje i isto tako pitanje, da li možeš biti spašen ili ne.

2. Lekcija

O nebeskom oku

Mnogi *qigong* majstori su govorili nešto o nebeskom oku, međutim, na različitim nivoima Fa ima različite manifestacije. Osoba koja se kultivirala do određenog nivoa, može vidjeti samo pojave na tom nivou. Ona ne može vidjeti istinu iznad tog nivoa i ne vjeruje u nju. Zbog toga ona misli da je ispravno samo to što je vidjela na svom nivou. Dok još nije dostigla viši nivo kultivacije, ona će misliti da te stvari na višim nivoima ne postoje i da su nevjerodostojne. To je uslovljeno njenim nivoom kultivacije i tada se njene misli neće moći povisiti. To znači, neko govori o nebeskom oku ovako, neko onako, napravljena je prilična zbrka i na kraju ga niko nije tačno objasnio. Istina je da se nebesko oko ne može tačno objasniti sa niskog nivoa. Struktura nebeskog oka je tajna tajni i običnom čovjeku nije bilo dozvoljeno znati za to. Zato ga niko nikad nije objasnio. Ovdje nećemo govoriti o starim teorijama, nego ćemo ono bitno o nebeskom oku objasniti uz pomoć moderne nauke i sa najjednostavnijim modernim jezikom.

Nebesko oko, o kojem mi govorimo, u stvari se nalazi nešto malo iznad tačke između obrva i povezano je s epifizom. To je glavni kanal. Ljudsko tijelo ima još mnogo očiju. U Tao školi se kaže da je svaki *qiao* jedno oko. U Tao školi se akupunkturne tačke zovu *qiao*, dok se u tradicionalnoj kineskoj medicini nazivaju akupunkturnim tačkama. U Buda školi se kaže da je svaka pora jedno oko. Zato neki ljudi mogu čitati ušima ili gledati rukama, potiljkom, stopalima ili stomakom. Sve je to moguće.

Kada govorimo o nebeskom oku, recimo najprije nešto o našem fizičkom paru očiju. U današnje vrijeme, neki ljudi misle da ovaj par očiju može vidjeti sve supstance i sve predmete u našem svijetu. Zato se kod nekih ljudi razvilo kruto mišljenje, oni misle da je samo ono što vide očima realno i stvarno i ne vjeruju u ono što ne vide. U prošlosti se uvijek govorilo da takvi ljudi nemaju dobar kvalitet prosvjetljenja. Neki ljudi ne mogu tačno objasniti zašto kvalitet prosvjetljenja nije dobar: "on ne vjeruje u ono što ne vidi - to zvuči sasvim logično". Ali ako se posmatra sa nešto višeg nivoa, to više nije logično. Svaki vrijeme-prostor se sastoji od materije, naravno, različiti vrijeme-prostori imaju različite materijalne strukture i različite forme manifestacije kod različitih živih bića.

Daću vam jedan primjer. U budizmu se kaže da su sve pojave u ljudskom društvu iluzije, da nisu stvarne. Zašto iluzije? Ko može tvrditi da ovi stvarno postojeći predmeti nisu stvarni? Zapravo, forma u kojem predmet postoji drugačija je od njegove forme manifestacije, ali naše oči imaju funkciju da fiksiraju predmete u našoj materijalnoj dimenziji u stanju koje mi sada vidimo. Zapravo oni nisu u tom stanju, čak ni u ovoj našoj dimenziji nisu u tom stanju. Na primjer, kako čovjek izgleda pod mikroskopom? Čitavo tijelo je labava tvorevina sastavljena od malih molekula, kao zrna pijeska u pokretu, elektroni kruže oko atomskih jezgri, čitavo tijelo se izvija i pokreće. Površina tijela nije glatka, nego je nepravilna. Kod svih predmeta u kosmosu, kao što su čelik, željezo i kamenje, je isto, njihovi unutrašnji molekularni sastavni dijelovi su svi u pokretu. Ti ne možeš vidjeti njihovu cjelokupnu formu, u stvari oni nisu stabilni. Ovaj sto se također izvija, ali oči ne mogu vidjeti stvarnu pojavu. Ovaj par očiju može čovjeku stvoriti lažnu sliku.

Nije tačno da ne možemo vidjeti stvari u mikroskopskom. Nije tačno da čovjek nema tu sposobnost, već svaki čovjek prirodno posjeduje sposobnost vidjeti određene mikroskopske stvari. Upravo zato što imamo ovaj par očiju u ovoj materijalnoj dimenziji, on može ljudima stvoriti lažnu sliku. On ljude sprječava vidjeti. Zato se prije govorilo da ljudi ne priznaju ono što ne mogu vidjeti. Još od davnina se u krugovima kultivatora smatralo da takvi ljudi nemaju dobar kvalitet prosvjetljenja, oni su zbunjeni lažnim slikama svakodnevnih ljudi i izgubili su se među svakodnevnim ljudima. To je oduvijek bilo mišljenje religija i što se nas tiče i mi smatramo da to ima smisla.

Ovaj par očiju može fiksirati stvari u ovoj našoj materijalnoj dimenziji, tako da su one u ovom stanju, ali, osim toga, on nema nikakve veće sposobnosti. Kad ljudi gledaju stvari, slike se ne formiraju direktno u njihovim očima. Kao i objektiv foto-aparata, oči služe samo kao alat. Kod pogleda u daljinu objektiv se izdužuje, tako funkcionišu i naše oči. Kod pogleda u tamu zjenice se povećavaju, a i kada foto-aparat snima slike u mraku, blenda se mora povećati, inače će slike biti nedovoljno osvijetljene i crne. Kad izađeš vani, gdje je vrlo svijetlo, zjenice se vrlo brzo smanjuju, u protivnom će oči biti zaslijepljene i jedva da ćeš još nešto moći vidjeti. Foto-aparat također funkcionišu na ovom principu i blenda također mora biti smanjena. One samo mogu snimiti objekte i samo su jedna vrsta alatke. Zapravo, kada vidimo formu u kojoj nešto, neki čovjek ili neki predmet postoje, slika se stvarno formira u mozgu. To znači da mi vidimo sliku kroz oči, onda se ona preko vidnih živaca prosljeđuje do epifize, koja se nalazi u zadnjem dijelu mozga, i tamo se prikazuje. To znači da se u epifizi u mozgu stvari stvarno prikazuju. Moderna medicina je to također već spoznala.

Otvaranje nebeskog oka o kojem mi govorimo znači da se otvara jedan kanal između obrva, kako bi epifiza mogla direktno gledati prema vani, bez korišćenja vidnih živaca. To se zove otvaranje nebeskog oka. Neki misle: Ali to nije realistično, ipak ovaj par očiju funkcionišu kao alatka, može snimati predmete, bez očiju to ne ide. U anatomiji moderne medicine je već utvrđeno da prednji dio epifize ima kompletnu organsku strukturu ljudskog oka. Zato što se nalazi unutar lobanje, smatraju je degenerisanim okom. Da li se radi o degenerisanom oku, o tome mi u krugovima kultivatora još uzdržavamo svoje mišljenje. Ali, u svakom slučaju, moderna nauka je već uvidjela da na tom mjestu, usred ljudske glave, postoji oko. Kanal koji mi otvaramo upravo vodi do tog mjesta, to se tačno poklapa sa znanjem moderne medicine. To oko čovjeku neće stvarati lažnu sliku, kao što to naš obični par očiju čini, ono može vidjeti bit stvari i predmeta. Zato neko sa nebeskim okom na vrlo visokim nivoima može vidjeti kroz našu dimenziju i vidjeti druge vrijeme-prostore, on može vidjeti pojave koje svakodnevni ljudi ne mogu vidjeti; neko sa nebeskim okom na nižim nivoima može imati prodornu moć i vidjeti stvari kroz zidove i vidjeti unutar ljudskog tijela. Ono posjeduje tu funkciju.

U Buda školi se govori o pet nivoa: fizički vid, nebeski vid, vid mudrosti, Fa vid i Buda vid. To su pet velikih nivoa nebeskog oka. Svaki nivo se još dijeli na gornji, srednji i donji podnivo. U Tao školi se govori o 9 puta 9, znači 81 nivoa Fa oka. Mi vam ovdje otvaramo nebesko oko, ipak, ono neće biti otvoreno na nivou ili ispod nivoa nebeskog vida. Zašto? Jeste da sjediš ovdje i da si započeo kultivaciju, ali ti si samo napravio prvi korak među svakodnevnim ljudima i mnoge vezanosti svakodnevnih ljudi još nisi otpustio. Ako bismo tvoje nebesko oko otvorili na nivou ili ispod nivoa nebeskog vida, ti bi dobio sposobnosti koje svakodnevni ljudi nazivaju posebne natprirodne sposobnosti, mogao bi vidjeti stvari kroz zidove i vidjeti unutar ljudskih tijela. Da smo širili te natprirodne sposobnosti u velikoj mjeri i svakome otvorili nebesko oko na tom nivou, onda bi to ozbiljno remetilo obično ljudsko društvo, stanje običnog ljudskog društva bilo bi sabotirano. Državne tajne više ne bi mogle

biti očuvane; bilo bi svejedno da li je neko odjeven ili ne, bio bi u stanju izvana vidjeti ljude u sobi; moglo bi se desiti da na lutriji izvučeš sve prve nagrade, ako vidiš neke na ulici. To ne ide! Razmislite, ako bi nebesko oko svakog čovjeka bilo otvoreno na nivou nebeskog vida, da li bi to još bilo ljudsko društvo? Događaji koji ozbiljno remete ljudsko društvo apsolutno nisu dozvoljeni. Da sam stvarno otvorio tvoje nebesko oko na tom nivou, možda bi odmah postao *qigong* majstor. Neki su već prije željeli postati *qigong* majstori. Ako bi njihovo nebesko oko sada bilo otvoreno, mogli bi lako liječiti bolesne. Zar te ja na taj način ne bi odveo na pogrešan put?

Dakle na kojem nivou ću ti otvoriti nebesko oko? Otvaram ti ga direktno na nivou vida mudrosti. Za još više nivoe tvoj *xinxing* nije dovoljan; ako je otvoreno na nižim nivoima, onda će stanje običnog ljudskog društva biti ozbiljno sabotirano. Na nivou vida mudrosti doduše ne posjeduješ sposobnost vidjeti stvari kroz zidove ili vidjeti unutar ljudskih tijela, ali možeš vidjeti pojave u drugim dimenzijama. Kakve to ima prednosti? To može pojačati tvoju vjeru u prakticiranje, ti zaista vidiš stvari koje svakodnevni ljudi ne mogu vidjeti, primjetićeš da one zaista postoje. Sasvim svejedno da li ti sada možeš vidjeti jasno ili nejasno, tvoje nebesko oko će biti otvoreno na tom nivou, to je dobro za tvoje prakticiranje. Kod onih koji stvarno kultiviraju Dafa i postavljaju stroge zahtjeve na povećanje svog *xinxinga*, nastupiće isto dejstvo ako čitaju ovu knjigu.

Šta određuje nivo nebeskog oka? Nije tako da već sve možeš vidjeti kada ti je nebesko oko otvoreno, to nije tako, postoji još podjela nivoa. Šta onda određuje nivo nebeskog oka? Za to postoje tri faktora: Prvi faktor je da čovjekovo nebesko oko od unutra prema vani mora imati jedno polje. Mi ga nazivamo esencijalni *qi*. Kakvu funkciju on ima? Kao kod televizora sa ekranom bez fluorescentnog sloja, nakon što ga upalimo, on je samo lampa, postoji samo svjetlo, ali nema slika. Upravo zato što postoji fluorescentni sloj, on može prikazivati slike. Naravno, ovaj primjer još ne odgovara u potpunosti. Jer mi vidimo slike direktno, dok se kod televizora one prikazuju na ekranu. Otprilike tako to mislim. To malo esencijalnog *qija* je izuzetno vrijedno, sastoji se od nečeg još esencijalnijeg, što se rafinira iz *de*-a. Obično je esencijalni *qi* kod svakog čovjeka drugačiji, među deset hiljada ljudi se možda mogu naći dva čovjeka koji se nalaze na istom nivou.

Nivo nebeskog oka je direktna manifestacija Fa u ovom našem kosmosu. On je nešto izvanredno i usko je povezan sa čovjekovim *xinxingom*; ako je čovjekov *xinxing* nizak, onda je njegov nivo nizak. Zato što je njegov *xinxing* nizak, gubi se puno od to malo njegovog esencijalnog *qija*. Ali jedan drugi čovjek ima vrlo visok *xinxing*, on u društvu svakodnevnih ljudi već od malih nogu veoma olako uzima ugled, dobit, međuljudske konflikte, lične interese, kao i sve osjećaje i žudnje, njegov esencijalni *qi* je možda ostao relativno dobro očuvan, zato on može vidjeti relativno jasno nakon što je njegovo nebesko oko otvoreno. Djeca ispod šest godina mogu vrlo jasno vidjeti nakon što im je nebesko oko otvoreno; također, vrlo ga je jednostavno otvoriti, sa jednom riječju se već može otvoriti.

Pod uticajem velikog strujanja i jakog negativnog uticaja običnog ljudskog društva, mnoge stvari koje ljudi smatraju ispravnim, zapravo su neispravne. Zar svaki čovjek ne želi dobro živjeti? Ako neko želi dobro živjeti, onda će možda povrijediti interese drugih ljudi, to bi moglo pojačati sebičnost i on će možda dobiti na račun drugih, šikanirati ili povrijediti druge. Zbog lične dobiti, on će se boriti i svađati se među svakodnevnim ljudima. Zar to nije u suprotnosti sa osobinama kosmosa? Zbog toga, to što ljudi smatraju ispravnim nije nužno ispravno. Pri odgajanju djece, odrasli obično pokušavaju djeci od malena govoriti: "Nauči se

snalaziti", kako bi djeca poslije u običnom ljudskom društvu mogla stati na svoje noge. Sa gledišta ovog našeg kosmosa je "biti snalažljiv" već samo po sebi pogrešno, jer mi govorimo o tome da se slijedi prirodan tok i da se mnogo ne mari za ličnu dobit. On je tako snalažljiv samo zato što želi dobiti lične interese. "Ako te neko šikanirao, trebaš se žaliti njegovom učitelju ili njegovim roditeljima", "Ako vidiš novac na zemlji, uzmi ga", tako se ono odgaja. Ako dijete od malena prihvati puno toga, s vremenom će u društvu svakodnevnih ljudi postati sve sebičnije, dobiće na račun drugih, izgubiće *de*.

Supstanca *de* ne nestaje nakon što je izgubljena, ona se prebacuje na druge ljude, ali esencijalni *qi* može nestati. Ako je neko od malena snalažljiv, svoje lične interese smatra vrlo važnim i samo je okrenut profitu, onda obično njegovo nebesko oko ne može jasno vidjeti nakon što je otvoreno. Ali to opet ne znači da u budućnosti više nikad neće moći jasno vidjeti. Zašto? Zato što se mi kroz kultivaciju želimo vratiti izvorištu i istinitom sebi. Kad neko stalno prakticira, stalno se dobija nazad i ponovo se uravnotežuje. Zato se mora govoriti o *xinxingu*, mi govorimo o cjelokupnom unaprijeđivanju i cjelokupnom oplemenjivanju. Ako je *xinxing* poboljšan, sve drugo se unaprijeđuje zajedno s njim; ako *xinxing* nije poboljšan, to malo esencijalnog *qija* nebeskog oka se ne da povratiti. To je taj princip.

Drugi faktor je sljedeći: Ako neko ima dobru osnovu, njegovo nebesko oko se također može otvoriti kad on sam prakticira. Često se neki ljudi uplaše kad im se nebesko oko po prvi put otvori. Zašto? Jer ljudi obično prakticiraju oko ponoći, kada vlada noćni mir. Dok on prakticira i prakticira, iznenada ispred sebe vidi veliko oko koje ga uplaši. On se tako jako uplaši da se nakon toga više ne usuđuje dalje prakticirati. Stvarno strašno! Tako veliko oko, koje žmirka i koje se sasvim jasno vidi. Zato ga neki nazivaju demon-oko, neki Buda-oko i tako dalje, u stvari je to tvoje vlastito oko. Naravno, kultivacija zavisi od tebe samog, *gong* zavisi od Učitelja. Čitav proces razvijanja *gonga* jednog kultivatora u drugim dimenzijama je vrlo komplikovan proces, ne samo u jednoj drugoj dimenziji, nego se tijela u svim dimenzijama, u svakoj dimenziji, mijenjaju. Možeš li sam to postići? Ne. Sve je to učitelj aranžirao, učitelj to čini. Zato se kaže: „Kultivacija zavisi od tebe samog, *gong* zavisi od učitelja.“ Ti samo imaš tu želju i tu misao, učitelj je taj koji to stvarno čini.

Neki su kroz prakticiranje sami otvorili svoje nebesko oko. Kažemo, zapravo, da je to tvoje oko, ali ga ti ne možeš sam razviti. Neko ima učitelja; kad učitelj vidi da je tvoje nebesko oko otvoreno, razviće oko za tebe, ono se zove "istinsko oko". Naravno, neki nemaju učitelja, ali postoji učitelj koji je u prolazu. U Buda školi se kaže: "Posvuda ima Buda". Oni su svuda, ima ih tako puno. Neki također kažu: Jedan metar iznad glave već postoje božanstva i inteligentna bića. To znači da ih jednostavno ima jako puno. Učitelj koji je u prolazu vidi da jako dobro prakticiraš i da je tvoje nebesko oko već otvoreno i da ti samo još fali oko, onda će on razviti oko za tebe, to oko također važi za oko koje si ti sam isprakticirao. Jer, pri spasenju ljudi se ne govori o uslovima i troškovima, ne traži se nadoknada i ne pridaje se važnost sopstvenom ugledu. To je mnogo uzvišenije nego uzorne ličnosti među svakodnevnim ljudima, to sve proizilazi iz dobrodušnosti.

Nakon što je nebesko oko otvoreno, može se pojaviti ovakvo stanje: Svjetlo veoma jako zasljepljuje i oči su nadražene. Zapravo nisu nadražene tvoje oči, nego tvoja epifiza, ali ti imaš osjećaj kao da su ti oči zasljepljene. To je zato što ti još uvijek nemaš to oko. Nakon što ti se to oko usadi, više nećeš imati osjećaj da te zasljepljuje. Neki od nas mogu osjetiti ili vidjeti to oko. Jer ono ima iste osobine kao i univerzum, vrlo je prostodušno i znatiželjno, ono gleda prema unutra da bi vidjelo je li tvoje nebesko oko već otvoreno i može li vidjeti, ono

gleda prema tvojoj unutrašnjosti. U tom trenutku je tvoje nebesko oko također otvoreno i gleda te; kad ga odjednom vidiš, uplašićeš se. Zapravo je to tvoje oko. Poslije ćeš vidjeti kroz to oko, bez tog oka ne možeš vidjeti ama baš ništa; čak i ako je već otvoreno, ne možeš vidjeti.

Treći faktor je da se probijaju nivoi i pokazuju se razlike različitih dimenzija; to je pitanje koje stvarno određuje nivoe. Da bi vidio stvari, pored glavnog kanala, čovjek ima i mnogo sporednih kanala. U Buda školi se kaže da je svaka pora oko; u Tao školi se kaže da su svi *qiao*, naime sve akupunkturne tačke, oči. Naravno, sve to što oni kažu je jedna forma transformacije Fa na tijelu, dakle ne postoji mjesto koje ne može vidjeti.

Nivoi o kojima mi govorimo su ipak drugačiji od onih gore spomenutih. Pored glavnog kanala, postoji još nekoliko važnih sporednih kanala koji se nalaze na obrvama, iznad i ispod očnih kapaka i na korijenu nosa. Oni određuju probijanje nivoa. Naravno, ako običan kultivator može vidjeti sa svim ovim mjestima, on je već probio vrlo visoke nivoe. Neko može vidjeti i s očima, on je uspješno kultivirao i svoje oči, tako da one također posjeduju različite forme natprirodnih sposobnosti. Ali ako on ne može dobro vladati ovim očima, on često vidi ove stvari, ali one ne vidi. To također ne ide. Zato neki često vide ovu stranu s jednim okom, a onu stranu s drugim. Ispod ovog oka (desnog oka) nema sporednog kanala, jer je to direktno povezano sa Fa. Kada ljudi čine loše stvari, koriste prije desno oko, zato ispod desnog oka ne postoji sporedni kanal. To je nekoliko bitnih sporednih kanala, koji se pojavljuju pri kultivaciji Fa-unutar-trostrukog-svijeta.

Kad neko izađe iz kultivacije Fa-unutar-trostrukog-svijeta i nalazi se na krajnje visokom nivou, pojaviće se još jedno oko koje izgleda kao mrežasto oko. Naime, na gornjoj polovici čitavog lica nastaje veliko oko u kojem se nalazi nebrojeno malih očiju. Neki vrlo visoki veliki prosvijetljeni iskultivirali su jako puno očiju koja se nalaze po čitavom licu. Sve ove oči vide kroz veliko oko, one mogu vidjeti sve što žele vidjeti, jednim pogledom vide sve nivoe. Danas zoolozi i entomolozi proučavaju muhu. Oči kod muha su jako velike, gledano kroz mikroskop u njima postoji nebrojeno malih očiju i to se zove mrežasto oko. Na krajnje visokim nivoima možda se može pojaviti takvo stanje; tek kad je neko puno viši od Tathagate može se pojaviti tako nešto. Ali svakodnevni ljudi to ne mogu vidjeti, čovjek na običnim nivoima ne može vidjeti njegovo postojanje; može se samo vidjeti da on izgleda kao običan čovjek - jer se ono nalazi u drugoj dimenziji. Time je objašnjeno probijanje nivoa, naime pitanje mogućnosti probijanja određene dimenzije.

Ja sam vam najvećim dijelom već objasnio strukturu nebeskog oka. Kada ti vanjskom silom otvorimo nebesko oko, tada to ide relativno brzo i jednostavno. Dok objašnjavam nebesko oko, svako od prisutnih će osjetiti da se čelo zateže i da se mišići stežu i buše prema unutra. Je li to tačno? Tačno je. Svako od ovdje prisutnih, ko stvarno odbaci vezanosti i uči Falun Dafa, može to osjetiti, snaga je također vrlo jaka i pritišće prema unutra. Mi otvaramo tvoje nebesko oko dajući ti *gong* koji je specijalno namijenjen otvaranju nebeskog oka. Istovremeno šaljemo *falun* da koriguje i nadopuni nebesko oko. Dok objašnjavamo nebesko oko, otvorićemo nebesko oko svakom ko kultivira Falun Dafa, ali neće nužno svako moći jasno vidjeti, također neće nužno svako moći vidjeti, to je direktno povezano sa samim tobom. Nema veze ako ne možeš vidjeti, kultiviraj se mirno dalje. Sa neprestanim povišenjem tvog nivoa, postepeno ćeš vidjeti i to sve jasnije. Sve dok se kultiviraš, dok se kultiviraš sa velikom odlučnošću, sve što si izgubio može se ponovo dobiti.

Relativno je teško sam otvoriti nebesko oko. Objasniću nekoliko načina na koje neko sam može otvoriti nebesko oko. Kada na primjer neko od nas pri meditaciji posmatra čelo i nebesko oko, ne osjeća ništa osim tame na čelu. Vremenom će osjetiti da čelo postepeno postaje bijelo. Nakon što se neko vrijeme kultivirao, primjećuje da čelo postepeno postaje svjetlije, a zatim crvenkasto. U tom momentu se rascvjetava kao cvijet, kao na filmu ili televiziji, pupoljak se iznenada rascvjetava, tako nešto će se pojaviti. Najprije je crvenkasto bilo pljosnato, odjednom se u sredini ispučuje, zatim se rascvjetava laticu po laticu. Ako ga sam želiš potpuno rascvjetati, nije dovoljno ni 8 ili 10 godina, jer je čitavo nebesko oko začepljeno.

Kod nekih ljudi nebesko oko nije sasvim začepljeno, ono ima kanal, ali zato što on ne prakticira, nema ni energiju. Zato će se dogoditi da mu se prilikom prakticiranja iznenada pred očima pojavi jedna crna okrugla stvar. Nakon nekog vremena prakticiranja polako postaje bijela, a zatim svjetlija i svjetlija i pomalo zasljepljuje. Tada neko kaže: "Vidio sam sunce." ili "Vidio sam mjesec." U stvari nisi vidio ni sunce ni mjesec. Šta si onda vidio? Upravo taj kanal. Neko relativno brzo probija nivoe; nakon što mu je ovo oko usađeno, može gledati s njim. Kod nekoga je ipak vrlo teško; kad prakticira, on trči prema vani kroz ovaj kanal, koji izgleda kao tunel ili bunar. Čak i u snu ima osjećaj da trči prema vani. Neki imaju osjećaj da jašu, neki lete, neki trče, neki jure sa nekim vozilom prema vani, ali oni uvijek imaju osjećaj da nikad ne mogu dostići kraj, jer je vrlo teško sam otvoriti nebesko oko. U Tao školi se ljudsko tijelo smatra malim kosmosom. Razmislite, ako je ono mali kosmos, onda je udaljenost od čela do epifize veća od 108 hiljada *li*-ja, zato on uvijek ima osjećaj da neprekidno juri prema vani, a da ipak nikad ne dostiže kraj.

U Tao školi se ljudsko tijelo smatra malim kosmosom, to ima puno smisla. Time se ne misli da struktura organa tijela liči na strukturu kosmosa, ne misli se na formu postojanja tijela u ovoj našoj materijalnoj dimenziji. Mi pitamo: Kakvo je to stanje ispod ćelija fizičkog tijela, koje današnja nauka spoznaje? To su različiti molekularni sastavni dijelovi, ispod molekula su atomi, protoni, atomska jezgra, elektroni i kvarkovi. Najmanja čestica koja se sada proučava je neutrino. Šta su onda najmanje čestice? To je stvarno teško proučiti. U svojim poznim godinama, Shakyamuni je rekao sljedeće: "Prema vani bezgranično veliko, prema unutra bezgranično malo." Šta to znači? Na nivou Tathagata, on u području velikog ne može vidjeti granicu kosmosa, u području malog, on ne može vidjeti najmanje djeliće materije. Zato je on rekao: "Prema vani bezgranično veliko, prema unutra bezgranično malo."

Shakyamuni je još govorio o učenju tri hiljade velikih svjetova. Rekao je da u ovom našem kosmosu, u ovom našem sistemu Mliječnog puta postoji tri hiljade planeta na kojima postoji nešto slično nama ljudima sa tijelom od krvi i mesa. Također je još rekao da u jednom zrnu pijeska postoji još jednom takvih tri hiljade svjetova. Zrno pijeska je kao kosmos, unutra također postoje ljudi sa inteligencijom kao i mi i također postoje takve planete, planine i rijeke. To zvuči veoma mistično! Ako je to tako, razmislite, postoji li unutra još zrna pijeska ili ne? Postoji li još tri hiljade velikih svjetova u tim zrnima pijeska? Postoji li onda još zrna pijeska u tim tri hiljade velikih svjetova? I postoji li opet tri hiljade velikih svjetova u tim zrnima pijeska? Dakle, na nivou Tathagata se ne može vidjeti kraj.

Kod molekularnih ćelija čovjeka je isto tako. Ljudi se pitaju koliko je velik univerzum. Ja vam kažem, ovaj univerzum ima granicu, ali na nivou Tathagata se on čak smatra bezgraničnim i beskonačno velikim. Ali unutrašnjost čovjekovog tijela je od molekula do čestica u mikroskopskom isto tako velika kao i ovaj univerzum. To zvuči veoma mistično. Pri stvaranju jednog čovjeka ili jednog života, u krajnje mikroskopskom su za njega već

sastavljeni određeni sastavni dijelovi života i njegovo biće. Zato je istraživanje naše moderne nauke još prilično udaljeno od toga. U poređenju sa živim bićima na planetama u čitavom kosmosu, na kojima postoji visoka inteligencija, naučno-tehnički nivo našeg čovječanstva je vrlo nizak. Mi čak ne možemo probiti ni druge dimenzije koje postoje u isto vrijeme i na istom mjestu, dok se NLO-i vanzemaljaca već direktno kreću u drugim dimenzijama u kojima postoje drugačiji pojmovi vrijeme-prostora. Zato se oni mogu iznenada pojaviti kada žele doći i opet iznenada nestati kada žele otići, tako brzo da ljudski nazori to ne mogu prihvatiti.

Kada smo objašnjavali nebesko oko, dotakli smo ovo pitanje. Dok ti u tunelu trčiš prema vani, imaćeš osjećaj da je bezgraničan. Neki možda vide drugu situaciju: On nema osjećaj da trči duž jednog tunela, nego duž jedne beskonačno duge, široke ulice, s obje strane ulice se nalaze brda, rijeke i gradovi, on uvijek trči prema vani. To zvuči još mističnije. Sjećam se da je jedan *qigong* majstor rekao: "Čak u jednoj jedinoj čovjekovoj pori postoji grad u kojem voze vozovi i auta." Kada su drugi to čuli, čudili su se i smatrali su to prilično nevjerovatnim. Znači da među česticama materije postoje molekule, atomi i protoni i još se dalje istražuje. Ako umjesto jedne jedine tačke možeš vidjeti površinu dotičnog nivoa, kao na primjer površinu nivoa molekula, površinu nivoa atoma, površinu nivoa protona, odnosno površinu nivoa atomskih jezgri, onda možeš vidjeti forme egzistencije u različitim dimenzijama. Svi predmeti, uključujući i ljudska tijela, postoje istovremeno sa nivoima dimenzija univerzuma i povezani su s njima. Pri istraživanju čestica materije u modernoj fizici, istražuje se samo jedna jedina čestica, pri čemu se ona analizira i cijepa, nakon cijepanja atomskog jezgra, istražuju se njegovi sastavni dijelovi. Ako bi postojao takav uređaj, s kojim se može promatrati cjelokupno utjelovljenje svih sastavnih dijelova atoma ili svih molekula na ovom nivou, ako bi se takva slika mogla vidjeti, onda bi ti probio ovu dimenziju i vidio pravu pojavu egzistencije drugih dimenzija. Ljudsko tijelo odgovara vanjskim dimenzijama i ono ima sve ove forme postojanja.

Ako neko sam otvara nebesko oko, postoji još nekoliko drugih različitih stanja, maloprije smo uglavnom objasnili nekoliko opštih pojava. Neki također vide da se nebesko oko okreće; oni koji prakticiraju puteve kultivacije Tao škole često vide da se nešto u nebeskom oku okreće, *taiji*-ploča se sa jednim "pras" rascjepljuje, nakon toga on vidi slike. Ali nije da u tvojoj glavi postoji *taiji*, nego ti je učitelj već na početku usadio niz stvari, jedna od njih je *taiji*. Učitelj je zatvorio tvoje nebesko oko; kada se ono otvori, *taiji* se rascjepljuje. On je to specijalno za tebe aranžirao i ono nije oduvijek bilo u tvojoj glavi.

Ima i nekih koji teže otvaranju nebeskog oka, ali što više prakticiraju, to se ono manje otvara. Zašto? Ni njima samima nije jasno zašto. Glavni razlog je taj da se ne smije težiti nebeskom oku. Što više težiš, tim više ga nećeš dobiti. Što je težnja veća, ne samo da se ono ne otvara, nego također nešto ističe iz nebeskog oka, nešto što nije ni crno, ni bijelo, to će pokriti nebesko oko. Vremenom se gradi jako veliko polje i sve više toga ističe van. Kad nebesko oko još uvijek nije otvoreno, čovjek još više teži tome i zato još više toga ističe, tako da na kraju obavlja njegovo cijelo tijelo. To također može biti jako gusto i može imati veliko polje. I ako je nebesko oko ovog čovjeka stvarno otvoreno, on ipak ne može vidjeti, jer se sam blokirao svojom vezanošću. Samo ako kasnije više ne misli na to i sasvim se odrekne te vezanosti, onda se ono polako razgrađuje. Ali to se da odstraniti tek nakon teškog i vrlo dugog procesa kultivacije, koji stvarno nije bio neophodan. Neko to ne zna i, iako mu je njegov učitelj stalno ponavljao da ne smije težiti tome, on ne vjeruje u to i uvijek iznova teži tome i na kraju postiže suprotno.

Natprirodna sposobnost gledanja na daljinu

Jedna natprirodna sposobnost, koja je direktno povezana sa nebeskim okom, zove se gledanje na daljinu. Neko kaže: Ja sjedim ovdje, ali mogu vidjeti događaje u Pekingu ili u SAD, mogu vidjeti drugu stranu zemaljske kugle. Neki to ne mogu razumjeti, ni pomoću nauke se ne može razumjeti. Kako je to moguće? Neki objašnjavaju ovako, neki onako, ali se još uvijek ne može objasniti zašto čovjek može imati tako veliku sposobnost. U stvari to nije tako. Ljudi koji se kultiviraju na nivou Fa-unutar-trostrukog-svijeta nemaju ovu sposobnost. To što on vidi, uključujući njegovo gledanje na daljinu i mnoge, mnoge posebne natprirodne sposobnosti, sve djeluju unutar jedne određene dimenzije, ni najveće ne prekoračuju ovu materijalnu dimenziju u kojoj živi naše čovječanstvo; one obično ne mogu prekoračiti sopstveno dimenzionalno polje.

U jednoj određenoj dimenziji naše tijelo ima jedno polje, ali to polje nije isto polje u kojem se nalazi *de*; ona se ne nalaze u istoj dimenziji, ali obim oba polja je jednako velik. Ovo polje ima odgovarajuću vezu s kosmosom; sve što postoji na onoj strani kosmosa i što se može reflektovati u njegovom polju, može se reflektovati. To je vrsta sjene i nije stvarna. Na primjer, na Zemlji postoje Amerika i Washington; u njegovom polju se također reflektuju Amerika i Washington, ali su oni sjene. Ipak, sjene su također vrsta materijalne egzistencije, one su u odgovarajućim međusobnim vezama i mijenjaju se prema promjenama na drugoj strani. Zato je takozvana natprirodna sposobnost gledanja na daljinu takva da on vidi stvari u području svog sopstvenog dimenzionalnog polja. Nakon što izađe iz kultivacije Fa-unutar-trostrukog-svijeta, on više ne vidi na ovaj način, nego direktno, to se zove "božanske sposobnosti Buda Fa" i one su neuporedivo moćne.

Kako funkcioniše natprirodna sposobnost gledanja na daljinu u Fa-unutar-trostrukog-svijeta? To ću vam detaljno objasniti. U dimenziji tog polja, na čovjekovom čelu postoji ogledalo; kod onih koji ne prakticiraju, ono je okrenuto prema njima, kod praktikanata se okreće. U trenutku kada se natprirodna sposobnost gledanja na daljinu pojavi, ono se počinje okretati tamo-vamo. Znači da se kod filmova prikazuju 24 slike u sekundi da bi se proizvele neprekidne kretnje. Kada se prikazuje manje od 24 slike u sekundi, slike preskaču. Ogledalo se okreće brže od 24 puta u sekundi, ono utiskuje reflektovane stvari na površinu ogledala i okreće se da bi ti mogao vidjeti slike, zatim se opet okreće nazad i briše slike. Ponovo reflektuje, opet se okreće, pa opet obriše slike, ogledalo se stalno okreće, tako da vidiš pokretne slike. To znači da ono reflektuje stvari u tvom dimenzionalnom polju i pokazuje ti ih, a stvari u tom dimenzionalnom polju su preslikane iz makrokosmosa.

Kako se onda mogu vidjeti stvari koje su iza leđa? To ogledalo je tako malo, zar stvarno može reflektovati sve oko tvog tijela? Kao što znate, kad je nebesko oko toliko otvoreno da prevazilazi nivo nebeskog vida i uskoro dostiže nivo vida mudrosti, tada se probija ova naša dimenzija. U tom trenutku, kada se proboj još nije sasvim, ali se skoro desio, desiće se promjena na nebeskom oku: Ono vidi da predmeti više nisu tu, nema ljudi, nema zidova, nema više ničeg, supstance više ne postoje. Znači, kad u toj određenoj dimenziji pogledaš u dubinu, ustanovićeš da su ljudi nestali i da samo još jedno ogledalo stoji u području tvog dimenzionalnog polja. Ovo ogledalo u tvom dimenzionalnom polju je veliko kao tvoje cjelokupno dimenzionalno polje, zato ono može reflektovati sa svih strana, kada se okreće unutar njega. Ono može reflektovati sve u području tvog dimenzionalnog polja, dok god je to reflektovano iz kosmosa. To je natprirodna sposobnost gledanja na daljinu o kojoj mi govorimo.

Kada naučnici koji istražuju ljudsko tijelo testiraju ovu natprirodnu sposobnost, često se događa da je osporavaju. Razlog je sljedeći: Recimo da neko želi vidjeti šta radi njegov rođak u Pekingu i nakon što su date opšte informacije o tom rođaku, osoba sa sposobnošću gledanja na daljinu već vidi. On opisuje kako izgleda kuća, kako čovjek ulazi kroz vrata u sobu, kako je soba uređena. Sve je tačno. Šta čovjek tamo radi? On kaže da čovjek upravo piše. Kako bi se to provjerilo, taj rođak se nazove telefonom: Šta sad radiš? Upravo jedem. Zar to onda nije različito od onog što je on vidio? Iz tog razloga se ova natprirodna sposobnost prije osporavala. Ali okolina koju je vidio je bila potpuno tačna. To je zato što postoji vremenska razlika između ovog našeg prostora i ovog vremena, koje nazivamo vrijeme-prostor, i vrijeme-prostora te dimenzije u kojoj postoji natprirodna sposobnost; vremenski pojmovi na obje strane nisu isti. On je prije pisao, a sad jede, to je vremenska razlika. Dakle, ako bi naučnici koji istražuju ljudsko tijelo polazili od uobičajenih teorija i izvodili naučne pretpostavke i to istraživali prema današnjoj nauci, bilo bi uzalud, čak ako bi prošlo još 10.000 godina. To je zato što je to nešto što prevazilazi obične ljude, ljudsko razmišljanje se mora promijeniti; takve stvari se više ne mogu razumjeti na taj način.

Natprirodna sposobnost vidovitosti

Postoji još jedna natprirodna sposobnost, koja je direktno povezana s nebeskim okom, ona se zove vidovitost. Trenutno postoji šest natprirodnih sposobnosti koje su priznate u svijetu, u njih se ubraja nebesko oko, gledanje na daljinu i također vidovitost. Šta znači vidovitost? To znači da neko može nešto znati o budućnosti i prošlosti nekog čovjeka; u velikim razmjerama može znati o usponu i propasti društva; u još većim razmjerama može znati zakonitosti promjena cijelih nebeskih tijela. To je natprirodna sposobnost vidovitosti. Zato što se materija kreće prema određenim zakonitostima, bilo koji predmet u određenoj dimenziji ima svoje forme postojanja u mnogim, mnogim drugim dimenzijama. Na primjer, kada se čovjekovo tijelo pomjera, zajedno s njim se pomjeraju sve ćelije u tijelu; u mikroskopskom će se također zajedno s njim pomjerati sve molekule, protoni, elektroni, najmanji, najsitniji sastavni dijelovi. Ali oni ipak imaju svoje nezavisne forme egzistencije, i forme tijela u drugim dimenzijama će se promijeniti.

Zar se ne kaže da materija ne nestaje? U jednoj određenoj dimenziji je sve što su ljudi uradili nešto što materijalno postoji. Kad oni na primjer nešto urade pokretom ruke; sve što se uradilo ostavlja iza sebe sliku i informacije. U drugim dimenzijama one neće nestati i postojaće tamo zauvijek. Kada ljudi sa natprirodnim sposobnostima vide pojave iz prošlosti koje tamo postoje, oni već znaju šta se desilo. Kada u budućnosti budeš imao natprirodnu sposobnost vidovitosti, moći ćeš vidjeti formu našeg današnjeg kursa, ona će i dalje postojati, ona već sada tamo postoji. Kad čovjek dođe na svijet, istovremeno cijeli njegov život već postoji u jednoj specijalnoj dimenziji u kojoj ne postoji pojam vremena; kod nekih ljudi čak ne postoji samo jedan život.

Možda neko sad misli: Zar onda naše vlastite težnje da se promijenimo nisu nepotrebne? On to ne može prihvatiti. Zapravo, vlastita težnja može promijeniti sitnice u životu, neke sitnice se daju malo promijeniti vlastitom težnjom. Ali upravo kroz tvoj napor da to promijeniš možda ćeš dobiti karmu, jer inače ne bi postojalo pitanje stvaranja karme i također ne bi postojalo ni pitanje činjenja dobrog ili lošeg. Kad neko uporno nastavlja to raditi, on će sebi prigrabiti tuđu korist, tada je učinio nešto loše. Zato se pri kultivaciji stalno govori da treba "slijediti prirodan tok". Tako glasi princip. Jer, tvojim naporima ćeš povrijediti druge. Zapravo, te stvari ne postoje u tvom životu, one prvobitno pripadaju nekom

drugom, ali si ti ipak dobio te stvari koje su prvobitno pripadale nekom drugom u društvu i onda ti to duguješ tom drugom.

Kada se radi o velikim stvarima, običan čovjek ih uopšte ne može promijeniti. Ipak, postoji način na koji to može biti promijenjeno: Taj čovjek uvijek čini loše stvari i čini sva moguća zlodjela. On može promijeniti svoj život, ali mu onda predstoji potpuno uništenje. Na visokim nivoima vidimo da nakon smrti čovjekova duša nije umrla. Kako to da duša nije umrla? Možemo vidjeti da je mrtav čovjek u mrtvačnici zapravo samo ćelije njegovog ljudskog tijela u ovoj našoj dimenziji. Svo ćelijsko tkivo unutrašnjih organa i tijela, čitavo tijelo, ćelije u ovoj dimenziji se raspadaju. Ali tijela u drugim dimenzijama, koja se sastoje od sićušnih materijalnih čestica koje su još manje od molekula, atoma, protona i tako dalje, u drugim dimenzijama uopšte nisu umrla, ona i dalje postoje u drugim dimenzijama, u dimenzijama na mikroskopskim nivoima. Ljudi koji su počinili sva moguća zlodjela nalaze se pred potpunim raspadanjem svih svojih ćelija, u budizmu se to naziva "potpuno uništenje tijela i duha".

Postoji još jedan način na koji čovjek može promijeniti cijeli svoj život i to je jedini način: taj čovjek od sada kreće putem kultivacije. Zašto njegov život može biti promijenjen kada krene putem kultivacije? Ko to može tek tako promijeniti? Jer, kad taj čovjek želi krenuti putem kultivacije, čim se ta misao pojavi, ona uzdrma Svijet-deset-smjerova. Koncept univerzuma Buda škole je teorija svijeta deset nebeskih smjerova. Jer, sa stanovišta viših bića, čovjek ne živi da bi bio čovjek. S njihovog gledišta, život čovjeka je nastao u kosmičkim prostorima i ima iste osobine kao i kosmos, dobrodušan je i sastavljen je od supstanci *Zhen, Shan, Ren*. Ali ti životi također imaju međusobne veze; kada su u zajednici nastale društvene veze, neki su postali loši i zato su pali dole; na tom nivou ponovo nisu mogli ostati, postali su još gori i opet su pali za jedan nivo; padaju, padaju, padaju, na kraju padaju na nivo svakodnevnih ljudi.

Na ovom nivou bi čovjek zapravo trebao biti uništen, odstranjen. Ali su veliki prosvjetljeni iz njihovog velikog milosrđa specijalno napravili takvu dimenziju kao što je ova dimenzija našeg ljudskog društva. U ovoj dimenziji on još dobija ljudsko, fizičko tijelo i ovaj par očiju, koji je ograničen na to da vidi predmete u ovoj našoj materijalnoj dimenziji, što znači da je pao u maglu i njemu nije dozvoljeno vidjeti pravu pojavu kosmosa, koja se u svim ostalim dimenzijama može vidjeti. U ovoj magli, u ovom stanju dobija ovu šansu. Jer, u magli je najtegnije; ovo tijelo je dobio da bi patio. Ako se čovjek iz ove dimenzije može vratiti nazad prema gore - kod prakticiranja u Tao školi se govori o "povratku izvorištu, istinskom sebi" - ako on ima srce za kultivaciju, to znači da se pojavila njegova Buda-priroda; ovakvo srce se smatra najvrijednijim i njemu se onda može pomoći. U takvom okruženju punom patnje čovjek se ipak nije izgubio i još se želi i vratiti, zato će mu biti pomognuto, bezuslovno pomognuto, u bilo čemu mu se može pomoći. Zašto ovo možemo učiniti za kultivatore, ali ne i za obične ljude? Princip je upravo takav.

Dakle, ako ti kao običan čovjek želiš biti izliječen, ništa ti ne može pomoći. Svakodnevni ljudi ostaju upravo svakodnevni ljudi, svakodnevni ljudi trebaju biti upravo u stanju društva svakodnevnih ljudi. Mnogi kažu: Ali Buda spašava sva bića, u Buda školi se ipak govori o sveobuhvatnom spasenju svih bića. Kažem ti, pogledaj u svim budističkim klasičnim djelima, nigdje ne stoji da otklanjanje bolesti svakodnevnih ljudi spada u sveobuhvatno spasenje svih bića. Zadnjih godina su upravo lažni *qigong* majstori ovo sabotirali i poremetili. Istinski *qigong* majstori, koji su prokrčili put, uopšte nisu govorili o tome kako da liječiš bolesti drugih. Oni bi te samo naučili tome kako da sam prakticiraš,

odstraniš svoje bolesti i održavaš svoje zdravlje. Ti si običan čovjek, kako bi već mogao liječiti, nakon što si učio samo nekoliko dana? Zar to nije prevara? Ne hrani li se time vezanost? Ti težiš ugledu i dobitku, težiš neobičnim stvarima da bi se razmetao s tim među svakodnevnim ljudima! To apsolutno nije dozvoljeno. Zbog toga, što ljudi više nečemu teže, to manje toga dobijaju. Tako nešto ti nije dozvoljeno, također ti nije dozvoljeno na ovaj način proizvoljno sabotirati društveno stanje svakodnevnih ljudi.

U ovom kosmosu postoji ovaj princip: Ako se želiš vratiti izvorištu, vratiti se istinskom sebi, drugi će ti pomoći. Prema njihovom gledištu, čovjekov život se treba upravo vratiti, a ne ostati među svakodnevnim ljudima. Kada bi čovječanstvo bilo oslobođeno od bolesti, vodilo vrlo ugodan život, ti ne bi htio postati božanstvo čak ni kad bi te molili. Nema bolesti, nema patnje, sve što poželiš, dobiješ, kako bi to bilo lijepo, to bi stvarno bio božanski svijet. Ali ti si pao tu dole jer si postao loš, zato ti neće biti ugodno. U magli čovjek lako čini loše stvari, u budizmu se to zove "kružni tok karmičke odmazde". Dakle, kad neki ljudi proživljavaju teškoće ili nešto loše, oni obično otplaćuju svoju karmu u kružnom toku karmičke odmazde. U budizmu se također kaže da svugdje ima Buda. Kada bi jedan Buda mahnuo rukom, čitavo čovječanstvo bi bilo oslobođeno od bolesti, to je garantovano moguće. Zašto mnogobrojni Bude to ne čine? On podnosi ovu patnju jer je to prije skrivio svojim lošim djelima. Ako bi ga izliječio, to bi značilo prekršiti princip kosmosa i da ovaj čovjek smije činiti loše, a da ne mora otplatiti svoje dugove. To nije dozvoljeno. Zato svako održava stanje društva svakodnevnih ljudi, niko ga neće sabotirati. Jedina mogućnost postići dobro stanje bez bolesti i stvarno spasenje je isključivo kultivacija! Potaknuti ljude na kultivaciju ispravnog Fa je tek pravo sveobuhvatno spasenje svih bića.

Kako onda mnogi *qigong* majstori mogu liječiti bolesti? Zašto oni govore o liječenju? Neki su možda došli na ovo pitanje. Većina njih se ne nalazi na ispravnim putevima. Tokom kultivacije, pravi *qigong* majstor pomaže drugima iz milosrđa i suosjećanja, jer vidi da sva bića pate, to je dozvoljeno. Ali on ih ne može stvarno izliječiti, on za tebe bolesti samo može privremeno staviti pod kontrolu ili ih pomjeriti u budućnost: Ako sad nisi bolestan, bićeš kasnije, dakle bolesti su odgođene; ili ih on za tebe transformiše, tako da se one prenose na članove tvoje porodice. Ali stvarno potpuno odstraniti karmu za tebe, on to ne može, nije dozvoljeno to proizvoljno raditi za obične ljude, to se može uraditi samo za kultivatore. Takav je princip.

Sveobuhvatno spasenje svih bića, o kojem se govori u Buda školi, znači: Izvesti te iz stanja svakodnevnih ljudi koje je najmučnije i dovesti te do visokih nivoa, tako da više nikad ne patiš i da budeš spašen. To je smisao ovih riječi. Nije li Shakyamuni govorio o dolasku na drugu stranu putem nirvane? To je istinski smisao sveobuhvatnog spasenja svih bića o kojem je on govorio. Kad bi ti bilo dozvoljeno uživati sreću među svakodnevnim ljudima i kad bi imao dovoljno novca, da je čak i tvoj krevet obložen novčanicama i da nemaš nikakvih patnji, ne bi više htio postati božanstvo čak ni kad bi te molili. Zato što si kultivator, tvoj životni put može biti promijenjen, samo kroz kultivaciju može biti promijenjen.

Natprirodna sposobnost vidovitosti pokazuje se u toj formi da se na čovjekovom čelu nalazi mali ekran, kao kod televizora. Kod nekih na čelu, kod nekih u blizini čela, kod nekih unutar čela. Neki ga mogu vidjeti zatvorenih očiju. Ako je ta sposobnost vrlo jaka, neki ga mogu vidjeti otvorenih očiju. Ali drugi ga ne mogu vidjeti, jer je to nešto što je u području njegovog dimenzionalnog polja. Dakle, to znači da, nakon što se ova natprirodna sposobnost pojavila, postoji još jedna natprirodna sposobnost koja služi kao prenosnik i koja te pojave, koje se vide u drugim dimenzijama, preslikava ovamo i tako se one vide u nebeskom oku. I

budućnost i prošlost čovjeka se mogu vidjeti i to vrlo precizno. Svejedno koliko proricanje sudbine može biti tačno, sitnice i pojedinosti se ne mogu spoznati kroz proračune. Ali on može vrlo jasno vidjeti, može čak vidjeti u kojoj je to godini, također može prepoznati pojedinosti promjena, jer je to što je vidio istinski odraz ljudi ili predmeta iz različitih dimenzija.

Svima koji kultiviraju Falun Dafa nebesko oko će biti otvoreno. Ali ostale natprirodne sposobnosti, o kojima smo poslije govorili, neće biti otvorene. S postepenim povisivanjem nivoa, natprirodna sposobnost vidovitosti će se sama od sebe pojaviti, u budućnosti ćete se susresti s tako nečim prilikom kultivacije. Kada se ova natprirodna sposobnost pojavi, već ćete znati o čemu se radi, zato vam svima objašnjavamo ove Fa i ove principe.

Izvan pet elemenata, napustiti Tri sfere

Šta znači "Izvan pet elemenata, napustiti Tri sfere"? To je vrlo delikatna tema. Prije su mnogi *qigong* majstori govorili o tome i naišli su na oštre prigovore onih koji ne vjeruju u *qigong*: "Ko je od vas *qigong* praktikanata izašao iz pet elemenata, ko se od vas ne nalazi više u Tri sfere?" Neki nisu *qigong* majstori, nego su se sami prozvali *qigong* majstorima. Ako to ne mogu objasniti, onda bi trebali šutjeti, ali se oni ipak usuđuju pričati o tome, zato su im drugi zatvorili usta. To je krugovima kultivatora prouzrokovalo veliku štetu i sa sobom donijelo veliku zbrku, tako da su onda drugi to iskoristili kako bi napali *qigong*. "Izvan pet elemenata, napustiti Tri sfere" je izreka iz kultivacijskih krugova, ona potiče iz religija, nastala je u religijama. Zato ovu temu ne možemo objasniti, a da ne uzmemo u obzir istorijsku pozadinu i tadašnju situaciju.

Šta znači "izvan pet elemenata"? Stara kineska fizika, kao i današnja fizika, smatraju da je učenje pet elemenata iz Kine ispravno. Metal, drvo, vatra, voda i zemlja, ovih pet elemenata grade sve stvari u našem univerzumu. To je činjenica i zato govorimo o ovih pet elemenata. Da je čovjek izašao izvan pet elemenata, u današnjem jeziku znači da je izašao izvan ovog našeg materijalnog svijeta. To zvuči stvarno vrlo nevjerovatno. Razmislite, *qigong* majstori imaju *gong*. Ja sam testiran, mnogi *qigong* majstori su također testirani da bi im se izmjerila energija. Jer, materijalni sastavni dijelovi *gonga* mogu biti ustanovljeni mnogim našim današnjim mjernim uređajima. To znači, čim postoji odgovarajući mjerni uređaj za sastavne dijelove *gonga* jednog *qigong* majstora, može se izmjeriti postojanje *gonga*. Današnji uređaji kroz mjerenja mogu utvrditi infracrvene zrake, ultraljubičaste zrake, ultrazvuk, infrazvuk, elektricitet, magnetne zrake, gama zrake, atome i neutrone. *Qigong* majstori imaju sve ove supstance, a neke supstance koje *qigong* majstori emituju ne mogu se izmjeriti, jer za njih ne postoji mjerni uređaj. Sve dok za to postoji uređaj, sve se može utvrditi kroz mjerenja i pri tome je utvrđeno da su supstance koje *qigong* majstori emituju krajnje bogate.

Pod dejstvom određenog elektromagnetnog polja, *qigong* majstori mogu emitovati jak i prekrasan svjetlosni sjaj. Što je veći *gong*, to je veće energetska polje. Svakodnevni ljudi također imaju taj svjetlosni sjaj, ali je on vrlo, vrlo slab. U istraživanju u visokoenergetskoj fizici se smatra da je energija nešto kao što su neutroni, atomi i takve stvari. Mnogi *qigong* majstori su testirani, svi nešto poznatiji *qigong* majstori su bili testirani. Ja sam također testiran, izmjerena vrijednost emitovanih gama zraka i termičkih neutrona je bila 80 do 170 puta veća od jačine radioaktivnosti kod običnih supstanci i pri tome je kazaljka mjernog

uređaja dostigla krajnju tačku. Jer je kazaljka dosegla krajnju poziciju, na kraju se nije znalo koliko je stvarno bilo. Tako jaki neutroni, jednostavno nezamislivo! Kako čovjek može emitovati tako jake neutrone? To također dokazuje da mi *qigong* majstori imamo *gong*, znači energiju. To je već potvrđeno u krugovima nauke i tehnike.

Da bi se izašlo izvan pet elemenata potreban je dvostruki put kultivacije tijela i duha. Kod puteva, kod kojih se ne kultiviraju istovremeno tijelo i duh, raste samo *gong* koji određuje nivo. A kod puteva koji ne kultiviraju tijelo ova tema ne postoji, oni ne govore o "izvan pet elemenata". Dvostrukom kultivacijom tijela i duha energija se pohranjuje u svim ćelijama tijela. Zrna emitovane energije običnog praktikanta, kod kojeg se *gong* upravo razvija, vrlo su krupna, imaju međuprostor i malu gustoću, zato je njihova snaga vrlo slaba. Dok se njegov nivo stalno povećava, gustoća energije postaje stotinu, hiljadu, čak stotinu miliona puta veća od gustoće normalnih molekula vode, sve je to moguće. Jer, što je veći nivo, to je veća gustoća, to su zrna sitnija i snaga je moćnija. Pod ovim okolnostima, energija se pohranjuje u svakoj ćeliji tijela i to ne samo u svakoj ćeliji tijela u ovoj našoj materijalnoj dimenziji, nego i u ćelijama svih tijela u drugim dimenzijama - molekule, atomi, protoni, elektroni, sve do krajnje mikroskopskog, sve ćelije su ispunjene ovom energijom. Malo pomalo, čovjekovo tijelo se potpuno ispunjava ovom visokoenergetskom supstancom.

Ova visokoenergetska supstanca ima inteligenciju i sposobnosti. Nakon što je bude više i postane gušća i nakon što je ispunila sve ćelije ljudskog tijela, ona može sputati čovjekove ćelije od krvi i mesa koje su najnesposobnije. Čim su ćelije sputane, više nema metabolizma i na kraju će ona potpuno zamijeniti ćelije od krvi i mesa. Naravno, to je lako reći, ali to dostići je vrlo spor proces. Kada si se tako daleko kultivirao, sve ćelije tvog tijela biće zamijenjene ovom visokoenergetskom supstancom. Razmisli, da li se tvoje tijelo još sastoji od pet elemenata? Jesu li to još supstance naše dimenzije? Ono se već sastoji od visokoenergetskih supstanci koje su sakupljene iz drugih dimenzija. I sastavni dijelovi *de*-a su također supstance koje postoje u drugim dimenzijama i ni one nisu ograničene vremenskim poljem ove naše dimenzije.

Današnja nauka smatra da vrijeme ima polje i da nešto što se ne nalazi u području vremenskog polja nije ograničeno tim vremenom. Pojmovi vrijeme-prostora u drugim dimenzijama drugačiji su od ovih na našoj strani, kako bi onda ono moglo ograničiti supstance drugih dimenzija? Ono na njih nema nikakav uticaj. Razmisli, zar onda nije tako da ti više nisi u pet elemenata? Je li tvoje tijelo još uvijek tijelo običnog čovjeka? Više uopšte nije. Ali još nešto: Svakodnevni ljudi to ne mogu primjetiti. Iako se tvoje tijelo tako jako promijenilo, to još uvijek nije kraj tvoje kultivacije. Moraš i dalje nastaviti probijati nivoe i kultivirati se naviše. Zato se još moraš kultivirati među svakodnevnim ljudima i ne bi išlo ako te ljudi ne bi vidjeli.

Dakle, šta se dalje događa? Za vrijeme tvoje kultivacije, sve tvoje molekularne ćelije su zamijenjene visokoenergetskom supstancom, ali atomi imaju određen redosljed u svom rasporedu i redosljed rasporeda molekula i atomskih jezgri se također nije promijenio. Raspored molekula ćelija je takav da su mekane pri dodiru, raspored molekula kostiju je gust i pri dodiru su tvrde, gustoća molekula krvi je vrlo mala, tako da je tečna. Svakodnevni ljudi ne mogu primjetiti promjene na tvom vanjskom izgledu, molekularne ćelije još zadržavaju prijašnju stukturu i redosljed rasporeda; struktura se nije promijenila, ali se energija u unutrašnjosti promijenila i zato ovaj čovjek od sada neće stariti na prirodan način, njegove ćelije neće odumrijeti i on tako ostaje uvijek mlad. Za vrijeme kultivacije će čovjek izgledati mlad i na kraju će ostati takav.

Naravno da će se kosti možda slomiti ako to tijelo doživi sudar s autom. Kada se posiječe nožem, također će još krvariti. To je zato što redosljed rasporeda molekula nije promijenjen, samo ono neće odumirati ili stariti na prirodan način, metabolizam se više ne odvija. To je "izaći izvan pet elemenata" o kojem mi govorimo. Gdje je tu praznovjerje? To se može naučno objasniti. Ali neki ljudi to ne znaju objasniti, a ipak pričaju proizvoljno o tome i tada će drugi reći da oni propagiraju praznovjerje. Dakle, ovaj izraz potiče iz religije i nije izraz koji potiče iz modernog *qigonga*.

Šta znači "izvan Tri sfere"? Ovih dana sam objasnio da je kultivacija našeg *xinxinga* ono odlučujuće za rast *gonga*. Kada se asimiliraš sa osobinama kosmosa, one te više neće ograničavati i kad se tvoj *xinxing* povisi, sastavni dijelovi *de*-a se transformišu u *gong*. On stalno raste prema gore, povisuje se. Kad dostigne visoke nivoe, formira se stup *gonga*. Koliko je visok taj stup, toliko je visok tvoj *gong*. Postoji izreka: Dafa je bezgraničan - kultivacija u potpunosti zavisi od tvog srca. Koliko visoko se možeš kultivirati, u potpunosti zavisi od tvoje izdržljivosti i tvoje sposobnosti da izdržiš teškoće. Kad se tvoja sopstvena bijela supstanca potroši, tvoja crna supstanca kroz izdržavanje teškoća također može biti transformisana u bijelu supstancu. Ako ni to još nije dovoljno, onda možeš podnijeti grijehе članova tvoje porodice ili dobrih prijatelja, koji se ne kultiviraju. Na taj način također možeš povisiti svoj *gong*. Ovo se odnosi na one koji su se kultivirali do krajnje visokih nivoa. Ti kao običan čovjek ne trebaš pri kultivaciji pomišljati na to da podnosiš grijehе za svoju rodbinu; sa tako velikom količinom karme se običan čovjek ne može uspješno kultivirati. Ovo što ja ovdje objašnjavam su principi različitih nivoa.

Tri sfere, o kojima se govori u religiji, odnose se na devet ili trideset tri nebeska nivoa. To znači da Nebo, Zemlja i Podzemni svijet čine sva bića u Tri sfere. Znači da sva bića unutar trideset tri nebeska nivoa moraju ići kroz šestostruki put reinkarnacije. Šestostruki put reinkarnacije znači da je neko u ovom životu čovjek, ali će u sljedećem životu možda biti životinja. U budizmu se kaže: potpuno iskoristiti vrijeme života, ako se sad ne kultiviramo, a kad onda? Jer, životinjama nije dozvoljeno kultivirati se i slušati Fa. I kad se kultiviraju, ne mogu postići ispravno dostignuće; kad imaju visok *gong*, biće čak ubijene od Neba. Ne možeš dobiti ljudsko tijelo tokom nekoliko stotina godina, tek nakon više od hiljadu godina dobijaš ljudsko tijelo, ali ga ne znaš cijeliti. Ako se ponovo rodiš kao kamen, nećeš moći izaći iz njega ni za deset hiljada godina; ako se taj kamen ne zdrobi ili ne raspadne pod uticajem vremena, nikad nećeš moći izaći. Kako je teško dobiti ljudsko tijelo! Kad čovjek može stvarno dobiti Fa, zaista se može smatrati sretnim. Ljudsko tijelo je teško dobiti, takav je princip.

Pri prakticiranju, mi govorimo o nivoima. Nivoi potpuno zavise od tvoje sopstvene kultivacije. Ti želiš izaći izvan Tri sfere; kada je stup tvog *gonga* vrlo, vrlo visoko kultiviran, zar onda nisi probio Tri sfere? Kod nekih ljudi pri meditaciji njihove duše napuštaju njihovo tijelo i odjednom se penju vrlo visoko. Jedan učenik mi je napisao svoje iskustvo: "Učitelju, popeo sam se na toliko nivoa Neba i vidio sam te i te pojave." Ja sam mu rekao: "Probaj se popeti još više." On je rekao: "Ne mogu više, ne usuđujem se više, ne mogu se popeti još više." Zašto? Zato što je stup njegovog *gonga* samo toliko visok; sjedeći na svom stupu se popeo gore. To je status dostignuća o kojem se govori u budizmu; on se kultivirao do tog statusa dostignuća. Ali za jednog kultivatora time još nije dostignut vrhunac statusa dostignuća. On se neprekidno penje naviše, neprekidno se povisuje i neprekidno se poboljšava. Kada stup tvog *gonga* probije Tri sfere, zar onda nisi izašao izvan Tri sfere? Jednom smo provjerili i ustanovili da se Tri sfere, o kojima se govori u religiji, nalaze samo

unutar područja devet velikih planeta. Neki govore o deset planeta, ja kažem da to uopšte nije tačno. Vidio sam da su stupovi *gonga* nekih prijašnjih *qigong* majstora izbili izvan Mliječnog puta, prilično visoko, oni su već odavno izašli izvan Tri sfere. Ovo "izvan Tri sfere", o čemu sam upravo govorio, u stvari je pitanje nivoa.

O težnji

Mnogi ljudi su u naše polje kultivacije došli sa srcem koje nečemu teži. Neki teže natprirodnim sposobnostima, neki žele čuti teorije, neki žele liječiti bolesti, neki žele dobiti *falun*, postoje svi mogući mentaliteti. Zatim postoje još drugi koji kažu: "Neko iz moje porodice nije došao na kurs, platiću nešto za kurs, molim te daj mi jedan *falun*". Kroz toliko mnogo generacija, kroz krajnje dug vremenski period - ako bi vam rekao broj, šokirali biste se - kroz tako dug vremenski period smo razvijali ovaj *falun*, a ti ga želiš kupiti za nekoliko desetaka yuana? Zašto vam ga možemo bezuslovno dati? Upravo zato što se želiš kultivirati. Takvo srce se ne može kupiti novcem. Tvoja Buda-priroda se pojavila i zato ćemo to učiniti.

Ti imaš srce koje teži, jesi li samo zbog toga došao? Moj *fašen* u drugim dimenzijama tačno zna svaku tvoju misao. Jer pojmovi ova dva vrijeme-prostora nisu jednaki; gledano iz drugih dimenzija, nastanak tvojih misli je krajnje spor proces. I prije nego što počneš misliti, moj *fašen* to već može znati, zato trebaš odustati od svih svojih neispravnih misli. U Buda školi se govori o sudbinskoj vezi, svi ste vi došli zbog sudbinske veze. Ako nešto dobiješ, onda to možda upravo i trebaš dobiti i zato to trebaš znati cijeniti i ničemu ne težiti.

Kod prijašnje kultivacije u religijama, u Buda školi se govorilo o praznini, ne misliti ni na šta, ući u prazninu; u Tao školi se govorilo o ništavnosti, nemati ništa, ništa ne željeti, ničemu ne težiti. Praktikanti kažu: "S namjerom praktcirati, bez namjere dobiti *gong*". Kultivirati se u stanju bez namjera, samo se koncentrirati na kultivaciju svog *xinxinga*, tada ćeš činiti proboje u svom nivou i sigurno ćeš dobiti ono što trebaš dobiti. Zar to nije vezanost ako nešto ne možeš otpustiti? Mi ovdje odjednom širimo tako veliki Fa, naravno da se postavljaju visoki zahtjevi na tvoj *xinxing*. Zato ne trebaš učiti Fa sa srcem koje nečemu teži.

Da bi bili odgovorni prema svima, vodimo vas ispravnim putem i moramo vam temeljito objasniti ovaj Fa. Ako težiš nebeskom oku, ono će se samo od sebe začepiti i omotati te. Također vam mogu reći da su sve natprirodne sposobnosti, koje se pojavljuju za vrijeme kultivacije Fa-unutar-trostrukog-svijeta, vrsta urođenih instinkta koje fizičko tijelo nosi sa sobom i u današnje vrijeme ih nazivamo "posebne natprirodne sposobnosti". One mogu imati uticaja samo u ovoj dimenziji, u ovoj našoj dimenziji i mogu uticati na obične ljude. Zašto težiš takvim malim sposobnostima i tehnikama? Ti težiš i težiš, ali kad dostigneš Fa-izvan-trostrukog-svijeta, one nemaju nikakvog dejstva u drugim dimenzijama. Kad kultiviraš Fa-izvan-trostrukog-svijeta, sve ove natprirodne sposobnosti moraju biti odbačene, one će biti gurnute u jednu vrlo duboku dimenziju i tamo će biti pohranjene; one će za vrijeme tvog puta kultivacije u budućnosti samo služiti kao zapis i pri tome igrati samo tu malu ulogu.

Nakon što je neko izašao izvan Fa-unutar-trostrukog-svijeta, on se mora iznova kultivirati. Njegovo tijelo je tijelo koje je izašlo izvan pet elemenata, o čemu sam upravo govorio; to je Buda-tijelo. Zar se to tijelo tada ne zove Buda-tijelo? To Buda-tijelo se mora iznova kultivirati i natprirodne sposobnosti će se ponovo pojaviti; one se ne zovu natprirodne sposobnosti, već božanske moći Buda Fa. One su bezgranično moćne i imaju učinka u svakoj

dimenziji, one su stvari koje stvarno djeluju. Dakle, šta misliš, zašto još težiš natprirodnim sposobnostima? Svi vi koji težite natprirodnim sposobnostima, zar vaša namjera nije upotrijebiti ih među svakodnevnim ljudima da bi se hvalisali? Za šta drugo ih trebate? One se ne daju ni vidjeti, ni dotaknuti. Ako kažeš da ih samo želiš upotrijebiti kao ukras ili slično tome, zar ne bi bilo bolje da nađeš nešto što izgleda lijepo? U tvojoj podsvijesti garantovano imaš namjeru upotrijebiti ih. One se ne mogu dobiti težnjom kao sposobnosti svakodnevnih ljudi. One su nešto potpuno nesvakidašnje i nije ti dozvoljeno razmetati se njima među svakodnevnim ljudima. Nagon za isticanjem je vrlo jaka vezanost, karakterni nedostatak i loše srce, kojeg se kultivator mora riješiti. Ako želiš time zaraditi novac i obogatiti se, ili ličnim naporima ostvariti svoje ciljeve među svakodnevnim ljudima, to pogotovo neće ići. To bi značilo remetiti ljudsko društvo sa stvarima visokih nivoa, sabotirati društvo svakodnevnih ljudi. Takve misli su još gore. Zato nije dozvoljeno upotrijebiti ih po želji.

Obično se natprirodne sposobnosti češće pojavljuju kod dvije grupe ljudi: kod djece i kod starijih. Prije svega kod starijih žena, jer one obično mogu dobro vladati svojim *xinxingom*, one nemaju mnogo vezanosti svakodnevnih ljudi. Nakon što su se njihove sposobnosti pojavile, one mogu lako vladati sobom i nemaju vezanost za isticanjem. Zašto se natprirodne sposobnosti ne pojavljuju tako lako kod mlađih ljudi? Prije svega mlađi muškarci još uvijek žele težiti nečemu u društvu svakodnevnih ljudi i žele ostvariti neke svoje ciljeve! Čim se natprirodne sposobnosti pojave, oni će ih upotrijebiti kako bi ostvarili svoje ciljeve; oni će ih koristiti kao sposobnosti za ostvarivanje svojih ciljeva. To apsolutno nije dozvoljeno i zato se natprirodne sposobnosti kod njih neće pojaviti.

Kultivacija nije dječija igra, niti sposobnost svakodnevnih ljudi, nego vrlo ozbiljna stvar. Želiš li se kultivirati, možeš li se kultivirati, zavisi potpuno od toga kako poboljšavaš svoj *xinxing*. To bi stvarno bilo loše ako bi čovjek zaista mogao dobiti natprirodne sposobnosti težeći za njima. Pogledaj ga, "Koja kultivacija?" - on uopšte više ne bi mislio na to. Jer je njegov *xinxing* na nivou svakodnevnih ljudi, a natprirodne sposobnosti je stekao težnjom, možda će počinuti sva moguća loša djela. U banci ima dovoljno novca, mogao bi uzeti nešto od toga; na ulici ima dovoljno lutrija, mogao bi izvući prvu nagradu. Zašto se takve stvari ne događaju? Neki *qigong* majstori kažu: "Neko ko ne pazi na *de*, lako će učiniti loše djelo kada dobije natprirodne sposobnosti". Ja kažem da je ta tvrdnja netačna. To uopšte nije tako. Ako ne paziš na svoj *de* i ne kultiviraš svoj *xinxing*, neće se uopšte pojaviti nikakve natprirodne sposobnosti. Ima ljudi koji su imali dobar *xinxing* i koji su na svom nivou dobili natprirodne sposobnosti, ali poslije nisu mogli vladati sobom i učinili su nešto što nisu smjeli učiniti. Postoje i takvi slučajevi. Ali čim on učini nešto loše, njegove natprirodne sposobnosti će oslabiti ili će potpuno nestati. A kad ih jednom izgubi, izgubiće ih zauvijek, a što je najgore, time se može izazvati vezanost.

Neki *qigong* majstori kažu, kao u reklami, da ćeš već moći liječiti ljude, nakon što si učio njihov *qigong* tri ili pet dana. Njih bi trebali nazivati *qigong* trgovcima. Razmisli, ti si običan čovjek, da li već možeš liječiti bolesti drugih time što ćeš emitovati malo *qija*? Svakodnevni ljudi u svom tijelu imaju *qi*, ti također imaš *qi*. Ti si tek počeo prakticirati i samo je tvoja *laogong* tačka otvorena i može primati i emitovati *qi*. Ako želiš liječiti bolesti drugih ljudi, možda će oni tebe izliječiti, jer njihova tijela također imaju *qi*. Kako *qi* može djelovati jedan na drugi? *Qi* uopšte ne može liječiti. Osim toga, ako ga liječiš, ti sa bolesnikom gradiš jedno polje i sav bolesni *qi* bolesnika kompletno prelazi na tebe i imaćeš ga isto toliko. Iako je korijen bolesti u njegovom tijelu, ako imaš previše bolesnog *qija*, ti ćeš se također razboliti.

Čim misliš da možeš liječiti, otvorićeš ordinaciju i počećeš liječiti bolesne. Ko god da dođe, nećeš ga odbiti i kod tebe će se pojaviti vezanost. Uspješno si izliječio druge, kako si samo sretan! Zašto ih možeš izliječiti? O tome nisi razmišljao: svi lažni *qigong* majstori imaju posjedujuće duhove na sebi i kako bi te uvjerali, daju ti nešto "informacija". Nakon što si izliječio, na primjer, tri, pet, osam ili deset bolesnika, one će se potrošiti. To je vrsta potrošnje energije i nakon toga nećeš više imati to malo energije. Ti sam ne posjeduješ *gong* - odakle bi ga imao? Mi *qigong* majstori smo prošli decenije kultivacije i u prošlosti je kultivirati Tao bilo jako teško. Prilično je teško ako se čovjek ne kultivira u ispravnoj školi, nego u sporednim školama ili malim putevima.

Ti vidiš da su neki veliki *qigong* majstori stekli veliku popularnost, ali oni su se decenijama neprekidno kultivirali i tek tada su mogli iskultivirati nešto malo *gonga*. Ti se nisi kultivirao i misliš da ćeš dobiti *gong* pohađajući jedan kurs? Kako je to moguće? Od tog trenutka se kod tebe pojavljuje vezanost. Čim se vezanost pojavila, uznemirićeš se kad ne budeš mogao izliječiti bolesti. Šta neki čak misle prilikom tretmana da bi očuvali svoju reputaciju? "Daj da ja dobijem tu bolest, da bi on bio izliječen". To nije iz dobrodušnosti. On se uopšte nije oslobodio svoje težnje za ugledom i dobitkom i dobrodušnost se uopšte ne može razviti. On se boji gubitka sopstvene reputacije, on čak sam želi dobiti bolest, da ne bi izgubio svoju reputaciju, tako je jaka težnja za ugledom! Čim je emitovao tu želju, dakle u redu, bolest odmah prelazi na njega - stvarno je djelovalo. Dok je druga osoba izliječena, on ide kući i boluje. Nakon što je izliječio nekoga, on sam pati kod kuće. Misliš da si izliječio nekoga; i kada te ljudi nazivaju *qigong* majstorom, ti se već uljuljuješ u samozadovoljstvu i presretan si. Zar to nije vezanost? Kad ne budeš mogao izliječiti bolesti, oborićeš glavu, zar to nije uzrokovano tvojom težnjom za ugledom i dobitkom? Osim toga, sav bolesni *qi* bolesnika kojeg liječiš prelazi na tebe. Taj lažni *qigong* majstor te uči kako da ga odvođiš van; ja ti kažem da ti uopšte nisi u stanju odvoditi ga, ni malo od toga ne možeš odvoditi, jer ti sam ne posjeduješ sposobnost razlikovanja lošeg *qija* od dobrog *qija*. Vremenom će tvoje tijelo iznutra postati sasvim crno, to je karma.

Ako se stvarno kultiviraš, biće ti jako teško. Šta još možeš učiniti? Koliko patnje moraš pretrpjeti da bi to pretvorio u bijelu supstancu? To je jako teško. Obično kod osoba sa dobrom urođenom osnovom lakše nastaju takvi problemi. Neki uvijek samo teže sposobnosti da liječe bolesti. Ako težiš za tim, ta životinja će to vidjeti i onda će se prikačiti za tebe, upravo to se zove posjedovanje od strane duha. "Želiš liječiti ljude? Ja ću ti pomoći liječiti ljude". Ali ona ti neće pomoći liječiti tek tako, ko ništa ne gubi, ništa ne dobija. To je vrlo opasno. Konačno, sam si je doveo, kako ćeš se onda kultivirati? Bićeš potpuno uništen.

Neki ljudi sa dobrom urođenom osnovom razmjenjuju svoju sopstvenu osnovu za karmu drugih. Ljudi sa zdravstvenim problemima imaju mnogo karme. Ako si liječio nekog teškog bolesnika, osjećaćeš se jako loše kada se poslije tretmana vratiš kući! Mnogi, koji su prije liječili bolesne, doživjeli su to da je bolesnik izliječen, ali se ti vratiš kući i patiš teško bolestan. Kako vrijeme bude prolazilo, biće mnogo karme koja je prenesena na tebe, ti drugima daješ svoj *de* za njihovu karmu. Bez gubitka nema dobitka. Iako su bolesti to što želiš dobiti, ti također moraš razmijeniti svoj *de* za karmu. U ovom univerzumu postoji zakonitost da, ako ti sam želiš nešto imati, niko se ne može umiješati. A ne može se ni reći da si dobar. U univerzumu je jedna stvar određena: Ko ima mnogo karme, taj je loš čovjek. Ti si svoju sopstvenu urođenu osnovu razmijenio za karmu drugih; kako ćeš se kultivirati sa svom tom karmom? Tvoja urođena osnova će biti potpuno uništena od strane te osobe. Zar to nije strašno? Druga osoba je izliječena i sada se osjeća dobro, ali ti ideš kući i patiš. Ako si

izliječio dva bolesnika od raka, onda ćeš morati umrijeti umjesto njih. Zar to nije opasno? To je upravo tako, mnogi ne poznaju princip koji stoji iza toga.

Neki lažni *qigong* majstori su veoma poznati, ali biti poznat ne mora značiti i jasno poznavanje stvari. Uostalom, šta znaju svakodnevni ljudi? Kada se mnogi nečim oduševljavaju, i on vjeruje u to. Možda on sada može to raditi, ali on ne škodi samo drugima, nego i sebi. Vidjećeš šta će postati od njega za jednu ili dvije godine. Kultivacija se ne smije sabotirati na taj način. Kultivacija može liječiti, ali ona nije tu zbog liječenja. Ona je nešto natprirodno i nije sposobnost svakodnevnih ljudi. Apsolutno nije dozvoljeno po volji je sabotirati na taj način. Sada su neki lažni *qigong* majstori stvarno napravili veliku zbrku, jer koriste *qigong* kao sredstvo za postizanje slave i bogatstva. Oni su sekte koje se bave širenjem svog uticaja i mnogostruko prevazilaze broj istinskih *qigong* majstora. Ti, znači, vjeruješ u to, jer svi svakodnevni ljudi tako kažu i tako rade? Misliš da *qigong* nije ništa drugo nego to. U stvari, nije tako. To što sam ti rekao je istinski princip.

Kad svakodnevni ljudi u svojim različitim društvenim odnosima zbog ličnih interesa učine nešto loše i zaduže se, oni to moraju otrpiti i otplatiti. Pretpostavimo da liječiš po volji. Čak i ako si u stanju liječiti, da li bi to bilo dozvoljeno? Buda ima posvuda, zašto mnogobrojni Bude to ne čine? Kako bi to bilo dobro kada bi oni sredili da kompletno čovječanstvo živi ugodnim životom! Zašto oni to ne čine? Čovjek mora sam otplatiti sopstvenu karmu i to je zakon koji se niko ne usuđuje sabotirati. Tokom kultivacije, neko možda ponekad pomogne nekome iz dobrodušnosti, ali on je njihove bolesti samo odgodio za kasnije. Ne patiš sad, ali ćeš patiti kasnije, ili će ih on za tebe transformisati, tako da nećeš dobiti bolesti, nego ćeš izgubiti novac ili pretrpiti nesreću, to bi i tako moglo biti. Stvarno to uraditi - odjednom ukloniti tvoju karmu - to je nešto što se može uraditi samo za kultivatore i ne može se uraditi za obične ljude. Ja ovdje ne objašnjavam samo principe moje škole, nego govorim o istini našeg cjelokupnog univerzuma, govorim o stvarnom stanju stvari u kultivacijskim krugovima.

Mi te ovdje ne učimo kako liječiti ljude. Mi te izvodimo na veliki put, ispravan put i vodimo te naviše. Zato na svakom kursu kažem da Falun Dafa učenici ne smiju liječiti bolesne. Ako liječiš bolesne, nisi učenik mog Falun Dafa. Jer, mi te vodimo na ispravan put i tokom kultivacije Fa-unutar-trostrukog-svijeta, tvoje tijelo ćemo stalno čistiti i čistiti i čistiti, sve dok se potpuno ne transformiše u visokoenergetsku supstancu. Kako se onda još možeš kultivirati ako čak sam sebi pribavljaš tu crnu stvar? To je karma! Ti se onda više uopšte ne možeš kultivirati. Ako dobiješ previše toga, nećeš to moći podnijeti. Ako moraš previše patiti, onda se više ne možeš kultivirati. To je princip. Ja sam proširio ovaj Dafa u javnosti, ali ti možda još ne znaš šta ja uopšte podučavam. Ako se ovaj Dafa može širiti, onda postoje načini kojima se može zaštititi. Ako liječiš bolesne, moj *fašen* će oduzeti sve što je za kultivaciju usađeno u tvoje tijelo. Ne može biti dozvoljeno da zbog slave i bogatstva proizvoljno uništiš nešto tako vrijedno. Ako ne postupaš prema zahtjevima Fa, ne pripadaš našem Falun Dafa. Tvoje tijelo će opet biti vraćeno na nivo običnog čovjeka i loše stvari će ti biti vraćene, jer želiš ostati običan čovjek.

Počevši od kraja našeg jučerašnjeg predavanja, mnogi od nas osjećaju da im je tijelo vrlo lagano. Ali jako mali broj ljudi sa ozbiljnim bolestima su već korak dalje i od juče su počeli da se ne osjećaju dobro. Nakon što sam juče uklonio loše stvari sa vaših tijela, većina vas je osjećala da im je tijelo sasvim lagano i osjećali su se jako dobro. Ali u ovom našem univerzumu postoji jedan princip: Bez gubitka nema dobitka. Ne može sve biti odstranjeno za

tebe, uopšte nije dozvoljeno da ni malo ne istrpiš. Drugim riječima, odstranili smo osnovni uzrok tvojih bolesti i tvog lošeg zdravlja, ali još imaš bolesno polje. Kad je nebesko oko otvoreno na vrlo niskom nivou, u tvom tijelu se mogu vidjeti mase crnog *qija*, mutnog, bolesnog *qija*. To su zgusnute mase crnog *qija* velike gustoće; kad se rasprše, ispuniće tvoje čitavo tijelo.

Od danas će neki osjećati hladnoću po čitavom tijelu, kao kod teške gripe, kosti će možda također boljeti. Većina će se osjećati loše na određenim dijelovima tijela, noge će boljeti, imaće vrtoglavicu. Možda misliš da su mjesta na kojima si prije imao bolesti izliječena vježbanjem *qigonga* ili od strane nekog *qigong* majstora, ali se one ponovo pojavljuju. Jer, on te nije izliječio, nego ih je za tebe samo odložio za kasnije, one su još uvijek na istom mjestu, tako da nećeš patiti danas, nego kasnije. Moramo ih sve izvaditi, odstraniti ih za tebe i sve ih iz korijena ukloniti. Zato možda imaš osjećaj da doživljavaš povratak bolesti. Karma se iz temelja odstranjuje i zato ćeš imati reakcije. Neki će imati lokalne reakcije, osjećaću se loše na ovom ili onom mjestu, razne nelagodnosti se mogu pojaviti, to je sve normalno. Kažem vam, bez obzira koliko vam loše bilo, trebate obavezno nastaviti dolaziti na predavanja; čim uđeš ovdje u salu, svi simptomi bolesti će nestati i neće biti nikakve opasnosti. Jedno ću vam reći: Bez obzira koliko se osjećao "bolestan", nadam se da ćeš uprkos tome i dalje dolaziti ovamo. Fa je teško dobiti. Kad se osjećaš još gore, to znači: "Vrhunac je dostignut, preokret slijedi". Cijelo tvoje tijelo će biti očišćeno, ono mora biti potpuno očišćeno. Korijeni bolesti su već odstranjeni, samo ovo malo crnog *qija* ostaje, da bi sam od sebe izašao napolje; tako da ćeš pretrpiti malo poteškoća i podnijeti malo patnje. Neće ići ako baš ništa ne istrpiš.

U društvu svakodnevnih ljudi, zbog ugleda i lične dobiti i zbog borbe među ljudima, ne možeš dobro spavati, ni dobro jesti i već si prilično upropastio svoje tijelo. Kad se tvoja tijela posmatraju iz drugih dimenzija, čak su i sve tvoje kosti crne. Takvo tijelo će za tebe biti odjednom očišćeno, ne ide da pri tome nemaš ni malo reakcija, zato ćeš imati reakcije. Neki ljudi će čak povraćati ili dobiti proljev. Prije su mi učenici iz mnogih regiona pisali i podijelili svoje iskustvo o tome: "Učitelju, poslije predavanja sam išao kući i čitavim putem sam tražio toalete, sve dok nisam stigao kući". Jer, svi unutrašnji organi moraju biti očišćeni. Mali broj ljudi će još i spavati; probudiće se nakon što je predavanje završeno. Zašto? Zato što on ima bolesti u glavi i to za njega mora biti dovedeno u red. Ali on uopšte ne može podnijeti dovođenje glave u red, zato mora biti stavljen u stanje anestezije, tako da on to neće primjetiti. Ali neki ljudi nemaju problem sa sluhom, oni su doduše duboko zaspali, ali ipak nisu propustili nijednu riječ i sve su čuli. Nakon toga su se probudili i neće biti pospani čak i ako dva dana nisu spavali. To su različita stanja. Sve se mora dovesti u red, cijelo tijelo će biti u potpunosti očišćeno za tebe.

Ako oni, koji istinski kultiviraju Falun Dafa, mogu odbaciti svoje vezanosti, oni će od sada, pa nadalje imati reakcije. Iz usta onih koji ih ne mogu odbaciti može se doduše čuti da su ih odbacili, u stvari ih uopšte nisu odbacili. Zato je jako teško pročistiti njihova tijela. Neki su sadržaj mog kursa shvatili nešto kasnije, onda su ih odbacili i njihova tijela su očišćena. Dok se drugi već osjećaju sasvim lagani, oni tek počinju sa odstranjivanjem bolesti i osjećaju se loše. Na svakom kursu ima takvih ljudi, koji zaostaju za drugima i imaju nešto slabiji kvalitet prosvjetljenja. Dakle, bez obzira na kakvo stanje naiđeš, to je normalno. Kada sam držao kurseve u drugim regionima, često se događalo tako nešto, bilo je ljudi koji su se osjećali jako loše, sjedili su presavijeni na stolici, nisu ustajali i samo su čekali da siđem s podijuma i liječim ih. Ali ja ih neću liječiti. Ni ovakvu prepreku ne možeš prevazići; kada se

poslije budeš kultivirao, susrećeš se sa mnogim velikim teškoćama, reci mi, kako ćeš se kultivirati ako čak ni ovako nešto ne možeš prevazići? Zar čak ni ovakvu sitnicu ne možeš prevazići? Sigurno možeš. Zato ne trebate dolaziti kod mene da vas liječim, ja ne liječim bolesti. I kad samo izgovoriš riječ "bolestan", već nerado slušam.

Ljude je baš teško spasiti. Na svakom kursu uvijek ima 5 ili 10 posto polaznika koji ne mogu držati korak. Ne može svako dostići Tao; čak i ako istrajno dalje prakticiraš, mora se vidjeti možeš li se uspješno iskultivirati, možeš li biti čvrsto odlučan kultivirati se; nemoguće je da svako postane Buda. Kod onih koji istinski kultiviraju Dafa, nastupiće također ista stanja dok čitaju ovu knjigu; oni će također dobiti sve što trebaju dobiti.

3. Lekcija

Ja sve praktikante smatram svojim učenicima

Znate li šta ja radim? Ja sve praktikante, uključujući i one koji se istinski mogu kultivirati učeći sami, smatram svojim učenicima. Kod širenja puta kultivacije ka visokim nivoima, neće ići ako te ne vodim na ovaj način, u suprotnom, to bi bilo neodgovorno i samovoljno. Dali smo ti tako mnogo stvari i dopustili ti da znaš tako mnogo principa koje svakodnevni ljudi ne trebaju znati, ja sam ti prenio ovaj Dafa i daću ti još mnogo stvari. Tvoje tijelo je očišćeno i to je još povezano s nekim drugim stvarima, tako da to uopšte neće ići ako te ne vodim kao učenika. Nije dozvoljeno nesmotreno otkrivati tako puno nebeskih tajni svakodnevnim ljudima. Ali ima jedna stvar. Vremena su se promijenila i mi sada više ne koristimo formalnosti poniznog klanjanja do poda i naklona sa sklopljenim rukama. Ove formalnosti su beskorisne i to izgleda kao religija, pa mi ne radimo takve stvari. Jer čak i ako se klanjaš i obožavaš Učitelja, ako se, čim izađeš vani, odmah vraćaš svom starom načinu djelovanja, činiš šta želiš među svakodnevnim ljudima i svađaš se i boriš za svoj ugled i vlastiti interes, koja je korist od toga? Možda ćeš čak i u moje ime štetiti reputaciji Dafe!

Prava kultivacija u potpunosti zavisi od tvog srca. Sve dok se možeš kultivirati i sve dok se možeš solidno i ustrajno dalje kultivirati, vodićemo te kao učenika. Neće ići ako ne postupam s tobom na taj način. Ipak, neki se ne mogu stvarno smatrati kultivatorima i dalje se kultivirati. Za neke ljude je to nemoguće. Ali mnogi će se stvarno dalje kultivirati. Sve dok se ustrajno dalje kultiviraš, vodićemo te kao učenika.

Da li se neko može smatrati Falun Dafa učenikom, ako svaki dan samo radi ove vježbe? Baš i ne. Jer, kod istinske kultivacije se zahtijeva da se ponašaš prema kriterijima *xinxinga* o kojima smo govorili i da stvarno povisiš svoj *xinxing*. Samo tada je to istinska kultivacija. Ako radiš samo vježbe i ne možeš povisiti svoj *xinxing*, nećeš imati jaku energiju da bi pojačao sve što si kultivirao. To se ne može zvati kultivacijom i ne možemo te smatrati Falun Dafa učenikom. Ako nastaviš tako, ti radiš vježbe, ali se ne ponašaš u skladu sa zahtjevima našeg Falun Dafa, ne povisuješ svoj *xinxing* i ponašaš se među ljudima na isti način kao i prije, možda ćeš upasti i u druge nevolje. Možda ćeš čak reći i da si prakticiranjem našeg Falun Dafa dospio na pogrešan put. Sve je to moguće. Zato se moraš voditi kriterijima našeg *xinxinga*, tako ćeš postati istinski kultivator. To sam vam sasvim jasno objasnio. Prema tome, ne trebate više dolaziti k meni zbog formalnosti kao što su rituali inicijacije. Sve dok se istinski kultiviraš, tako ću postupati s tobom. Moji *fašeni* su već tako brojni da se više ne mogu izbrojati. Bez obzira koliko će učenika biti, mogu se brinuti o njima, a da i ne govorim o ovdje prisutnim učenicima.

Qigong Buda škole i budizam

Qigong Buda škole nije budizam, to vam sasvim jasno kažem; u stvari, ni *qigong* Tao škole nije taoizam. Nekima među nama to još uvijek nije jasno. Neki ljudi su monasi u hramu, a neki su budisti laici. Oni misle da znaju nešto više o budizmu, onda propagiraju bezobzirno stvari budizma među našim učenicima. Ja ti kažem, nemoj to raditi, jer su to stvari različitih škola. Religije imaju religiozne forme, dok mi ovdje prenosimo jedan dio kultivacije naše

škole. Osim kod učenika koji profesionalno kultiviraju Falun Dafa, ne govori se o religioznim formama, zbog toga mi ne spadamo u budizam iz Vremena kraja Fa.

Fa u budizmu je samo mali dio Buda Fa. Postoji još mnogo drugih dubokih Fa, a i različiti nivoi imaju različit Fa. Shakyamuni je rekao da postoji 84.000 škola kultivacije. U budizmu postoji samo nekoliko škola, kao što su Tiantai škola, Huayan škola, Zen škola, Jingtu škola, tantrizam, itd., što nije čak ni djelić toga! Zato to ne može obuhvatiti cjelokupni Buda Fa, to je samo mali dio Buda Fa. Naš Falun Dafa je također jedna od 84.000 škola, on nema ništa zajedničko sa izvornim budizmom ili budizmom iz Vremena kraja Fa i također nema ništa zajedničko sa današnjim religijama.

Shakyamuni je osnovao budizam u staroj Indiji prije 2.500 godina. U to vrijeme, kada je Shakyamuni postigao otvaranje *gonga* i postao prosvjetljen, prisjetio se onoga što je prije kultivirao i objavio je to kako bi spasio ljude. Bez obzira koliko je desetina hiljada sutri objavljeno u njegovoj školi, zapravo se radi samo o tri riječi. Osobine njegove škole su: "zapovijed, meditacija i mudrost". "Zapovijed" znači odbaciti sve žudnje svakodnevnih ljudi, čovjek je primoran ostaviti težnju ka ličnim interesima i odvojiti se od svih svjetovnih stvari i tako dalje. Tako će njegov um postati prazan, on više ne misli ni na šta i tako može ući u meditaciju. Oni se međusobno nadopunjavaju. Nakon što je utonuo u meditaciju, on mora sjediti u meditaciji i stvarno se kultivirati i postići napredak u kultivaciji oslanjajući se na svoju moć koncentracije. To je dio stvarne kultivacije te škole. Tu se ne uče tehnike i *benti* se ne mijenja. On samo kultivira *gong* koji određuje visinu njegovog nivoa. Zbog toga on jedino kultivira svoj *xinxing*, jer osoba koja ne kultivira tijelo ne obraća pažnju na transformaciju *gonga*. Istovremeno, on kroz meditaciju jača svoju sposobnost meditiranja, podnosi patnje sjedeći u meditaciji prekrštenih nogu i eliminira svoju karmu. "Mudrost" znači postati prosvjetljen i steći veliku mudrost. On vidi istinu univerzuma i vidi istinsku pojavu svih dimenzija u univerzumu, njegove božanske moći se mogu veličanstveno prikazati. Otvaranje mudrosti i prosvjetljenje također se zovu i otvaranje *gonga*.

U to vrijeme kada je Shakyamuni osnovao ovu školu, u Indiji je postojalo osam religija koje su se istovremeno širile. Postojala je jedna duboko ukorijenjena religija koja se zvala bramanizam. Za vrijeme svog života, Shakyamuni je stalno vodio ideološku borbu sa drugim religijama. Zato što je to što je Shakyamuni širio bio ortodoksan Fa, Buda Fa koji je on širio postajao je sve jači tokom čitavog širenja, dok su druge religije sve više slabile, čak se i duboko ukorijenjeni bramanizam nalazio pred izumiranjem. Ali nakon Shakyamunijeve nirvane, druge religije su opet počele oživljavati, a prije svega bramanizam. Ali šta se tada desilo u budizmu? Neki monasi su na različitim nivoima postigli otvaranje *gonga* ili prosvjetljenje, ali su nivoi koje su dostigli bili prilično niski. Shakyamuni je dostigao nivo Tathagate, ali mnogi monasi nisu dostigli taj nivo.

Na različitim nivoima, Buda Fa ima različite manifestacije. Međutim, što je nivo viši, on je bliži istini; što je niži, to je udaljeniji od istine. Kada su ti monasi postigli otvaranje *gonga* i prosvjetljenje na niskim nivoima, tumačili su ono što je Shakyamuni govorio s manifestacijama univerzuma koje su vidjeli na svojim nivoima i s okolnostima koje su shvatili i principima koje su spoznali. Drugim riječima, neki monasi su tumačili Fa koji je Shakyamuni podučavao, jednom ovako, a jednom onako. Bilo je i nekih monaha koji su govorili o tome što su sami shvatili kao da su to Shakyamunijeve riječi, umjesto da su koristili originalne Shakyamunijeve riječi. Na ovaj način je Buda Fa promijenjen do neprepoznatljivosti i više uopšte nije bio Fa koji je širio Shakyamuni. Na kraju je to dovelo do

toga da je Buda Fa u budizmu u Indiji isčeznuo. Ovo je ozbiljna historijska lekcija, zbog toga poslije u Indiji više nije bilo budizma. Prije nego što je nestao, bio je više puta reformisan, konačno je bio kombinovan sa stvarima iz bramanizma i iz toga je u Indiji nastala sadašnja religija, hinduizam. Oni se više ne mole Budi, već se mole nečim drugom i više ne vjeruju u Shakyamunija. Takva je situacija.

Tokom razvoja budizma nastupilo je nekoliko relativno velikih promjena. Jedna od njih se desila kratko nakon što je Shakyamuni napustio ovaj svijet. Prema principima viših nivoa, koje je objasnio Shakyamuni, neki ljudi su osnovali mahajana budizam ili budizam velikog puta. Neki drugi su mislili da je Fa, koji je Shakyamuni objašnjavao u javnosti, namijenjen svakodnevnim ljudima, da bi se sami spasili i dostigli status dostignuća Arhata, tu se nije govorilo o sveobuhvatnom spasenju svih bića i tako je on nazvan hinajana budizam ili budizam malog puta. Monasi u zemljama jugoistočne Azije zadržali su izvornu metodu kultivacije iz vremena Shakyamunija i u našoj Han oblasti se to zove budizam malog puta. Naravno, oni ne misle tako. Oni vjeruju da su oni naslijedili Shakyamunijeve izvorne stvari. To je stvarno tako, sve u svemu, oni su naslijedili metodu kultivacije iz vremena Shakyamunija.

Nakon što je ovaj reformisani mahajana budizam bio predstavljen u Kini, ukorijenio se u Kini i postao je budizam koji se u današnje vrijeme prenosi u Kini. U stvari, on se u potpunosti razlikuje od budizma iz Shakyamunijevog vremena. Sve se promijenilo, od odjeće, pa sve do cijelog statusa prosvjetljenja i procesa kultivacije. U izvornom budizmu, samo je Shakyamuni bio obožavan kao uvaženi osnivač, dok u današnjem budizmu ima brojnih Buda i velikih Bodisatvi, osim toga je to vjerovanje u više Buda. Pojavilo se vjerovanje u mnogo Tathagata-Buda i budizam je postao religija vjerovanja u više Buda, kao što su Buda Amitabha, Bhaisajyaguru, Mahavairocana i tako dalje, a također se pojavilo i mnogo velikih Bodisatvi. Na taj način, cjelokupni budizam se u potpunosti razlikuje od budizma koji je Shakyamuni u početku osnovao.

U to vrijeme, desio se još jedan proces reforme. Bodisatva Nagarjuna je objavila jednu tajnu metodu kultivacije, koja je iz Indije, preko Afganistana i konačno preko našeg Xinjiang regiona uvezena u Han oblast Kine. S obzirom da se to dogodilo u vrijeme Tang dinastije, tako je ona dobila ime Tang tantrizam. Jer je Kina bila pod jakim uticajem konfucijanizma, moralni stavovi Kineza razlikovali su se od moralnih stavova drugih naroda. Kultivacijska metoda tantrizma sadrži dvostruku kultivaciju muškarca i žene, što od tadašnjeg društva nije moglo biti prihvaćeno, zbog toga je on bio istrijebljen za vrijeme uništavanja budizma pod vladavinom Huichanga u Tang dinastiji i tako je Tang tantrizam nestao u našoj Han oblasti. U Japanu sada postoji Istočni tantrizam koji su oni tada naučili od Kine, ali kod njih nije bio izvršen *guanding*. Prema tantrizmu važi: Ako je neko nešto naučio iz tantrizma bez *guandinga*, to spada u krađu Fa i ne priznaje se kao pravo predanje. Jedna druga grana je preko Indije i Nepala uvezena u Tibet, zove se Tibetanski tantrizam i on se prenosio sve do današnjeg dana. U biti je to stanje u budizmu. Ja sam njegov proces razvoja i transformacije objasnio vrlo jednostavno i sažeto. U procesu razvoja čitavog budizma, pojavile su se još i Zen škola, koju je osnovao Bodhidharma, kao i Jingtu škola, Huayan škola i tako dalje. One su sve osnovane na osnovu shvatanja i interpretacije stvari koje je u svoje vrijeme objasnio Shakyamuni i također pripadaju reformisanom budizmu. U budizmu postoji preko deset takvih škola, one su sve poprimile religioznu formu, zato one sve pripadaju budizmu.

Religije koje su nastale u ovom stoljeću, u stvari ne samo u ovom stoljeću, već i u posljednjih nekoliko stoljeća su nastale mnoge druge nove religije u svim dijelovima svijeta,

one najčešće spadaju u pogrešne. Svi veliki prosvjetljeni koji spašavaju ljude imaju svoje vlastito nebesko carstvo. Kada Tathagata-Bude, kao što su Shakyamuni, Amitabha, Mahavairocana, itd., spašavaju ljude, svi oni imaju svijet kojim upravljaju. U ovom našem sistemu Mliječnog puta postoji više od sto takvih svjetova. Naš Falun Dafa također ima Falun-svijet.

Kuda te pogrešne škole vode ljude kada ih "spašavaju"? One ne mogu spasiti ljude. Ono što oni objašnjavaju nije Fa. Naravno, neki ljudi su osnovali religije i na početku nisu htjeli postati demoni koji sabotiraju ortodoksne religije. Oni su na različitim nivoima došli do otvaranja *gonga* i do prosvjetljenja i vidjeli su nešto malo principa, ali su ostali jako daleko od prosvjetljenih koji mogu spasiti ljude; oni su veoma nisko. Oni su otkrili nekoliko principa i primjetili su da su neke stvari među svakodnevnim ljudima pogrešne, oni su također drugima govorili kako da čine dobro. U početku, nisu bili protiv drugih religija. Vremenom su ljudi počeli vjerovati u njih i smatrali su njihove riječi uvjerljivim i onda su sve više vjerovali u njih. Na kraju su ovi ljudi obožavali njih, a religije više ne. Kada se kod njih pojavila želja za slavom i bogatstvom, zatražili su od javnosti da im se dodijele nekakve titule i tako su postali osnivači novih religija. Ja vam kažem, sve one spadaju u heretične religije; sve i da ne štete ljudima, ipak su heretične religije, jer ometaju ljude u vjerovanju u ortodoksne religije; ortodoksne religije mogu spasiti ljude, ali one ne mogu. Kako je vrijeme prolazilo, one su se razvijale i činile potajno loše. U novije vrijeme su mnoge od njih prenešene i u Kinu, takozvana Guanyin škola je na primjer jedna od njih. Zbog toga obavezno morate obratiti pažnju na to. Navodno u jednoj istočnoazijskoj zemlji ima preko 2.000 takvih škola. U jugoistočnoj Aziji i drugim zapadnim zemljama vjeruje se u sve i svašta, u jednoj zemlji postoji čak i vješticearstvo. Sve su to demoni koji su se pojavili u Vremenu kraja Fa. Vrijeme kraja Fa ne odnosi se samo na budizam, već na to da su se mnoge dimenzije, koje se nalaze ispod jednog veoma visokog nivoa, iskvarile. Kraj Fa ne odnosi se samo na Kraj Fa budizma, već to znači da u ljudskim srcima više ne postoji Fa, koji bi održavao moral u ljudskom društvu.

Kod kultivacije se mora koncentrisati na jednu školu

Mi kažemo da se kod kultivacije treba koncentrisati na jednu školu. Sasvim svejedno kako se kultiviraš, ne smiješ miješati druge stvari i kultivirati se nepromišljeno. Neki budisti laici kultiviraju i stvari u budizmu, kao i stvari u našem Falun Dafa. Ja ti kažem, na kraju ništa nećeš dobiti, niko ti neće dati ništa. Iako mi svi pripadamo Buda školi, radi se o pitanju *xinxinga* i o pitanju koncentracije na jednu školu. Ti imaš samo jedno tijelo, *gong* koje škole će se razviti u tvom tijelu? Kako će se on transformisati? Kuda želiš ići? Prema kojoj školi se kultiviraš, tamo ćeš ići. Ako se kultiviraš prema Jingtū školi, ići ćeš u Sukhavati svijet Bude Amitabhe, ako se kultiviraš prema školi Bhaisajyagurua, ići ćeš u Majolika svijet; tako se upravo kaže u religiji i to se zove "bez druge škole".

Practiciranje o kojem mi ovdje govorimo u stvari je cjelokupni proces transformacije *gonga*; on se odvija prema toj specifičnoj školi kultivacije. Šta misliš, gdje ćeš ići? Ako istovremeno stojiš s nogama u dva čamca, ne možeš ništa dobiti. Ne samo da se *qigong* i kultivacija do Bude u hramu ne smiju miješati, nego se ne smiju miješati ni različite metode kultivacije, različite vrste *qigonga* i različite religije. Ne smiju se miješati čak ni škole unutar iste religije, samo jedna od njih se smije izabrati. Ako se kultiviraš prema Jingtū školi, onda kultiviraj isključivo Jingtū školu; ako se kultiviraš prema školi tantrizma, onda kultiviraj samo tantrizam; ako se kultiviraš prema Zen školi, onda kultiviraj samo Zen školu. Ali ako

istovremeno stojiš s nogama u dva čamca i kultiviraš i ovo i ono, onda ne možeš dobiti ništa. To znači, i u budizmu se isto tako govori o "bez druge škole" i nije ti dozvoljeno miješati stvari u svoju kultivaciju. Budisti također prakticiraju i kultiviraju se. Proces nastajanja njihovog *gonga* odvija se prema procesu kultivacije i transformacije njihove škole. U drugim dimenzijama također postoji proces transformacije *gonga*, to je također krajnje složen i čudesan proces, tako da se u to ne smiju proizvoljno miješati druge stvari za vrijeme kultivacije.

Čim neki budisti laici čuju da mi prakticiramo *qigong* Buda škole, pokušavaju odvući naše praktikante u hramove, kako bi ih preobratali u budiste. Reći ću vam, niko od naših ovdje prisutnih učenika ne bi smio to raditi. Ti time sabotiraš naš Dafa i isto tako i zapovijedi u budizmu, a istovremeno i smetaš našim učenicima, tako da ne mogu ništa dobiti. To neće ići. Kultivacija je ozbiljna stvar, mora se biti usmjeren na jednu školu. Iako dio koji mi širimo među svakodnevnim ljudima nije religija, cilj kultivacije je isti - postići otvaranje *gonga*, prosvjetljenje i uspjeti u kultivaciji i postići Ispunjenje.

Shakyamuni je rekao da u Vremenu kraja Fa monasi u hramovima čak i sami sebe jedva mogu spasiti, a da ne govorimo o budistima laicima, o kojima se zapravo još manje vodi briga. Iako si ti formalno uzeo nekog za učitelja, taj takozvani učitelj je također neko ko se kultivira. Ako se on istinski ne kultivira, sve je uzaludno. Bez kultivacije srca, niko ne može ići prema gore. Preobraćenje je formalnost svakodnevnih ljudi. Da li će te preobraćenje u budizam učiniti pripadnikom Buda škole? Hoće li se Buda tada brinuti o tebi? Takvo nešto ne postoji. Čak i ako se svakodnevno klanjaš i od toga dobiješ ranu na glavi, ili ako pališ snopove svijeća, ništa ne pomaže. Ti moraš istinski kultivirati srce, tek onda će to funkcionisati. U Vremenu kraja Fa, kosmos se već vrlo jako promijenio, čak ni mjesta gdje ljudi prakticiraju svoju religioznu vjeru nisu više dobra. To su primjetili i ljudi sa natprirodnim sposobnostima (uključujući i monahe). Trenutno sam ja jedini u čitavom svijetu koji u javnosti širi ispravan Fa. Uradio sam nešto što prije mene niko nije uradio, osim toga sam u Vremenu kraja Fa otvorio tako velika vrata. Ovo je uistinu prilika koja se ne dobija ni u hiljadu godina ili čak deset hiljada godina. Ipak, možeš li biti spašen, što znači možeš li se kultivirati ili ne, još uvijek zavisi od tebe samog. Ovo što sam objasnio je jako veliki kosmički princip.

Ali ja od tebe ne tražim da po svaku cijenu učiš ovaj moj Falun Dafa. Ono što sam objasnio je princip. Ako se želiš kultivirati, moraš se koncentrisati na jednu školu, inače se uopšte ne možeš kultivirati. Naravno, ako se ne želiš kultivirati, nećemo se brinuti za tebe. Fa je objašnjen za one koji se stvarno kultiviraju, zato se obavezno mora koncentrisati na jednu školu, čak se ni misli iz drugih škola ne smiju miješati. Ja ovdje ne govorim o umnim aktivnostima, naš Falun Dafa nema nikakvih umnih aktivnosti. Zbog toga ne trebate dodavati nikakve misli u svoju kultivaciju. Obavezno morate voditi računa o ovome, u osnovi ne postoje umne aktivnosti u našem sistemu. Buda škola podučava prazninu, a Tao škola ništavnost.

Jednom sam svoje misli povezao sa četiri, pet velikih prosvjetljenih, velikih Tao na izuzetno visokim nivoima. Kada se govori o visokim nivoima, onda je to za obične ljude jednostavno zapanjujuće. Oni su htjeli znati o čemu razmišljam. Ja sam se kultivirao tako dugo godina i drugima je sasvim nemoguće čitati moje misli. Natprirodne sposobnosti drugih uopšte ne mogu prodrijeti. Niko ne može saznati nešto o meni ili znati šta mislim. Oni su željeli znati šta mislim, pa su, uz moju saglasnost, izvjesno vrijeme povezali svoje misli sa mojim. Nakon što smo se povezali, za mene je to postalo u izvjesnoj mjeri neizdržljivo. Bez

obzira koliko je visok ili nizak moj nivo, zbog toga što se nalazim među svakodnevnim ljudima, još uvijek radim nešto s namjerom, spašavam ljude i moje je srce posvećeno spasenju ljudi. Ali kako su mirni bili njihovi umovi? Tako mirni da je to zastrašujuće. Da je bio samo jedan koji je postigao takvu mirnoću, to bi bilo u redu. Ali tamo su sjedila četvorica ili petorica, svi u toj mjeri mirni, poput mirnog jezera, bez ičega. Pokušao sam ih osjetiti, ali nisam mogao. Tih nekoliko dana sam se stvarno loše osjećao, imao sam takav osjećaj. To je nešto što svakodnevni ljudi ne mogu zamisliti, niti osjetiti. Njihovi umovi su bili u stanju potpunog nedjelovanja i praznine.

Kod kulture na veoma visokim nivoima uopšte nema misaonih aktivnosti, jer su temelji za to već položeni dok si se nalazio na nivou izgradnje temelja među svakodnevnim ljudima. Kod kulture na visokim nivoima, a posebno u našem sistemu kulture, sve se u potpunosti odvija automatski. Sve dok povisuješ svoj *xinxing*, tvoj *gong* raste. Ti čak više ne trebaš raditi nikakve pokrete rukama. Naše vježbe služe za to da se pojača automatski mehanizam. Zašto se čovjek uopšte ne pomjera kod meditacije? On je potpuno u stanju nedjelovanja. U Tao školi vidimo da se govori o ovim ili onim pokretima ruku, takozvanim misaonim aktivnostima i vođenju misli. Ali ja ti kažem, čim se u Tao školi malo izade iznad nivoa *qija*, više ništa ne postoji; više se uopšte ne govori o ovakvim ili onakvim mislima. Ipak, neki ljudi, koji su prakticirali neke druge *qigong* prakse, nikako ne mogu otpustiti metode disanja, misaone aktivnosti, itd. Ja ih učim stvari s univerziteta, ali me oni stalno pitaju o stvarima iz osnovne škole, kao npr. kako voditi i koristiti misaone aktivnosti. Oni su se već navikli na to i misle da je *qigong* upravo takav, ali u stvari nije.

Natprirodne sposobnosti i *gong* potencija

Mnogima od nas pojmovi *qigonga* nisu sasvim jasni i neki ljudi stalno sve brkaju. Oni označavaju natprirodne sposobnosti *gong* potencijom, a *gong* potenciju natprirodnim sposobnostima. *Gong*, koji se razvio kultivacijom našeg *xinxinga*, nastao je izjednačavanjem s osobinama univerzuma i razvio se iz našeg *de*-a. On određuje visinu nečijeg nivoa, snagu nečije *gong* potencije i visinu njegovog statusa dostignuća. To je najvažniji *gong*. Kakvo se stanje može pojaviti u procesu kulture jedne osobe? Mogu se pojaviti neke posebne natprirodne sposobnosti, koje skraćeno nazivamo natprirodne sposobnosti. *Gong*, o kojem sam upravo govorio, koji povisuje nečiji nivo, naziva se *gong* potencija. Što je nivo viši, to je veća *gong* potencija i natprirodne sposobnosti su moćnije.

Natprirodne sposobnosti su samo nusproizvod kulture, one ne predstavljaju nivo, ne predstavljaju visinu nečijeg nivoa ili jačinu nečije *gong* potencije. Kod nekih ljudi se pojavljuju više, kod nekih manje. Osim toga, natprirodne sposobnosti se ne mogu dobiti ako se njima teži kao glavnom cilju kulture. Natprirodne sposobnosti se mogu razviti samo ako osoba odluči istinski se kultivirati, one se ne smiju smatrati glavnim ciljem kulture. Zašto prakticiraš takvo nešto? Želiš li ih upotrijebiti među svakodnevnim ljudima? Tebi apsolutno nije dozvoljeno koristiti ih po volji među svakodnevnim ljudima. Zato, što više tome težiš, manje ih dobijaš. To je zbog tvoje težnje, a težiti nečemu je samo po sebi vezanost. A ono što se kod kulture odstranjuje su upravo vezanosti.

Mnogi ljudi su se kultivirali do jako visokih nivoa, ali nemaju natprirodne sposobnosti. Njihovi učitelji su ih zatvorili da bi se izbjeglo da urade nešto loše u slučaju da se ne mogu dobro kontrolisati. Zato im nije dozvoljeno koristiti svoje natprirodne sposobnosti. Ima jako

puno takvih ljudi. Čovjekova svijest može upravljati natprirodnim sposobnostima. Moglo bi biti da se neko u snu ne može dobro kontrolisati, poslije jednog sna bi se već moglo desiti da su iduće jutro Nebo i Zemlja preokrenuti naglavačke. To nije dozvoljeno. Zato što se kultura odvija među svakodnevnim ljudima, onima sa velikim natprirodnim sposobnostima obično nije dozvoljeno koristiti ih i najveći dio njih je zaključan, ali to nije apsolutno tako. Mnogi, koji su se dobro kultivirali i mogu se dobro kontrolisati, smiju koristiti neke od svojih natprirodnih sposobnosti. Kad od takvog čovjeka zatražiš da jednostavno pokaže svoje natprirodne sposobnosti, on to ni u kom slučaju neće uraditi, on se može dobro kontrolisati.

Povratna kultura i posuđivanje gonga

Neki još nikad nisu prakticirali *qigong* ili su samo nešto naučili na nekom *qigong* kursu, ali to sve spada u odstranjivanje bolesti i održavanje zdravlja i to nije kultura. To znači da ovi ljudi nisu dobili ispravno učenje, ali su iznenada preko noći dobili *gong*. Mi ćemo sada objasniti odakle dolazi ova vrsta *gonga*. Postoji nekoliko scenarija.

Jedan je povratna kultura. Šta je povratna kultura? To znači da su neki ljudi nešto stariji i žele se kultivirati, ali nemaju dovoljno vremena da bi se kultivirali od početka. Za vrijeme porasta popularnosti *qigonga*, oni su se također htjeli kultivirati. Znali su da se s *qigongom* drugima može činiti dobro i da se oni time istovremeno mogu poboljšati. Imali su želju da se povise, da se kultiviraju. Međutim, prije nekoliko godina, za vrijeme porasta popularnosti *qigonga*, svi *qigong* učitelji su samo promovirali *qigong* i niko nije istinski podučavao stvari visokih nivoa. Čak i do današnjeg dana, ja sam jedini koji u javnosti istinski širi put kulture na visokim nivoima, nema nikog drugog. Svi koji su se povratno kultivirali bili su stariji od 50 godina, relativno stariji ljudi. Njihova urođena osnova i stvari koje su nosili u svojim tijelima bili su jako dobri. Skoro svi oni su bili ljudi koje bi učitelji uzeli za učenike ili nasljednike. Ali ti ljudi su bili već stari i sada se žele kultivirati. To je lakše reći nego učiniti! Gdje oni mogu pronaći učitelja? Ali sve dok su se željeli kultivirati i ako su to pomislili u srcu, ta misao bi zasjala poput zlata i potresla bi Svijet-deset-smjerova. Ljudi često govore o Buda-prirodi, dakle to bi bila upravo Buda-priroda koja se pojavila.

Gledajući sa visokih nivoa, čovjekov život nije zato tu da bi bio čovjek. Čovjekov život je nastao u prostoru univerzuma, tako da je izjednačen s osobinama univerzuma *Zhen, Shan, Ren* i po prirodi je milosrdan i dobrodušan. Ali nakon što je broj živih bića porastao, kod njih se pojavila jedna vrsta društvenih odnosa i tako su neki od njih postali sebični ili loši i nisu više mogli ostati na veoma visokim nivoima i pali su prema dole, znači na jedan drugi nivo. Na ovom nivou su opet postali lošiji i nastavili su padati prema dole, prema dole i na kraju su pali na nivo svakodnevnih ljudi. Onaj ko je pao na ovaj nivo, trebao bi biti potpuno uništen, ali su veliki prosvjetljeni iz dobrodušnosti odlučili dati ljudima još jednu priliku u najbolnijem okruženju, pa su zato stvorili ovu dimenziju.

Ljudi u drugim dimenzijama nemaju takvo tijelo, oni mogu lebditi i mogu se smanjiti ili povećati. Ali u ovoj dimenziji je čovjeku dato takvo tijelo, ovo naše fizičko tijelo. Kad imaš ovo tijelo, ne možeš podnijeti hladnoću, ne možeš podnijeti vrućinu, ne možeš podnijeti umor i ne možeš podnijeti glad. U svakom slučaju, to je patnja. Kada si bolestan, osjećaš se loše. Prolaziš kroz rođenje, starenje, bolest i smrt. Kroz patnju otplaćuješ svoje karmičke dugove. Tebi je pružena još jedna šansa i gleda se na to da li se još možeš vratiti ili ne. Zato su ljudi upali u maglu. Nakon što si tu upao, za tebe je stvoren ovaj par očiju da ne bi mogao vidjeti

druge dimenzije i pravu pojavu materije. Ako se možeš vratiti, onda je najveća patnja upravo najvrijednija. Proživjećeš mnoge teškoće dok se u magli kultiviraš kroz spoznaju i tako će povratak biti brži. Budeš li i dalje išao prema dole, tvoj će život biti uništen. Zbog toga, čovjekov život u očima prosvijetljenih bića ne postoji zato da bi bio čovjek, nego da bi se vratio svom izvoru, istinskom sebi. Svakodnevni ljudi to ne mogu spoznati. Običan čovjek je u običnom ljudskom društvu samo običan čovjek. On misli na to kako da napreduje i da dobro živi. Što bolje živi, sve je sebičniji, želi posjedovati još više i tako se sve više udaljava od osobina univerzuma. I tako on ide ka uništenju.

Tako to izgleda posmatrano sa visokih nivoa. Ti misliš da napreduješ, dok u stvari nazaduješ. Čovječanstvo vjeruje da se razvija i da nauka napreduje, ali ono u stvari jednostavno slijedi zakone univerzuma. Zhang Guolao, jedan od osam božanstava, jahao je naopačke na svom magarcu. Samo mali broj ljudi zna zašto je on sjedio naopačke na svom magarcu. Shvatio je da je kretanje naprijed zapravo pomicanje unazad, tako da je jahao magarca okrenut leđima naprijed. Znači, kada se neki ljudi žele kultivirati, prosvijetljeni smatraju to srce izuzetno dragocjenim i onda im mogu bezuslovno pomoći. Kao za naše učenike koji su danas ovdje, ako se želite kultivirati, ja vam mogu bezuslovno pomoći. Ali, kao običnom čovjeku, ako se želiš izliječiti ili želiš imati ovo ili ono, zaboravi na to, ja ti ne mogu pomoći. Zašto? Zato što želiš biti običan čovjek, a običan čovjek mora proći kroz rođenje, starenje, bolest i smrt. Tako mora biti. Sve ima svoje uzročno-posljedične veze, koje se ne mogu poremetiti. Tvoj život na početku nije uključivao kultivaciju, ali se sada želiš kultivirati, prema tome, tvoj budući put će biti preuređen i sada tvoje tijelo može biti dovedeno u red.

Znači, čim se osoba poželi kultivirati, čim se pojavi ta želja, veliki prosvijetljeni će to vidjeti i smatraće to vrlo dragocjenim. Ali kako mu oni mogu pomoći? Gdje u svijetu on može pronaći učitelja koji će ga podučavati? Osim toga, on već ima preko 50 godina. Velika prosvijetljena bića ga ne mogu podučavati, jer ako bi se oni ovdje prikazali i podučavali ga, objašnjavali mu Fa i pokazivali vježbe, to bi značilo otkrivanje nebeskih tajni i onda bi i oni sami pali dole. Ljudi su upali u svijet zablude zbog svojih sopstvenih loših djela i zato se usred zablude moraju kultivirati kroz spoznaju. Zato ih prosvijetljeni ne mogu podučavati. Ako bi ljudi vidjeli da ti živi, pravi Buda objašnjava Fa i pokazuje vježbe, čak bi i oni koji su skrivili neoprostive grijehe došli učiti i svi bi vjerovali. Šta bi tada ostalo za ljude da spoznaju? Pitanje spoznaje ne bi više postajalo. Ljudi su sami upali u svijet zablude i trebali bi biti uništeni. Tebi je pružena još jedna šansa da se vratiš iz zablude. Ako se možeš vratiti, vrati se. Ako se ne uspiješ vratiti, nastavićeš ciklus reinkarnacije i bićeš uništen.

Svako mora ići svojim putem. Šta se dešava ako se čovjek odluči kultivirati? Oni su smislili način. *Qigong* je u to vrijeme bio vrlo popularan, što je bila posljedica promjene u kosmičkoj klimi. Da bi djelovali u skladu s ovom promjenom u kosmičkoj klimi, oni su tu osobu, prema nivou njenog *xinxinga*, snabdjeli *gongom*. Na njeno tijelo je prikačeno mekano crijevo, koje je funkcionisalo kao slavina za vodu, kad bi se otvorilo, *gong* bi došao. Kad je ona htjela emitovati *gong*, *gong* bi došao. Kad nije emitovala *gong*, nije posjedovala *gong*. U takvom je stanju bila. To se zove povratna kultivacija, kod koje se kultivira odozgo prema dole sve do Ispunjenja.

Kada govorimo o uobičajenoj kultivaciji, tu se kultivira odozdo prema gore, sve do Otvaranja *gonga* i postizanja Ispunjenja. Povratna kultivacija, o kojoj govorimo, odnosi se na to kada stariji ljudi nemaju dovoljno vremena kultivirati se odozdo prema gore, pa bi zato za

njih bilo brže ako se kultiviraju odozgo prema dole. To je također fenomen koji se pojavio u to vrijeme. Takva osoba mora imati vrlo visok *xinxing* i data joj je energija u skladu s nivoom njezinog *xinxinga*. Čemu sve to? Kao prvo, to je bilo da bi se išlo ukorak s kosmičkim fenomenima tog vremena. Kad je ta osoba činila dobra djela, mogla je istovremeno prolaziti kroz teškoće. To je zbog toga što te u ophođenju sa svakodnevnim ljudima mogu ometati sve vrste vezanosti svakodnevnih ljudi. Neki ljudi neće pokazati razumijevanje za njega, iako je izliječio njihove bolesti. On je možda odstranio mnoge loše stvari iz njihovih tijela, ali možda u to vrijeme promjene nisu tako očite, bez obzira u kojoj mjeri ih je on izliječio. Tada su oni nezadovoljni i ne iskazuju mu zahvalnost, čak će ga možda psovati i optužiti za prevaru! Kroz takve probleme se njegovo srce čeliči u ovom okruženju. Njemu je dat *gong* da bi se mogao kultivirati, poboljšati i povesiti se. Dok čini dobra djela, on istovremeno razvija svoje natprirodne sposobnosti i povećava svoj vlastiti *gong*. Međutim, neki ljudi ne znaju za taj princip. Nisam li rekao da se tim osobama ne smije objasniti Fa? Oni to sami moraju spoznati, to je pitanje spoznaje. Ako osoba to ne može spoznati, ništa se ne može učiniti.

Kada su neki ljudi dobili *gong*, iznenada su jedne noći u snu osjetili vrućinu i teško su mogli podnijeti i pokrivač. Sljedeće jutro, nakon što su ustali, šta god da su dodirnuli, dobili bi strujni udar. Znali su da su dobili energiju. Ako je nekog nešto boljelo, prešli bi rukom preko tog mjesta i to je funkcionisalo prilično dobro. Od tog trenutka su znali da posjeduju *gong*. Postali su *qigong* majstori i okačili su natpis. Dali su sebi titulu *qigong* majstora i započeli sopstvenu praksu. Na početku, s obzirom da je takav čovjek prilično dobar, mogao je odbiti novac ili poklone koje su mu drugi htjeli dati u znak zahvalnosti za njihovo izlječenje. Ipak, nije se mogao oduprijeti zagađenju u ovoj velikoj šarenoj kolotečini svakodnevnih ljudi, jer ljudi koji su se povratno kultivirali nisu doživjeli pravu kultivaciju *xinxinga*, tako da je njima jako teško kontrolisati svoj *xinxing*. Polako je počeo uzimati male suvenire, a onda je postepeno počeo uzimati i velike poklone, i konačno, ako bi mu dali premalo, nije više pristajao na to. Na kraju je rekao: "Zašto mi dajete toliko mnogo stvari? Bolje mi dajte novac!" Kada mu neko ne bi dao dovoljno novca, nije pristajao na to. Također više nije poštovao ni *qigong* majstore ispravnih škola. Sve što mu je dolazilo do ušiju bili su komplimenti drugih o tome kako je on sposoban. Kad bi neko rekao da nije dobar, bio je nezadovoljan. Njegova žudnja za slavom i bogatstvom je porasla. On je vjerovao da je pametniji od drugih i da je izuzetan. Vjerovao je da je dobio *gong* da bi postao *qigong* majstor i da bi se time obogatio. Zapravo je to bilo za kultivaciju. Čim je porasla žudnja za slavom i bogatstvom, njegov *xinxing* je već opao.

Rekao sam da, koliko god je visok nečiji *xinxing*, toliko je visok i njegov *gong*. Kada njegov *xinxing* opadne, onda se njemu više ne može dati toliko *gonga*, jer se on mora dati u skladu s njegovim *xinxingom*. Koliko je visok *xinxing*, toliko je visok i *gong*. Što je jača njegova težnja za slavom i bogatstvom, to će dublje propadati među običnim ljudima i njegov *gong* će također padati s njim. Na kraju, kada potpuno padne do dna, više neće dobijati *gong* i više ga uopšte neće imati. Prije nekoliko godina se pojavio ne tako mali broj takvih ljudi, najčešće žena preko 50 godina. Ti vidiš tu stariju ženu kako radi vježbe, ali ona nije dobila istinsko učenje. Možda je ona na nekom *qigong* kursu naučila nekoliko pokreta za odstranjivanje bolesti i održavanje zdravlja. Jednog dana je sasvim iznenada dobila *gong*. Međutim, kada se njen *xinxing* pogoršao i čim se pojavila težnja za slavom i bogatstvom, ona je pala dole, na kraju je postala niko i ništa i sada također više nema *gonga*. Od onih koji su se povratno kultivirali, jako puno ih je sada palo dole, samo jako malo ih je još ostalo. Zašto? Zato što ona nije znala da se time trebala kultivirati. Mislila je da kroz to može steći bogatstvo

među svakodnevnim ljudima, steći slavu i postati *qigong* majstor. U stvari je to bilo za njenu kultivaciju.

Šta je posuđivanje *gonga*? Tu ne postoji starosna granica, ali postoji jedan zahtjev, naime, taj čovjek mora imati izuzetno dobar *xinxing*. On zna da se prakticiranjem *qigonga* može kultivirati, on se također želi kultivirati. On se u svom srcu želi kultivirati, ali gdje može naći učitelja? Prije nekoliko godina je stvarno bilo istinskih *qigong* majstora koji su širili puteve kultivacije, ali to što su širili bile su samo stvari odstranjivanja bolesti i održavanja zdravlja. Niko nije širio stvari ka visokim nivoima i niko to nije podučavao.

S obzirom da se upravo govori o posuđivanju *gonga*, objasniću uz to još nešto: Pored glavne duše (glavne svijesti) čovjek još ima sporednu dušu (sporednu svijest). Neki imaju jednu, dvije, tri, četiri, ili čak pet sporednih duša. Sporedne duše ne moraju nužno biti istog spola kao i osoba. Neke su muškog spola, neke ženskog, sve su različite. Zapravo, glavna duša i fizičko tijelo također nisu nužno istog spola. Ustanovili smo da u današnje vrijeme mnogo muškaraca ima žensku dušu, dok mnogo žena ima mušku dušu, što upravo odgovara nebeskoj pojavi o kojoj se sada govori u Tao školi, naime, da su *yin* i *yang* zamijenili mjesta, *yin* je jak, *yang* je slab.

Obično čovjekova sporedna duša dolazi sa višeg nivoa nego njegova glavna duša. Posebno kod nekih ljudi, njihova sporedna duša dolazi sa vrlo visokog nivoa. Sporedna duša, međutim, nije posjedujući duh, ona je rođena istovremeno s tobom iz majčinog stomaka i ima isto ime kao i ti, ona je također dio tvog tijela. Obično je glavna duša ta koja ima zadnju riječ kada ljudi o nečemu razmišljaju ili nešto rade. Ono što sporedna duša uglavnom čini je da kontroliše glavnu dušu, kako bi učinila što je moguće manje loših stvari. Ali ako je glavna duša vrlo tvrdoglava, sporedna duša je nemoćna. Sporedna duša nije zavedena običnim ljudskim društvom, dok se glavna duša lako da zavesti.

Neke sporedne duše dolaze sa vrlo visokih nivoa i one su možda nadomak ispravnog dostignuća. Sporedna duša se želi kultivirati, ali ako se glavna duša ne želi kultivirati, ona ništa ne može učiniti. Jednog dana za vrijeme *qigong* vala, glavna duša je također poželjela učiti *qigong* i kultivirati se ka višim nivoima. Naravno, ta misao je bila vrlo jednostavna i ona nije težila stvarima kao što su ugled i vlastiti dobitak. Sporedna duša se jako obradovala: "Ja se želim kultivirati, ali ja ne odlučujem. Sada se i ti želiš kultivirati, to je upravo to što i ja želim." Ali gdje naći učitelja? Sporedna duša je vrlo sposobna, napustila je tijelo i potražila velikog prosvijetljenog kojeg je poznavala iz svog prošlog života. Zato što neke sporedne duše dolaze sa vrlo visokih nivoa, one mogu napustiti tijelo. Nakon što je stigla tamo, rekla je da se želi kultivirati i posuditi *gong*. On je vidio da je ta osoba prilično dobra i naravno da će joj pomoći ako se želi kultivirati. I tako je sporedna duša posudila *gong*. Obično ovaj *gong* ima raspršavajuću energiju i prenosi se vodovima; postoje i posuđene, već gotove, formirane stvari i obično su u gotovim, formiranim stvarima sadržane i natprirodne sposobnosti.

Na ovaj način, osoba je istovremeno mogla posjedovati i natprirodne sposobnosti. Kao što sam prethodno već objasnio, i ovaj čovjek je noću, u snu, osjetio jaku vrućinu. Kada se iduće jutro probudio, imao je *gong*. Šta god da je dotaknuo, dobio bi strujni udar. Mogao je liječiti bolesti drugih ljudi i znao je da je dobio *gong*. Odakle? To mu je bilo nejasno. Znao je otprilike da je došao iz kosmičkih prostora, ali nije znao odakle je tačno došao. Sporedna duša mu to nije rekla, jer je sporedna duša bila ta koja se kultivirala. On je samo znao da je dobio *gong*.

Ne postoji starosna granica za ljude koji posuđuju kultivacijsku energiju. Bilo je relativno mnogo mladih ljudi. Prije nekoliko godina su se također pojavili neki, koji su imali preko 20, 30, ili 40 godina, bilo je također i nekih starijih. Za mlade ljude je onda još teže kontrolisati se. Ti vidiš doduše da je on uobičajeno prilično dobar; dok u društvu svakodnevnih ljudi još nema velikih sposobnosti, njegovo srce koje teži slavi i bogatstvu je veoma slabo. Ali čim nadmaši druge, obično će lako pasti pod uticaj slave i bogatstva. On misli kako u svom životu pred sobom ima još jako dug put, on se još želi napregnuti i dalje se boriti kako bi postigao nekakav cilj svakodnevnih ljudi. Zbog toga, čim dobije natprirodne sposobnosti i neke posebne sposobnosti, često ih koristi kao sredstvo za postizanje vlastitih ciljeva u društvu svakodnevnih ljudi. To onda više ne ide i one također više ne smiju biti upotrebljavane na ovaj način. Što više oni koriste taj *gong*, to manje *gonga* imaju, na kraju nemaju više ničega. Od ovih ljudi je još više palo naniže, kao što vidim, sad više niko nije preostao.

Oba slučaja, koja sam upravo objasnio, spadaju u slučajeve kod kojih su ljudi sa prilično dobrim *xinxingom* dobili *gong*. Taj *gong* nije nastao njihovom vlastitom kultivacijom, on dolazi od prosvijetljenih bića, zato je *gong*, sam po sebi, dobar.

Posjedujući duhovi (*futi*)

Mnogi od vas su možda u krugovima kultivatora čuli priče o tome kako životinje, lisice, žute lasice, duhovi, zmije i tako dalje, mogu obuzeti ljudsko tijelo. O čemu se tu radi? Neki govore o razvijanju natprirodnih sposobnosti kroz prakticiranje *qigonga*. U stvari, natprirodne sposobnosti se ne razvijaju, natprirodne sposobnosti su samo čovjekove urođene sposobnosti. Radi se samo o tome da se ljudi za vrijeme razvoja ljudskog društva sve više koncentrišu na vidljive stvari u ovoj našoj materijalnoj dimenziji i oni su sve više ovisni o našim modernim alatima, zbog toga čovjekove urođene sposobnosti sve više nazaduju i na kraju potpuno nestaju.

Ako želi posjedovati natprirodne sposobnosti, čovjek se mora kroz kultivaciju vratiti svom izvoru, istinskom sebi i otvoriti ih kroz kultivaciju. Ali životinje nemaju tako komplikovane misli kao ljudi, tako da su povezane s kosmičkim osobinama i imaju svoje urođene sposobnosti. Neki tvrde da se životinje mogu kultivirati, da lisice znaju kako se oplemenjuje eliksir, ili da zmije i druge životinje znaju kako se može kultivirati. U stvari, nije da one znaju kako se može kultivirati. U početku, one uopšte ne znaju šta je to kultivacija, one jednostavno imaju te urođene sposobnosti. Pod određenim uslovima i pod određenim okolnostima, one će s vremenom možda djelovati, tako da one mogu dobiti *gong* i mogu se pojaviti natprirodne sposobnosti.

Na taj način, te životinje su dobile neke sposobnosti. Prije se govorilo da su dobile inteligenciju i sposobnosti. U očima svakodnevnih ljudi su životinje jako opasne i mogu lako upravljati ljudima. Ja kažem da zapravo nisu tako opasne, pred istinskim kultivatorom nisu ništa. Iako su se kultivirale već oko hiljadu godina, ne mogu izdržati čak ni pritisak malog prsta. Mi kažemo da životinje imaju ove urođene instinkte i mogu imati neke sposobnosti. Ali u ovom našem kosmosu postoji još jedan princip: životinjama nije dozvoljeno doći do uspjeha u kultivaciji. Zbog toga ste čitali u knjigama iz starih vremena da životinje moraju biti ubijene svakih nekoliko stotina godina, ponekad kroz velike katastrofe, ponekad kroz male katastrofe. Nakon izvjesnog vremena će *gong* kod životinje porasti, zato mora biti uništena, biće pogođena gromom ili će se nešto drugo desiti. Njima nije dozvoljeno kultivirati se. Zato što

ne posjeduju ljudsku prirodu, ne mogu se kultivirati kao ljudi. Ako dođu do uspjeha u kultivaciji, garantovano će postati demoni, jer nemaju ljudske osobine. Zato im nije dozvoljeno doći do uspjeha u kultivaciji i zato će biti ubijene od Neba. To i one znaju. Ali, kao što sam rekao, ljudsko društvo se sada jako brzo srozava i neki ljudi čine sva moguća nedjela. Kad dospije do takvog stanja, nije li ljudsko društvo u opasnosti?

Kada nešto dođe do krajnosti, slijedi preokret! Mi smo ustanovili da se čovječanstvo, svaki put kada je ljudsko društvo bilo uništeno u različitim ciklusima predistorijskih vremena, nalazilo u stanju u kojem je moral bio krajnje pokvaren. Sada se dimenzija u kojoj živi čovječanstvo, a i mnoge druge dimenzije, nalaze u krajnje opasnoj situaciji. Isto je i u drugim dimenzijama na ovom nivou. Bića tamo također žele brzo pobjeći i također žele doći na više nivoe. Ona vjeruju da mogu izbjeći opasnost ako povise svoje nivoe. Ali kako to može biti tako jednostavno? Onaj ko se želi kultivirati mora imati ljudsko tijelo. To je jedan od razloga zašto postoji tako nešto da *qigong* praktikanti budu zaposjednuti od strane duha.

Neki se pitaju zašto se niko od mnogobrojnih velikih prosvijetljenih i majstora sa velikim sposobnostima ne pobrine za to? Postoji još jedan princip u ovom našem kosmosu: Ako sam težiš nečemu ili želiš nešto imati, drugi se ne žele u to miješati. Mi vas ovdje učimo da idete ispravnim putem, istovremeno ti temeljito objašnjavamo Fa, a tebi je prepušteno da to shvatiš. Međutim, hoćeš li se odlučiti da učiš ili ne, to je konačno tvoja sopstvena stvar. Učitelj uvodi kroz vrata, ali kultivacija zavisi od tebe samog. Niko ne vrši pritisak na tebe i ne prisiljava te na kultivaciju. To je tvoja stvar da li ćeš se kultivirati ili ne. To znači, kojim god se putem odlučiš ići, šta god želiš imati i šta god želiš dobiti, niko te neće spriječiti. Samo te se može pokušati ljubazno ubijediti da činiš dobro.

Ti doduše vidiš da neki ljudi vježbaju *qigong*, ali je njihov posjedujući duh u stvari dobio sve. Kako su oni privukli posjedujući duh? Koliko od *qigong* praktikanata u cijeloj zemlji imaju posjedujući duh na svom tijelu? Ako bi vam rekao broj, mnogi se više ne bi usudili praktistirati *qigong*. Broj je zastrašujući! Ali zašto se ovo stanje pojavilo? Ove stvari upropaštavaju obično ljudsko društvo. Kako je moguće da se pojavi ovako loša situacija? Ljudi su sami to prouzrokovali, jer se čovječanstvo kvari i demoni su svuda. Prije svega lažni *qigong* majstori svi imaju posjedujuće duhove na sebi, kod širenja njihovog *qigonga* oni prenose upravo te stvari. U istoriji čovječanstva životinjama nikad nije bilo dozvoljeno doći na ljudska tijela. Čim bi to uradile, bile bi ubijene. Ko god bi to vidio, ne bi to dozvolio. Ali u našem današnjem društvu ima nekih koji im se mole, žele ih imati i prinose im žrtve. Neki će misliti: Pa ja nisam stvarno težio za njima! Ti doduše nisi težio za njima, ali ti težiš natprirodnim sposobnostima. Zar bi ti ih prosvijetljeni ispravnog Fa mogli dati? Težnja je vezanost svakodnevnih ljudi i ta vrsta težnje mora biti odstranjena. Ko ti onda to može dati? Samo demoni i različite životinje u drugim dimenzijama ti ih mogu dati, zar to nije isto kao i težiti za njima? Tako one dolaze.

Koliko ljudi vježba *qigong* sa ispravnim mislima? Kod prakticiranja čovjek mora voditi računa o *de-u*, činiti dobre stvari i biti dobrodušan, na svakom mjestu i u svakoj prilici se treba vladati na taj način. Svejedno da li prakticiraju u parkovima ili kod kuće, koliko ljudi razmišlja na taj način? Ko zna kakav *qigong* neki vježbaju, oni vježbaju i klate se tamo-vamo, a istovremeno još i govore: "Ah! Moja snaha jednostavno nema poštovanja prema meni; moja stara svekrva, kako je samo loša!" Neki pričaju o svemu, od radnog mjesta, pa sve do velikih državnih problema, nema o čemu ne brbljaju. Čak se još jako razljute ako nešto ne odgovara njihovim ličnim stavovima. Šta misliš, je li to prakticiranje? Neko vježba stojeći stav, pri

čemu se njegove noge tresu od umora, ali uprkos tome njegov um nije miran: "Sad je sve tako skupo, cijene su porasle, a na mom radnom mjestu se više ne mogu isplaćivati plate. Zašto ne mogu dobiti natprirodne sposobnosti kroz vježbanje? Ako dobijem natprirodne sposobnosti, i ja mogu postati *qigong* majstor i obogatiti se, i ja ću liječiti ljude i time moći zarađivati." Kad on vidi da se natprirodne sposobnosti pojavljuju kod drugih, postaje još uzrujaniji. On još samo teži natprirodnim sposobnostima, otvaranju nebeskog oka i tome da može liječiti bolesti. Razmisli, koliko je to daleko od kosmičkih osobina *Zhen, Shan, Ren*! To u potpunosti odudara od njih. Još jače izraženo, on vježba zao put! Ali on to radi nesvjesno. Što više on tako misli, to su lošije misli koje on emituje. S obzirom da ovaj čovjek nije dobio Fa, on ne zna da treba voditi računa o vrlinama i misli da može dobiti *gong* samo izvodeći neke pokrete rukama i da ono što želi imati, može dobiti težnjom, on misli da je to tako.

Upravo jer sopstvena misao nije ispravna, privučene su loše stvari. Ta životinja to vidi: "Ovaj čovjek se prakticiranjem želi obogatiti; onaj čovjek želi postati slavan i dobiti natprirodne sposobnosti. Lijepo, njegovo tijelo nije loše i stvari koje ima na sebi su također jako dobre, ali njegove misli su stvarno loše, on teži natprirodnim sposobnostima! Možda on ima učitelja, ali čak i ako ima učitelja, to me ne plaši." Ona zna da, kad učitelj ispravnog puta kulture vidi njegovu težnju za natprirodnim sposobnostima, što više on za njima težio, to je manje vjerovatno da će mu ih učitelj dati, jer je to upravo vezanost koja mora biti odstranjena. Što više takvih misli on ima, to je manja šansa da će dobiti ikakve natprirodne sposobnosti i on to još manje može shvatiti. Što više tome teži, to lošije postaju njegove misli. Na kraju, kad učitelj vidi da je za ovog čovjeka prošao voz, on odmahuje i više se ne brine za njega. Neki ljudi nemaju učitelja, ali možda će se jedan učitelj u prolazu pobrinuti za njega, jer u različitim dimenzijama postoji mnogo prosvijetljenih. Taj prosvijetljeni vidi ovog čovjeka, posmatra ga i slijedi jedan dan. Kada vidi da on ništa ne valja, on odlazi. Sutradan dolazi još jedan drugi, baca pogled na njega, vidi da ne valja, pa i on odlazi.

Životinja zna da mu njegov učitelj neće dati stvari za kojima on teži, svejedno da li on ima učitelja ili učitelja u prolazu. Životinje ne mogu vidjeti dimenzije u kojima se nalaze veliki prosvijetljeni, zbog toga se ne boje, one iskorištavaju tu prazninu. Postoji princip u našem univerzumu: Kad neko sam nečemu teži, kad neko sam želi nešto imati, drugi se obično ne mogu umiješati. Ovu prazninu životinja koristi za sebe: On to želi imati, ja ću mu to dati, pomoći ću mu i to nije pogrešno, zar ne? I tako mu životinja to da. Na početku se životinja ne usuđuje prikačiti se na njega, nego mu prvo daje malo *gonga* za probu. Jednog dana on iznenada stvarno dobija *gong* za kojim je težio i čak može liječiti bolesti. Životinja vidi da je funkcionisalo, kao uvertira u muzičkom komadu: s obzirom da on to želi imati, onda ću se prikačiti na njega, tako da mu mogu dati više i direktnije. "Zar ne želiš nebesko oko? Ovaj put ću ti dati sve." Tako ga ona zaposjedne.

Njegove žudne misli teže upravo za ovim stvarima, onda je njegovo nebesko oko otvoreno, on čak može emitovati *gong* i uz to još ima i nekoliko malih sposobnosti. On se jako raduje i misli da je te stvari konačno dobio težeći i vježbajući. On zapravo ništa nije dobio vježbajući. On osjeća da može gledati kroz ljudsko tijelo i vidjeti gdje su problemi u nečijem tijelu. U stvari, njegovo nebesko oko uopšte nije otvoreno, to je ta životinja koja upravlja njegovim mozgom. Životinja gleda sopstvenim očima i to se preslikava u njegovom mozgu, onda on vjeruje da je njegovo nebesko oko otvoreno. "Želiš emitovati *gong*? Onda uradi to." Čim on ispruži svoju ruku da emituje *gong*, mala šapa te životinje se također ispruža iza njegovog tijela. Kad on emituje *gong*, mala zmija plazi svoj jezik i liže njime bolesno ili

natečeno mjesto. Tako nešto se dešava jako često, ti duhovi koji posjeduju ove ljude, svi su privučeni njihovom sopstvenom težnjom.

Znači, on teži ka nečemu, on se želi obogatiti, on želi biti slavan. Dobro, on već ima natprirodne sposobnosti, on može liječiti, a čak i njegovo nebesko oko može gledati. Prilično je radostan. Životinja to vidi: "Ti se želiš obogatiti, zar ne? U redu, ja ću te učiniti bogatim." Stvarno je jednostavno manipulirati mozgom običnog čovjeka. Ona može upravljati mnogim ljudima tako da oni dođu kod njega na liječenje, i oni dolaze u velikom broju. Onda dobro, dok on sa ove strane liječi bolesne, ona sa one strane navodi novinare da mu prave reklamu u novinama. Ona upravlja svakodnevnim ljudima da to rade. Ako neko, ko dođe na liječenje, ne plati dovoljno, to neće ići i ona će učiniti da on dobije glavobolju, tako da on u svakom slučaju mora puno platiti. Znači, on dobija i slavu i bogatstvo. Obogatio se, postao je slavan i postao je *qigong* majstor. Obično ljudi kao on ne paze na svoj *xinxing* i usuđuju se sve reći: Nebo je broj jedan, a on je broj dva. On se usuđuje reći da je on božica Kraljica majka ili Car žada, koji je sišao u ljudski svijet, on ide čak tako daleko da se usuđuje reći da je Buda. Zato što nije stvarno proživio kultivaciju *xinxinga*, on kod vježbanja teži natprirodnim sposobnostima i na kraju je privukao posjedujućeg duha kroz ovu životinju.

Neki možda misle: "Pa šta je tu loše? U redu je, sve dok mogu zaraditi novac i obogatiti se. Osim toga, još se mogu i proslaviti." Mnogi ljudi tako misle. Ja vam kažem, zapravo životinja ima svoje namjere i neće ti ništa dati bez razloga. U ovom univerzumu postoji princip koji glasi: Bez gubitka nema dobitka. Šta ona dobija? Zar nisam upravo govorio o tome? Ona želi imati to malo esencije tvog tijela da bi se kultivirala u ljudski oblik i tako ona sakuplja čovjekovu esenciju sa njegovog ljudskog tijela. Ali postoji samo ova jedna porcija esencije u ljudskom tijelu; ko se želi kultivirati, ima samo ovu jednu porciju. Ako dopustiš životinji da ti je uzme, možeš zaboraviti na kultivaciju. Kako ćeš se onda kultivirati? Ti nemaš više ništa, više se uopšte ne možeš kultivirati. Neki možda kažu: ja se i ne želim kultivirati, ja se samo želim obogatiti, dovoljno je da imam novac, sve drugo mi je svejedno! Ja ti kažem, ti se želiš obogatiti, ali kad ti objasnim ovaj princip, nećeš više tako misliti. Zašto? Ako ona ranije napusti tvoje tijelo, nećeš više imati snage u svojim zglobovima. Od tada, pa nadalje, čitav tvoj život će biti tako, jer ti je oduzela previše ljudske esencije. Ako ona kasnije napusti tvoje tijelo, vegetiraćeš i provešćeš ostatak svog života ležeći u krevetu, jedva dišući. Ti imaš novac, ali da li ga možeš trošiti? Ti si slavan, ali možeš li uživati u tome? Zar to nije zastrašujuće?

Tako nešto je posebno primjetno među današnjim praktikantima *qigonga* i vrlo je čest slučaj. Ne samo da životinja može zaposjednuti osobu, nego i ubija dušu, prodire u čovjekovu *nivan* palaču i tu čuči. Izvana gledano je on čovjek, ali on nije čovjek, sada se čak i tako nešto pojavljuje. Jer, moralne vrijednosti čovječanstva su se već promijenile. Kad neko čini nešto loše i ti mu kažeš da čini nešto loše, on ti jednostavno neće vjerovati. On vjeruje da je zarađivati novac, težiti za novcem i obogatiti se, njegovo urođeno pravo i da je to ispravno. Zbog toga će on povrijediti druge i činiti drugima štetu. Da bi zaradio novac, počinice sva moguća nedjela i usudiće se uraditi sve. Ako ništa ne izgubi, životinja neće ništa dobiti. Kako ti može tek tako nešto dati? Ona želi uzeti stvari sa tvog tijela. Naravno, onda kažemo da su ljudi privukli probleme, jer njihovo vlastito stanovište nije ispravno, njihovo srce nije ispravno.

Da vidimo sad šta naš Falun Dafa kaže o tome. Kad se kultiviraš u našoj školi, sve dok možeš vladati svojim *xinxingom*, neće ti se ništa desiti, "jedno ispravno pobjeđuje sto zala".

Ali ako ne možeš vladati svojim *xinxingom* i težiš ka ovome ili onome, sigurno ćeš privući probleme. Neki jednostavno ne mogu ostaviti stvari koje su prije vježbali. Mi kažemo, kod prakticiranja se mora koncentrisati na jednu školu, kod istinske kultivacije se mora koncentrisati na jednu školu. Ti vidiš da su neki *qigong* majstori čak napisali knjige, ali ja ti kažem, u tim knjigama ima svega i svačega, to je isto kao i stvari koje oni prakticiraju - zmije, lisice i žute lasice. Kad čitaš te knjige, takve stvari iskaču iz riječi. Ja sam rekao, broj lažnih *qigong* majstora mnogostruko prevazilazi broj istinskih *qigong* majstora. Ti ih ne možeš prepoznati. Zato se obavezno morate dobro kontrolisati. Ja ovdje također ne tražim od vas da obavezno kultivate Falun Dafa. Ti možeš kultivirati koju god želiš školu. Postoji jedna stara izreka, koja kaže: "Bolje i u hiljadu godina ne dobiti ispravan Fa, nego li i jedan dan kultivirati praksu divlje lisice." Zbog toga se treba obavezno dobro kontrolisati i stvarno kultivirati ispravan Fa. Nemoj miješati ništa drugo u svoju kultivaciju, nemoj dodavati čak ni misli. Kod nekih je *falun* već deformisan. Zašto je on deformisan? Oni kažu: "Ali ja nisam prakticirao taj drugi *qigong*." Ali, kad god prakticira, njegove misli dodaju stvari koje je ranije prakticirao, zar onda one nisu umiješane? Toliko o pitanju posjedujućih duhova.

Kosmički jezici

Šta su kosmički jezici? To znači da neko iznenada može govoriti neki čudan jezik, dilidulu, dilidulu, a da ni sam ne razumije šta govori. Ljudi sa sposobnošću telepatije mogu otprilike shvatiti značenje, ali oni ne mogu znati šta on konkretno kaže. Neki ljudi mogu govoriti čak i više različitih jezika. Neki se još smatraju veličanstvenim, oni vjeruju da je to sposobnost ili natprirodna sposobnost. U stvari, to nije natprirodna sposobnost, niti je sposobnost praktikanta, niti to može predstavljati nečiji nivo. Šta je to onda? To znači da tvojim mislima upravlja jedno strano inteligentno biće. Ali ti misliš da je to super, drago ti je i raduješ se što to imaš. Što si sretniji, to ono jače upravlja tobom. Kako ti, kao pravi kultivator, možeš dopustiti da ono upravlja tobom? Osim toga, ono dolazi sa jako niskih nivoa. Zato mi, kao pravi kultivatori, ne bi trebali privlačiti takve probleme.

Čovjek je najvrijedniji, on je najviša inteligencija svih stvari, kako možeš dopustiti da takve stvari upravljaju tobom? Ti čak više ne želiš imati ni svoje tijelo, kako je to tužno! Neke od ovih stvari se prikače na tijela ljudi; neke se ne prikače, nego su na izvjesnoj udaljenosti, ali one manipuliraju tobom i kontrolišu te. Ako želiš govoriti tim jezikom, puste te da govoriš, mumljaš, dilidulu. To se čak može prenositi i na druge osobe. Ako taj čovjek to želi naučiti, on se usuđuje i otvara usta, onda i on to počinje izgovarati. U stvari se te stvari mogu pojaviti i u grupama. Ako želiš govoriti, jedno od njih će se prikačiti na tvoje tijelo i pomoći će ti da govoriš.

Zašto se tako nešto pojavljuje? Kao što sam rekao, oni žele povisiti svoj nivo, ali na onoj strani nema patnji za pretrpiti, tako da se oni tamo ne mogu kultivirati i povisiti se. Oni su se dosjetili jedne metode: pomoći ljudima da čine dobra djela, ali ne znaju kako. Ipak znaju da energija koju emituju može malo ublažiti bolesti oboljelog i za trenutak ga osloboditi bolova, ali ona ne može izliječiti bolest. Oni znaju da to mogu postići emitujući energiju kroz čovjekova usta. Tako to ide. Neki ih nazivaju nebeskim jezicima, neki drugi ih nazivaju jezicima Bude, to je klevetanje Bude. Ja kažem da je to potpuna besmislica!

Kao što znate, Bude ne progovaraju lakomisleno. Kad bi on u ovoj našoj dimenziji otvorio usta i nešto izgovorio, mogao bi izazvati zemljotres u ljudskom svijetu. To bi bilo strašno! Takva gromovita buka. Neki kažu: "Vidio sam svojim nebeskim okom da je

razgovarao sa mnom". Nije on razgovarao s tobom. Isto je i kada neki vide moj *fašen*, on nije razgovarao s tobom, misao koju je on emitovao ima prostorni zvuk. Kad to čuješ, zvuči kao da je on govorio. On obično može govoriti u svojoj dimenziji, ali nakon što se glas ovdje prenese, ne možeš jasno čuti šta je rekao. To je zbog toga što su koncepti vrijeme-prostora različiti između ove dvije dimenzije, jedan *shichen* u dimenziji na našoj strani danas odgovara dva sata, ali u toj velikoj dimenziji, jedan naš *shichen* odgovara jednoj godini u njihovom vremenu. To znači da naše vrijeme čak prolazi sporije nego njihovo.

Postoji stara izreka, koja glasi: "Na nebu samo jedan dan, na Zemlji već hiljadu godina". To se odnosi na jedinstvene svjetove koji nemaju koncept prostora i vremena, naime na svjetove u kojima borave veliki prosvijetljeni, kao na primjer Sukhavati svijet, Majolika svijet, Falun svijet, Lotos svijet i tako dalje, to su ta mjesta. Ali vrijeme u toj velikoj dimenziji ipak prolazi brže u poređenju s našom. Ako možeš primiti i čuti njihov govor (nebesko uho nekih ljudi je otvoreno i kad je nebesko uho otvoreno, oni ih mogu čuti kako govore), ne možeš jasno razumjeti šta govore. Sve što čuješ zvuči kao cvrkut ptica, kao kod brzog okretanja ploče, ništa se ne razumije. Naravno, neki ljudi mogu čuti muziku ili govor. Ali oni moraju koristiti jednu natprirodnu sposobnost, koja služi kao nosač, da bi ujednačili vremensku razliku. Tek onda možeš jasno čuti riječi, kada se prenese u tvoje uši. Tako je to. Neki kažu da je to jezik Buda, ali to uopšte nije to.

Kada se prosvijetljeni susretnu, osmijeh je dovoljan da se razumiju. Jer, to je vrsta nečujne telepatije i ono što se prima ima prostorni zvuk. Čim se osmjehnu, već su razmijenili svoje ideje. Ne koristi se samo ova forma, nekad se isto tako koristi i druga metoda. Kao što znate, u tantrizmu tibetanske lame izvode ručne geste, ali ako upitaš lamu šta te geste znače, on će ti reći da su one najviša joga. Šta je to tačno? To ni on ne zna. Zapravo su to jezici velikih prosvijetljenih. Kad ima puno ljudi, on izvodi velike ručne geste koje su jako lijepe, različite velike ručne geste. Kad ima malo ljudi, on izvodi male ručne geste, koje su također jako lijepe. Oni koriste male ručne geste u različitim oblicima, one su veoma složene i veoma bogate, jer su to jezici. Prije su sve to bile nebeske tajne, a mi smo ih sad sve otkrili. Ono što se u Tibetu koristi su samo nekoliko pokreta koji služe samo za prakticiranje, oni su razvrstani i sistematizirani. To su samo jednostavni jezici za prakticiranje i to oblici za neke od ovih vrsta prakticiranja. Prave ručne geste su veoma složene.

Šta je Učitelj dao učenicima

Kad me neki ljudi vide, uhvate moju ruku i ne puštaju je. Kada drugi ljudi vide da se neko rukuje sa mnom, i oni će također doći i rukovati se sa mnom. Znam šta oni misle u svom srcu. Neki se žele rukovati sa Učiteljem i raduju se tome. Neki žele dobiti izvjesne "informacije" i ne puštaju moju ruku. Mi vam kažemo: istinska kultivacija je tvoja sopstvena stvar i mi nismo ovdje da bismo odstranili tvoje bolesti i da bi održavali tvoje zdravlje, ili da bismo ti dali neke "informacije" i time odstranili tvoje bolesti. Mi to ne radimo. Ja ću direktno odstraniti tvoje bolesti. Na mjestima gdje se rade vježbe, odstraniće ih moj *fašen*. Oni koji samostalno uče Falun Dafa čitajući knjigu, također imaju moj *fašen* koji će im odstraniti bolesti. Misliš li da ćeš povisiti svoj *gong* jednostavnim dodiranjem moje ruke? Nije li to vic?

Gong nastaje kultivacijom sopstvenog *xinxinga*. Ako se ne kultiviraš istinski, tvoj *gong* neće rasti, jer postoje *xinxing* standardi koji to određuju. Kada tvoj *gong* raste, bića visokih nivoa mogu vidjeti da je tvoja vezanost, ta supstanca, odstranjena i da iznad tvoje glave raste jedno mjerilo. Osim toga, ovo mjerilo postoji u obliku jednog *gong* stupa. Koliko je visoko

mjerilo, toliko je visok i *gong* stup, on predstavlja tvoj *gong* koji si sam iskultivirao. On također predstavlja i visinu tvog *xinxinga*. Sasvim svejedno koliko neko drugi za tebe doda, to neće ići, ni djelić toga ne može ostati, sve će opet pasti dole. Ja mogu učiniti da odjednom dostigneš "tri cvijeta se sakupljaju iznad glave", ali čim izađeš kroz ova vrata, *gong* će opet pasti dole. To nije tvoj *gong*, nisi ga ti iskultivirao, tako da ne može ostati tamo, jer mjerilo tvog *xinxinga* nije tamo, niko ti ne može dodati ništa. To u cjelosti zavisi od tvoje sopstvene kulture, od kulture tvog srca. Tek kad tvoj *gong* postojano raste, kad se neprestano oplemenjuješ i izjednačavaš s kosmičkim osobinama, tek tada možeš ići naviše. Neki ljudi me pitaju za autogram, ali im ga ne želim dati. Neki će ljudi reći drugima da im je Učitelj dao autogram, oni se žele praviti važnim i žele biti zaštićeni Učiteljevom "informacijama". Zar to nije opet vezanost? Kultiviranje zavisi od tebe samog, zbog čega govoriš o "informacijama"? Zar možeš kod kulture na visokim nivoima govoriti o tako nečemu. Šta to treba da znači? O tako nečemu se govori samo kod odstranjivanja bolesti i održavanja zdravlja.

U krajnje mikroskopskom se vidi da djelići *gonga*, kojeg si sam iskultivirao, imaju tačno tvoj izgled. Kad izađeš iz Fa-unutar-trostrukog-svijeta, kultiviraćeš Buda-tijelo. Sav tvoj *gong* ima oblik Buda-tijela i veoma je lijep, on sjedi na lotosovom cvijetu, kod svakog malog djelića je tako. Međutim, sav *gong* životinja čine male lisice i male zmijske, čak i najmanji djelići u krajnje mikroskopskom su takve stvari. Također postoje i takozvane "informacije". Neki ljudi ti promiješaju čaj i daju ti ga piti, to se već smatra *gongom*. Svakodnevni ljudi se žele samo privremeno osloboditi bolova i odložiti svoje bolesti za nešto kasnije i potisnuti ih. Običan čovjek je upravo običan čovjek, kako god on uništavao svoje tijelo, mi ne vodimo računa o tome. Ali vi ste praktikanti i zato vam objašnjavam ove stvari. Od sada, nemojte to više raditi. Nemojte nikako tražiti takve stvari kao što su takozvane "informacije" i slično. Neki *qigong* majstori kažu: „Ja ću vam poslati 'informacije' i vi ih možete primiti posvuda u cijeloj zemlji“. Šta primiti? Kažem ti, tako nešto ne može imati veliki učinak. Pretpostavimo da su one od koristi, čak i onda bi koristile samo za odstranjivanje bolesti i održavanje zdravlja. Ali kao kultivatori mi sami kultiviramo *gong*. Takozvani "informacijski *gong*" koji drugi emituju ne može povisiti nivo, nego samo može odstraniti bolesti svakodnevnih ljudi. Srce obavezno mora biti ispravno, niko drugi se ne može kultivirati za tebe. Samo ako se istinski kultiviraš, možeš povisiti svoj nivo.

Šta vam ja onda dajem? Kao što znate, mnogi od nas nisu nikad prakticirali *qigong* i njihova tijela imaju bolesti. Mnogi su puno godina prakticirali *qigong*, ali se još uvijek nalaze na nivou *qija* i nemaju *gong*. Naravno, ima ljudi koji liječe druge - ti ne znaš kako si ih izliječio. Dok sam objašnjavao pitanje posjedovanja od strane duhova, odstranio sam posjedujuće duhove na tijelima onih koji stvarno mogu kultivirati Dafa, sve ove loše stvari sam iznutra prema vani potpuno odstranio s tijela, sasvim svejedno o čemu se radilo. Kod onih, koji se učeći sami stvarno kultiviraju, tijelo će također biti očišćeno kad čitaju ovaj Dafa. Osim toga, okolina kod tebe kući također mora biti očišćena. Baci brzo oltare te lisice ili žute lasice kojima si se prije molio. Sve je za tebe očišćeno, oni više ne postoje. Zato što se želiš kultivirati, možemo ti otvoriti najpovoljnija vrata i učiniti to za tebe, ali je to ograničeno samo na istinske kultivatore. Naravno, neki ljudi se ne žele kultivirati i čak ni sada im još uvijek nije postalo jasno o čemu se radi. O njima stvarno ne možemo voditi računa. Vodimo računa samo o onima koji se stvarno kultiviraju.

Postoji i druga vrsta ljudi, prije su mu drugi ljudi rekli da ima posjedujući duh na sebi, a i on sam je to osjećao. Ali nakon što je to odstranjeno, on još uvijek ne može otpustiti svoju

zabrinutost, on se još uvijek tako osjeća, kao da to stanje još uvijek postoji, on misli da je to još uvijek tu. To je vrsta vezanosti i zove se sumnjičavost. Ako tako nastavi, čak bi se moglo desiti da on to s vremenom ponovo privuče. Ti sam moraš otpustiti tu vezanost, to više uopšte ne postoji. Za neke od ovih ljudi smo to već u ranijim kursevima uredili, ja sam to već učinio i odstranio sve posjedujuće duhove.

U Tao školi, kod prakticiranja na niskim nivoima moraju biti postavljeni izvjesni temelji, formira se nebesko kolo, mora se formirati polje eliksira, a i neke stvari u drugim oblastima se također moraju formirati. Kod nas, mi usađujemo *falun*, *qi*-mehanizme, sve mehanizme za kultivaciju i još mnogo više stvari, više od deset hiljada, sve ti se ovo mora dati, kao sjeme biti usađeno u tebe. Nakon što su tvoje bolesti odstranjene, sve će biti urađeno što treba biti urađeno. Sve što ti se treba dati biće usađeno u tebe, tek onda se stvarno možeš uspješno kultivirati u našoj školi. Inače, ako ništa ne dobiješ, onda bi to bilo samo odstranjivanje bolesti i održavanje zdravlja. Sasvim jasno rečeno, neki ljudi ne paze na svoj *xinxing*, onda im je bolje baviti se gimnastikom.

Ako se istinski kultiviraš, mi moramo biti odgovorni za tebe. Oni koji se kultiviraju učeći sami također mogu to dobiti, ali moraju biti istinski kultivatori - mi to sve dajemo istinskim kultivatorima. Rekao sam da te moram istinski voditi kao učenika. Pored toga, moraš obavezno temeljito učiti Fa na visokim nivoima, da bi znao kako da se kultiviraš. Svih pet vježbi trebaš naučiti odjednom. U budućnosti možeš dostići veoma visok nivo, tako visok nivo, da si to jedva možeš predstaviti i nije nikakav problem dobiti istinsko dostignuće. Ovaj Fa objašnjavam u vezi sa različitim nivoima; sve dok se kultiviraš, kasnije ćeš kod kultivacije na različitim nivoima primjetiti da te ovaj Fa uvijek može voditi.

Kao kultivatoru, tvoj životni put će od sada biti promijenjen. Moj *fašen* će ga za tebe preurediti. Kako će ga preurediti? Koliko je još dug životni put za neke ljude? Oni to ni sami ne znaju. Neki će možda nakon jedne godine ili nakon pola godine teško oboliti i bolest će možda potrajati nekoliko godina. Neki će možda dobiti moždani udar ili druge bolesti i više se ne mogu pomjerati. Kako se onda u svom daljnjem životu možeš kultivirati? Mi ćemo sve to za tebe očistiti, da bismo spriječili da se tako nešto dogodi. Ali nešto ćemo prije toga reći: To se može uraditi samo za prave kultivatore i to se ne može proizvoljno raditi za obične ljude, to bi značilo činiti nešto loše. Rođenje, starenje, bolest i smrt svakodnevnih ljudi, sve to ima svoje uzročne veze i ne smije se remetiti po volji.

Mi kultivatore smatramo najdragocjenijim, zbog toga jedino za kultivatore možemo promijeniti ove stvari. Kako mi to mijenjamo? Ako učitelj ima vrlo veliku moćnu vrlinu, znači ako je kultivacijska snaga učitelja jako visoka, on može za tebe odstraniti karmu. Učitelj s visokim *gongom* može odstraniti veliku količinu toga, dok učitelj s niskim *gongom* može odstraniti samo nešto od toga. Uzmimo jedan primjer: Razne vrste karme će biti položene na tvoj budući životni put i dio toga, polovina toga će biti odstranjena. Ipak, drugu polovinu još uvijek ne možeš prevazići, ona je još uvijek viša od brda. Šta da se radi? Kad u budućnosti dostigneš Tao, vjerovatno će mnogi ljudi od toga imati koristi i tako će mnogo ljudi nositi jednu porciju za tebe. Naravno, za njih to nije veliki problem. Ti sam također imaš puno živih bića koja si razvio kroz kultivaciju, osim toga, osim glavne duše i sporedne duše imaš još puno svojih *ja* koji će svi nositi jednu porciju za tebe. Kad prevazilaziš teškoće, onda više nije mnogo preostalo. Kaže se doduše da nije mnogo preostalo, ali je još uvijek prilično veliko i ti to još uvijek ne možeš prevazići. Šta onda radimo? To će biti podijeljeno na brojne porcije,

biće položeno na različite nivoe tvoje kultivacije, da bi se tvoj *xinxing* povisio, tvoja karma bila transformisana i tvoj *gong* se povisio.

Još nešto: Kad se čovjek želi kultivirati, to nije jednostavna stvar. Rekao sam da je to jako ozbiljna stvar i osim toga prevazilazi obične ljude i teže je od svega drugog među svakodnevnim ljudima. Zar to nije nešto natprirodno? Zbog toga se pri tome na tebe postavljaju viši zahtjevi nego kod bilo čega među svakodnevnim ljudima. Mi ljudi imamo duše i duše su besmrtni. Ako su duše besmrtni, razmisli, zar nisu tvoje duše u društvenim aktivnostima u tvojim prošlim životima uradile nešto loše? Vrlo vjerovatno. Mogao si nekoga ubiti, nekome nešto dugovati, nekoga maltretirati ili povrijediti. Mogao si tako nešto počinuti. Ako je to tako i ti se na ovoj strani kultiviraš, on na onoj strani to veoma jasno vidi. Ako ti nešto radiš za odstranjivanje bolesti i održavanje zdravlja, on ne vodi računa o tome. On zna da ti to samo odlažeš za kasnije. Ako ne platiš sada, moraćeš to platiti u budućnosti, a tada će ti biti još teže to platiti. Zato on ne vodi računa o tome, ako ti to privremeno ne otplatiš.

Ali ako kažeš da se želiš kultivirati, on ti to neće dopustiti: "Ti se želiš kultivirati. Ti želiš otići. Kad se tvoj *gong* povisi, neću te više moći dosegnuti i neću te moći dotaći." Tako da on neće dopustiti da se to desi. Svim sredstvima će te ometati i sve će pokušati da te zaustavi u kultivaciji. On će primijeniti različite metode da bi ti smetao, on će čak doći da te stvarno ubije. Naravno, tebi neće kod meditacije biti odrubljena glava, to je nemoguće, jer mora odgovarati stanju običnog ljudskog društva. Možda će te, čim izadeš vani, udariti auto, ili ćeš pasti sa neke zgrade, ili ćeš se susresti sa drugim opasnostima, tako nešto se može pojaviti, to je jako opasno. Istinska kultivacija nije tako laka kao što ti to zamišljaš. Da li se već možeš kultivirati naviše ako se želiš kultivirati? Ako se stvarno kultiviraš, odmah ćeš se suočiti sa životnim opasnostima, odmah ćeš upasti u takve probleme. Mnogi *qigong* majstori se ne usuđuju širiti put kultivacije ka visokim nivoima i upućivati ljude u to. Zašto? Upravo jer on nije u stanju to uraditi, on te ne može zaštititi.

Prije je bilo mnogih koji su podučavali Tao. Oni su mogli podučavati samo jednog učenika i bilo je u redu ako su štitili samo jednog učenika. Međutim, činiti to u ovako velikim razmjerima, svakodnevni ljudi se ne usuđuju. Ipak, kažem vam, ja to mogu uraditi, jer imam bezbrojne *fašene* koji posjeduju moje neobično velike božanske sposobnosti i moju Fa-snagu i koji mogu ispoljiti jako velike božanske sposobnosti i veoma jaku Fa-snagu. Osim toga, ovo što mi danas radimo nije tako jednostavno kao što izgleda, ja također nisam istupio u javnost iz nekog iznenadnog nagona da bi ovo uradio. Mogu ti reći da mnogi veliki prosvijetljeni promatraju ovu situaciju s velikom pažnjom. To je posljednji put da širimo ispravan Fa u Vremenu kraja Fa. Ono što sada radimo ne smije poći naopako. Ako se stvarno kultiviraš na ispravnom putu, niko se neće usuditi da ti olako nešto učini. Osim toga, ti si pod zaštitom mog *fašena*, neće se pojaviti nikakva opasnost.

Dugovi moraju biti poravnati, zato se mogu pojaviti neki opasni događaji na putu kultivacije. Ali kada se takve stvari pojave, nećeš se bojati i nećeš biti izložen stvarnoj opasnosti. Mogu vam navesti nekoliko primjera. Kada sam u Pekingu držao predavanje, jedna učenica je na biciklu prelazila ulicu. Tada se iz krivine pojavio luksuzni auto i u toj oštroj krivini je udario našu učenicu. Ova učenica je bila žena od preko 50 godina. Auto je iznenada udario, stvarno žestoko udario i glava joj je s jednim "bum" udarila tačno u krov auta. U tom trenutku, noga joj je još bila na pedali bicikla. Ona je udarila glavom, ali nije osjetila nikakvu bol. Ne samo da nije osjetila nikakvu bol, nego također nije ni krvarila i nije bilo čak ni čvoruge. Ali vozač je bio veoma prestrašen, iskočio je iz auta i upitao je užurbano: "Jeste li

povrijeđeni? Da vozimo u bolnicu?" Ona je odgovorila da je sve u redu. Naravno, ova naša učenica ima veoma visok *xinxing* i nije htjela vozaču prirediti nikakve teškoće. Rekla je da se ništa nije desilo, međutim na autu je ostalo veliko udubljenje.

To se sve dešava da bi ti oduzelo život, ali nećeš biti u nikakvoj opasnosti. Kada smo zadnji put imali predavanje na univerzitetu u Jilinu, jedan od naših učenika je izlazio kroz glavni ulaz Jilinskog univerziteta, gurajući svoj bicikl. Upravo kada se nalazio na sredini ulice, odjednom se našao priklješten između dva auta i skoro udaren, ali se uopšte nije uplašio. Kada se mi susretnemo sa takvim stvarima, obično nas nije strah, istog trena su se auta zaustavila, ništa se nije desilo.

Drugi događaj se desio u Pekingu. Zimi se prilično brzo smrkne i ljudi idu prilično rano na spavanje. Nije bilo nikog na ulici, bilo je jako mirno. Jedan učenik je žurio kući na svom biciklu, ispred njega je vozio samo jedan džip. Dok je on tako dalje vozio, džip je iznenada zakočio. On to nije primjetio i nastavio je voziti spuštene glave. Ali džip je iznenada počeo voziti unazad, punom brzinom unazad. Ove dvije sile zajedno su isto tako zato tu da bi mu oduzele život. U tom trenutku, kratko prije sudara, njegov bicikl je iznenada od neke sile bio povučen pola metra unazad i džip je naglo zakočio i zaustavio se tik uz njegov bicikl, vjerovatno je vozač primjetio da je neko bio iza njega. Ovaj učenik se također u tom trenutku nije uplašio. Svi koji se susretnu sa tako nečim, ne uplaše se, možda će se kasnije uplašiti. On je prvo pomislio: "Uh, ko me je to povukao unazad? Moram mu se zahvaliti." Okrenuo se kako bi se zahvalio, ali tamo nije bilo nikog na ulici. Odmah je shvatio: To je bio Učitelj, on me je zaštitio!

Još jedan slučaj iz Changchuna. Pored kuće jednog učenika se upravo gradila zgrada. Danas se zgrade grade vrlo visoko i skele su sve od 5 cm širokih i 4 metra dugih željeznih cijevi. Kad je ovaj učenik izašao iz svog stana i još nije bio daleko od kuće, jedna željezna cijev je pala sa jedne visoke zgrade okomito prema dole, usmjerena direktno prema njegovoj glavi. Ljudi na ulici su se ukočili od straha. On je rekao: "Ko me je to pogladio?" Još je mislio da ga je neko pogladio po glavi. U tom trenutku, kad se okrenuo, vidio je veliki *falun* koji se okretao iznad njegove glave i željezna cijev je skliznula pored njegove glave prema dole. Nakon toga je ostala da stoji zabijena horizontalno u zemlju. Da je stvarno bila u njegovom tijelu, zamisli, tako nešto teško, bilo bi stvarno kao štapić sa kandiranim voćem, jednim udarcem bi bio probijen do zemlje. To je bilo jako opasno!

Ima jako puno takvih slučajeva, nebrojeno puno, ali niko nije bio u opasnosti. Neće se svako obavezno susresti s tako nečim, samo mali broj će naići na tako nešto. Svejedno da li to tebe snađe ili ne, garantujem ti da nećeš biti u opasnosti, to ti mogu garantovati. Neki učenici ne postupaju po zahtjevima na *xinxing*, oni samo prakticiraju vježbe i ne kultiviraju svoj *xinxing*, oni se ne mogu smatrati praktikantima.

Što se tiče toga šta Učitelj daje: Ja vam upravo dajem ove stvari. Moj *fašen* će te tako dugo štiti, sve dok se sam ne budeš mogao štiti. U to vrijeme ćeš već izaći iz kulture Fa-unutar-trostrukog-svijeta i već si dostigao Tao. Ali moraš se vladati kao istinski kultivator, tek onda možemo to uraditi za tebe. Jedan čovjek je s mojom knjigom u ruci išao ulicom i pri tome vikao: Pod zaštitom Učitelja Li-ja ne bojim se da će me udariti auto. On je time štetio Dafi. Takvi ljudi neće biti zaštićeni. U stvari se istinski kultivatori neće tako ponašati.

Energetsko polje

Dok prakticiramo, oko nas će nastati jedno polje. Kakvo je to polje? Neki kažu da je to *qi* polje, magnetno polje ili električno polje. Zapravo to sve nije tačno, svejedno kako nazivaš to polje, jer su supstance koje ovo polje sadrži krajnje obilne. Skoro sve supstance, koje sačinjavaju sve dimenzije našeg kosmosa, mogu se naći u ovom *gongu*. Za nas je relativno primjereno zvati ga energetsko polje. Zbog toga ga uobičajeno nazivamo energetskim poljem.

Kakav učinak ima ovo polje? Kao što znate, mi praktikanti ispravnog puta imamo ovaj osjećaj: Kada se neko kultivira prema ispravnom Fa, pridaje važnost dobrodušnosti i izjednačen je sa kosmičkim osobinama *Zhen, Shan, Ren*. Zato svi naši učenici koji se nalaze u ovom polju osjećaju kako nema ničeg lošeg u njihovim mislima. Osim toga, mnogi od naših ovdje prisutnih učenika ni ne pomišljaju na pušenje, oni osjećaju jako harmoničnu atmosferu i osjećaju se vrlo ugodno. To je učinak energije u području ovog polja, koje oko sebe imaju oni koji kultiviraju ispravan Fa. Kada poslije napustite ovaj kurs, većina vas će posjedovati *gong*, stvarno ćete razviti *gong*, jer sam ti predao stvari kultivacije ispravnog Fa i ti se također trudiš ponašati se prema zahtjevima na *xinxing*. Dok neprekidno prakticiraš i kultiviraš se prema našim zahtjevima na *xinxing*, tvoja energija će postepeno postajati sve jača.

Mi govorimo o samospasenju, spasenju drugih, kao i o spasenju svih živih bića. Tako *falun* služi samospasenju kada se okreće prema unutra i spasenju drugih kada se okreće prema vani. Prilikom okretanja prema vani, on oslobađa energiju i pomaže drugima. Tako će svi ljudi unutar oblasti koju pokriva tvoje polje imati korist od toga i mogu se osjećati jako ugodno. Sasvim svejedno da li ideš ulicom, ili si na poslu, ili kod kuće, možeš imati takav učinak. Ti si možda nesvjesno doveo u red tijela onih koji se nalaze u području tvog polja, jer ovo polje može popraviti sva abnormalna stanja. Čovjekovo tijelo ne treba imati bolesti, imati bolesti spada u abnormalna stanja i ono može ispraviti ovo abnormalno stanje. Kada osoba sa lošim mislima misli na nešto loše, ta osoba pod jakim uticajem tvog polja također može promijeniti svoje misli i možda u tom trenutku više ne misli na ništa loše. Možda neko upravo želi psovati, ali odjednom se predomislio i više ne želi psovati. Samo energetsko polje kod kultivacije ispravnog Fa može imati ovakav učinak. Zbog toga je u budizmu prije postojala izreka, koja glasi: "Svjetlo Bude sve osvjetljava, ispravnost i pravednost harmoniziraju sve." Ta izreka ima upravo to značenje.

Kako Falun Dafa učenici šire put kultivacije

Nakon što su mnogi naši učenici otišli kući, smatraju put kultivacije jako dobrim i žele ga prenijeti dalje rođacima i prijateljima. To je u redu, ti ga možeš prenositi dalje, sasvim svejedno kome. Ali jedno vam želim jasno reći: Mi smo vam dali tako mnogo stvari i to se ne može mjeriti novcem. Zašto smo vam ih dali? Za tvoju kultivaciju. Samo ako se kultiviraš, možemo ti dati ove stvari. To onda znači da, kada vi poslije budete širili put kultivacije, ne smijete koristiti ove stvari da bi težili za ugledom i dobitkom, zato ne smiješ kao ja držati kurseve i naplaćivati ih. Mi imamo neke troškove, jer moramo štampati knjige i materijale i svuda putovati da bi širili put kultivacije. Ono što mi naplaćujemo je već najniže u cijeloj zemlji, ali mi dajemo najviše, mi stvarno vodimo ljude ka visokim nivoima, to ste i sami doživjeli. Kada ti, kao Falun Dafa učenik, u budućnosti budeš dalje prenosio ovaj put kultivacije, od tebe se zahtijevaju dvije stvari:

Prvi zahtjev je da ne naplaćuješ. Mi ti nismo dali tako mnogo da bi se obogatio i težio slavi, nego da bi te spasili i da bi se kultivirao. Ako naplaćuješ, moj *fašen* će oduzeti sve što ti je dato, onda također više ne pripadaš našem Falun Dafa i ono što prenosiš također više nije naš Falun Dafa. Kada vi prenosite put kultivacije, ne težite za ugledom i dobitkom, već dobrovoljno služite drugima. Svi naši učenici u cijeloj zemlji tako postupaju, asistenti svih regiona prednjače s dobrim primjerom. Ako želiš učiti naš put kultivacije, sve dok želiš učiti, dođi i uči, mi možemo preuzeti odgovornost za tebe i za to nećemo uzeti ni cent.

Drugi zahtjev je - ne miješati lične stvari u Dafa. Drugim riječima: Kod širenja puta kultivacije, sasvim svejedno da li je tvoje nebesko oko otvoreno, da li si nešto vidio, ili se kod tebe pojavila nekakva natprirodna sposobnost, ne smiješ objašnjavati naš Falun Dafa s tim što si vidio. Taj djelić koji si na tom nivou vidio jako je daleko od istinskog sadržaja Fa koji smo mi podučavali. Zbog toga obavezno moraš paziti na to kada ubuduće budeš širio put kultivacije, jer samo tako se može osigurati da prvobitne stvari našeg Falun Dafa ostanu nepromijenjene.

Također nije dozvoljeno širiti put kultivacije na isti način kao što ja to radim, vi ne smijete objašnjavati Fa u formi velikog predavanja, kao što ja to radim, ti nisi u stanju objašnjavati Fa. Jer to što ja objašnjavam ima veoma duboko značenje, ja to objašnjavam u vezi sa stvarima na visokim nivoima. Ti se kultiviraš na različitim nivoima, kada se poslije povisiš i opet poslušaj ove tonske snimke, neprekidno ćeš se povisivati. Ako ih neprekidno slušaš, imaćeš uvijek iznova nove spoznaje i nove uspjehe i to još više važi za čitanje knjige. Moje lekcije sadrže stvari koje su vrlo duboke i visoke. Zato ti nisi u stanju podučavati ovaj Fa. Nije ti dozvoljeno koristiti moje originalne riječi kao svoje, inače to predstavlja krađu Fa. Ti samo možeš objasniti s mojim originalnim riječima i uz to dodati: "to je ono što je Učitelj rekao", ili "tako piše u knjizi". Samo tako smije biti objašnjeno. Zašto? Kada tako govoriš, to ima snagu Dafe. Ti ne smiješ prosljeđivati stvari koje znaš kao Falun Dafa, inače to što prosljeđuješ nije Falun Dafa i to je onda isto kao da sabotiraš naš Falun Dafa. Kada objašnjavaš prema svojim pogledima i svojim mislima, to nije Fa i ne može spasiti ljude, također ne može imati nikakav učinak. Zato niko ne može objasniti ovaj Fa.

Vaša metoda za širenje puta kultivacije je da učenicima u grupama za vježbanje, ili na lokacijama za davanje instrukcija pustite tonske snimke, odnosno video snimke, i nakon toga im asistenti pokazuju vježbe. Vi možete koristiti formu grupne diskusije, gdje ljudi uče jedni od drugih, razmjenjuju iskustva, diskutiraju i razgovaraju. Mi od vas zahtijevamo da tako radite. Istovremeno, učenici koji šire Falun Dafa ne smiju biti oslovljavani sa "učitelj" ili "veliki majstor" i tako dalje, postoji samo jedan Učitelj Dafe. Sasvim svejedno kad je neko počeo prakticirati, svi su učenici.

Kod širenja prakse, neki možda misle: Učitelj može postaviti *falun* i dovesti u red tijela drugih, ali mi ne možemo. To nema veze, ja sam vam već rekao da je iza svakog učenika moj *fašen*, ne samo jedan, moji *fašeni* će se već pobrinuti za to. Dok ti nekog podučavaš, on može odmah dobiti *falun* ako ima sudbinsku vezu. Ako on ima nešto slabiju sudbinsku vezu, može ga postepeno dobiti kasnije, kroz prakticiranje i nakon što je njegovo tijelo dovedeno u red. Moj *fašen* će mu pomoći da dovede svoje tijelo u red. Ne samo to, kažem ti, ako čitaš moje knjige, gledaš moje video-snimke, ili slušaš moje tonske snimke da bi učio Fa i vježbe, ako se stvarno smatraš praktikantom, isto tako ćeš dobiti sve što trebaš dobiti.

Mi također ne dozvoljavamo učenicima da liječe druge, Falun Dafa učenicima je najstrožije zabranjeno liječiti druge. Mi te učimo da se kultiviraš naviše, mi ne želimo da se

kod tebe pojavi niti jedna vezanost i ne želimo ti dopustiti da uništiš svoje tijelo. Naše polje za vježbanje je bolje nego polja za vježbanje svih drugih puteva kultivacije. Ako dođeš u naše polje i prakticiraš, to je puno bolje nego da se podvrgavaš liječenju. Moji *fašeni* sjede u krugu, iznad polja za vježbanje nalazi se i zaštitni štiti, na njemu je veliki *falun*, veliki *fašen* nadgleda polje iznad štita. To polje nije obično polje, to nije obično polje kao kod običnog prakticiranja. To je polje kultivacije. Mnogi među nama koji posjeduju natprirodne sposobnosti vidjeli su polje našeg Falun Dafa, ono je obmotano crvenim svjetlom, posvuda crveno.

Moj *fašen* može direktno usaditi *falune*, ali mi ne želimo poticati tvoju vezanost. Kada mu ti pokazuješ pokrete vježbi, on kaže: „Hej, dobio sam *falun*“. Ti vjeruješ da si ga ti usadio, ali to nije tako. Ja sam vam to rekao da ne bi hranili ovu vezanost, sve to obavlja moj *fašen*. Na taj način naši Falun Dafa učenici šire put kultivacije.

Svako ko pokuša promijeniti Falun Dafa vježbe sabotira Dafa i ovu školu kultivacije. Neki su saželi upute za vježbe u kratke stihove. To ni u kom slučaju nije dozvoljeno. Sve istinske metode kultivacije naslijeđene su iz predistorijskih vremena i prenosile su se jako dugo vremena, nebrojeni veliki prosvijetljeni su se kroz njih uspješno kultivirali. Niko se nikad nije usudio ni najmanje ih promijeniti. Tako se nešto dešava jedino u ovom našem Vremenu kraja Fa. U istoriji se tako nešto nikad nije desilo. Obavezno morate paziti na to.

4. Lekcija

Gubitak i dobitak

U krugovima kultivatora se često govori o vezi između gubitka i dobitka, među svakodnevnim ljudima se također govori o tome. Kako se naši praktikanti trebaju odnositi prema gubitku i dobitku? To je drugačije nego kod svakodnevnih ljudi. Ono što svakodnevni ljudi žele dobiti su vlastiti interesi, te kako da dobro i ugodno žive. Naši praktikanti nisu takvi, nego sasvim suprotno, mi ne tražimo ono što svakodnevni ljudi žele. S druge strane, ono što mi dobijamo svakodnevni ljudi ne mogu dobiti, čak i ako to žele - osim ako se kultiviraju.

Gubitak na koji obično mislimo ne odnosi se na gubitak u uskom okviru. Kad neko govori o gubitku, on misli na donaciju nešto novca, pomoć nekome u nevolji ili udjeljivanje nešto hrane prosjaku. To je također vrsta odricanja i vrsta gubitka. Ali to se odnosi samo na ovo pitanje da se čovjek olako odnosi prema novcu i materijalnim stvarima. Odricanje od bogatstva je naravno aspekt gubitka i to jedan od većih aspekata, ali gubitak o kojem mi govorimo nije tako usko ograničen. Za vrijeme kultivacije ima jako mnogo vezanosti kojih se praktikant treba odreći: želja za isticanjem, ljubomora, želja za nadmetanjem, ushićenje. Mnoge različite vrste vezanosti moraju biti odbačene. Gubitak o kojem mi govorimo odnosi se na jedan širi smisao, dakle, u toku kultivacije se treba odreći svih svojih vezanosti i različitih žudnji koje svakodnevni ljudi imaju.

Možda neko misli: "Mi se kultiviramo među svakodnevnim ljudima; ako bismo sve izgubili, zar onda nismo isti kao i monasi i opatice? Sve izgubiti izgleda nemoguće." Naša škola zahtijeva da se dio, u kojem se kultivira među svakodnevnim ljudima, upravo kultivira u ljudskom društvu i da se, koliko god je to moguće, prilagodimo svakodnevnim ljudima. Ne traži se od tebe da izgubiš nešto materijalno. Nije bitno na koliko si visokoj poziciji ili koliko bogatstvo posjeduješ. Ono što je ključno je da li se možeš odreći te vezanosti.

Naša škola kultivacije cilja direktno na čovjekovo srce. Odlučujuće pitanje je da li se pitanja ličnih interesa i međuljudskih konflikta mogu uzeti olako. Kultivacija u hramovima, u dalekim planinama i šumama služi tome da te u potpunosti izolira od svakodnevnih ljudi i prisili da izgubiš srce običnog čovjeka. Drži te podalje od materijalnih interesa i time navodi da ih se odrekneš. Onaj ko se kultivira među svakodnevnim ljudima ne ide tim putem, ali se od njega zahtijeva da te stvari uzima olako u ovom svakodnevnom ljudskom okruženju. Naravno da je to jako teško, ali to je bit naše škole kultivacije. Zbog toga gubitak o kojem mi govorimo treba shvatiti u širem, a ne u užem smislu. Uzmimo jedan primjer - činiti nešto dobro i davati materijalnu pomoć. Samo pogledaj neke od današnjih prosjaka na ulicama. Neki su profesionalci koji možda imaju više novca nego ti. Mi se trebamo fokusirati na velike stvari, a ne na sitnice. Kod kultivacije se treba kultivirati otvoreno i ispravno i usmjereno na velike stvari. U procesu gubljenja, ono što stvarno gubimo su loše stvari.

Obično ljudi vjeruju da je sve čemu teže dobro. Ali, gledajući sa visokih nivoa, sve to u stvari služi tome da osoba zadovolji materijalne potrebe svakodnevnih ljudi. U budizmu se kaže: Koliko god novca imao i koliko god visoku službu imao, to ostaje samo nekoliko decenija. Pri rođenju ne donosimo ništa, pri umiranju ne odnosimo ništa. Zašto je *gong* tako dragocjen? Upravo zato što raste direktno na tvojoj duši, može se donijeti rođenjem i ponovo

ponijeti nakon smrti. Osim toga, on direktno određuje tvoj status dostignuća, zato ga je teško kultivirati. To znači da su to, čega se odričeš, loše stvari i samo tako se možeš vratiti izvoru i istini. Šta onda dobijaš? Napredovanje nivoa, a na samom kraju istinsko dostignuće, konačan uspjeh i Ispunjenje, čime se rješava osnovni problem. Naravno, mi se želimo odreći različitih žudnji svakodnevnih ljudi i dostići standard pravog kultivatora, što nije jednostavno i treba se raditi postepeno. Sad si od mene čuo da se radi postepeno i onda kažeš: „Učitelj je rekao, raditi postepeno, onda ću raditi postepeno.“ Ali to nije dozvoljeno! Ti prema sebi moraš postaviti striktno zahtjeve, iako ti mi dozvoljavamo da postepeno napreduješ. Kada bi danas sve odjednom postigao, već danas bi bio Buda. Znači da to nije realistično. S vremenom ćeš to već postići.

Ono što gubimo je u suštini nešto loše. Šta je to? To je karma, što je tijesno povezano sa raznim ljudskim vezanostima. Na primjer, svakodnevni ljudi imaju razne loše misli i radeći nešto loše radi vlastitih interesa, dobiće ovu crnu supstancu - karmu. To je direktno povezano s našim srcem. Da bismo odstranili ovu lošu supstancu, najprije tvoje srce mora iz temelja biti promijenjeno.

Transformacija karme

Između bijele i crne supstance postoji proces transformacije. Kada se pojave konflikti među ljudima, postoji proces transformacije. Nakon učinjenog dobrog djela dobija se bijela supstanca - *de*; nakon učinjenog lošeg djela dobija se crna supstanca - karma. Obje supstance se mogu prenositi. Neko se možda pita da li je to zato što je učinio nešto loše u prvoj polovini svog života. Ali to ne mora nužno biti tako, jer je čovjek sakupio karmu ne samo u jednom životu. U krugovima kultivatora se kaže da je duša besmrtna. Ako je duša besmrtna, onda je možda imala društvene aktivnosti u svojim prethodnim životima. Osoba je mogla nekome nešto dugovati, biti gruba prema nekome ili nešto drugo loše napraviti, ubiti itd., što bi proizvelo takvu karmu. Ove supstance se mogu sakupljati u drugim dimenzijama i uvijek su kod te osobe; sa bijelom supstancom je isto. One ne dolaze samo iz ovog izvora. Postoji još jedan slučaj, naime, može biti akumulirana u porodici ili se prenositi od predaka. Prije su stariji ljudi često govorili: „Sakupljaj *de*, sakupljaj *de*“, Tvoji preci su akumulirali *de*“, „Ovaj čovjek gubi *de*, on troši svoj *de*“. Ove riječi su potpuno tačne. Danas svakodnevni ljudi više ne slušaju ove riječi. Mladi to neće nimalo uzeti k srcu ako im govoriš o gubitku *de*-a ili da imaju premalo *de*-a. U stvari ove riječi imaju zaista duboko značenje. One nisu samo misaona i duhovna norma ljudi novijeg vremena, nego je to stvarno nešto što materijalno postoji. Obje supstance se mogu naći u ljudskom tijelu.

Neki pitaju da li to znači da se čovjek ne može kultivirati prema višim nivoima ako ima previše crne supstance. To je donekle istina, puno crne supstance utiče na kvalitet prosvjetljenja, jer ona gradi polje oko tvog tijela i u potpunosti okružuje tvoje tijelo, pa si time izoliran od kosmičkih osobina *Zhen, Shan, Ren*. Takvi ljudi možda imaju loš kvalitet prosvjetljenja. Kada takav čovjek govori o kultivaciji ili o *qigongu*, on to smatra praznovjerjem, smatra to smiješnim i uopšte ne vjeruje u to. Ovo se često događa, ali nije pravilo. Da li to onda znači da je za ovog čovjeka jako teško da se kultivira i da visoko kultivira svoj *gong*? To opet nije baš tako. Mi kažemo, *Dafa* je bezgraničan i sve zavisi od tvoje želje da se kultiviraš. Da li se možeš kultivirati ili ne, zavisi od toga da li možeš izdržati, davati i podnositi patnje. Ako si odlučan da prevaziđeš sve vrste teškoća, onda kažem da neće biti problema.

Osoba koja ima puno crne supstance obično mora žrtvovati više od onoga ko ima puno bijele supstance. Zato što je bijela supstanca direktno asimilirana s kosmičkim osobinama *Zhen, Shan, Ren*, osoba može jednostavno i direktno povisiti svoj *gong* čim kroz konflikte poboljša svoj *xinxing*. Osoba sa puno *de*-a ima visok kvalitet prosvjetljenja, ona također može izdržati kako fizička, tako i psihička iskušenja. Ona može povećati svoj *gong* čak i ako više izdrži fizičke, nego mentalne patnje. Međutim, kod osobe s puno crne supstance to ipak ne bi bilo moguće, jer ona prvo mora proći kroz sljedeći proces: prvo crna supstanca mora biti transformisana u bijelu supstancu. Taj proces je jako bolan. Dakle, osoba s lošim kvalitetom prosvjetljenja obično mora izdržati više patnji; za nju je čak i teže da se kultivira zbog ogromne karme i lošeg kvaliteta prosvjetljenja.

Uzmimo konkretan slučaj. Na primjer, pogledajmo kako se ovakva osoba kultivira. Kultivacija u meditaciji u sjedećem položaju zahtijeva da se duže boravi s nogama prekrštenim jedna preko druge. Usljed toga, noge počinju boliti i trnuti. S vremenom će se osoba početi osjećati sve nelagodnije, a zatim će postati vrlo nestrpljiva. Fizička i psihička patnja mogu i tijelo i duh učiniti vrlo nespokojnim. Neki ljudi ne mogu podnijeti bol sjedeći sa tako postavljenim nogama i žele odustati, tako da spuste noge dole. Neki to više ne mogu podnijeti, nakon što sjede nešto duže. U trenutku kad osoba spusti noge, njeno je prakticiranje uzaludno. Mi smatramo uzaludnim ako neko odustane od sjedenja s prekrštenim nogama čim počne osjećati bol i ponovo se vrati u položaj nakon nekoliko vježbi razgibavanja. To je zato što smo vidjeli da, kada noge bole, crna supstanca odlazi u noge. Crna supstanca je karma koja može biti eliminirana kroz patnje, a zatim može biti transformisana u *de*. Čim se počne osjećati bol, karma se počinje eliminirati. Što jače karma pritišće, noge sve više bole. Dakle, bol u nogama nije bez razloga. Obično će nečije noge u sjedećoj meditaciji osjećati bol u talasima. Nakon momenta vrlo neugodne boli, bol popušta i nakon kratkog vremena opet počinje boliti. Obično je to tako.

Zato što se karma odstranjuje komad po komad, noge se osjećaju malo bolje nakon što je dio odstranjen. Ubrzo nadolazi drugi komad i noge će ponovo osjetiti bol. Nakon što je crna supstanca odstranjena, ona ne nestaje, jer ova supstanca nije uništena. Nakon što je odstranjena, transformiše se direktno u bijelu supstancu, ova bijela supstanca je *de*. Kako to da se ona može transformisati na ovaj način? To je zato što je osoba pretrpila patnje, žrtvovala nešto i izdržala bolove. Mi kažemo da se *de* dobija izdržavanjem boli, podnošenjem patnji i činjenjem dobrih djela. Zbog toga će se ovakva situacija pojaviti u sjedećoj meditaciji. Neki ljudi spuste noge čim počnu osjećati bol u nogama, malo se kreću i onda opet sjedaju u lotosov položaj. To uopšte neće djelovati. Za vrijeme stojeće vježbe sa rukama podignutim gore, neki ljudi osjećaju bol u rukama i ne mogu to izdržati, pa spuste ruke dole. To nema učinka. Šta je to malo patnje? Ja kažem, kada bi se ljudi jednostavno podizanjem ruku mogli kultivirati, to bi jednostavno bilo previše lako. Ovo je situacija koja se pojavljuje kod kultivacije u meditaciji.

U našoj školi se uglavnom ne ide ovim putem, iako postoji jedan dio koji djeluje u ovoj oblasti. U većini slučajeva, osoba transformiše karmu kroz konflikt *xinxinga* s drugom osobom i obično se tako manifestuje. Dok je osoba u konfliktu, sukob između dvije osobe čak je jači i od fizičkog bola. Ja kažem da se tjelesne patnje mogu najlakše izdržati, one se mogu prevazići stiskanjem zuba. Kod međuljudskih intriga i borbi, ljudsko srce je najteže kontrolisati.

Na primjer, kada dođe na posao, osoba se može jako razljutiti kada čuje dvije osobe kako ružno govore o njoj. Mi smo rekli da praktikant ne treba uzvratiti kada ga udare ili uvrijede, već treba na sebe postaviti visoke standarde. Prisjetiće se da je Učitelj rekao da mi praktikanti ne bi trebali biti kao drugi i da se moramo bolje ponašati. On se neće svađati s te dvije osobe. Ali obično, kada se problem pojavi, ako on psihički ne iritira osobu, onda se ne računa i beskoristan je, jer ne može poslužiti tome da ta osoba napreduje. Zbog toga njegovo srce i um ne mogu preći preko toga i to ga još muči. On će težiti da se okrene i pogleda tu dvojicu. On preko ramena opaža zlobne izraze lica ove dvojice u žestokoj diskusiji. Odjednom, on to više ne može izdržati i postaje jako ljut. Najvjerojatnije će odmah započeti svađu s njima. Kod međuljudskih konflikta je jako teško obuzdati srce. Ja kažem da bi bilo lako kada bi se sve riješilo u sjedećoj meditaciji, ali to neće uvijek biti tako.

Zbog toga ćeš kod budućeg prakticiranja naići na razne teškoće. Kako se bez ovih teškoća možeš kultivirati? Kako možeš povisiti svoj *xinxing* samo sjedeći, dok su svi dobri jedni prema drugima, bez sukoba interesa i bez smetnji ljudskog srca? To je nemoguće. Čovjek se stvarno mora čeličiti u praksi, samo tako se može poboljšati. Neko pita: "Zašto mi uvijek kod prakticiranja nailazimo na probleme? Ti se problemi baš i ne razlikuju od problema svakodnevnih ljudi." To je zato što se kultiviraš među svakodnevnim ljudima. Nećeš iznenada biti okrenut naglavačke i biti ostavljen da visiš u zraku i patiš. Neće biti tako. Sve će poprimiti formu svakodnevnih situacija, kao npr. neko te danas provocirao, neko te naljutio, neko se loše ponio prema tebi, ili ti se iznenada obraća bez imalo poštovanja. To se dešava da bi se vidjelo kako ćeš reagovati na te situacije.

Zašto nailaziš na takve probleme? Sve je to prouzrokovano tvojom vlastitom karmom. Mi smo za tebe već odstranili nebrojene dijelove, ostavljajući samo taj mali djelić koji je raspodijeljen na poteškoće na raznim nivoima da bi se povisio tvoj *xinxing*, testiralo tvoje srce i da bi razno-razne vezanosti bile odstranjene. Sve su to tvoje vlastite poteškoće, koje upotrebljavamo da bi oplemenili tvoj *xinxing* i ti ćeš ih moći prevazići, osim ako ih ne želiš prevazići. Sve dok oplemenjuješ svoj *xinxing*, možeš ih prevazići. Dakle, od sada pa nadalje, kada se suočiš s konfliktima, ne bi ih trebao smatrati slučajnim. Jer, kada dođe do konflikta, doći će iznenada. Ali to nije slučajnost - oni su zato tu da bi se tvoj *xinxing* povisio. Sve dok se smatraš praktikantom, možeš se dobro nositi s tim.

Naravno, nećeš unaprijed biti obaviješten o poteškoćama i konfliktima. Kako se možeš kultivirati ako ti se sve unaprijed kaže? Od toga ne bi bilo nikakve koristi. Oni se obično pojavljuju iznenada, tako da se *xinxing* osobe može testirati i istinski povisiti. Jedino se tako može vidjeti da li neko može održati svoj *xinxing*. Dakle, kada se konflikt pojavi, ne pojavljuje se slučajno. Tokom cijelog procesa kultivacije, biće prisutno ovo pitanje transformacije karme. Suprotno onome što svakodnevni ljudi misle, ovo je puno teže od fizičke boli. Kako možeš povisiti svoj *gong* tako što jednostavno vježbaš malo duže, dok ruke bole od držanja u visini i noge su umorne od stajanja? Kako možeš povisiti *gong* sa samo par sati više vježbanja? To jedino transformiše tvoj benti, ali to još treba biti podržano energijom. To ne povisuje tvoj nivo. Psihički prevazilaziti teškoće je ključ istinskog povišenja nivoa. Kad bi neko mogao napredovati jedino pomoću fizičke patnje, onda kažem da kineski seljaci najviše pate. Ne bi li onda svi oni trebali biti *qigong* majstori? Bez obzira koliko ti fizički patio, ne patiš toliko kao i oni, koji svaki dan teško i bolno rade u polju, pod suncem koje nemilosrdno prži. Znači to nije tako jednostavno. Zbog toga kažemo - da bi istinski napredovali, moramo istinski unaprijediti svoje srce. Jedino tako se stvarno možemo povisiti.

Da bi se prilikom transformacije karme mogli dobro kontrolisati, a ne učiniti stvari još gorim, kao što to svakodnevni ljudi rade, trebamo cijelo vrijeme sačuvati dobrodušno srce i spokojan um. Kada se iznenada suočiš s bilo kojim problemom, moći ćeš ispravno reagovati. Ako je tvoje srce uvijek tako dobrodušno i milosrdno, kada se problemi iznenada pojave, imaćeš vremena i prostora za razmišljanje. Ako uvijek misliš na nadmetanje i borbu s drugima, kažem da ćeš se sigurno svađati kada naiđeš na probleme. Znači, kada naiđeš na konflikt, to se dešava da bi se tvoja crna supstanca transformisala u bijelu supstancu, *de*.

Kada se čovječanstvo razvilo do današnjeg stadija, skoro svako se rađa s naslagama karme i svačije tijelo ima poprilično puno karme. Prilikom transformacije karme, ovakve će se situacije često pojavljivati: Dok tvoj *gong* raste i tvoj se *xinxing* poboljšava, tvoja se karma odstranjuje i transformiše. Kad osoba naiđe na konfliktnu situaciju, to se može manifestirati kao *xinxing* neslaganje između dvije osobe. Ako možeš to izdržati, tvoja karma će biti odstranjena; tvoj *xinxing* će se povisiti i tvoj *gong* će također porasti. Sve ovo ide uporedo. Ljudi u prošlosti su već u startu imali puno *de*-a i dobar *xinxing*. Sve dok bi izdržali samo malo boli, mogli su povisiti svoj *gong*. Današnji ljudi međutim nisu takvi. Čim pate, više se ne žele kultivirati. Osim toga, njima je sve teže spoznati, što im još više otežava kultivaciju.

Postoje dva scenarija kada se tokom kultivacije susretniš s određenim konfliktima ili kada drugi loše postupaju s tobom. Prvi je da si možda loše postupao prema toj osobi u svom prijašnjem životu. U srcu osjećaš da to nije u redu: "Zašto ta osoba tako postupa sa mnom?" Ali zašto si se ti loše odnosio prema toj osobi u prošlosti? Možda ćeš reći da tada to nisi znao i da ovaj život nema ništa zajedničko s prethodnim životom. Ali to ne ide. Drugi scenarij je povezan s transformacijom karme za vrijeme konflikata. Dakle, kada smo suočeni s određenim konfliktom, mi bismo trebali opraštati, umjesto da postupamo poput svakodnevnih ljudi. Ovo bi se trebalo primijeniti na radnom mjestu i u drugim radnim okruženjima, kao i kod samostalnih privrednika, jer oni također imaju društvene odnose. Nemoguće je nemati nikakav kontakt sa društvom, u najmanju ruku još postoji kontakt sa komšijama.

U društvenim odnosima, osoba će se suočiti sa svakakvim konfliktima. Kod onih koji se kultiviraju među svakodnevnim ljudima, uopšte nije bitno čime se baviš. Sasvim je svejedno koliko imaš novca, koja ti je funkcija ili koliko veliku firmu vodiš, bilo privatnu ili društvenu, sve to ne igra nikakvu ulogu, jer trebaš poslovati pošteno i imati ispravno srce. Sve profesije u ljudskom društvu trebaju postojati. Čovjekovo srce je ono što nije ispravno, a ne njegova profesija. U prošlosti je postojala izreka da je devet od deset trgovaca nepošteno. Ovo je izreka svakodnevnih ljudi. Ja kažem da je to pitanje ljudskog srca. Sve dok je tvoje srce ispravno i dok trguješ pošteno, zaslužuješ zaraditi više novca, ako se potrudiš. To je zato što si nagrađen za trud koji si uložio među svakodnevnim ljudima. Bez gubitka nema dobitka. Ti si to zaradio. Bez obzira na društveni sloj, čovjek može biti dobra osoba. U različitim slojevima postoje različiti konflikti. Visoki slojevi društva imaju konflikte visokog sloja društva i sa svakim od njih se može ispravno postupiti. U bilo kojem sloju društva, osoba može biti dobra i ne obzirati se na različite žudnje i vezanosti. U različitim slojevima se može pokazati kao dobar čovjek, svako se u svom društvenom sloju može kultivirati.

U današnje vrijeme u Kini, bez obzira da li se radi o državnoj ili privatnoj firmi, međuljudski konflikti su postali vrlo svojstveni. U drugim zemljama i tokom istorije, ovaj fenomen se nikad nije pojavio. Kao rezultat toga, konflikti zbog vlastitih interesa su prilično intenzivni. Ljudi igraju raznorazne igre i nadmeću se i za malo vlastitih interesa, misli koje imaju i trikovi kojima se koriste jako su pokvareni. Čak je i biti dobar čovjek veoma teško. Na

primjer, dođeš na posao i osjetiš u zraku da nešto nije u redu. Kasnije ti kolega kaže da je neko u javnosti loše govorio o tebi i prijavio to i tvom šefu, dovodeći te u veoma neugodnu situaciju. Ostali te svi gledaju čudnim pogledom. Kako to obična osoba može tolerisati? Kako se osoba može nositi s tim? "Ako mi neko stvara probleme, uzvatiću mu istom mjerom. Ako on ima svoje ljude, imam i ja svoje, hajmo se boriti." Ako ovako postupaš među svakodnevnim ljudima, reći će da si jak. Ali kao praktikant si onda jako loš. Ako se svađaš i boriš kao običan čovjek, onda i jesi običan čovjek. Ako se u borbi pokažeš još sposobniji od njega, onda si još i gori od tog običnog čovjeka.

Kako bi mi trebali postupati s ovim pitanjem? Kad naiđemo na ovu vrstu konflikta, trebamo prvo ostati prisebni i mirni i ne bi se smjeli ponašati isto kao i ta osoba. Naravno, možemo ljubazno razjasniti stvar i nije problem ako razjasnimo problem. Ali, ne smiješ biti previše vezan za to. Kad naiđemo na takve probleme, ne trebamo se svađati i boriti kao drugi. Ako postupaš kao i ta druga osoba, zar onda ipak nisi običan čovjek? Ne samo da se ne bi trebao boriti i svađati poput njega, nego ga ne trebaš ni mrziti u svom srcu, niti biti uvrijeđen. Zaista ga ne bi trebao mrziti. Ako ga mrziš, zar onda nisi ljut? Nisi slijedio toleranciju. Mi prakticiramo *Zhen, Shan, Ren*, a govoreći o tome, od tvoje dobrodušnosti nema ni traga. Zbog toga ne trebaš biti kao on ili se ljutiti na njega, bez obzira što te stavio u tako groznu situaciju, u kojoj ne možeš više ni glavu podići. Umjesto da se ljutiš na njega, trebaš mu od srca zahvaliti, stvarno mu zahvaliti. Svakodnevni ljudi možda misle: "Nije li to onda biti kao Ah Q?" Ja ti kažem da to nije tako.

Razmislite: vi ste praktikanti, zar ne bi trebali zadovoljavati više standarde? Principi svakodnevnih ljudi se vas ne bi trebali ticati, zar ne? Kao praktikant, zar to što dobijaš nije nešto sa visokih nivoa? Prema tome, moraš poštovati principe visokih nivoa. Ako postupiš kao što je i ta osoba postupila, zar onda nisi isti kao i ta osoba? Zašto joj se onda trebaš zahvaliti? Razmisli o tome: šta ćeš dobiti? U ovom kosmosu postoji princip koji glasi: bez gubitka nema dobitka. Da bi dobila, osoba mora izgubiti. Ta te osoba stavlja u neugodnu situaciju među svakodnevnim ljudima i ona je ta koja je dobila na tvoj račun. U što te goru situaciju stavlja i što je jači udarac, više ćeš istrpiti i ona će izgubiti više *de*-a. Sav taj *de* ćeš ti dobiti. Istovremeno, dok to podnosiš, možda ćeš manje mariti za to i u svom srcu nećeš to uzeti za ozbiljno.

U ovom kosmosu postoji još jedan princip: ako si puno patio, karma iz tvog tijela će se transformisati. Zato što si patio, koliko god si istrpio, toliko će biti transformisano u *de*. Zar to nije upravo ovaj *de* koji praktikanti žele imati? Imaćeš dvostruki dobitak, jer je i tvoja karma eliminirana. Da ti ta osoba nije stvorila ovu situaciju, kako bi povisio svoj *xinxing*? Ako smo i ti i ja dobri jedan prema drugome i sjedimo tako u potpunom skladu, kako može biti moguće povisiti *gong*? Upravo zato što ti je ta osoba stvorila ovaj konflikt i time se pojavila ova mogućnost da povisiš *xinxing*, ti možeš povisiti svoj *xinxing*. Zar na ovaj način tvoj *xinxing* nije povišen? Dobio si na tri načina. Ti si praktikant. Sa povišenim *xinxingom*, zar se neće i tvoj *gong* povećati? Četiri dobitka jednim udarcem. Kako bi mogao ne zahvaliti se toj osobi. Trebaš joj se iskreno zahvaliti, iz dubine srca, to je zaista tako.

Naravno, misli te osobe nisu bile dobre, inače ti ne bi dala *de*. Ali ona je stvarno stvorila priliku za povišenje tvog *xinxinga*. Drugim riječima, moramo voditi računa o kultivaciji *xinxinga*. Istovremeno, dok se kultivira *xinxing*, eliminira se karma i transformiše se u *de*, tako da se možeš uzdići na viši nivo; ovo ide jedno s drugim. Iz perspektive visokih nivoa, ovi principi su svi promijenjeni. Običan čovjek to ne može razumjeti. Kad gledaš te principe s

visokih nivoa, sve će biti drugačije. Među svakodnevnim ljudima smatraš neki princip ispravnim, ali on zapravo nije ispravan. Jedino ono što se vidi sa visokih nivoa je u potpunosti ispravno. To je obično tako.

Temeljito sam vam objasnio principe i nadam se da se kod buduće kultivacije svako od vas može smatrati praktikantom i uistinu se kultivirati, jer su principi ovdje već izneseni. Možda će neki, jer žive među svakodnevnim ljudima, još uvijek misliti da su konkretni, materijalni interesi, koji se nalaze pred njihovim očima, ipak praktični. Usred kolotečine svakodnevnih ljudi, oni se ipak ne mogu vladati u skladu s visokim standardima. U stvari, da bi se bio dobar čovjek među svakodnevnim ljudima, postoje heroji i primjerni ljudi koji služe kao uzori, ali to su uzori među svakodnevnim ljudima. Ako želiš biti praktikant, sve zavisi od kultivacije tvog srca i tvoje sopstvene sposobnosti poimanja, jer ne postoji uzor. Na sreću, danas smo iznijeli u javnost ovaj Dafa. U prošlosti, ako si se želio kultivirati, nije bilo nikog ko bi te učio. Znači, ako se pridržavaš Dafe, možda ćeš bolje postupati. Da li se možeš kultivirati, da li možeš uspjeti i koji nivo ćeš dostići, u potpunosti zavisi od tebe samog.

Naravno, način na koji se karma transformiše nije ograničen samo na ovaj način koji sam upravo objasnio, također se manifestuje i u drugim oblastima. Može se desiti u društvu ili kod kuće. Dok hoda ulicom ili u drugim društvenim okruženjima, osoba može naići na probleme. Bićeš doveden do toga da otpustiš sve vezanosti koje svakodnevni ljudi ne mogu otpustiti. Sve dok ih imaš, vezanosti moraju biti otklonjene u različitim okruženjima. Bićeš naveden na to da se spotakneš, da bi spoznao Tao. Na taj način se čovjek kultivira.

Postoji još jedan relativno tipičan slučaj. Tokom kultivacije, mnogi će od vas primjetiti da upravo dok prakticiraš *qigong*, tvoj bračni partner često postaje jako nezadovoljan. Čim počneš raditi vježbe, tvoj bračni partner će započeti svađu s tobom. Ako radiš nešto drugo, tvoj bračni partner neće mariti. Bez obzira koliko vremena traćio igrajući Mah Jong, tvoj partner može biti nezadovoljan, ali ne toliko kao kad prakticiraš *qigong*. Tvoje prakticiranje *qigonga* ne ometa tvog bračnog partnera; pa to je dobra stvar, jer treniraš tijelo da bude zdravo i ne smetaš svom bračnom partneru. Ali ipak, čim počneš prakticirati *qigong*, tvoj bračni partner će početi bacati stvari uokolo i započće svađu. Malo je falilo da se neki parovi razvedu zbog prepirki oko prakticiranja *qigonga*. Mnogi nisu razmišljali o tome zašto se tako nešto dešava. Ako nešto kasnije pitaš svog bračnog partnera: "Zašto si se uzrujao kada sam prakticirala *qigong*?", on ne može to objasniti i zaista neće imati nikakvog logičnog odgovora. "Zaista, zašto sam postao tako jako ljut i uzrujan u tom trenutku?" Šta je to u stvari? Dok osoba prakticira *qigong*, karma te osobe mora biti transformisana. Ko ništa ne izgubi, ništa ne dobija; ono što gubiš su loše stvari, zbog toga moraš nešto žrtvovati.

Možda će se tvoj bračni partner bez razloga sručiti na tebe, čim uđeš na kućna vrata. Ako to istripiš, onda tvoj trud prakticiranja *qigonga* danas nije bio uzaludan. Neki također znaju da se kod prakticiranja mora cijeniti de, zbog toga su ti ljudi obično jako dobri prema svom bračnom partneru. On misli: "U pravilu, ako ja kažem 'jedan', ona ne kaže 'dva'. Ali danas se prepire sa mnom." On ne može suzdržati svoj bijes i započće svađu. Na taj način današnje prakticiranje biva uzaludno. Jer karma je bila tu, ona mu je pomagala da je odstrani. Ali on to nije prihvatio i započeo je svađu s njom. Karma na taj način nije mogla biti odstranjena. Tako nešto se jako često dešava i mnogi praktikanti su se susreli s tim, ali nisu razmišljali zašto je to tako. Tvoj bračni partner ne mari ako radiš nešto drugo. *Qigong* vježbe bi u stvari trebale biti dobra stvar, ali tvoja supruga uvijek nađe grešku u tebi. Ona ti ustvari pomaže da odstraniš karmu, iako to ni sama ne zna. Nije da se ona samo površno svađa s

tobom, a iznutra je u stvari dobra prema tebi; ne, njezina ljutnja dolazi iz dubine srca, jer, na koga karma padne, taj se ne osjeća dobro. To je garantovano tako.

Povisiti *xinxing*

Zbog toga što mnogi ljudi u prošlosti nisu mogli dobro sačuvati svoj *xinxing*, pojavili su se mnogi problemi. Nakon što su se kultivirali do određenog nivoa, nisu više mogli napredovati. Neki ljudi od početka imaju visok nivo *xinxinga*. Njihovo nebesko oko se prakticiranjem odmah otvara i mogu dostići određene nivoe. Zato što ovaj čovjek ima relativno dobru urođenu osnovu i visok *xinxing*, njegov *gong* se brzo povećava. Njegov *gong* se povisio do nivoa njegovog *xinxinga*. Ako on želi nastaviti dalje povisivati svoj *xinxing*, onda će i konflikti postati ozbiljniji, jer se od njega traži da povisuje svoj *xinxing*. Ovo je pogotovo tačno kod osoba s dobrom urođenom osnovom. On možda misli da njegov *gong* brzo raste i da prakticiranje također dobro ide. Zašto se iznenada pojavilo tako mnogo problema? Sve ide naopako! Drugi više nisu dobri prema njemu, a i njegov šef mu također nije naklonjen. Čak i kod kuće postaje vrlo napeto. Zašto se odjednom pojavilo tako mnogo problema? Ova osoba možda i sama ne shvata. Na temelju njene dobre urođene osnove ona je dostigla određeni nivo koji donosi ovu situaciju. Ali kako to može biti norma za konačno Ispunjenje praktikanta? To je daleko od kraja kultivacijske prakse. Ti se moraš dalje poboljšavati. Zbog te male količine urođene osnove, dostigao si ovo stanje. Da bi se dalje poboljšavao i standardi se moraju povisiti.

Neko će reći: "Zaradiću više novca da osiguram svoju porodicu, pa se više neću morati ni o čemu brinuti. Nakon toga ću prakticirati kultivaciju." Rekao bih da je to samo pusta želja. Ne možeš se miješati u živote drugih ljudi, niti možeš kontrolisati sudbinu drugih, uključujući i sudbinu tvoje žene, sinova, kćeri, tvojih roditelja, ili braće i sestara. Određuješ li ti ove stvari? Osim toga, kako se možeš kultivirati ako nemaš nikakvih briga ili problema? Kako možeš prakticirati komotno i spokojno? Pa gdje toga ima? Tako razmišljaš s gledišta običnog čovjeka.

U kultivaciji se mora prolaziti kroz iskušenja da bi se testiralo da li možeš odbaciti i manje brinuti o raznim oblicima ljudske sentimentalnosti i žudnje. Ako si vezan za te stvari, nećeš uspjeti u kultivaciji. Sve ima svoju sudbinsku vezu. Zašto ljudi mogu biti ljudi? Upravo zato što ljudska bića imaju osjećaje. Oni žive samo za osjećaje: veze između članova porodice, ljubav između muža i žene, ljubav prema roditeljima, sentimentalnost, prijateljstvo, činiti djela za prijateljstvo i sve ostalo, sve se povezuje s osjećajima. Sviđa li ti se raditi nešto ili ne, sretan si ili tužan, voliš ili mrziš nešto i sve u cjelokupnom ljudskom društvu proizilazi iz osjećaja. Ako se ne odvojiš od ovih osjećaja, nećeš se moći kultivirati. Ako se oslobodiš od ovih osjećaja, niko neće moći uticati na tebe. Srce običnog čovjeka neće te moći pokolebati. Ono što to zamjenjuje je dobrodušnost, što je nešto plemenitije. Naravno, nije lako odjednom se osloboditi ovih osjećaja. Kultivacija je jako dug proces, proces u kojem se postepeno odričeš vezanosti. Ali moraš postaviti stroge zahtjeve na sebe.

Kao praktikantu, konflikti će se iznenada pojavljivati. Šta da se radi? Uvijek bi trebalo sačuvati dobrodušno srce i ljubaznost. Tada, kad naiđeš na problem, moći ćeš pravilno postupati jer imaš prostora da amortizuješ tenzije. Uvijek trebaš biti dobrodušan i dobar prema drugima i misliti na druge kada nešto radiš. Kad god naiđeš na problem, prvo trebaš razmisliti da li drugi to mogu podnijeti i da li će to nekog povrijediti. Ako tako radiš onda više neće biti problema. Zato se kod kultivacije trebaš pridržavati višeg i još višeg standarda.

Neki ljudi ovo često ne razumiju. Kada je nebesko oko kod nekog otvoreno i vidi Budu, ći će kući i moliti se Budi gundajući u sebi: "Zašto mi ne pomogneš? Molim te pomoz mi riješiti ovaj problem." Taj Buda naravno neće ništa učiniti za ovu osobu zato što je upravo sam Buda aranžirao ovu teškoću s namjerom da povisi *xinxing* tog čovjeka i unaprijedi ga kroz poteškoću. Kako Buda može riješiti problem za tebe? On uopšte neće riješiti problem za tebe. Kako možeš povećati svoj *gong* i povisiti svoj *xinxing* i nivo ako ti on riješi problem? Cilj je povećati tvoj *gong*. Sa gledišta velikih prosvijetljenih, živjeti kao ljudsko biće nije cilj; i čovjekov život nije namijenjen da bude ljudsko biće - namijenjen je da se vratiš tamo odakle potičeš. Ljudska bića puno pate. Prosvijetljeni ljudi smatraju da što više čovjek pati - tim bolje, jer će brže poravnati svoje dugove. Oni tako misle. Neki ljudi to ne razumiju i počinju se žaliti Budi ako im molitva nije pomogla: "Zašto mi ne pomažeš? Svaki dan palim za tebe dimne štapiće i klanjam ti se." Zbog tako nečeg će neko čak razbiti statu Bude i počće psovati Budu. Kao rezultat tog psovanja, njegov *xinxing* pada i njegov *gong* nestaje, pa on vrijeđa Budu još i više, vjerujući da mu Buda škodi. Ta osoba presuđuje o *xinxingu* Bude kriterijima svakodnevnih ljudi. Kako se može tako presuđivati? Kako može funkcionisati ako osoba gleda na stvari visokih nivoa s normama svakodnevnih ljudi? Zbog toga se mnogi ovakvi slučajevi često pojavljuju kada ljudi patnju u životu smatraju nepravdom. Mnogi ljudi na ovaj način padaju naniže.

U zadnjih nekoliko godina su mnogi veliki *qigong* učitelji, uključujući i poznate, pali postavši niko i ništa. Naravno, svi istinski *qigong* majstori su se već vratili nazad nakon što su obavili svoj istorijski zadatak. Samo oni, koji su se izgubili među svakodnevnim ljudima i čiji je *xinxing* opao, su još uvijek aktivni. Ti su ljudi već izgubili svoj *gong*. Manji broj *qigong* učitelja, koji su prije imali relativno visok ugled, još su aktivni u društvu. Kada su njihovi učitelji vidjeli da su oni izgubljeni među svakodnevnim ljudima i da se ne mogu osloboditi opsjednutosti slavom i bogatstvom, nakon što su postali beznadežni, njihovi učitelji odvode njihovu sporednu dušu. Sav *gong* je bio razvijen na tijelu sporedne duše. Postoji prilično puno ovakvih primjera.

U našoj školi ima relativno malo takvih primjera. Čak i ako ih ima, nisu tako upadljivi. Što se tiče povisivanja *xinxinga*, postoji jako puno izuzetnih primjera. Jedan praktikant radi u fabrici trikotaže u jednom gradu u provinciji Shandong. Nakon što je naučio Falun Dafa, pokazao ga je i ostalim radnicima. Kao rezultat toga, cijela fabrika je dobila drugi izgled. Prije su radnici imali običaj iz fabrike uzimati i nositi preostale peškire kući. Nakon što je naučio Dafa, ne samo da nije više ništa nosio kući, on je još i vratio ono što je već bio odnio kući. Kada su ostali radnici to vidjeli, niko više ništa nije nosio kući. Neki radnici su također vratili ono što su prije uzeli. To se desilo u čitavoj fabrici.

Jedan voditelj Dafa asistentskog centra jednog grada otišao je u jednu fabriku da vidi kako se tamošnji Falun Dafa učenici kultiviraju. Direktor fabrike je izašao da ga lično upozna i rekao mu je: "Nakon što su ovi radnici naučili Falun Dafa, dolaze na posao rano i odlaze kasno. Oni rade savjesno i vrijedno i uradiće svaki posao koji im se dodijeli. Osim toga, više se ne bore za vlastite interese. Postupajući tako, cijela fabrika je dobila novi izgled i ekonomska situacija fabrike se također poboljšala. Vaš put kultivacije je stvarno moćan. Kad dolazi vaš učitelj? I ja bih volio pohadati njegova predavanja." Glavni cilj kultivacije našeg Falun Dafa je da vodi ljude ka visokim nivoima. Iako mi nismo imali tu namjeru, ona ipak može snažno unaprijediti duhovnu civilizaciju društva. Ako svako istražuje unutrašnjost svog srca i vodi računa o tome kako da se dobro ponaša, onda kažem, to će društvo biti stabilno i moralni nivo čovječanstva će se iznova poboljšati.

Kada sam predavao Fa u Taiyuanu, tamo je bila praktikantica koja je bila starija od 50 godina. Dolazila je na predavanja sa svojim mužem. Dok su išli ulicom, velikom brzinom je naišao jedan auto i retrovizor auta je zakačio odjeću starije gospođe. Sa zakačenom odjećom, gospođa je bila vučena preko 10 metara i potom bačena na zemlju. Poslije nekih dvadeset metara auto se zaustavio. Vozač je iskočio iz auta i još je bio neljubazan: "Hej, što ne gledaš kuda ideš?" Ljudi su danas upravo takvi i kada se nešto desi, prvo će odbaciti odgovornost od sebe, bez obzira na to da li su pogriješili ili ne. Suvozač je rekao: "Pogledaj koliko je povrijeđena, odvezimo je u bolnicu." Vozač je došao sebi i brzo rekao: "Kako ste, gospođo? Jeste li povrijeđeni? Dajte da idemo u bolnicu na ispitivanje." Praktikantica je polako ustala i rekla: "Nisam nigdje povrijeđena, možete slobodno ići." Otresla je prašinu i otišla sa svojim mužem.

Došla je na predavanje i ispričala mi to i bio sam veoma sretan to čuti. *Xinxing* naše praktikantice se stvarno povisio. Ona mi je rekla: "Učitelju, danas sam učila Falun Dafa; da nisam učila Falun Dafa, ne bih danas postupila sa udesom na ovaj način." Razmislite: za penzionere su cijene ovih dana tako visoke, a nema ni socijalne pomoći. Osobu od preko 50 godina auto je tako daleko vukao i srušio na ulicu. Gdje je sve njezino tijelo moglo biti povrijeđeno? Posvuda. Mogla je ostati ležati na ulici, ne ustajući se. Da ide u bolnicu? Nego šta! Mogla je otići u bolnicu i ostati tamo. Obična osoba može biti ovakva, ali ona je praktikantica i nije tako postupila. Rekli smo, dobro ili loše potiče od spontane misli osobe i ta misao u tom trenutku može donijeti različite posljedice. U njenim godinama, da je bila obična osoba, zar je mogla ostati nepovrijeđena? Ipak, ona nije imala čak ni ogrebotinu. Dobro ili loše potiču od te trenutne misli. Da je ona tamo ležala kukajući: "Uh, osjećam se loše. Boli tu i tamo", tada bi joj kosti vrlo vjerovatno bile slomljene i možda bi ostala paralizovana. Koliko god joj platili, zar bi joj bilo udobno provesti ostatak života u bolnici? Radoznali prolaznici su se čak čudili zašto ova starija dama nije iznudila novac od vozača. U današnje vrijeme, ljudske moralne vrijednosti su izopačene. Vozač je zaista vozio prebrzo, ali zar bi mogao namjerno nekog udariti? Nije li on to nenamjerno uradio? Ali ljudi su danas jednostavno takvi. Ako se ne iznudi novac, čak će i radoznali prolaznici misliti da to nije fer. Kažem da u današnje vrijeme ljudi više ne razlikuju dobro od lošeg. Ako kažeš nekom da radi nešto loše, on ti neće vjerovati. Zbog promjene moralnih standarda ljudi, neki ljudi teže samo ličnom interesu i sve će uraditi za novac. "Ako čovjek ne teži ličnom interesu, Nebo i Zemlja će ga uništiti" - ovo je već postao moto!

Jedan praktikant iz Pekinga je poslije večere odveo svoje dijete u šetnju na Qianmen i tu su vidjeli reklamni štand na kojem se prodavala lutrija. Dijete se zainteresovalo i tražilo da igra lutriju. Otac je dao djetetu jedan yuan da igra i dijete je dobilo drugu nagradu - luksuzni dječiji bicikl. Dijete je bilo presretno. U trenutku je ocu sinulo: "Ja sam praktikant. Kako mogu težiti ovako nečemu? Koliko *de*-a moram dati ako dobijem nešto za šta nisam platio?" Rekao je djetetu: "Hajde da to ne uzmemo. Ako želiš, možemo sami kupiti." Dijete se uzrujalo: "Molio sam te da mi kupiš bicikl i nisi to učinio. Sad mi ne daš da ga zadržim kad sam ga sam dobio." Dijete je plakalo i vrištalo. Ovom čovjeku nije preostalo ništa drugo nego da ponese bicikl kući. Kod kuće, što je više mislio na to, bivalo mu je sve neprijatnije. Razmišljao je da jednostavno pošalje novac tim ljudima. Ali, onda je pomislio: "Listići za lutriju su prodani i ako im pošaljem novac, zar ga neće među sobom podijeliti? Pokloniću novac svom preduzeću."

Srećom, u njegovom preduzeću ima dosta Falun Dafa praktikanata i njegov šef ga je također razumio. Da je to bilo tipično okruženje ili tipično preduzeće i da si tamo rekao da si

praktikant koji je dobio bicikl na lutriji, ali da ga ne želiš zadržati i da želiš pokloniti novac firmi, onda bi i šef mislio da si mentalno poremećen. Ostali bi također komentarisali: "Je li ovaj čovjek zastranio pri prakticiranju *qigonga* ili je dobio kultivacijsko ludilo?" Kažem vam da su se moralne vrijednosti izopačile. U 50-tim i 60-tim godinama ovo ne bi bilo ništa posebno i bilo bi sasvim uobičajeno - niko to ne bi smatrao čudnim ili neobičnim.

Rekli smo da, bez obzira koliko su se moralne norme čovječanstva promijenile, osobine ovog kosmosa - *Zhen, Shan, Ren*, zauvijek će ostati nepromijenjene. Ako neko kaže da si dobar, možda nisi stvarno dobar. Ako neko kaže da si loš, možda nisi stvarno loš. To je zato što su kriteriji za prosuđivanje dobrog i lošeg već deformisani. Samo onaj ko se pridržava ovih osobina univerzuma je dobar čovjek. To je jedini kriterij za prosuđivanje dobrih i loših ljudi i priznat je u kosmosu. Iako su se velike promjene desile u ljudskom društvu, moralne vrijednosti čovječanstva su se jako srozale. Moral ljudi se iz dana u dan pogoršava i profit je postao jedina motivacija. Međutim, promjene u kosmosu ne slijede promjenu čovječanstva. Tako praktikant ne smije na sebe postavljati kriterije zasnovane na standardu svakodnevnih ljudi. Nije dozvoljeno raditi neku stvar samo zato što svakodnevni ljudi kažu da je ta stvar ispravna. Ono što svakodnevni ljudi smatraju dobrim, ne mora biti dobro. Također, ono što svakodnevni ljudi smatraju lošim, ne mora biti loše. U ovom vremenu kada su moralne vrijednosti izopačene, ako nekom kažeš da čini nešto loše, neće ti vjerovati! Praktikant mora procjenjivati stvari s osobinama univerzuma. Jedino onda može razlikovati šta je stvarno dobro i šta je stvarno loše.

Guanding

U krugovima kultivatora postoji nešto što se zove *guanding*. *Guanding* je religiozni ritual kod metoda kultivacije budističkog tantrizma. Cilj toga je da kroz *guanding* osoba više ne slijedi druge škole kultivacije i ona biva prihvaćena kao istinski učenik te škole. Šta je sada u tome čudno? Ovaj religiozni ritual se također pojavio i kod prakticiranja *qigonga*. Ne samo da se prakticira u tantrizmu, nego i u Tao školi. Rekao sam da su svi u društvu, koji šire tantričke puteve kultivacije pod imenom tantrizma, varalice. Zašto to kažem? Zato što je Tang tantrizam već prije hiljadu godina nestao u Kini i više uopšte ne postoji. Tibetanski tantrizam zbog jezične barijere nikad nije u potpunosti bio uveden u Han oblast. Pogotovo zato što je to ezoterična religija, mora se tajno kultivirati u samostanima. Također mora biti u tajnosti podučavan od strane učitelja i učitelj mora povesti osobu da se u tajnosti kultivira. Ako se ovo ne može uraditi, ni u kom slučaju ne može biti podučavan.

Mnogi ljudi, koji idu na Tibet da bi učili *qigong*, imaju ovakav plan: žele pronaći učitelja i učiti tibetanski tantrizam s namjerom da poslije postanu *qigong* učitelji i postanu bogati i slavni. Razmislite, istinski, živi Buda-lama, koji je dobio izvorna učenja, ima vrlo moćne natprirodne sposobnosti i može čitati misli takve osobe. Zašto ta osoba dolazi ovamo? On će odmah znati čitajući misli te osobe: "Dolaziš ovamo sa željom da naučiš vještinu da bi postao *qigong* učitelj, obogatio se i postao slavan. Time ćeš narušiti ovu školu Buda kultivacije." To je tako ozbiljna škola Buda kultivacije, kako može biti olako uništena tvojom težnjom da postaneš *qigong* učitelj zbog slave i bogatstva? Šta je tvoja motivacija? Zbog toga on uopšte neće podučavati takvu osobu, niti će ta osoba dobiti ikakvo pravo učenje. Naravno, sa toliko samostana uokolo, osoba može dobiti neke od površinskih stvari. Ako srce osobe nije ispravno, privući će posjedujuće duhove dok pokušava postati *qigong* učitelj radeći loše

stvari. Te posjedujuće životinje također imaju *gong*, ali nije od tibetanskog tantrizma. Oni koji idu na Tibet da bi iskreno tražili Fa, možda tamo ostanu, to su istinski kultivatori.

Čudno je da danas mnogi taoistički putevi kultivacije također rade *guanding*. Tao škola govori o meridijanima. Zbog čega onda raditi *guanding*? Bio sam u južnoj Kini da držim predavanja. Koliko znam, tamo postoji preko deset zbrkanih puteva kultivacije koji rade *guanding*, pogotovo u provinciji Guandong. Šta oni pokušavaju? Ako ti učitelj napravi *guanding*, postaćeš njegov sljedbenik i ne možeš učiti ni jednu drugu vještinu. U protivnom će te kazniti. To je to što on radi. Nije li to zla praksa? To što on podučava je nešto za liječenje bolesti i održavanje zdravlja. Ljudi to uče jednostavno zato što žele imati zdravo tijelo. Zašto on radi tako nešto? Neki kažu, ako ljudi uče njihov *qigong*, ne smiju vježbati nijedan drugi *qigong*. Da li on može spasiti ljude i omogućiti im da stignu do Ispunjenja svoje kultivacije? To je pogrešno vođenje učenika! Mnogi ljudi to rade na ovaj način.

U Tao školi se nikad ne uči *guanding*, ali se ipak pojavilo nešto kao *guanding*. Ustanovio sam da *qigong* učitelj, koji je najglasniji u vezi *guandinga*, ima *gong* visine samo jedne dvokatnice ili trokatnice. Za prilično poznatog *qigong* učitelja, mislim da se njegov *gong* vrlo bijedno smanjio. Stotine ljudi čekaju u redu da im napravi *guanding*. Njegov *gong* je ograničen na samo toliko i vrlo će brzo pasti na nulu. S čim će on onda raditi *guanding*? Zar to nije varanje ljudi? Gledajući iz drugih dimenzija, kod pravog *guandinga*, čovjekove kosti od glave do stopala postaju kao bijeli žad. To znači da se tijelo pomoću *gonga*, visokoenergetske supstance, pročišćava od glave do pete. Da li ovaj *qigong* učitelj to može uraditi? Ne, ne može. Šta on radi? Naravno, on najvjerojatnije ne želi osnovati religiju. Njegov cilj je da mu pripadaš, jednom kad počneš učiti njegovu vještinu. Moraš pohadati njegova predavanja i učiti te stvari. Cilj je da ti uzme novac. Ako niko ne uči od njega, neće zaraditi ništa.

Kao i učenici drugih škola kultivacije Buda škole, Falun Dafa učenici će također više puta doživjeti *guanding* od Učitelja, ali ti to neće biti rečeno. Oni koji imaju natprirodne sposobnosti ili oni koji su osjetljivi, možda će u snu ili drugom prilikom odjednom osjetiti toplo strujanje od tjemena kroz čitavo tijelo. *Guanding* ne služi za to da se poveća tvoj *gong*, jer se on mora razviti tvojom vlastitom kultivacijom. *Guanding* je metoda pojačavanja koja služi za pročišćavanje i daljnje čišćenje tvog tijela. Kroz *guanding* se prolazi više puta, tvoje tijelo na svakom nivou mora biti očišćeno. Zbog toga što kultivacija zavisi samo od tebe, dok transformaciju *gonga* obavlja Učitelj, mi ne prakticiramo ritual *guandinga*.

Neki ljudi još prakticiraju takozvano "obožavanje učitelja". Govoreći o ovome, želio bih spomenuti nešto. Mnogi ljudi me žele obožavati kao učitelja. Istorijski gledano, ovo naše današnje vrijeme je drugačije od kineskih feudalnih društava. Da li klečanje i klanjanje znači smatrati nekog učiteljem? Mi ne izvodimo ovaj ritual. Mnogi ljudi misle: "Ako se klanjam, palim tamjan i obožavam Budu od sveg srca, moj *gong* će se povisiti." Smatram to krajnje smiješnim. Istinska kultivacija zavisi u potpunosti od tvoje vlastite kultivacije, tako da je uzaludno moliti se za nešto. Ne trebaš se moliti Budi ili paliti tamjan. Sve dok se stvarno kultiviraš prema kriteriju jednog kultivatora, Buda će biti sretan vidjeti te. Ali, ako na drugim mjestima uvijek radiš loše stvari, gadiće mu se i da te pogleda, iako pališ tamjan i klanjaš mu se. Zar to nije zaista tako? Istinska kultivacija zavisi od tebe samog. Koja je svrha tvog klanjanja i obožavanja učitelja, ako radiš šta želiš čim prekoračiš prag ovih vrata? Mi se uopšte ne obaziremo na ovu formalnost. Čak bi mogao naškoditi mojoj reputaciji!

Mi vam svima dajemo tako mnogo stvari. Sve vas, sve dok se stvarno kultivirate i vladate isključivo u skladu s Dafa, tretiraću kao svoje učenike. Sve dok kultivirate Falun Dafa, tretiraćemo vas kao učenike. Ako se ne želiš kultivirati, koja je svrha da nosiš tu oznaku? Nije bitno da li ste učenici sa prve sesije predavanja ili sa druge sesije. Kako možeš biti naš praktikant ako samo radiš vježbe. Da bi postigao zdravo tijelo i istinski napredovao prema visokim nivoima, moraš se kultivirati stvarno slijedeći naš standard *xinxinga*. Zbog toga mi ne marimo za ove formalnosti. Sve dok se kultiviraš, ti si praktikant u našoj školi kultivacije. Moji *fašeni* znaju sve, znaju sve što misliš i mogu sve uraditi. Neće se brinuti o tebi ako se ne kultiviraš. Ako se kultiviraš, pomoći će ti sve do kraja.

U nekim *qigong* praksama, praktikanti koji nisu nikad vidjeli svog učitelja tvrde da, ako plate nekoliko stotina yuana i klanjaju se u određenom smjeru, da je to dovoljno. Zar to nije varati samog sebe i druge? Osim toga, ovi ljudi su poslije vrlo predani i počinju braniti ili štiti svoje prakse i učitelje. I drugima također kažu da ne smiju više učiti druge prakse. Ja to smatram jako smiješnim. Isto tako, neko obavlja nešto što se zove "dodirivanje tjemena". Niko ne zna kakav efekat taj dodir može imati.

Nisu lažni samo oni koji šire puteve kultivacije pod imenom tantrizma, nego su također takvi i svi oni koji podučavaju *qigong* pod imenom budizma. Razmislite, kultivacijske metode budizma su zadržale ove forme već nekoliko hiljada godina. Kako to još uvijek može biti budizam ako neko promijeni nešto od toga? Kultivacijske metode služe za ozbiljnu Buda kultivaciju i krajnje su složene. I mala promjena može sve ispreturati. Zato što je transformacija *gonga* krajnje složena, ono što čovjek osjeća nije ništa. Kultivacija se ne može prakticirati prema sopstvenim osjećajima. Religiozne forme monaha su njihove kultivacijske metode, čim se promijene, više nisu stvari te škole kultivacije. Svaku školu vodi jedan veliki prosvijetljeni i svaka škola je također proizvela puno velikih prosvijetljenih. Niko se ne usuđuje olako promijeniti kultivacijske metode te škole. Kakvu moćnu vrlinu ima jedan mali *qigong* majstor da se usuđuje vrijeđati svog učitelja i promijeniti školu Buda kultivacije? Hoće li to još uvijek biti ta škola ako se stvarno promijeni? Lažni *qigong* se može prepoznati.

Postavljanje misterioznog prolaza

"Postavljanje misterioznog prolaza" (*xuanguan shewei*) se također naziva i "jedan otvor misterioznog prolaza" (*xuanguan yiqiao*). U knjigama *Spisi eliksira*, *Taoistički spisi* i *Važne upute za tijelo i duh* mogu se naći ovi izrazi. Šta je to u stvari? Mnogi *qigong* učitelji to ne mogu jasno objasniti. To je zato što se na nivou prosječnog *qigong* učitelja to uopšte ne može vidjeti, niti mu je dozvoljeno da to vidi. Kad jedan kultivator to želi vidjeti, on mora dostići gornji nivo vida mudrosti ili viši. Obični *qigong* učitelji ne mogu dostići ovaj nivo, zbog toga oni to ne mogu vidjeti. Kroz istoriju, u krugovima kultivatora se stalno diskutiralo o tome šta je misteriozni prolaz, gdje je jedan otvor i kako postaviti misteriozni prolaz na mjesto. U *Spisima eliksira*, *Taoističkim spisima*, *Važnim uputama za tijelo i duh* samo se diskutiraju teorije, a ne govori se o suštini. Od jedne diskusije do druge, samo te zbunjuju. Oni to ne mogu jasno objasniti, jer svakodnevnim ljudima nije dopušteno saznati ništa od suštinskih stvari.

Osim toga, reći ću vam nešto i samo zato što ste Falun Dafa učenici, reći ću vam ovo: Nikad nemojte čitati te lažne *qigong* knjige. Time ne mislim na gore navedene klasične tekstove, već na tobožnje *qigong* knjige koje ljudi pišu danas. Ne bi ih trebali čak ni otvoriti.

Ako ti jedna misao munjevito prođe kroz glavu: "Pa, ova rečenica ima smisla", s tim će se posjedujući duhovi iz knjige prikačiti na tvoje tijelo. Mnoge knjige su napisane pod kontrolom i upravljanjem posjedujućih duhova koji manipuliraju čovjekovim vezanostima za slavu i bogatstvo. Postoji mnogo, prilično mnogo lažnih *qigong* knjiga. Mnogi ljudi su neodgovorni i pišu knjige sa posjedujućim duhovima i haotičnim stvarima u njima. U pravilu, bolje je ne čitati niti gore navedena stara klasična djela ili drugu sličnu klasičnu literaturu, jer se time dotiče pitanje koncentracije na jednu školu.

Jedan zvaničnik iz Društva za naučno istraživanje *qigonga* u Kini ispričao mi je priču koja me je zaista nasmijala. Rekao je da je u Pekingu bio jedan čovjek koji je često išao na *qigong* predavanja. Nakon što je poslušao mnoga predavanja, mislio je da *qigong* nije ništa više od toga što je tamo rečeno. Zato što su svi bili na istom nivou, svi su govorili o istim stvarima. Slično drugim tobožnjim *qigong* majstorima, mislio je da *qigong* nije ništa više od toga. Onda je i on poželio napisati knjigu o *qigongu*. Razmislite, neko ko ne prakticira *qigong* piše knjige o *qigongu*. U današnje vrijeme su *qigong* knjige prepisivane jedna od druge. Dok je napredovao u pisanju, zapeo je na pitanju o misterioznom prolazu. Ko razumije šta je misteriozni prolaz? Čak i među istinskim *qigong* učiteljima samo nekolicina to razumije. Otišao je pitati jednog tobožnjeg *qigong* učitelja. On nije znao da je ovaj bio tobožnji, jer ionako nije razumio *qigong*. Ali ako ovaj tobožnji *qigong* učitelj ne može odgovoriti na njegova pitanja, zar onda drugi ne bi saznali da je on lažan? Zbog toga se usudio izmisliti i izjavio je da se jedan misteriozni prolaz nalazi na vrhu penisa. To zvuči prilično apsurdno. Ali nemoj se smijati, jer ta knjiga je već objavljena. Ovo potvrđuje da su današnje knjige o *qigongu* već do te mjere apsurdne. Koja je korist od čitanja tih knjiga? Ne koristi ništa i jedino može štetiti.

Šta znači "postavljanje misterioznog prolaza"? U nečijem prakticiranju Fa-unutar-trostrukog-svijeta, kada je kultivacija te osobe iznad srednjeg nivoa ili na visokim nivoima Fa-unutar-trostrukog-svijeta, ta osoba počinje razvijati besmrtno dijete. Besmrtno dijete (*yuanying*) i kultivirana djetesca (*yinghai*) o kojima govorimo su dva različita pojma. Kultivirana djetesca su mala, živahna i radosno trče uokolo. Besmrtno dijete se ne miče. Ako duša osobe ne upravlja s njim, besmrtno dijete će nepomično sjediti na lotosovom cvijetu s obje noge prekrštene u lotosovom položaju i s rukama spojenim u *jiyin* poziciju. Besmrtno dijete raste iz polja eliksira i može se vidjeti na mikroskopskom nivou, čak i dok je manje od vrha igle.

Osim ovog, još jedno pitanje treba biti razjašnjeno. Postoji samo jedno pravo polje eliksira i ono se nalazi na mjestu donjeg trbuha. Ono je iznad *huiyin* tačke i ispod trbuha unutar tijela. Mnogi oblici *gonga*, mnoge natprirodne sposobnosti, mnoge vještine, *fašen*, besmrtno dijete, kultivirana djetesca i mnoga bića, sva nastaju iz ovog polja.

Nekoliko praktikanata je u prošlosti govorilo o gornjem polju eliksira, srednjem polju eliksira i donjem polju eliksira. Rekao bih da je to pogrešno. Neki ljudi također kažu da su njihovi učitelji ovo predavali generacijama i da to u knjigama također stoji napisano. Kažem vam, besmislica je bilo i u stara vremena. Iako neke stvari mogu biti predavane godinama, one mogu biti pogrešne. Neki manji kultivacijski putevi su oduvijek bili prenošeni među svakodnevnim ljudima, ali se s njima ne može kultivirati i nisu dobri nizašta. Kad oni to nazivaju gornje polje eliksira, srednje polje eliksira i donje polje eliksira, oni time misle da je polje eliksira svugdje tamo gdje se može stvoriti eliksir. Zar to nije vic? Kada se misli čovjeka duže vrijeme koncentriraju na jednu tačku na tijelu, može se razviti energetska masa i

formirati eliksir. Ako ne vjeruješ, probaj koncentrirati svoje misli na svoju ruku i ostani tako duže vrijeme i tamo će se formirati eliksir. Dakle, neki ljudi su ovo vidjeli i zbog toga su izjavili da je polje eliksira svugdje. Ovo zvuči još besmislenije. Oni smatraju da je polje eliksira gdje god se formira eliksir. Zapravo, to je eliksir, ali nije polje. Možeš reći da je eliksir svugdje, ili da postoji gornji eliksir, srednji eliksir i donji eliksir. Ali postoji samo jedno stvarno polje iz kojeg stvarno može nastati nebrojeno Fa, to je upravo to polje na mjestu donjeg trbuha. Zbog toga je izjava o gornjem polju eliksira, srednjem polju eliksira i donjem polju eliksira pogrešna. Gdje god se čovjekove misli koncentriraju duže vrijeme, formiraće se eliksir.

Besmrtno dijete raste polako iz polja eliksira na mjestu donjeg trbuha, da bi postepeno bilo sve veće i veće. Kad naraste do veličine ping-pong loptice, njegove cjelokupne tjelesne konture se jasno vide, sa formiranim nosom i očima. U isto vrijeme kada je besmrtno dijete veličine ping-pong loptice, rađa se i jedan mali okrugli mjehur pored njega. Nakon rođenja, mjehur će rasti zajedno sa besmrtnim djetetom. Kada besmrtno dijete naraste do veličine od 10 cm, niknuće latica lotosovog cvijeta. Kada besmrtno dijete naraste do 13, 14 cm, latice lotosovog cvijeta će uglavnom biti formirane i pojavljuje se vijenac lotosovih cvjetova. Blistavo, zlatno, besmrtno dijete sjediće na zlatnom lotosovom tronu, izgledajući predivno. To je neprolazno Vajra-tijelo, koje se u Buda školi naziva Buda-tijelo, a u Tao školi "besmrtno dijete".

U našoj školi se kultiviraju i potrebne su obje forme tijela; i *benti* se također mora transformisati. Svima je poznato da se Buda-tijelo ne smije pojaviti među svakodnevnim ljudima. Uz puno napora, njegov obris se može prikazati i njegova svjetlost se može vidjeti očima običnog čovjeka. Nakon transformacije, fizičko tijelo ipak izgleda isto kao i tijelo prosječnog čovjeka među svakodnevnim ljudima. Svakodnevni ljudi ne mogu vidjeti razliku, međutim ovo tijelo može prolaziti kroz dimenzije. Kada besmrtno dijete dostigne veličinu od 10-13 cm, vazdušni mjehur će također porasti do te veličine i providan je poput balona. Besmrtno dijete nepokretno sjedi u lotosovom meditacijskom položaju. Kada je vazdušni mjehur tako velik, napušta polje eliksira. "Jabuka pada kada je zrela", kao što kažu - tako će se uspinjati prema gore. Ovo uspinjanje je veoma spor proces, ali njegovo kretanje se može svakodnevno vidjeti. On se postepeno pomjera naviše i penje se naviše. Ako to pažljivo pratimo, možemo osjetiti njegovo postojanje.

Kada vazdušni mjehur dostigne mjesto *tanzhong* tačke, ostaće tamo neko vrijeme. Zato što su tamo mnoge esencijalne stvari ljudskog tijela (srce se također nalazi tamo), sistem stvari će biti formiran u vazdušnom mjehuru. Esencijalne stvari će biti postavljene u vazdušni mjehur. Nakon nekog vremena, on će se ponovo početi kretati prema gore. Kada prolazi kroz grlo, osoba će se osjećati kao da se guši, kao da su krvne žile priklještene i osjećaću se vrlo natečeno, tako da će biti vrlo neugodno. Ovo će trajati samo nekoliko dana. Zatim će se vazdušni mjehur popeti do vrha glave i to nazivamo "dostizanje *nivana*". Kaže se, doduše, da je on dostigao *nivan*, ali je on u stvari velik kao tvoja cijela glava. Tvoja glava će se osjećati natečeno. Zato što je *nivan* jako važno područje za ljudsko biće, njegova se bit također mora formirati u vazdušnom mjehuru. Nakon toga, vazdušni mjehur se provlači kroz kanal nebeskog oka prema vani i to će biti vrlo neugodan osjećaj. Nebesko oko će biti natečeno sve do jake boli, sljepoočnice se osjećaju natečene, dok će oči imati osjećaj kao da pritišću prema unutra. Ovaj osjećaj će trajati sve dok vazdušni mjehur ne izbije vani kroz kanal nebeskog oka i odjednom visi ispred čela. Ovo se zove postavljanje misterioznog prolaza i on tamo visi.

U to vrijeme, oni čije je nebesko oko otvoreno nisu u mogućnosti ništa vidjeti. To je zato što su kod kultivacije u Buda školi i u Tao školi vrata zatvorena, kako bi se stvari unutar misterioznog prolaza ubrzano formirale. Postoje dvojica prednja vrata i dvojica stražnja vrata i ona su sva zatvorena. Kao kapije na Trgu nebeskog mira u Pekingu, na obje strane se nalazi par velikih vrata. Kako bi se misteriozni prolaz brzo formirao i ispunio, vrata se ne otvaraju, osim u izvanrednim situacijama. Oni koji mogu gledati svojim nebeskim okom, u ovom trenutku ne mogu gledati, jer to nije dopušteno. Iz kojeg razloga on tu visi? Jer se stotine energetskih kanala iz našeg tijela susreću na ovom mjestu, u ovom trenutku svi oni moraju kružiti kroz misteriozni prolaz, a zatim izaći izvan njega. Oni moraju proći kroz misteriozni prolaz i cilj je postaviti dodatne temelje i formirati sistem stvari unutar misterioznog prolaza. Zato što je ljudsko tijelo mali kosmos, formiraće mali svijet sa svim esencijalnim stvarima ljudskog tijela formiranim unutar njega. Ali pri tome se razvija samo niz postrojenja koja se još ne mogu potpuno upotrebljavati.

Kod kultivacije u neobičnim školama misteriozni prolaz je otvoren. Kad je misteriozni prolaz izbačen van, on je kao cilindar, ali će postepeno postati okrugao. Tako su njegova vrata sa obje strane otvorena. Zato što se kod neobičnih škola ne kultivira ni Buda, ni Tao, osoba se mora sama zaštititi. U Buda školi i Tao školi postoji puno učitelja, koji te svi mogu štiti. Ti ne moraš sam vidjeti, niti ćeš imati ikakvih problema. Ali to nije slučaj kod neobičnih škola, jer se osoba mora sama zaštititi. I zbog toga mora biti u stanju vidjeti. U to vrijeme, nebesko oko osobe vidi stvari kao kroz teleskop. Nakon što se ovaj sistem izgradio, otprilike nakon mjesec dana, počinje se vraćati unutra. Kada se vrati unutar glave, to se naziva "promjena pozicije misterioznog prolaza".

Kada se misteriozni prolaz vrati unutra, glava će se osjećati natečeno i jako neugodno. Nakon toga će se istisnuti kroz *yuzhen* tačku. Ovo istiskivanje prema vani je također jako neugodno, kao da će se glava raspoloviti. Misteriozni prolaz će cijeli izaći vani i tada će osoba odmah osjetiti olakšanje. Nakon što je izašao vani, misteriozni prolaz će visiti u veoma dubokoj dimenziji i postojaće u tjelesnoj formi veoma duboke dimenzije. Tako neće žuljati osobu pri spavanju. Ali ima jedna stvar: kod prvobitnog postavljanja misterioznog prolaza, osoba osjeća nešto pred očima. Iako je on u drugoj dimenziji, osoba uvijek osjeća kao da je vid mutan, kao da su oči nečim pokrivena, to nije baš ugodno. Zato što je *yuzhen* tačka vrlo važan prolaz, misteriozni prolaz i ovdje također mora izgraditi sistem stvari. Nakon toga se opet počinje vraćati. Misteriozni prolaz se u stvari ne odnosi na jedan položaj misterioznog prolaza, jer će on više puta promijeniti mjesto. Nakon što se vrati u *nivan*, počinje se spuštati u tijelu dok ne stigne do *mingmen* tačke. Na *mingmen* tački će ponovo izaći vani.

Mingmen tačka u ljudskom tijelu je vrlo važan i glavni otvor. U Tao školi se naziva "otvor", a kod nas "prolaz" (*guan*). To je glavni prolaz, koji uistinu liči na čeličnu kapiju i ima mnogobrojne slojeve čeličnih kapija. Poznato je da ljudsko tijelo ima mnogo slojeva. Naše fizičke ćelije su jedan sloj, molekule unutra su drugi sloj. Kapija je postavljena kod svakog sloja atoma, protona, elektrona, beskrajno sitnih čestica, još manjih i još manjih čestica, sve do krajnje sitnih čestica. Zbog toga su mnogobrojne natprirodne sposobnosti i mnoge posebne sposobnosti zaključane iza kapija različitih slojeva. U drugim putevima kultivacije se oplemenjuje eliksir. Prije nego što eliksir eksplodira, *mingmen* tačka mora prvo eksplodirati. Ako ne eksplodira, natprirodne sposobnosti ne mogu biti oslobođene. Nakon što je misteriozni prolaz formirao sistem na *mingmen* tački, ponovo se vraća unutra. Nakon toga se počinje vraćati ka donjem trbuhu. Ovo se naziva "povratak misterioznog prolaza na mjesto".

Nakon što se vrati, misteriozni prolaz se ne vraća na svoje prijašnje mjesto. Do sada je besmrtno dijete poraslo već jako veliko. Vazdušni mjehur će pokriti i omotati besmrtno dijete. Dok besmrtno dijete raste, raste i misteriozni prolaz. U Tao školi, obično kada besmrtno dijete naraste do veličine šestogodišnjeg ili sedmogodišnjeg djeteta, biće mu dozvoljeno napustiti tijelo; to se zove "rođenje besmrtnog djeteta". Upravlja od glavne duše osobe, može izaći iz tijela osobe i kretati se. Fizičko tijelo osobe se ne miče, dok glavna duša osobe izlazi van. U Buda školi, obično će besmrtno dijete biti izvan opasnosti kada kroz kultivaciju naraste do veličine odraslog čovjeka. Tada mu je obično i dozvoljeno napustiti tijelo i izaći iz tijela. Sada je besmrtno dijete poraslo do veličine same osobe i njegov omotač je također velik. Omotač se već proširio izvan tijela osobe - to je misteriozni prolaz. Zato što je besmrtno dijete naraslo već toliko veliko, misteriozni prolaz će se sigurno proširiti izvan tijela.

Možda ste već vidjeli statue Bude u hramovima i uočili da se Bude uvijek nalaze unutar jednog kruga. Pogotovo kod portreta Bude uvijek postoji krug u kojem Buda sjedi. Mnogi portreti Bude tako izgledaju, pogotovo oni u starim hramovima su svi takvi. Zašto Buda sjedi unutar kruga? Niko to ne može tačno objasniti. Mogu vam reći da je to upravo ovaj misteriozni prolaz, ali sada se više ne naziva misteriozni prolaz. Naziva se "svijet", iako u stvari još ne može biti nazvan svijet, jer on samo ima taj skup postrojenja. To je kao fabrika sa postrojenjem, ali bez mogućnosti proizvodnje. Mora postojati izvor energije i sirovine prije nego što može proizvoditi. Prije nekoliko godina su mnogi praktikanti rekli: "Nivo mog *gonga* je viši nego kod Bodisatve" ili "Nivo mog *gonga* je viši nego kod Bude". Kad to čuju, drugima se to čini vrlo neprihvatljivim. U stvari to što su rekli uopšte nije neprihvatljivo, jer u ljudskom svijetu *gong* osobe zaista mora biti kultiviran na vrlo visok nivo.

Kako je to moguće: Oni su postigli nivo viši od Bude? To ne može biti shvaćeno tako površno. *Gong* takve osobe je stvarno vrlo visok. To je zato što kad njegova kultivacija dostigne vrlo visok nivo, u trenutku prosvjetljenja će nivo njegovog *gonga* zaista biti vrlo visok. Jedan trenutak prije potpunog prosvjetljenja, osam desetina njegovog *gonga* će biti skinuto zajedno s njegovim mjerilom *xinxinga* i ova energija će se upotrijebiti da obogati njegov svijet - njegov vlastiti svijet. Kao što znate, pored ovog mjerila *xinxinga*, *gong* praktikanta je kultiviran kroz bezbrojne muke i u teškim okruženjima tokom cijelog života. Zbog toga je on jako vrijedan. Osam desetina ove vrijedne materije je upotrijebljeno da obogati njegov svijet. Dakle, kad u budućnosti uspije u kultivaciji, dobiće šta god poželi čim ispruži ruke i imaće sve što poželi. On može raditi sve što želi i u njegovom svijetu ima svega. To je njegova moćna vrlina koju je sam kultivirao kroz patnje.

Ta njegova energija po volji može biti pretvorena u bilo šta. Dakle, ako Buda želi imati nešto, nešto jesti, ili se želi igrati s nečim, on to može imati. To dolazi od njegovog vlastitog uspjeha u kultivaciji, to je Buda-status (*fowei*). Bez toga se osoba ne može uspješno kultivirati. Sada se već može nazivati zasebnim svijetom. Ova osoba će sada imati samo još dvije desetine svog preostalog *gonga* da upotpuni kultivaciju i dostigne Tao. Iako su preostale još samo dvije desetine, njegovo tijelo nije zaključano; on ili više nema tijela ili ima tijelo, ali je ovo tijelo već transformisano od visokoenergetskih supstanci. Sada se mogu pokazati njegove božanske sposobnosti koje imaju neizmjernu moć. Kada se osoba kultivira među svakodnevnim ljudima, ona je obično zaključana bez ijedne velike sposobnosti. Bez obzira koliko je velik njen *gong*, on je još uvijek ograničen. Ali sada je to drugačije.

5. Lekcija

Slika *faluna*

Simbol našeg Falun Dafa je *falun*. Oni koji imaju natprirodne sposobnosti, mogu vidjeti da se ovaj *falun* okreće. Kod našeg malog *falun* simbola je isto tako, okreće se. Mi se kultiviramo vođeni kosmičkim osobinama *Zhen, Shan, Ren*. Mi prakticiramo prema principima transformacije kosmosa, zato mi kod ovog puta kultivacije stvarno prakticiramo nešto jako veliko. U izvjesnom smislu je ova *falun*-slika kosmos u minijaturi. U Buda školi se Svijet-deset-smjerova posmatra kao pojam kosmosa, sa četiri strane i osam nebeskih smjerova. Možda neki mogu vidjeti da se ispod i iznad *faluna* nalazi energetski stup; znači, ako se uračuna gore i dole, to je jedan svijet sa tačno deset nebeskih smjerova od kojih je sastavljen ovaj kosmos i to u Buda školi predstavlja sažetak kosmosa.

Naravno, u ovom kosmosu postoje nebrojene galaksije, uključujući i naš sistem Mliječnog puta. Čitav kosmos se kreće, isto tako se kreću i sve galaksije u cjelokupnom kosmosu, tako se unutar simbola također okreću mali *taiji* i mali svastika znakovi; čitav *falun* se okreće i veliki svastika-znak u sredini se također okreće. U izvjesnom smislu to simbolizira naš sistem Mliječnog puta. Istovremeno, jer mi pripadamo Buda školi, u sredini se nalazi znak Buda škole; tako je gledano sa površine. Sve različite supstance imaju svoje oblike postojanja u drugim dimenzijama, u drugim dimenzijama imaju krajnje bogate i krajnje komplikovane procese transformacije i oblike postojanja. Ova slika *faluna* je kosmos u minijaturi. On i u drugim dimenzijama ima svoje oblike postojanja i procese transformacije. Zbog toga kažem da je on jedan svijet.

Kada se *falun* okreće u smjeru kazaljke na satu, on može sam od sebe primati energiju iz kosmosa. Kada se okreće suprotno od smjera kazaljke na satu, on može davati energiju. Pri okretanju prema unutra (u smjeru kazaljke na satu), on služi samospasenju, pri okretanju prema vani (suprotno od smjera kazaljke na satu), on služi spasenju drugih, to je osobitost našeg puta kultivacije. Neki kažu: "Mi pripadamo Buda školi, ali zašto su tu onda i *taiji*? Zar *taiji* ne pripada Tao školi?" Zato što se kod našeg puta kultivacije prakticira nešto jako veliko, to je kao da se prakticira čitav kosmos. Dakle razmislite, u ovom kosmosu postoje dvije velike škole, Buda škola i Tao škola, bez jedne od njih ne može se izgraditi potpun kosmos, ne može se nazvati cjelokupnim kosmosom, zbog toga mi tu imamo stvari Tao škole. Neki kažu: "Ne postoji samo Tao škola, nego također i hrišćanstvo, konfucijanizam i druge religije." Ja vam kažem: kada se kod konfucijanizma kultivira do krajnje visokih nivoa, biće uvršten u Tao školu. I kad se kod mnogih religija na zapadu kultivira do visokih nivoa, one su uvrštene u Buda školu, one pripadaju istom sistemu Buda škole. Postoje samo ove dvije velike škole.

Zašto onda imamo dva *taiji* znaka, koji su gore crveni, a dole plavi i još dva druga koji su gore crveni, a dole crni? Prema našem opštem znanju, vjerujemo da se *taiji* sastoji iz crne i bijele supstance, naime iz dva *qi, yin* i *yang*. To je spoznaja na jednom jako niskom nivou, u različitim dimenzijama postoje različite pojave. Na najvišem nivou pokazuju se upravo ove boje. Tao, na koji mi obično mislimo, sastoji se upravo iz ove dvije boje, gore crveno i dole crno. Spomenimo jedan primjer: Kod nekih od nas je nebesko oko otvoreno, oni su primjetili da je nešto viđeno očima crveno; ali je u jednoj drugoj dimenziji, koja je udaljena samo jedan nivo, ipak zeleno. Zlatno je u drugoj dimenziji ljubičasto, postoji ovaj kontrast, znači u

različitim dimenzijama se također mijenjaju i boje. *Taiji* sa gore crvenim i dole plavim pripada prapočetnom velikom Tao, uključujući i neobične puteve kultivacije. Mali svastika-znakovi na četiri strane su iz Buda škole, kao i onaj u sredini, svi oni pripadaju Buda školi. Ovaj *falun* je relativno jarkih boja, mi ga uzimamo kao simbol za Falun Dafa.

Falun koji vidimo s nebeskim okom nema nužno ove boje; boja pozadine se može promijeniti, ali se uzorak ne mijenja. Kada se *falun*, koji sam usadio u tvoj donji trbuh, okreće, on je viđen tvojim nebeskim okom možda crven, možda ljubičast, možda zelen, a može biti i bezbojan. Crvena, narandžasta, žuta, zelena, indigo-plava, plava i ljubičasta, njegova boja pozadine se stalno mijenja, tako ti možda vidiš druge boje, ali se boja, kao ni uzorak svastika-znaka i *taiji* znaka neće mijenjati. Za nas je boja pozadine ovog uzorka lijepa i zato smo je zadržali. Oni koji imaju natprirodne sposobnosti, iza ove dimenzije mogu vidjeti jako puno stvari.

Neki kažu: "Ovaj svastika-znak izgleda kao onaj Hitlerov". Ja vam kažem, ovaj znak sam po sebi nema klasno značenje. Neki kažu da, ako je ugao okrenut na ovu stranu, onda je to Hitlerov znak. Ne zavisi od toga, on se okreće na obje strane. U našem ljudskom društvu je ovaj znak bio opšte poznat prije 2.500 godina, postao je poznat za vrijeme Shakyamunija. Od vremena Hitlera, od drugog svjetskog rata do danas, prošlo je tek nekoliko desetaka godina, on je ovaj znak ukrao i zloupotrijebio. Ipak, njegova boja je drugačija nego kod nas, on je crn, osim toga njegov vrh pokazuje prema gore, on je uspravljen, koristi se uspravljen. Toliko o ovom *falunu*, mi smo samo objasnili njegov površinski oblik.

Za šta se ovaj svastika-znak smatra u našoj Buda školi? Neki kažu da on znači sreću i ispunjenje želja. To je samo objašnjenje među svakodnevnim ljudima. Ja vam kažem, svastika-znak je simbol za nivo Bude, imaju ga samo oni koji dostignu nivo Bude. Bodisatve i Arhati ga nemaju, ali velike Bodisatve, četiri velike Bodisatve ga imaju. Mi smo vidjeli da su ove velike Bodisatve već daleko nadmašile nivo običnih Buda, one su čak više od Tathagate. Postoji nebrojeno Buda koji se nalaze na nivoima višim od nivoa Tathagate. Tathagata ima samo jedan svastika-znak, iznad nivoa Tathagate onda ima više svastika-znakova. Kada je nivo dvostruko viši od nivoa Tathagate, on ima dva svastika-znaka, još viši, onda imaju tri, četiri, pet; toliko, da je cijelo tijelo time pokriveno. Oni se mogu pojaviti na glavi, na ramenima i na koljenima, a kada više nema mjesta za njih, mogu se također pojaviti u sredini dlanova, na prstima, u sredini tabana, na nožnim prstima i tako dalje. Stalnim povisivanjem nivoa pojavljuje se sve više svastika-znakova, znači svastika-znak predstavlja nivo Bude. Što je viši nivo jednog Bude, to više svastika-znakova on ima.

Neobični putevi kultivacije

Pored puteva kultivacije Buda škole i Tao škole postoje i neobični putevi kultivacije, oni se nazivaju kultivacija neobičnih škola. Obično o putevima kultivacije svakodnevni ljudi imaju sljedeće saznanje: Od drevnih vremena Kine do danas, ljudi su smatrali puteve kultivacije Buda škole i Tao škole ortodoksnim putevima kultivacije, pa su ih također nazivali kultivacijom ortodoksnih škola. Neobični putevi kultivacije nisu nikad postali poznati u javnosti, samo veoma mali broj ljudi zna da oni postoje, oni se mogu naći samo u umjetničkim djelima.

Da li postoje neobični putevi kultivacije? Da. U mojoj kultivaciji, pogotovo u kasnijim godinama, sreo sam tri visoko kultivirana čovjeka iz neobičnih puteva kultivacije, oni su mi

predali ono esencijalno njihovih škola kultivacije, nešto veoma posebno, veoma dobro. Upravo zato što su njihove stvari veoma svojstvene, to što se iskultivira je jako neobično i svakodnevni ljudi to ne mogu shvatiti. Osim toga, oni imaju jednu izreku: Ni Buda škola, ni Tao škola, ne kultivirati ni Budu, ni Tao. Kad neki čuju da oni ne kultiviraju ni Tao, ni Budu, onda ih nazivaju "sporedne škole i lijevi putevi"; oni sami sebe nazivaju "neobični putevi kultivacije". Naziv "sporedne škole i lijevi putevi" ima omalovažavajuće, ali ne i negativno značenje, time se ne misli da oni spadaju u heretični Fa, to je sigurno. Ni bukvalno značenje ne podrazumijeva da se radi o heretičnom Fa. Od davnina se putevi kultivacije Buda škole i Tao škole nazivaju kultivacijom ortodoksne škole. Dok ljudi još nisu imali spoznaje o neobičnim putevima kultivacije, bili su nazivani "sporedne škole", znači škole koje su po strani i nisu ortodoksne škole. Šta onda znači "lijevi putevi"? "Lijevi" znači nespretno, dakle nespretni putevi. "Lijevi" kao staro-kineski izraz često znači nespretn; "sporedne škole i lijevi putevi" imaju ovo značenje.

Zašto one ne spadaju u heretični Fa? Jer također postavljaju stroge zahtjeve na svoj *xinxing* i također se kultiviraju prema kosmičkim principima. One također ne djeluju u suprotnosti sa kosmičkim osobinama i zakonitostima i ne čine ništa loše, zbog toga ne mogu biti označene heretičnim. Buda škola i Tao škola kultivacije pripadaju ortodoksnom Fa, ne zato što su osobine ovog našeg kosmosa u skladu s njima, nego zato što su one u skladu s kosmičkim osobinama. Kad je kultivacija neobičnih puteva kultivacije u skladu sa kosmičkim osobinama, onda oni ne pripadaju heretičnom Fa, nego također ortodoksnom, jer su osobine kosmosa kriterij za presuđivanje dobrog i lošeg, dobrodušnosti i zla. Oni se kultiviraju prema kosmičkim osobinama, zato su također ortodoksni putevi; samo su njihovi zahtjevi i osobitosti drugačiji nego kod Buda škole i Tao škole. Oni ne podučavaju učenike masovno, predanje se vrši samo u malom krugu. Kod predanja puta kultivacije Tao škole podučava se grupa učenika, ali samo jedan od njih dobija istinsko predanje. U Buda školi se govori o sveukupnom spasenju svih bića, ko se može kultivirati, kultivira se.

Kod predavanja neobičnih puteva kultivacije ne smiju se izabrati čak ni dva učenika, nego će samo jedan biti izabran u prilično dugom istorijskom periodu i on dobija predanje, zbog toga svakodnevni ljudi od davnina ne mogu vidjeti njihove stvari. Naravno, za vrijeme *qigong* vala, primjetio sam da su neki ljudi ovih škola kultivacije također nastupili i počeli širiti svoje puteve kultivacije. Kod širenja su ipak primjetili da ne ide, jer im njihovi učitelji uopšte nisu dozvolili da šire određene stvari. Ako želiš širiti put kultivacije, ne možeš više birati učenike. *Xinxing* ljudi koji su došli nalazi se na različitim nivoima. Oni sa različitim shvatanjima dolaze učiti, ima svakakvih različitih ljudi, zato kod širenja ne možeš birati učenike. Zato se neobični putevi kultivacije ne mogu naširoko podučavati, mogu se lako pojaviti opasnosti, jer su njihove stvari veoma neobične.

Neki misle: "U Buda školi se kultivira Buda, u Tao školi se kultivira istinski čovjek, šta će onda postati onaj ko se uspješno kultivirao u neobičnim putevima kultivacije?" On će postati lutajuće božanstvo koje nema određeno područje u kosmosu. Znae da Tathagata-Buda Shakyamuni ima Saha svijet; Amitabha ima Sukhavati svijet, Bhaisajyaguru ima Majolika svijet; sve Tathagate i veliki Bude imaju sopstvene svjetove. Svaki veliki prosvjetljeni ima nebesko carstvo, koje je sam kreirao i u kojem žive mnogi od njegovih učenika. Ali neobični putevi kultivacije nemaju određeni kosmički prostor. Oni su kao lutajuća božanstva.

Vježbanje heretičnog Fa

Šta je vježbanje heretičnog Fa? Postoje sljedeće forme: Ima ljudi koji specijalno vježbaju heretični Fa, jer od davnina ima ljudi koji predaju ove stvari. Zašto oni predaju ove stvari? Zato što teže slavi, ličnom dobitku i bogatstvu svakodnevnih ljudi, njima je to bitno. Naravno, njihov *xinxing* nije visok i oni ne mogu dobiti *gong*. Šta će onda dobiti? Karmu. Kad je karma jednog čovjeka velika, s tim se također pojavljuje vrsta energije. Ali on nema nivo, on se ne može porediti s praktikantima, ali ipak, u poređenju sa svakodnevnim ljudima, on može uticati na obične ljude. Jer ova stvar je također oblik energije. Kad je njena gustoća jako velika, to također može pojačati natprirodne sposobnosti ljudskog tijela, to može imati i takvo dejstvo, zato od davnina ima nekih koji predaju ove stvari. On kaže: "Ja činim loše, psujem druge, tada moj *gong* već može rasti." Kod njega ne raste *gong*, već je on pojačao gustoću ove crne materije, jer on kroz svoja loša djela može dobiti crnu materiju - karmu. Zato to nekoliko malih sposobnosti koje njegovo tijelo ima na sebi mogu biti pojačane ovom karmom i kod njega se također može pojaviti nekoliko malih sposobnosti, ali on s tim ne može napraviti ništa veliko. Ovi ljudi misle da *gong* također može rasti tako što čine loše, tako oni kažu.

Neki kažu nešto kao: "Dok se Tao penje jednu stopu, demon se penje deset stopa." To je heretična izreka među svakodnevnim ljudima. Démoni nikad ne mogu biti viši od Tao-a. Činjenica je da je kosmos, kojeg čovječanstvo poznaje, samo jedan mali kosmos među bezbrojnim kosmosima, mi ga skraćeno nazivamo kosmos. Svaki put nakon što je ovaj naš kosmos prošao kroz jako dug period, došlo je do velike kosmičke katastrofe. Ova katastrofa je mogla uništiti sve u kosmosu, uključujući i zvijezde, sva živa bića u kosmosu su mogla biti uništena. Kretanja kosmosa su također zakonita, u našem današnjem kosmosu čovječanstvo nije jedino koje je postalo loše, mnoga bića su već vidjela određenu situaciju, u ovo vrijeme je već odavno nastupila velika eksplozija u ovoj kosmičkoj dimenziji. Sada astronomi to ne mogu vidjeti, jer ono što danas posmatramo s najvećim teleskopom, samo su događaji od prije 150.000 svjetlosnih godina. Ako želimo vidjeti sadašnje promjene nebeskih tijela, one se mogu vidjeti tek nakon 150.000 svjetlosnih godina, to je jako dug vremenski period.

Trenutno je cjelokupni kosmos doživio jako veliku promjenu; svaki put kada se desila ova promjena, sva živa bića u cjelokupnom kosmosu su bila uništena; ona su bila potpuno u stanju uništenja. Svaki put kada je nastupila ova situacija, osobine koje su prije postojale u kosmosu i materija u njemu bile su potpuno razorene, obično su svi umrli prilikom eksplozije, ali svaki put nije sve bez ostatka bilo razoreno. Kada je novi kosmos bio iznova izgrađen od strane izuzetno visokih prosvijetljenih, ipak je u njemu bilo nekih koji nisu bili ubijeni eksplozijom. Ali veliki prosvijetljeni su izgradili kosmos prema svojim sopstvenim osobinama i svojim sopstvenim mjerilima, zbog toga su se osobine razlikovale od osobina kosmosa proteklog perioda.

Oni koji nisu bili ubijeni eksplozijom onda u ovom kosmosu djeluju prema prethodnim osobinama i principima. Novoizgrađeni kosmos se ravna prema novim kosmičkim osobinama i principima. Zbog toga će oni, koji nisu ubijeni eksplozijom, postati demoni koji ometaju kosmičke principe. Ipak, oni i nisu tako loši, oni jednostavno djeluju prema osobinama kosmosa prethodnog ciklusa, to su takozvani nebeski demoni. Ali oni ne predstavljaju prijatnu svakodnevnim ljudima i uopšte ne škode ljudima, oni samo djeluju prema svojim principima. Prije svakodnevnih ljudi ovo nisu smjeli znati. Kažem da postoje jednostavno brojni Bude, čiji su nivoi puno viši od nivoa Tathagate, šta su onda ti demoni? Oni su u

poređenju s njima jako mali. Starenje, bolest i smrt su isto vrsta demona, ali su oni također nastali da bi održavali osobine kosmosa.

U budizmu se govori o šestostrukom putu reinkarnacije, tu se spominje pitanje puta *asure*, zapravo su to živa bića iz različitih dimenzija, ali ona ne posjeduju ljudsku prirodu. Sa stanovišta velikih prosvijetljenih, ona su veoma niska i izuzetno nesposobna, ali u očima svakodnevnih ljudi su ipak jako strašna, ona posjeduju izvjesnu energiju, ona smatraju obične ljude životinjama, zbog toga rado žderu ljude. Ovih godina i ona izlaze vani da bi širila svoj put. Kakve su to kreature? Mogu li izgledati kao ljudi? Veoma strašno. Ako je neko naučio njihove stvari, mora otići k njima i postati jedan od njih. Neki kod vježbanja *qigonga* nemaju ispravne misli i kada tvoje misli odgovaraju njihovim mislima, onda oni dolaze i podučavaju te. Ali jedno ispravno pobjeđuje sto zala. Ako ne težiš tome, niko se ne usuđuje dotaći te. Ako imaš heretične misli i težiš lošim stvarima, onda oni dolaze da ti pomognu, onda pri kultivaciji dospijevaš na demonski put, ovaj problem se može pojaviti.

Postoji još jedan slučaj koji se naziva "nesvjesno vježbati heretični Fa". Šta znači "nesvjesno vježbati heretični Fa"? To znači da čovjek vježba heretični Fa, a da to ni ne zna. Ovo je česta pojava, jednostavno previše česta. Kao što sam ovih dana već rekao, mnogi prilikom vježbanja nemaju ispravne misli, ti vidiš da on vježba stojeći stav i da njegove ruke i noge drhte od umora. Ali njegova glava ne ostaje nezaposlena, on misli: "Cijene će porasti, moram ići u kupovinu, odmah nakon vježbi idem u kupovinu, poslije toga će sve poskupiti." Neki misle: "Na mom radnom mjestu se upravo dijele stanovi, da li ja mogu dobiti stan? Odgovorni za to mi nije baš naklonjen." Što više on misli na to, sve se više ljuti: "On mi sigurno neće dodijeliti stan, moram se boriti s njim, tako i onda ovako". On ima svakakvih misli. Kao što sam rekao, on brblja o svemu, od stvari u njegovoj kući, pa sve do velikih državnih problema i kod stvari koje ga ljute, biće sve ljucii, što više govori o tome.

Kod prakticiranja se mora cijeniti *de*. Kod našeg prakticiranja, čak i kad ne misliš na dobro, ne trebaš misliti ni na loše, najbolje je ne misliti ni na šta. Jer, kod prakticiranja na niskim nivoima moraju biti postavljene neke osnove i ove osnove ipak igraju veoma odlučujuću ulogu, jer čovjekove misaone aktivnosti imaju izvjesno dejstvo. Razmisli o tome, ako nešto umiješaš u svoj *gong*, da li to što si dobio kroz vježbanje može biti dobro? Nije li to nešto crno? Koliko ima ljudi koji ne vježbaju *qigong* sa takvim mislima? Zašto tvoje bolesti ne mogu biti odstranjene uprkos tvom dugom vježbanju. Na mjestu za vježbanje neki doduše ne misle na te loše stvari, ali oni kod vježbanja uvijek imaju namjeru da teže natprirodnim sposobnostima, da teže ovome i onome, oni imaju sva moguća shvatanja i različite jake žudnje. Zapravo već nesvjesno vježbaju heretični Fa. Ako mu kažeš da vježba heretični Fa, odmah će se razljutiti: "Mene je to naučio taj veliki *qigong* majstor." Ali taj veliki *qigong* majstor je od tebe zahtijevao da cijeniš *de*, jesi li ga cijenio? Kod vježbanja si uvijek ubacivao loše misli; šta misliš, možeš li onda vježbanjem dobiti nešto dobro? To je naime taj problem. To spada u nesvjesno vježbanje heretičnog Fa i veoma je česta pojava.

Dvostruka kultivacija muškarca i žene

U kultivacijskim krugovima postoji metoda kultivacije koja se zove "dvostruka kultivacija muškarca i žene". Možda ste kod metoda kultivacije tibetanskog tantrizma vidjeli izrezbarene Buda statue ili slike kod kojih muškarac za vrijeme kultivacije drži ženu u naručju. Muškarac se nekad prikazuje kao Buda koji u naručju drži savim голу ženu. On može imati i transformisan izgled Bude, Vajra figuru sa glavom bika i licem konja, koji također u

naručju drži ženu koja je sasvim gola. Zašto je to tako? Prvo ćemo vam objasniti jedno pitanje. Na našoj Zemlji nije samo Kina pod uticajem konfucijanizma, već su u cjelokupnom čovječanstvu, u starim vremenima prije nekoliko vijekova, moralni pogledi čovječanstva bili jako slični. Zbog toga ova kultivacijska metoda u stvari ne vodi porijeklo sa ove Zemlje, ona je došla sa drugih planeta, ali se s ovom metodom stvarno može kultivirati. Kad je ova kultivacijska metoda u to vrijeme bila uvezena u Kinu, nije mogla biti prihvaćena od strane Kineza, upravo zato što je sadržavala dvostruku kultivaciju muškarca i žene i neke stvari tajne kultivacije. Zbog toga je pod vladavinom Huichanga u Tang dinastiji bila ukinuta od cara Han oblasti. Nije bilo dozvoljeno širiti je u Han oblasti, tada se zvala Tang tantrizam. Ali proširila se u Tibetu, u tamošnjem posebnom okruženju, u toj posebnoj oblasti. Zašto se kultivira na ovaj način? Svrha dvostruke kultivacije muškarca i žene je sakupljati *yin* da bi se nadopunio *yang*, ili sakupljati *yang* da bi se nadopunio *yin*, oni se međusobno nadopunjavaju i kultiviraju da bi se *yin* i *yang* uravnotežili.

Kao što znate, i u Buda školi, kao i u Tao školi, a prije svega kod taoističkog učenja *yin-yanga*, govori se o tome da ljudsko tijelo samo po sebi posjeduje *yin* i *yang*. Zato što ljudsko tijelo posjeduje *yin* i *yang*, u njemu mogu biti iskultivirane različite natprirodne sposobnosti, besmrtno dijete, kultivirano djetetašce, *fašen* i druga živa bića. Zbog postojanja *yina* i *yanga*, jako puno živih bića može biti iskultivirano. To važi kako za muško, tako i za žensko tijelo. Ove stvari sve mogu nastati na polju eliksira, ova izjava ima puno smisla. U Tao školi se obično gornji dio tijela smatra *yangom*, a donji dio tijela *yinom*; neki smatraju leđa *yangom*, a prednju stranu tijela *yinom*; drugi opet smatraju lijevu stranu ljudskog tijela *yangom*, a desnu stranu *yinom*. Kod nas u Kini postoji jedna izreka: Lijevo muško, desno žensko. Ona isto tako potiče odatle i ima puno smisla. Jer ljudsko tijelo samo po sebi ima *yin* i *yang*, tijelo pod uzajamnim dejstvom *yina* i *yanga* već samo može postići izjednačavanje između *yina* i *yanga* i time može biti proizvedeno jako puno živih bića.

Time je objašnjeno jedno: Mi se i bez primjene metode dvostruke kultivacije muškarca i žene možemo kultivirati na veoma visoke nivoe. Kad neko primjenjuje metodu dvostruke kultivacije muškarca i žene i ne može dobro vladati sobom, dospjeće na demonski put, onda to postaje heretično. Kad neko u tantrizmu na veoma visokim nivoima želi primijeniti dvostruku kultivaciju muškarca i žene, ovaj monah, ovaj lama se već mora nalaziti na veoma visokim nivoima kultivacije. Tek onda će ga njegov učitelj uputiti da se kultivira na ovaj način. Jer je njegov *xinxing* veoma visok, on se može dobro kontrolisati i neće dospjeti u heretičnost. Ali neko sa veoma niskim *xinxingom* apsolutno ne smije primijeniti ovu metodu. Kada je primjeni, dospjeće u heretičnost i to sa sigurnošću. Zato što je njegov *xinxing* ograničen, njegove žudnje i njegove erotske strasti na nivou svakodnevnih ljudi nisu odstranjene i mjerilo njegovog *xinxinga* je samo toliko visoko, on će garantovano dospjeti u heretičnost čim primjeni ovu metodu. Zato kažemo, ako neko to proizvoljno širi na niskim nivoima, to predstavlja širenje heretičnog Fa.

Ovih godina postoji ne mali broj *qigong* učitelja koji šire dvostruku kultivaciju muškarca i žene. Ali nešto je pritom čudno: I u praksama Tao škole se pojavila dvostruka kultivacija muškarca i žene. Osim toga, ona se nije pojavila sad, nego još u vrijeme Tang dinastije. Kako se dvostruka kultivacija muškarca i žene mogla pojaviti u Tao školi? Prema *Taiji* teoriji Tao škole, ljudsko tijelo je mali kosmos koji i sam ima *yin* i *yang*. Istinski ortodoksni veliki Fa su se svi prenosili jako dugo vremena, po volji ih mijenjati ili po volji nešto umiješati, poremetiće stvari te škole kultivacije, tako da cilj kultivacije - doći do

Ispunjenja - ne može biti postignut. Ako taj put kultivacije ne sadrži ništa od dvostruke kultivacije muškarca i žene, ni u kom slučaju se ne treba primjenjivati, u suprotnom će čovjek dospjeti na pogrešan put i imaće probleme. Prije svega u ovoj našoj Falun Dafa školi kultivacije ne postoji dvostruka kultivacija muškarca i žene i mi ne govorimo o tome. To je naše mišljenje o ovom pitanju.

Dvostruka kultivacija tijela i duha

Pitanje dvostruke kultivacije tijela i duha sam vam već iscrpno objasnio. Dvostruka kultivacija tijela i duha znači da se pored kultivacije *xinxinga*, istovremeno kultivira i tijelo, to znači promijeniti *benti*. Kada se čovjekove ćelije u procesu promjene postepeno zamjenjuju visokoenergetskom supstancom, starenje će se usporiti. Tijelo izgleda kao da je opet mlado, ono se postepeno podmlađuje i transformiše. Kad je tijelo ovog čovjeka na kraju potpuno zamijenjeno visokoenergetskim supstancama, onda je ono već u cjelosti transformisano u jedno drugo materijalno tijelo. Kao što sam već objasnio, to tijelo je već izašlo iz pet elemenata, ono se više ne nalazi u pet elemenata i na taj način je njegovo tijelo postalo tijelo koje nikad ne stari.

U hramovima se kultivira samo *xinxing* i zbog toga se ne govori o ručnim tehnikama i kultivaciji tijela, oni govore o nirvani. Kod metoda koje je predavao Shakyamuni upravo se govori o nirvani; zapravo je i sam Shakyamuni imao visoki i dubokoumni veliki Fa, s kojim je svoj *benti* mogao potpuno transformisati u visokoenergetske supstance i ponijeti ga sa sobom. Da bi ostavio ovaj put kultivacije, on je i sam otišao u nirvanu. Zašto je on podučavao na ovaj način? On je upravo želio da se ljudi što je moguće više odreknu vezanosti, svega, i na kraju čak i tijela, da nema više nikakvih vezanosti. Da bi ljudi to mogli postići što je moguće više, on je otišao putem nirvane, zbog toga su monasi svih vremena također išli putem nirvane. Nirvana znači: monah umire, odbacuje svoje tijelo od krvi i mesa i njegova duša se sa *gongom* izdiže naviše.

Tao škola naglašava kultivaciju tijela, jer ona bira učenike i ne govori o sveukupnom spasenju svih bića, pred njom stoje jako dobri ljudi. Zbog toga ona podučava tehnike i objašnjava kako se treba kultivirati tijelo. Ali kod ovih specijalnih metoda kultivacije Buda škole, pogotovo kod metoda kultivacije u budizmu, ne može se govoriti o tako nečemu. Ali to ipak ne važi za sve, kod mnogih visokih i dubokoumnih praksi Buda škole također se govori o tome, kod ove naše škole kultivacije isto govorimo o tome. Kod našeg Falun Dafa su potrebni kako *benti*, tako i besmrtno dijete, ali su ipak oba različita. Besmrtno dijete je isto vrsta tijela koje se sastoji od visokoenergetskih supstanci, ali se ono ne može tek tako pojaviti u ovoj našoj dimenziji. Ako se oblik običnog čovjeka želi dugo vremena zadržati u ovoj dimenziji, mora se imati *benti*. Nakon što je ovaj *benti* transformisan, redosljed poretka njegovih molekula ostaje nepromijenjen, iako su njegove ćelije već zamijenjene visokoenergetskim supstancama, zbog toga on izgleda skoro kao tijelo običnog čovjeka. Ali ipak postoje razlike, naime ovo tijelo može stupiti u druge dimenzije.

Kod dvostruke kultivacije tijela i duha, čovjek izgleda jako mlad, on izgleda puno mlađi nego što je stvarno. Ovih dana me neko pitao: "Učitelju, možeš li pogoditi koliko mi je godina?" Zapravo je ona imala skoro 70, ali je izgledala samo kao da joj je nešto više od 40. Bez bora, lice je bilo glatko, bijelo i roza-crveno, ko može vjerovati da joj je skoro 70. Kod naših Falun Dafa praktikanata može se pojaviti tako nešto. Recimo u šali: Djevojke rado koriste šminku i žele da im koža bude svjetlija i ljepša. Ja kažem, prakticiraj istinski put

dvostruke kultivacije tijela i duha i to će već biti postignuto na prirodan način, garantovano ne trebaš ići kod kozmetičara. Za ovo nećemo davati daljnje primjere. Prije je u svim strukama bilo relativno mnogo starijih ljudi i tako su me drugi smatrali mladićem. Sada je postalo nešto bolje, u svim strukama sada ima relativno mnogo mladih ljudi. U stvari ni ja više nisam mlad, približavam se 50-toj, sad već imam 43 godine.

Fašen

Zašto na statuama Bude postoji polje? Mnogi to ne mogu objasniti, neki kažu: "Na statuama Bude postoji polje, jer su monasi recitali sutre ispred statua Bude i tako je ono nastalo." To znači da je polje nastalo kultivacijom monaha pred njima. Sasvim svejedno da li se jedan monah ili bilo ko drugi kultivira, ova vrsta energije je međutim raspršiva i nema određenog pravca, onda bi također trebalo postojati podjednako polje na podu, na tavanu i na zidovima u cijeloj prostoriji. Zašto je polje upravo na statui Bude tako jako? Pogotovo na statuama Bude koje su isklesane u dalekim brdima, u nekoj pećini, ili u stijeni obično postoji takvo polje. Zašto nastaje takvo polje? Bilo je ovakvih i onakvih objašnjenja koja međutim nikad nisu bila sasvim ubjedljiva. Zapravo, na statuama Bude postoji to polje, jer se na statuama Bude nalazi *fašen* jednog prosvijetljenog. *Fašen* tog prosvijetljenog je tu, zbog toga statue Bude imaju energiju.

Sasvim svejedno da li se radi o Shakyamuniju ili Bodisatvi Avalokitesvari, ako su oni stvarno postojali u historiji, razmisli da li su i oni bili praktikanti kada su se kultivirali? Nakon što se čovjek kultivirao do jednog prilično visokog nivoa iznad Fa-unutar-trostrukog-svijeta, nastaje *fašeni*. *Fašeni* nastaju iz čovjekovog polja eliksira i sastoje se iz Fa i *gonga*, njihova tijela se pokazuju u drugim dimenzijama. *Fašeni* posjeduju ogromne snage te osobe, ali su svijest i misli *fašena* pod kontrolom glavnog tijela. Ipak, sam *fašen* je potpuno, nezavisno, stvarno i individualno biće, zbog toga on može sve sam obaviti. Ono što *fašen* radi je isto to što glavna svijest čovjeka želi uraditi; to je jedno te isto. Čovjek sam radi jednu stvar ovako; kada je *fašen* radi, on će je isto tako uraditi, to je *fašen* o kojem mi govorimo. Kad ja želim nešto uraditi, na primjer dovesti u red tijela učenika koji se stvarno kultiviraju, to će sve obaviti moj *fašen*. Jer *fašen* nema tijelo običnog čovjeka i njegovo utjelovljenje je u drugim dimenzijama. Također, to živo biće ne ostaje nepromijenjeno, on se može povećati i smanjiti. Nekad postaje jako velik, tako da se čitava glava *fašena* ne može vidjeti; nekad postaje tako malen, čak manji od jedne ćelije.

Otvaranje svjetla

Statua Bude koja je proizvedena u fabrici predstavlja samo jedno umjetničko djelo. Otvaranje svjetla znači da se *fašen* jednog Bude zamoli da dođe na statuu Bude, onda će se statui Bude, kao opipljivom tijelu među svakodnevnim ljudima, prinositi pokloni i njoj će se moliti. Kada praktikant ima takvo srce strahopoštovanja, *fašen* na statui Bude će mu služiti kao stražar pri njegovoj kultivaciji, paziće na njega i štitiće ga, to je istinski cilj otvaranja svjetla. To može biti ostvareno samo ako su kod zvanične ceremonije otvaranja svjetla emitovane ispravne misli, ili to može biti urađeno od velikih prosvijetljenih na veoma visokim nivoima ili od čovjeka koji se kultivira na veoma visokim nivoima i koji posjeduje tu snagu.

U hramu se kaže da se za statue Bude mora izvesti otvaranje svjetla i ako kod statue Bude nije urađeno otvaranje svjetla, kaže se da ona nema dejstva. O današnjim monasima u

hramovima: Istinski veliki učitelji svi već nisu više na svijetu. Nakon kulturne revolucije su neki mali monasi, koji nisu dobili pravo predanje, postali starješine hrama i mnoge stvari su se izgubile kod prenošenja. Kad ga neko upita šta je cilj otvaranja svjetla, on kaže: "Nakon otvaranja svjetla statue Bude imaju dejstvo." Kako to tačno djeluje, on to ipak ne može objasniti. Zbog toga on zapravo samo obavlja ceremoniju, pri čemu ubacuje malu sutru u statuu Bude i lijepi je papirom, onda recitira sutre pred njom, zatim kaže da je to već bilo otvaranje svjetla. Ali da li svjetlo može stvarno biti otvoreno? To zavisi od toga kako on recitira sutre. Shakyamuni je govorio o ispravnim mislima, čovjek mora s apsolutno nepodijeljenom pažnjom recitirati sutre, da bi se svijet škole kultivacije koju on kultivira stvarno potresao, tek onda se može prizvati jedan prosvijetljeni. Jedan *fašen* ovog prosvijetljenog dolazi na statuu, tek onda može biti ostvaren cilj otvaranja svjetla.

Neki monasi recitiraju sutre, ali pri tom misle u srcu: "Koliko novca mogu dobiti nakon otvaranja svjetla?" Ili on misli za vrijeme recitiranja: "Taj čovjek je tako loš prema meni." I kod njega ima intriga i borbi. Sada je Vrijeme kraja Fa i ne može se ne priznati tako nešto. Mi ovdje ne želimo kritizirati budizam, u Vremenu kraja Fa u nekim hramovima stvarno nije čisto. Ako on misli na takve stvari i šalje tako lošu misao, zar bi onda taj prosvijetljeni mogao doći? Cilj otvaranja svjetla tako uopšte ne može biti ispunjen. Ali to nije apsolutno tako, postoje i pojedini dobri budistički hramovi i taoistički manastiri.

U jednom gradu sam vidio jednog monaha čije su ruke bile crne kao katran. On je ubacio sutru u statuu Bude i sasvim grubo je zaljepio, onda je nešto promrmljao i to je već trebalo važiti za otvaranje svjetla. Zatim je uzeo drugu statuu Bude i opet nešto promrmljao. Za otvaranje svjetla je naplaćivao po 40 yuana. Sada to monasi posmatraju kao robu i obogaćuju se otvaranjem svjetla za statue Bude. Ja sam vidio da svjetlo uopšte nije bilo otvoreno, svjetlo uopšte nije moglo biti otvoreno. Sada monasi sebi dozvoljavaju čak i tako nešto. Šta sam još vidio? U jednom hramu je bio čovjek, koji je po svemu sudeći bio budist laik; on je rekao da će otvoriti svjetlo za statuu Bude. Držao je ogledalo prema suncu i zaslijepio statuu Bude sunčevim svjetlom, onda je rekao da je svjetlo otvoreno. Do tako smiješnog stanja je već došlo! Danas se budizam razvio do ovog stepena, to je čak jako česta pojava.

U Nanjingu je proizvedena velika bronzana statua Bude, koja je bila postavljena na ostrvu Lantau u Hong Kongu, jako velika statua Bude. Puno monaha je došlo iz čitavog svijeta da bi otvorili svjetlo za ovu statuu Bude. Jedan od njih je držao ogledalo nasuprot suncu i zaslijepio je lice Budine statue sunčevim svjetlom, onda je rekao da je svjetlo otvoreno. Na tako uzvišenoj svečanosti i u tako ozbiljnoj situaciji je tako nešto urađeno, ja to smatram stvarno jako tužnim! Nije ni čudo da je Shakyamuni rekao: "U Vremenu kraja Fa je monasima jako teško spasiti same sebe, a da ne govorimo o spašavanju drugih." Osim toga, mnogi monasi su interpretirali sutre sa sopstvenog gledišta, tako nešto kao što su taoistički sveti spisi *Božica Kraljica Majka* već su našli svoj put do hramova. Stvari koje ne pripadaju budističkim klasičnim djelima također nalaze put do hramova, čime se svuda izaziva kaos, sada je sve sasvim zbrkano. Naravno, još ima monaha koji se istinski kultiviraju i oni su jako dobri. U stvari, otvaranje svjetla znači da je *fašen* jednog prosvijetljenog pozvan na statuu Bude i tamo ostaje, onda je svjetlo otvoreno.

Kada svjetlo za statuu Bude nije otvoreno, njoj se nikako ne smije moliti, inače će biti jako ozbiljnih posljedica. Kakvih ozbiljnih posljedica? Danas su ljudi, koji se bave naukom ljudskog tijela, otkrili da misli čovjeka, razmišljanje čovjekovog mozga, mogu proizvesti vrstu supstance. Na jako visokim nivoima vidimo da je to stvarno vrsta supstance, ali ova

supstanca se ne pokazuje u obliku električnih moždanih valova, kao što smo sada otkrili prilikom istraživanja, nego u obliku jednog cjelokupnog mozga. Supstanca u obliku mozga, koju običan čovjek u svakodnevnom životu kod razmišljanja emituje, rastvara se kratko nakon emitovanja jer nema energiju, ali će se energija praktikanta održati puno duže. Nije tako da statua Bude već ima misli nakon što je proizvedena u fabrici. Ne, ona ih nema. Za neke od njih nije izvedeno otvaranje svjetla, a ni u hramu nije postignut cilj otvaranja svjetla. Kada lažni *qigong* učitelj ili neko iz heretičnih škola obavlja otvaranje svjetla za nju, onda je to još opasnije, onda će se lisice ili žute lasice prikačiti na nju.

Jako je opasno moliti se statui Bude za koju svjetlo nije otvoreno. Koliko je to opasno? Ja sam rekao da se čovječanstvo razvilo do današnjeg stanja u kojem sve propada, čitavo društvo i sve u cjelokupnom kosmosu propada, jedno za drugim. Sve među svakodnevnim ljudima je čovjek sam prouzrokovao. Čak je jako teško naći ispravan Fa i ići ispravnim putem, čak i ako čovjek to želi, sa svih strana ima smetnji. Čovjek se želi moliti Budi za pomoć, ali ko je Buda? Čak je teško kada se čovjek želi moliti. Ako ne vjerujete u to reći ću vam ovu činjenicu: čim se neko kao prvi moli statui Bude za koju svjetlo nije otvoreno, to će biti jako loše. Koliko ljudi ima u današnje vrijeme, koji se mole Budi i u srcu misle na to da dobiju istinsko dostignuće? Ima premalo takvih ljudi. Šta je cilj većine onih koji se mole Budi? Odstraniti nevolju, riješiti teškoće i obogatiti se, oni teže tako nečem. Ima li takvih stvari u klasičnim djelima budizma? Tamo definitivno nema takvih stvari.

Kada neko prilikom molitve priželjkuje novac i moli se statui Bodisatve Avalokitesvare ili statui Tathagata-Bude i kaže: "Molim te, pomoz mi da se obogatim." Onda dobro, time je nastala jedna potpuna misao. On ju je poslao prema statui Bude, zato misao odmah ide ka statui Bude. U drugim dimenzijama, objekt se može uvećati i smanjiti; kada misao stigne do ovog objekta, ova statua Bude dobija mozak i misli, ali ona nema tijelo. I drugi joj se mole, s vremenom joj se sve više daje izvjesna energija. Pogotovo kada joj se praktikanti mole, biće još opasnije, oni joj pri molitvi postepeno daju energiju, onda kod statue nastaje tijelo s oblikom, ipak ovo tijelo s oblikom nastaje u drugim dimenzijama. Nakon nastajanja se ono nalazi u drugim dimenzijama i može saznati neke principe u kosmosu, zato može uraditi nešto za ljude, tako da i ono također može razviti malo *gonga*, ali ono pomaže ljudima pod uslovima i u zamjenu za novčanu nadoknadu. U drugim dimenzijama se ono može sasvim slobodno kretati i lako upravljati svakodnevnim ljudima. Ovo tijelo s oblikom izgleda isto kao i statua Bude, tako je molitvom nastala lažna Bodisatva Avalokitesvara ili lažni Tathagata-Buda, oni izgledaju isto kao i statue Bude i imaju oblik Bude. Misli lažnih Buda i lažnih Bodisatvi su ipak krajnje loše, oni teže za novcem. Oni su nastali u drugim dimenzijama i dobili su misli. Zato što poznaju malo istine, ne usuđuju se raditi velike loše stvari, ali se usuđuju raditi male loše stvari. Oni ponekad i pomažu ljudima. Ako ne pomažu ljudima, onda su u potpunosti heretični i biće ubijeni. Kako pomažu? Neki čovjek kaže: "Molim te, molim te, Buda, pomoz mi, taj i taj u mojoj kući je bolestan." Pa dobro, tebi će biti pomognuto. Oni će te navesti na to da ubaciš novac u kutiju za priloge, oni priželjkuju novac. Ako ubaciš puno novca u kutiju za priloge, onda će oni učiniti da bolesti budu brzo izliječene. Jer oni imaju izvjesnu energiju i mogu u drugim dimenzijama upravljati običnim čovjekom. Pogotovo kada im se moli čovjek sa *gongom*, biće još opasnije. Šta želi jedan praktikant? Novac. Razmisli, zašto jedan praktikant želi novac? I molba za odstranjivanje nesreće i za liječenje bolesti članova porodice je također vezanost za osjećaje prema članovima porodice. Ti želiš uticati na sudbinu drugih, ali svako ima svoju sopstvenu sudbinu! Ako im se moliš i mrmljaš: "Molim te, pomoz mi da se obogatim." Pa dobro, oni će ti pomoći, njima je još puno draže kada želiš više novca i imaš više želja, da bi mogli uzeti više od tebe, to je jednako vrijedna razmjena.

Oni imaju dovoljno novca u kutiji za priloge koji su drugi ubacili, omogućiće ti da ga dobiješ. Kako ga dobijaš? Kad izađeš vani, naći ćeš novčanik ili ćeš na svom radnom mjestu dobiti malu premiju, u svakom slučaju izmišljaju sve moguće metode da bi ti dobio novac. Ali kako je moguće da ti bezuslovno pomažu? Bez gubitka nema dobitka. Moraćeš dati nešto svog *gonga*, njima fali *gong*, ili ti oduzimaju eliksir ili druge stvari koje si ispracticirao. Oni žele imati takve stvari.

Ovakvi lažni Bude su ponekad veoma opasni. Mnogi od nas, čije je nebesko oko otvoreno, vjeruju da su vidjeli Bude. Neko kaže da je grupa Buda danas došla u hram i da se Buda zove tako i tako i da je doveo grupu Buda u hram. On također kaže kako je izgledala grupa koja je došla juče i kako je izgledala grupa koja je došla danas. Oni su nakon kratkog vremena otišli, a zatim je pristigla još jedna grupa. Šta su oni u stvari? Oni spadaju upravo u tu vrstu. Oni nisu istinski Bude, nego lažni. Njih ima prilično puno.

Kada se tako nešto pojavi u hramu, onda je to još opasnije. Ako im se monasi mole, onda oni vode brigu o monasima: "Zar se ne moliš meni? Ti se sasvim jasno moliš meni! Pa dobro, zar se ne želiš kultivirati? Ja ću se pobrinuti za tebe, ja ću ti reći kako se trebaš kultivirati." Oni će to aranžirati za tebe. Kuda želiš ići kad završiš s kultivacijom? Zato što su oni aranžirali tvoju kultivaciju, gore te neće primiti nijedna škola. Oni su to aranžirali, zato ćeš u budućnosti biti njima podređen. Zar se onda nisi uzaludno kultivirao? Ja kažem, sada je čovječanstvu jako teško kada čovjek kroz kultivaciju želi dobiti istinsko dostignuće. Takve pojave su jako česte. Svjetlo Bude, koje su mnogi od nas vidjeli u čuvenim brdima ili na velikim rijekama, najčešće pripada ovoj vrsti. Oni imaju energiju i mogu se učiniti vidljivim. Istinski veliki prosvijetljeni ne pokazuju se tek tako.

Prije su oni bili nazivani zemaljske Bude ili zemaljski Tao i bilo ih je relativno malo, ali danas ih ima jako puno. Kada oni rade nešto loše, oni sa viših dimenzija ih žele ubiti, ali onda oni bježe ka statui Bude. Veliki prosvijetljeni obično ne remete principe svakodnevnih ljudi. Što je viši nivo jednog prosvijetljenog, to manje on narušava principe svakodnevnih ljudi, on ih neće ni malo dotaknuti. On ipak ne može iznenada udarcem groma razbiti statuu Bude, on to neće uraditi, zato se prosvijetljeni više ne brine za to kada oni pobjegnu ka statui Bude. Oni znaju kada im je život u opasnosti i onda bježe. Da li je onda Bodisatva Avalokitesvara koju si vidio stvarno Bodisatva Avalokitesvara? Da li je Buda kojeg si vidio stvarno Buda? Jako je teško reći.

Kod mnogih od nas će se sada pojaviti pitanje: "Šta da radimo sa statuom Bude kod kuće?" Možda su mnogi mislili na mene. Da bi pomogao učenicima pri kultivaciji, kažem ti da možeš uraditi sljedeće: Uzmi moju knjigu (jer su u knjigama moje fotografije) ili moju fotografiju, drži statuu Bude u ruci i napravi ručnu gestu velikog lotosa. Onda zamoli Učitelja, kao da se obraćaš meni lično za pomoć, da otvori svjetlo za statuu. Za pola minute će problem biti riješen. Ipak, kažem vam, to je ograničeno samo na naše kultivatore. Neće djelovati ako obavljate otvaranje svjetla za rođake ili prijatelje, jer mi se brinemo samo o kultivatorima. Neko kaže da ostavlja sliku Učitelja kod rođaka ili prijatelja da bi otjerao zle duhove. Ja nisam zbog toga ovdje da bi štitio obične ljude od zlih duhova. To je najveće nepoštovanje prema Učitelju.

Ovdje se govori o zemaljskim Budama i zemaljskim Tao. Postoji još jedan slučaj: U starim vremenima Kine bilo je mnogo ljudi koji su se kultivirali duboko u brdima i prašumama. Zašto ih danas više nema? Zapravo ih još ima, samo ne dopuštaju svakodnevnim ljudima da saznaju za njih, uopšte im se nije smanjio broj, svi ovi ljudi imaju natprirodne

sposobnosti. Nije tačno da su ovi ljudi nestali ovih godina, nego su svi oni još tu. Trenutno ih u svijetu ima još nekoliko hiljada i u poređenju ih u našoj zemlji ima još više. Pogotovo ih ima u svim čuvenim planinama i na velikim rijekama, a također i u nekim visokim brdima. Oni su svoju pećinu zatvorili svojim natprirodnim sposobnostima, zbog toga ne možeš vidjeti da postoje. Oni se kultiviraju prilično sporo i njihove metode su prilično nespretne, oni ne mogu shvatiti suštinu kultivacije. S druge strane, mi smo direktno usmjereni na ljudsko srce i kultiviramo se prema najvišim kosmičkim osobinama, prema formi kosmosa, naravno da *gong* tada raste veoma brzo. Jer, škole kultivacije su u obliku piramide i samo put u sredini je veliki put. Pri kultivaciji na straničnim putevima, *xinxing* nije nužno visok. Možda je *gong* takvog čovjeka već otvoren, iako se nije visoko kultivirao. Ali on je još jako daleko od velikog puta istinske kultivacije.

I oni predaju svoj put i vode učenike, kod njihove škole se samo toliko visoko može kultivirati i njihov *xinxing* je također samo toliko visok, zbog toga se i njegovi učenici također kultiviraju samo toliko visoko. Što se više mali svjetski putevi nalaze po strani, to je više pravila i to su komplikovanije metode kultivacije. Oni kod kultivacije ne mogu razumjeti suštinu. Kod kultivacije se uglavnom kultivira *xinxing*, ali oni to još ne shvataju, oni vjeruju da se mogu kultivirati kroz podnošenje patnji. Zbog toga su nakon jako dugo vremena, nakon što su se kultivirali stotine godina, preko hiljadu godina, razvili samo malo *gonga*. U stvari ga nisu razvili kroz patnju, čime su ga onda razvili? Kao kod čovjeka koji u mladosti ima puno vezanosti, kada ostari, sa prolaskom vremena njegova budućnost postaje beznačajna, onda te vezanosti bivaju same od sebe postepeno ostavljene ili istrošene. Tako ovi mali putevi kultivacije također primjenjuju ovu metodu. Kada se kroz lotosov sjedeći položaj, sposobnost meditacije i podnošenje patnje kultiviraju prema gore, primjećuju da njihov *gong* također može rasti. Oni ipak ne znaju da su njihove vezanosti običnog čovjeka u dugom i teškom vremenu polako istrošene i da se *gong* razvio polaganim odstranjivanjem tih vezanosti.

Mi imamo cilj, mi stvarno ciljamo na srce i odstranjujemo te vezanosti i tako se jako brzo kultiviramo. Ja sam bio u nekim mjestima i često sam sretao takve ljude, oni su se kultivirali mnogo godina. Oni također kažu: "Niko ne može saznati da smo ovdje i nećemo se miješati u tvoju stvar i nećemo ti smetati." Oni spadaju u relativno dobre.

Ima također i loših, s njima se također trebamo pozabaviti. Ispričaću vam jedan primjer. Kada sam prvi put širio put kultivacije u Guizhou i držao predavanje, neko je došao k meni i rekao da me njegov veliki učitelj želi vidjeti. Njegov veliki učitelj je gospodin taj i taj i kultivirao se jako puno godina. Vidio sam da je negativna energija, koju je ovaj čovjek nosio na sebi, bila jako loša i on je imao lice žuto kao vosak. Rekao sam da se neću sresti s njim i da nemam vremena. Tako sam to odbio. To je razljutilo njegovog velikog učitelja i počeo me je ometati i to svaki dan. Ja se ne želim boriti s drugima, nije vrijedno truda boriti se s njim. Kada je donosio nešto loše, počistio bi to i nakon toga sam dalje širio svoj Fa.

Prije, u Ming-dinastiji, bio je jedan Tao kultivator koji je već za vrijeme kultivacije imao posjedujućeg duha na sebi, jednu zmiju. Poslije se ovaj čovjek nije uspio kultivirati do kraja, umro je i zmija je zaposjela njegovo tijelo i tako iskultivirala ljudski oblik. Veliki učitelj tog čovjeka je bio upravo ovaj ljudski oblik, kojeg je ta zmija iskultivirala. Zato što nije promijenio svoju prvobitnu prirodu, opet se pretvorio u veliku zmiju i ometao me. Vidio sam da je otišao predaleko i onda sam ga uhvatio rukom i s jednom vrstom veoma jake natprirodne sposobnosti, koja se naziva "sposobnost topljenja", istopio sam njegov donji dio tijela u vodu, a njegov gornji dio tijela je pobjegao.

Jednog dana je jedan njegov učenik posjetio voditeljicu našeg asistentskog centra u Guizhou i rekao da se njegov veliki učitelj želi sresti s njom. Voditeljica je krenula s njim, u pećini je bilo jako mračno i ništa se nije vidjelo, ona je vidjela samo sjenu kako tamo sjedi, čije su oči isijavale zeleno svjetlo. Kada bi on otvorio svoje oči, u pećini je bilo svijetlo, a kada bi zatvorio svoje oči, bilo je sasvim mračno. Rekao je u lokalnom dijalektu: "Li Hongzhi će ponovo doći, ovaj put niko od nas više neće raditi te stvari. Nisam bio u pravu, Li Hongzhi je došao spasiti ljude." Učenik ga je upitao: "Veliki učitelju, ustani, šta je s tvojim nogama?" On je rekao: "Ne mogu više ustati, moje noge su povrijeđene." Kada je bio upitan kako je došlo do povrede, počeo je govoriti o svom ometanju. Međutim, na Orijentalnom sajmu zdravlja 1993. u Pekingu me opet ometao. Zato što je uvijek činio loše i sabotirao moje širenje Dafa, potpuno sam ga uništio. Nakon toga su svi njegovi stariji i mlađi učenici i učenice htjeli nešto preduzeti. Tu sam ja rekao par riječi i oni su bili šokirani i prepali su se, od samog straha se više niko nije usudio nešto uraditi i također im je postalo jasno o čemu se u stvari radilo. Neki od njih su još bili sasvim svakodnevnici ljudi, a dugo su se kultivirali. To je bilo nekoliko primjera koje sam ispričao o pitanju otvaranja svjetla.

Zhuyouke

Šta je *zhuyouke*? U kultivacijskim krugovima, mnogi ljudi to kod širenja puteva kultivacije također smatraju nečim što spada u kategoriju kultivacije i to predaju. U stvari, to ne spada u kategoriju kultivacije. To je kao vrsta tajnih savjeta, magičnih formula i tehnika koje se predaju. Forme koje se pri tome koriste su nešto kao slikanje magičnih znakova, paljenje obrednih svijeća, paljenje papira, ili recitiranje magičnih formula, itd. To može liječiti i metode liječenja su veoma specifične. Na primjer, kada neko ima čir na licu, on uzima kist, umače ga u cinober i crta na podu krug sa krstom u sredini, onda kaže ovom čovjeku da stane u sredinu kruga i počinje recitirati magične formule. Onda uzima kist, umače ga u cinober i crta krugove na licu ovog čovjeka. Dok crta, recituje magične formule. On crta i crta i na kraju jednom punktira čir, pri čemu su magične formule također izrecitovane do kraja, onda kaže da je već gotovo. Ako dodirneš čir, osjećaš da se stvarno smanjio i da više ne boli, djelovalo je. Može liječiti takve male bolesti, ali velike bolesti više ne može. Šta on radi kada nekog na primjer boli ruka? On počinje recitovati magične formule, kaže ti da ispružiš ruku, uduvava vazduh u *hegu* tačku ove ruke i pušta ga da izađe iz *hegu* tačke druge ruke, ti stvarno osjećaš dašak vjetra i kad opet dotakneš ruku, više ne boli toliko. Osim toga, postoje još i druge metode, kao što su paljenje papira, slikanje magičnih krugova, ljepljenje magičnih znakova i tako dalje. Oni rade takve stvari.

Kod malih svjetskih puteva Tao škole, ne govori se o kultivaciji tijela, tu se radi o gledanju u budućnost, bavljenju *fengshuijem*, istjerivanju zla i liječenju bolesti. Kod ovih malih svjetskih puteva se tako nešto često koristi. To može liječiti, ali metode koje oni primjenjuju nisu dobre. Mi ovdje više nećemo objašnjavati čime on liječi, ali mi Dafa kultivatori ne trebamo to koristiti, jer to na sebi ima vrlo niske i loše informacije. U starim vremenima Kine, metode liječenja su bile podijeljene na predmete, kao što su, na primjer, podešavanje prelomljenih kostiju, akupunktura, masaža, kiropraktika, akupresura, *qigong* terapija, terapija travama i tako dalje, bili su podijeljeni na mnogo kategorija. Svaka metoda liječenja je bila jedan predmet, ovaj *zhuyouke* je bio klasicifiran kao 13. predmet, zato je njegovo potpuno ime bilo: "*zhouyou* - trinaesti predmet". *Zhuyouke* ne spada u kategoriju naše kultivacije, to nije *gong* koji se dobija kultivacijom, već je jedna vrsta tehnike.

6. Lekcija

Kultivacijsko ludilo

U kultivacijskim krugovima postoji pojam "kultivacijsko ludilo" i on ima znatan uticaj na javnost. Prije svega, neki su to raširili u tolikoj mjeri da se neki ljudi boje prakticirati *qigong*. Kada ljudi čuju da prakticiranje *qigonga* može dovesti do kultivacijskog ludila, biće previše prestrašeni da bi pokušali prakticirati. U stvari, kažem vam da kultivacijsko ludilo uopšte ne postoji.

Dosta ljudi je privuklo na sebe posjedujuće duhove zato što njihove misli nisu bile ispravne. Njihova glavna svijest se ne može kontrolisati, ali oni ipak misle da je to *gong*. Njihova tijela kontrolišu posjedujući duhovi, koji ih dovode do duševnog poremećaja i oni viču i vrište. Kada ljudi vide da *qigong* može i tako izgledati, biće previše uplašeni da bi prakticirali. Mnogi među nama misle da je to *qigong*. Kako to može biti prakticiranje *qigonga*? To je tek najniži nivo liječenja bolesti i održavanja zdravlja, ali to je veoma opasno. Ako se privikneš na to i tvoja glavna svijest te ne može kontrolisati, tada će tvojim tijelom možda ovladati sporedna svijest, vanjske poruke, ili posjedujući duhovi, itd. Onda ćeš možda uraditi nešto opasno i time nanijeti veliku štetu krugovima kultivatora. To je uzrokovano neispravnim mislima i jakom vezanošću hvalisanja. To nije kultivacijsko ludilo. Ko zna kako su neki ljudi postali takozvani *qigong* majstori. Oni također govore o kultivacijskom ludilu. U stvari, prakticiranje *qigonga* ne vodi do kultivacijskog ludila. Većina ljudi je za taj pojam saznala iz književnih djela, kung-fu beletristike itd. Ako ne vjeruješ, možeš potražiti u starim knjigama ili u knjigama o kultivaciji, tako nešto ne postoji. Kako može postojati kultivacijsko ludilo? Nemoguće je da se tako nešto desi.

Ljudi obično vjeruju da postoji nekoliko oblika kultivacijskog ludila. Ono što sam upravo spomenuo je također jedan od oblika. Zbog svojih misli koje nisu ispravne, neki su na sebe privukli posjedujući duh i imaju razne načine razmišljanja, kao npr. težnju za takozvanim "*qigong* stanjem" da bi se hvalisali itd. Neki ljudi jednostavno direktno teže natprirodnim sposobnostima ili prakticiraju lažni *qigong*. Uvijek kad prakticiraju *qigong*, navikli su opuštati svoju glavnu svijest. Oni gube svjesnost i prepuštaju svoja tijela drugima, postaju duševno dezorijentisani i dopuštaju da njihovim tijelima upravlja sporedna svijest ili vanjske poruke, pa ispoljavaju neko čudno ponašanje. Ako mu neko kaže da se baci sa zgrade, on će se baciti, ako mu neko kaže da skoči naglavačke u vodu, on će skočiti u vodu. On sam čak više ne želi živjeti i predaje svoje tijelo drugima. To ne spada u kultivacijsko ludilo, već u nepravilno prakticiranje *qigonga*, a to je uzrokovano time što je on namjerno tako postupao u početku. Mnogi ljudi misle da je nesvjesno njihanje tijelom prakticiranje *qigonga*. Zapravo, ako čovjek stvarno prakticira *qigong* u takvom stanju, to može dovesti do ozbiljnih posljedica. To nije prakticiranje *qigonga*, već posljedica vezanosti i težnje svakodnevnih ljudi.

Drugi slučaj je da se praktikant uplaši za vrijeme prakticiranja *qigonga* kada je *qi* blokiran negdje u tijelu, ili kada *qi* dostigne vrh glave ali se ne može spustiti. Ljudsko tijelo je mali univerzum. Posebno u taoističkoj praksi, kada *qi* ne može proći kroz prolaz, pojaviće se takvi problemi. Ako *qi* ne može proći kroz prolaz, ostaće tamo. To se može dogoditi ne samo u glavi, nego i u drugim dijelovima tijela. Međutim, čovjekovo najosjetljivije mjesto je glava.

Kada se *qi* popne do vrha glave i krene prema dole, ali ne može proći kroz prolaz, čovjek će osjetiti da mu je glava teška i oteknuta, kao da nosi debelu kapu *qija*, itd. Ipak, *qi* nema nikakvu ograničavajuću moć i ne može donijeti teškoće i uopšte ne može prouzrokovati bolesti. Neki ljudi uopšte ne znaju šta je zapravo *qigong* i daju neke neodgovorne izjave koje izazivaju haotične situacije. Onda ljudi misle da će dobiti kultivacijsko ludilo, ili da će nešto krenuti naopako ako se *qi* ne može spustiti s vrha glave. Mnogi su se uplašili zbog toga.

Ako *qi* ne silazi s vrha glave, to je samo privremeno stanje. Za neke ljude ta pojava može potrajati duže vrijeme i *qi* se ni za pola godine ne može spustiti. Ako je to slučaj, čovjek može naći pravog *qigong* majstora, koji može usmjeriti *qi* kroz prolaz prema dole. Uvijek kada u našem prakticiranju ne možemo proći kroz prolaz ili se *qi* ne može spustiti dole, trebali bi tražiti razloge unutar svog *xinxinga* da vidimo da li smo se predugo zadržali na tom nivou i da li bi trebali poboljšati svoj *xinxing*! Kada stvarno poboljšaš svoj *xinxing*, vidjećeš da se *qi* može spustiti. Ako se samo fokusiraš na transformaciju *gonga*, a ne obraćaš pažnju na promjenu svog *xinxinga*, problem će ostati sve dok se tvoj *xinxing* ne poboljša, tek tada može doći do sveukupnog poboljšanja. Neće se pojaviti nikakvi problemi ako je *qi* zaista blokiran. Najčešće je naša sopstvena psiha ta koja uzrokuje probleme. Kad uz to čovjek još čuje od nekih tobožnjih *qigong* majstora da će nešto krenuti naopako kad *qi* dođe do vrha glave, uplašiće se. Ako se boji, to zaista može izazvati probleme. Jer, kada se boji, to je onda strah. Nije li to vezanost? Kad se tvoja vezanost pojavi, zar ne bi trebala biti odstranjena? Što se više bojiš, to će tim više izgledati kao bolest. Ta tvoja vezanost mora biti odstranjena da bi naučio lekciju, da bi tvoj strah mogao biti odstranjen i da bi se mogao povisiti.

Praktikant se neće osjećati fizički udobno u svojoj budućoj kultivaciji. U tijelu će se pojaviti mnoge vrste *gonga*, a to su sve veoma snažne stvari koje će se kretati unutar tvog tijela, tako da ćeš osjećati nelagodnost ovdje i ondje. Razlog tvoje nelagodnosti je uglavnom taj što se uvijek bojiš da će tvoje tijelo oboliti od neke bolesti. Zapravo, u tvom tijelu su već razvijene veoma snažne stvari, sve je to *gong*, sve su to natprirodne sposobnosti i još ima i mnogo živih bića. Ako se pomaknu, osjetićeš svrab, bol, nelagodnost itd. Nervni završeci su posebno osjetljivi. Pojaviće se svakakva stanja. Dokle god tvoje tijelo nije transformisano visokoenergetskom supstancom, osjećaćeš se tako, ali to je zapravo dobra stvar. Ti si praktikant, ali ako se stalno smatraš običnim čovjekom i misliš da si bolestan, kako ćeš se onda kultivirati? Kad se nevolje pojave tokom kultivacije i ako se još uvijek smatraš običnim čovjekom, rekao bih da je tvoj *xinxing* u tom trenutku pao na nivo svakodnevnih ljudi. Barem po tom određenom pitanju si pao na nivo običnog čovjeka.

Kao istinski praktikanti, trebamo gledati na stvari s veoma visokog nivoa, a ne s tačke gledišta svakodnevnih ljudi. Ako budeš mislio da si bolestan, to već može dovesti do bolesti. Jer, čim misliš da si bolestan, tvoj *xinxing* je na istoj visini kao kod običnog čovjeka. *Qigong* i istinska kultivacija neće dovesti do bolesti, naročito ne u tom stanju. Poznato je da je kod ljudi koji su stvarno bolesni bolest 70% uzrokovana psihički, a 30% fizički. Najčešće je čovjek prvo psihički utučen, preopterećen i slomljen, tako da se stanje njegove bolesti brzo pogoršava. To je obično tako. Na primjer, bio je jednom jedan čovjek kojeg su zavezali za krevet. Podigli su mu ruku i rekli mu da će mu porezati ruku, tako da će iskrvariti. Tada su mu zavezali oči i ogrebali ruku. (Pri tome on uopšte nije krvario.) Otvorili su slavinu, tako da je mogao čuti zvuk kapanja vode, pa je mislio da to kaplje njegova krv. Čovjek je umro kratko vrijeme nakon toga. U stvari, on uopšte nije krvario, samo je kapala voda iz slavine. Njegova psiha je uzrokovala njegovu smrt. Ako uvijek misliš da si bolestan, vjerovatno ćeš se dovesti

do bolesti. Jer, tvoj *xinxing* je pao na nivo svakodnevnih ljudi, a običan čovjek će se naravno razboliti.

Ako ti kao praktikant uvijek misliš da su to bolesti, onda ti zapravo težiš za njima. Ti tražiš bolest, onda se bolest može uvući u tvoje tijelo. Ti kao praktikant moraš imati visok *xinxing*. Ne trebaš uvijek strahovati da se radi o bolestima, jer strah od bolesti je također vezanost, što ti isto tako može donijeti teškoće. U kultivaciji, čovjek eliminira karmu, a eliminiranje karme je bolno. Kako je moguće sasvim udobno povećavati *gong*? Kako bi se drugačije mogao osloboditi svojih vezanosti? Ispričaću vam priču iz budizma: Jednom je bio čovjek koji je uložio veliki trud i konačno se kultivirao do Arhata. On će uskoro doći do ispravnog dostignuća i postaće Arhat, kako da ne bude sretan? On će izaći izvan Tri sfere! Ta radost je onda vezanost, vezanost ushita. Arhat treba biti u stanju nedjelovanja i njegovo srce treba ostati nedirnuto. Ali on je pao i njegova kultivacija je bila uzaludna. Zbog toga što se uzaludno kultivirao, morao se kultivirati iznova. I tako se opet počeo kultivirati naviše i nakon ogromnog truda, uspio se opet kultivirati do tog statusa. Ovaj put se uplašio i rekao sam sebi: "Ovaj put se ne smijem radovati, inače ću opet pasti." Čim se uplašio, opet je pao dole. Strah je također vrsta vezanosti.

Postoji još jedna situacija: Kad neko postane duševno poremećen, drugi ljudi će reći da je dobio kultivacijsko ludilo. Postoje i neki ljudi, koji čak očekuju da liječim njihove duševne bolesti! Ja tvrdim da duševni poremećaj nije bolest i nemam vremena baviti se takvim stvarima. Zašto? Zbog toga što duševno poremećen bolesnik nema nikakve viruse, niti patološke promjene, a nema ni čireva na njegovom tijelu. Po mom mišljenju, to nije bolest. Duševni poremećaj je kad je čovjekova glavna svijest previše slaba. Koliko slaba? To je kao osoba koja nikad ne može biti sama svoj gazda. Glavna duša duševno poremećenog bolesnika je u takvom stanju. On više ne želi vladati svojim tijelom, on uvijek ima mutnu glavu i ne može se osvijestiti. Tada će mu njegova sporedna svijest i vanjske poruke praviti smetnje. Postoji tako mnogo nivoa u različitim dimenzijama, svakakve vrste poruka će mu smetati. Osim toga, glavna duša čovjeka je možda učinila neka loša djela u svojim prijašnjim životima, pa postoje kreditori koji mu žele naškoditi. Svakakve stvari se mogu dogoditi. Mi kažemo da se kod duševnog poremećaja o tome radi. Kako bi te onda mogao liječiti? Rekao bih da zapravo tako dolazi do duševnog poremećaja kod čovjeka. Šta bi se moglo uraditi? Podučavati ga i pomoći mu da postane svjestan, ali to je veoma teško postići. Pogledajte, kad doktor u bolnici za duševne bolesnike uzme elektro-šok palicu u ruku, duševni bolesnik se tako uplaši da odmah prestane mrmljati besmislice. Zašto? U tom trenutku se čovjekova glavna duša probudila i on se boji elektro-šoka.

Obično kad čovjek uđe kroz vrata kultivacije, imaće želju da nastavi. Svako ima Buda-prirodu i želju za kultivacijom. Zato kada nauče praksu kultivacije, mnogi ljudi će se nastaviti kultivirati do kraja svog života. Bez obzira da li se može kultivirati naviše ili ne, može li dobiti Fa ili ne, u svakom slučaju, on ima srce da traži Tao i uvijek želi prakticirati. Svi znaju da ovaj čovjek prakticira *qigong* - njegove kolege, ljudi u njegovom kraju i njegovi susjedi, svi to znaju. Ali razmislite o tome: istinska kultivacija, ko je zapravo to uradio u posljednjih nekoliko godina? Niko. Samo ako se čovjek istinski kultivira, njegov životni put može biti promijenjen. Ali kao običan čovjek, on samo prakticira *qigong* za liječenje bolesti i održavanje zdravlja. Ko će promijeniti njegov životni put? Običan čovjek se jednog dana može razboliti ili naići na neke poteškoće, jednog dana će čak možda postati duševno poremećen ili umrijeti. Život običnog čovjeka je upravo takav. Ti ga vidiš kako prakticira *qigong* u parku, ali on se zapravo ne kultivira istinski. On se želi kultivirati ka visokim

nivoima, ali nije dobio ispravan Fa, tako da se ne može kultivirati naviše. On samo ima želju da se kultivira prema visokim nivoima, ali ipak još uvijek ostaje *qigong* praktikant na niskom nivou liječenja bolesti i održavanja zdravlja. Niko neće promijeniti njegov životni put, tako da će se on razboliti. Ako ne obraća pažnju na vrline, čak ni njegove bolesti neće moći biti izliječene. Ne znači da se nakon prakticiranja *qigonga* čovjek više nikad neće razboliti.

On se mora istinski kultivirati i obratiti pažnju na svoj *xinxing*. Samo ako se istinski kultivira, može se riješiti svojih bolesti. *Qigong* nije gimnastika, nego nešto što prevazilazi obične ljude, pa za praktikante moraju postojati viši principi i standardi. On ih mora zadovoljiti i tek tada može postići svoj cilj. Ipak, mnogi ljudi nisu tako postupali, pa još uvijek ostaju svakodnevnici ljudi. Zato će se oni još uvijek razboliti kada za to dođe vrijeme. Jednog dana, on će možda iznenada dobiti moždani udar, ili će iznenada oboliti od neke bolesti, ili će jednog dana postati mentalno poremećen. Svi znaju da on prakticira *qigong*. Kad postane mentalno poremećen, ljudi će reći da je od prakticiranja dobio kultivacijsko ludilo. Krivica za to biće svaljena na *qigong*. Razmislite, da li je to razumno? Laici ne znaju šta se dešava, a čak i eksperti i mnogi praktikanti teško mogu znati pravu istinu. Ako ta osoba postane duševno bolesna kod kuće, biće manje problematično, iako će drugi još uvijek reći da je to od prakticiranja *qigonga*. Ali ako on postane mentalno poremećen upravo na mjestu za vježbanje, to će biti katastrofa. Velika etiketa će biti nalijepljena, koju će biti nemoguće ukloniti. "*Qigong* praksa dovela do kultivacijskog ludila" - pišaće u novinama. Neki ljudi se slijepo protive *qigongu*: "Vidi, samo prije nekoliko trenutaka je bio u redu i prakticirao je tamo *qigong*, a sad je dospio u takvo stanje." Kao običan čovjek, naići će na ono što mu je suđeno. Možda će dobiti i druge bolesti ili će naići na neke druge teškoće. Da li je razumno za sve to kriviti *qigong* praksu? Kao doktor u bolnici: zato što je postao doktor, ne bi se nikad u svom životu smio razboliti. Može li se to shvatiti na taj način?

Zato možemo reći da mnogi ljudi ne znaju istinu o *qigongu* i njegove principe, pa daju iracionalne komentare. Čim iskrse neki problem, svakakve etikete se stavljaju na *qigong*. *Qigong* je tek kratko vrijeme popularan u društvu. Dosta ljudi imaju tvrdoglav stav i ne priznaju *qigong*, kleveću ga i odbacuju ga. Ko zna kakav način razmišljanja imaju ti ljudi. Imaju takvu odbojnost prema *qigongu*, kao da to ima nekakve veze s njima. Čim se spomene riječ *qigong*, reći će da je to idealizam. *Qigong* je nauka, to je viša nauka. To se događa, jer ti ljudi imaju previše tvrdoglave stavove, dok je njihovo znanje previše ograničeno.

Postoji još jedna situacija. U kultivacijskim krugovima postoji takozvano "*qigong* stanje". Takav čovjek je psihički odsutan, ali on nema kultivacijsko ludilo, on je vrlo razuman. Prvo ću vam objasniti šta je to *qigong* stanje. Znae da prakticiranje uključuje pitanje čovjekove urođene osnove. U svim zemljama svijeta postoje ljudi koji vjeruju u religije, a u Kini već hiljade godina postoje ljudi koji su vjernici budizma i taoizma. Oni vjeruju da se dobro dobrim vraća, a loše lošim. Ali neki ljudi ne vjeruju u to. Posebno za vrijeme Kulturne revolucije, takve stvari su bile kritikovane i označene kao praznovjerje. Neki ljudi smatraju praznovjerjem sve što ne mogu shvatiti, sve što nisu učili u udžbenicima, sve ono što moderna nauka u svom razvoju još nije dostigla ili spoznala. Bilo je mnogo takvih ljudi prije nekoliko godina, sad ih je nešto manje. To je zbog toga što su se neke pojave već odrazile u našoj dimenziji, iako ih ti ne priznaješ. Ti se ne usuđuješ suočiti se s njima, ali sada ljudi imaju hrabrosti govoriti o njima. Ljudi su isto tako dobili neke informacije o *qigongu*, na osnovu onog što vide i čuju.

Neki ljudi su u tolikoj mjeri tvrdoglavi, da će ti se smijati iz dubine duše čim spomeneš *qigong*. Oni misle da si praznovjeran i jako smiješan. Čim spomeneš neke fenomene *qigonga*, smatraće te previše neukim. Iako je takav čovjek tvrdoglav, njegova urođena osnova ne mora biti loša. Ako on ima dobru urođenu osnovu i počne prakticirati *qigong*, njegovo nebesko oko će se možda otvoriti na vrlo visokom nivou i možda će također dobiti natprirodne sposobnosti. On ne vjeruje u *qigong*, ali ne može biti siguran da se nikad neće razboliti. Kad se razboli, ići će u bolnicu. Ako ga doktor zapadne medicine ne bude mogao izliječiti, ići će doktoru kineske medicine. Ako ga ni doktor kineske medicine ne bude mogao izliječiti, a nijedan narodni recept ne djeluje, tada će se sjetiti *qigonga*. Misliće u sebi: "Iskušaću svoju sreću da vidim da li *qigong* stvarno može izliječiti moju bolest." Doći će sa mnogo ustručavanja. Zbog svoje dobre urođene osnove, čim bude prakticirao *qigong*, biće veoma dobar u tome. Možda će se neki učitelj zainteresovati za njega, to više biće u drugoj dimenziji će mu pomoći. Odjednom će se njegovo nebesko oko otvoriti ili će se on naći u stanju poluprosvjetljenja. Njegovo nebesko oko je otvoreno na visokom nivou i on može odjednom vidjeti neke istinite pojave univerzuma. Uz to još posjeduje i neke natprirodne sposobnosti. Šta misliš, da li mozak tog čovjeka može to izdržati kada on svojim očima vidi te pojave? Zamisli u kakvom će on mentalnom stanju biti. Stvari koje je prije uvijek smatrao praznovjerjem i apsolutno nemogućim i stvari kojima se smijao kada su drugi pričali o tome sada se stvarno pojavljuju pred njegovim očima i on je zaista došao u kontakt s njima. Mozak ove osobe onda to neće moći podnijeti, jer je psihički pritisak prevelik. Ono što on govori drugi neće moći prihvatiti. Ali njegovo razmišljanje je logično, samo što on ne može balansirati vezu između te dvije strane. Otkrio je da je ono što čovječanstvo radi pogrešno, dok je na drugoj strani obično ispravno. Ako uradi nešto na način kako se to radi na drugoj strani, ljudi će reći da je pogriješio. Ljudi ga ne mogu shvatiti, pa će reći da je dobio kultivacijsko ludilo.

U stvari, on nema kultivacijsko ludilo. Većini nas koji prakticiramo *qigong* tako nešto se uopšte neće dogoditi. Samo kod onih ljudi koji su stvarno tvrdoglavi pojaviće se takvo *qigong* stanje. Mnogi ljudi ovdje u publici imaju otvoreno nebesko oko - prilično velik broj. Oni su zaista vidjeli stvari u drugim dimenzijama. Nisu iznenađeni i smatraju to veoma dobrim, njihov mozak nije šokiran i neće se pojaviti to *qigong* stanje. Kada se čovjek nalazi u *qigong* stanju, vrlo je razuman i ono što govori zvuči veoma filozofski i veoma logično. Međutim, svakodnevni ljudi neće vjerovati u ono što on govori. Mogao bi ti reći da je vidio umrlu osobu i da mu je ta osoba rekla da uradi nešto. Kako običan čovjek može vjerovati u tako nešto? Poslije će shvatiti da takve misli treba čuvati za sebe i da ne može govoriti o njima s drugima. Sve će opet biti u redu, kada bude u stanju uspostaviti ispravan odnos između te dvije strane. Takvi ljudi obično imaju i natprirodne sposobnosti. Ni ovo nije kultivacijsko ludilo.

Postoji i jedna druga pojava koja se naziva "istinsko ludilo", ali se to rijetko viđa. "Istinsko ludilo", o kojem mi govorimo, ne znači da je neko stvarno lud. To nema to značenje, već to predstavlja "kultivaciju istine". Kako izgleda "istinsko ludilo"? Rekao bih da od sto hiljada kultivatora vjerovatno samo jedan to ima, to je jako rijetko. Zato to nije uobičajeno i nema nikakav uticaj na društvo.

Obično postoji preduslov za "istinsko ludilo". Naime, takva osoba mora imati odličnu urođenu osnovu i uz to još mora biti nešto starija. Zbog starosti, ona više nema dovoljno vremena za kultivaciju. Oni koji imaju odličnu urođenu osnovu su ovdje obično u misiji i dolaze sa visokih nivoa. Svako se boji doći u ovo društvo svakodnevnih ljudi, jer, nakon što

su mu misli isprane, ne prepoznaje više nikoga. Nakon što čovjek dođe u ovo okruženje društva svakodnevnih ljudi, smetnje svakodnevnih ljudi prouzrokovat će da juri za slavom i profitom, pa će konačno pasti dole i više nikad neće imati priliku da ode odavde. Zbog toga se niko ne usuđuje doći ovamo i svako se boji toga. Međutim, postoje ljudi koji su došli. Nakon dolaska, oni se zaista nisu mogli ponašati dobro među svakodnevnim ljudima, oni će stvarno pasti na niske nivoe i učinili su mnogo loših stvari u svom životu. Ako se čovjek u životu bori za svoju ličnu korist, učiniće dosta loših stvari i mnogo će se zadužiti. Njegov učitelj vidi da će taj čovjek pasti. Ali on je neko sa statusom dostignuća, ne možemo dozvoliti da samo tako padne! Šta da se radi? Njegov učitelj je veoma zabrinut, ne postoji drugi način kako ga navesti na kultivaciju, gdje u to vrijeme čovjek može naći učitelja? On se mora vratiti i kultivirati se nazad. Ali to je lako reći? On je već jako star i nema više dovoljno vremena za kultivaciju. Gdje može naći praksu kultivacije duha i tijela?

Samo ako ta osoba ima odličnu urođenu osnovu i samo pod tako krajnje specijalnim okolnostima može biti primijenjena ta metoda da se on učini ludim. Drugim riječima, ako više ne postoji apsolutno nikakva nada i u situaciji kada se on sam više ne može vratiti, tada će možda biti upotrijebljena ta metoda da se on učini ludim, tako što se isključi neki određeni dio njegovog mozga. Na primjer, mi ljudi se bojimo hladnoće i prljavštine, pa će ti dijelovi mozga, koji osjećaju strah od hladnoće i prljavštine, biti isključeni. Nakon što su ti dijelovi mozga isključeni, on će biti mentalno poremećen i stvarno će se ponašati kao ludak. Ipak, on obično ne čini ništa loše, ne psuje i ne udara druge. Naprotiv, on često čini dobra djela, ali je veoma surov prema sebi. Zato što nije svjestan hladnoće, on će zimi hodati bosonog po snijegu i nosiće samo tanak sloj odjeće. Noge će mu se od hladnoće raspući i krvariti. Zato što nije svjestan prljavštine, usuđuje se čak i jesti izmet i piti mokraću. Prije sam poznao jednu takvu osobu koja je jela smrznuti konjski izmet, tvrd kao kamen, kao da je to nešto jako ukusno. Oni mogu podnijeti patnje koje običan čovjek pri zdravoj pameti ne bi mogao podnijeti. Zamislite samo koliko oni pate zbog tog ludila. Naravno, takvi ljudi obično imaju natprirodne sposobnosti. Većinom su to starije žene. U prošlosti su starijim ženama bila svezana stopala, ali jedna takva starija žena je ipak s lakoćom mogla preskočiti preko zida visokog dva metra i više. Kada su članovi njene porodice vidjeli da je poludjela i da uvijek bježi od kuće, zaključali su je u sobi. Nakon što bi članovi njene porodice otišli, ona bi samo uperila prst u bravu, tada bi se brava otključala i ona bi pobjegla van. Poslije bi je zavezali čeličnim lancima. Kada bi članovi njene porodice opet izašli, s lakoćom bi stresla lance. Bilo ju je nemoguće zaustaviti i tako je podnijela mnogo patnji. Zato što je mnogo patila i sve je bilo prilično žestoko, mogla je vrlo brzo otplatiti dugove za svoja loša djela. To bi potrajalo najviše tri godine, ali obično bi bilo gotovo nakon godinu, dvije. Patnje kroz koje je prošla su bile vrlo velike. Nakon toga je odjednom sve shvatila. Zato što je time završila kultivaciju, njen *gong* će se odmah otvoriti i pojaviti će se razne božanske moći. Takvi slučajevi su krajnje rijetki, krajnje rijetki. Bilo je nekoliko takvih ljudi u historiji, ali tako nešto se ne može primijeniti kod ljudi s običnom urođenom osnovom. Vjerovatno znate da su postojali ljudi monasi i ljudi taoisti. Oni su zaista postojali u historiji, postoje spisi o tome. Kao na primjer "ludi monah koji je metlom istjerao Qin Huia iz hrama" i druge priče o ludim taoistima. Postoji mnogo takvih predanja.

Mi sa sigurnošću kažemo da kultivacijsko ludilo ne postoji. Ako neko zaista može proizvesti vatru, rekao bih da je ta osoba dostojna divljenja. Ako neko može ispaliti vatru otvarajući usta ili stvoriti vatru čim pruži ruku, ili ako neko može zapaliti cigaretu prstom iz kojeg dolazi vatra, nazvao bih to natprirodnom sposobnošću.

Demonske smetnje pri praktíciranju

Šta su to "demonške smetnje pri praktíciranju"? To su smetnje koje se obično lako pojavljuju pri praktíciranju *qigonga*. Kako to da praktíciranje *qigonga* privlači demonške smetnje? Razlog je što je stvarno teško kada se čovjek želi kultivirati. Ti nikako ne možeš uspjeti u istinskoj kultivaciji bez zaštite mog *fašena*. Čim pređeš prag i izađeš vani, tvoj život može biti u opasnosti. Čovjekova duša je besmrtna, tako da je moguće da si u svojim društvenim aktivnostima u prijašnjim životima možda ostao nešto dužan nekome, povrijedio nekoga ili učinio neko loše djelo. Tako će te ti kreditori tražiti. U budizmu se kaže da ljudi žive po principu karmičke odmazde. Ako nekom nešto duguješ, tražiće te zbog otplate. Ako ti je uzeo previše, vratiće ti to idući put. Ako sin ne poštuje svoje roditelje, u idućem životu će uloge biti zamijenjene. Na taj način se to stalno ciklično ponavlja. Međutim, zaista smo vidjeli da postoje demoni koji te ometaju i koji te sprječavaju da praktíciraš *qigong*. Sve to ima sudbinske veze i ne pojavljuje se bez razloga, inače im ne bi bilo dopušteno to raditi.

Najuobičajeniji oblik demonških smetnji kod praktíciranja je da je tvoja okolina relativno tiha kad ne praktíciraš vježbe. Nakon što si naučio vježbe, uvijek ih rado praktíciraš. Međutim, čim sjedneš u meditaciju, primjetićeš da vani iznenada više nije tiho. Auta počinju trubiti, čuje se hodanje po hodniku, pričanje, lupanje vratima, neko je vani upalio radio. Odjednom više nije tiho. Kad ne praktíciraš *qigong*, okolina je prilično tiha, ali čim počneš praktícirati, pojavljuje se tako nešto. Mnogi od nas nisu dublje razmišljali šta se to zapravo događa, samo misle kako je to čudno i potišteni su, tako da ne mogu dalje praktícirati. S tim "čudno" su blokirani. To su upravo demoni koji te ometaju, oni upravljaju ljudima da te ometaju. To je najjednostavniji oblik smetnje, čiji je cilj da prestaneš praktícirati. Ti želiš praktícirati i postići Tao, ali ne želiš otplatiti toliko mnogo stvari koje duguješ? Oni neće pristati na to i neće ti dozvoliti da praktíciraš. Međutim, to je također samo nešto što se pojavljuje na jednom određenom nivou. Nakon određenog vremena, više nije dozvoljeno da postoji ova pojava. Naime, nakon što je dug namiren, više im neće biti dopušteno da te dalje ometaju. To je zato što se u našem Falun Dafa ljudi prilično brzo kultiviraju i isto tako prilično brzo probijaju nivoe.

Postoji još jedna vrsta demonške smetnje. Poznato je da se praktíciranjem *qigonga* može otvoriti nebesko oko. Nakon što se kod nekih ljudi otvori nebesko oko, oni mogu vidjeti zastrašujuće prizore ili strašna lica za vrijeme praktíciranja kod kuće. Neki od njih imaju raščupanu dugačku kosu, neki se žele boriti s tobom, ili čak prave sve moguće pokrete, to je stvarno strašno. Ponekad, kad neko praktícira, vidjeće takve stvari kako vise s vanjske strane njegovog prozora i to je jako zastrašujuće. Zašto se to dešava? Sve su to vrste demonških smetnji. Međutim, u našoj Falun Dafa školi se tako nešto vrlo rijetko dešava, oko jedan posto, većina ljudi se neće susresti s tim. Zato što to nije korisno za naše praktíciranje, nije im dopušteno da ti smetaju na taj način. U kultivaciji u običnim praksama je to vrlo uobičajena pojava i također traje dosta dugo. Upravo zbog toga neki ljudi ne mogu praktícirati i jako se prepadnu. Kad praktícira noću, čovjek obično izabere neko veoma mirno mjesto. Kad pred sobom iznenada ugleda osobu koja izgleda napola duh, a napola čovjek, biće previše uplašen da nastavi praktícirati. U našem Falun Dafa se tako nešto obično ne dešava. Međutim, postoje neki izuzeci. Neki ljudi se nalaze u veoma posebnoj situaciji.

Jedna druga vrsta se odnosi na ljude koji praktíciraju i vanjsku i unutrašnju kultivaciju. Oni praktíciraju borilačke vještine i istovremeno praktíciraju unutrašnju kultivaciju. Takve metode kultivacije se često viđaju u Tao školi. Kad osoba uči takvu metodu kultivacije, često

će naići na jednu vrstu demona. U običnim metodama kultivacije se tako nešto ne pojavljuje, to se dešava samo u metodama kultivacije koje sadrže i unutrašnju i vanjsku kultivaciju, kao i kod onih koji prakticiraju borilačke vještine. To znači da će ga neko izazvati na dvoboj, jer postoji mnogo taoističkih praktikanata u svijetu, od kojih mnogi prakticiraju borilačke vještine, pri čemu oni prakticiraju i unutrašnju i vanjsku kultivaciju. Osoba koja prakticira borilačke vještine može također povećati svoj *gong*. Zašto? Nakon što se oslobodi nekih vezanosti, kao i želje za ugledom i ličnim dobitkom, on također može povećati svoj *gong*. Međutim, potrajaće dugo dok on napusti svoju želju za borbom i nadmetanjem s drugima i on će je odbaciti prilično kasno. Zbog toga će lako učiniti tako nešto, što će se pojaviti na izvjesnom nivou. Dok sjedi u meditaciji, dospjeće u trans i znaće da neko upravo prakticira. Tada će njegova duša (*yuanshen*) napustiti fizičko tijelo i potražiće tu osobu i izazvaće je na dvoboj. On želi vidjeti čije su vještine bolje, pa će tako doći do borbe. I u drugim dimenzijama se tako nešto događa. Postoje i neki koji ga izazivaju na dvoboj. Ali, ako on odbije, drugi će ga stvarno htjeti ubiti, tako da će se oni međusobno boriti i to će se nastaviti dalje. Čim zaspi, neko će doći da odmjeri snage s njim u borbi, pa se zato cijelu noć neće moći odmoriti. Zapravo, upravo je vrijeme za njega da odbaci svoju vezanost borbe s drugima. Ako ne odbaci tu svoju vezanost nadmetanja, uvijek će mu se dešavati isto. Ako to bude dugo potrajalo, on će nekoliko godina stalno ostati na istom nivou i neće biti u stanju prevazići ga. To će dovesti do toga da više ne može prakticirati i njegovo fizičko tijelo to također više neće moći podnijeti, potrošiće previše energije, pa se može desiti da ostane sasvim nemoćan. Znači, takve stvari se pojavljuju u kultivacijskim metodama koje sadrže i unutrašnju i vanjsku kultivaciju i to je prilično uobičajeno. U našoj metodi unutrašnje kultivacije se tako nešto ne događa i nije dozvoljeno da se to pojavi. Tih nekoliko oblika o kojima sam upravo govorio su dosta uobičajeni.

Postoji još jedna vrsta demonske smetnje s kojom će se svako susresti, i u našoj školi kultivacije će se svako susresti s tim. To je demon požude. To je vrlo ozbiljno. U društvu svakodnevnih ljudi postoji bračni život između muža i žene i na taj način se ljudska bića mogu razmnožavati. Na taj način se čovječanstvo razvija. U ljudskom društvu postoje emocije, zato je u skladu s principima Neba i Zemlje da svakodnevni ljudi to rade. Jer, ljudi imaju emocije: ljutnja je emocija, radost je emocija, ljubav je emocija i mržnja je emocija, rado raditi nešto je emocija, nerado raditi nešto je također emocija, naklonost prema nekome, odbojnost prema nekome, voliti raditi nešto ili ne voliti raditi nešto. To su sve emocije i svakodnevni ljudi jednostavno žive za emocije. Ali, kao praktikant i viša osoba, ne možeš više koristiti takve principe da bi presuđivao o stvarima, nego se moraš otrgnuti od njih. Tako postoje mnoge vrste vezanosti koje proizilaze iz emocija i mi ih trebamo uzimati olako, sve dok ih konačno potpuno ne otpustimo. Stvari kao što su želje i požuda su sve stvari koje spadaju u ljudske vezanosti i trebaju biti odbačene.

U našoj školi, u periodu u kojem se kultiviramo među svakodnevnim ljudima, ne traži se od tebe da postaneš monah ili opatica. Mlađi praktikanti još uvijek trebaju zasnovati porodice. Kako bi onda trebali postupati s tim? Rekao sam da je naša škola usmjerena direktno na čovjekovo srce i neće prouzrokovati da zaista izgubiš neke materijalne interese. Naprotiv, tvoj *xinxing* se čeliči upravo usred materijalnih interesa svakodnevnih ljudi i ono što će zaista biti poboljšano je tvoj *xinxing*. Ako možeš otpustiti tu vezanost, moći ćeš otpustiti sve i ako trebaš otpustiti materijalne interese, svakako ćeš moći to učiniti. Ako ne možeš otpustiti svoju vezanost, nećeš moći ništa otpustiti. Zato je istinski cilj kultivacije kultivirati svoje srce. Kod kultivacije u hramu, primoran si izgubiti takve stvari i to isto služi tome da se oslobodiš vezanosti. Oni te tjeraju da se potpuno odvojiš od tih stvari i da ne razmišljaš o

njima. To je njihova metoda. Mi ne tražimo od tebe da tako postupaš. Mi od tebe tražimo da upravo olako uzimaš materijalne interese kada se oni nalaze pred tobom. Zato je kultivacija u našoj školi najsolidnija. Mi ne tražimo od vas da svi postanete monasi i opatice. Mi se kultiviramo među svakodnevnim ljudima i u budućnosti će se naša metoda kultivacije sve više širiti. Neće ići ako se svi koji nisu monasi, ponašaju kao monasi i ako bi svi Falun Dafa praktikanti tako postupali. Kod prakticiranja se od tebe zahtijeva sljedeće: Ti prakticiraš, ali tvoja supruga možda ne prakticira. U tom slučaju se ne možeš razvesti samo zato što prakticiraš *qigong*. To znači da trebamo to olako uzeti i ne trebamo se odnositi prema tome kao prema nečem važnom, kao što to rade svakodnevni ljudi. Posebno u današnje vrijeme u društvu, takve stvari kao što su seksualna sloboda i pornografija smetaju ljudima. Neki ljudi smatraju te stvari vrlo bitnim. Ali, kao praktikanti, mi ih stvarno trebamo uzeti olako.

Gledajući s visokih nivoa, kaže se da se svakodnevni ljudi u društvu jednostavno igraju blatom na Zemlji, ne misleći da je ono prljavo. Oni se igraju blatom na Zemlji. Mi kažemo da ne trebaš uzrokovati nikakve probleme u porodici zbog te stvari. Zato će biti dovoljno ako na sadašnjem nivou manje mariš za te stvari i održavaš normalan i skladan bračni život. Kad u budućnosti dođeš do određenog nivoa, na tom nivou će biti drugačija situacija. Zasad je tako i dovoljno je da tako postupaš. Naravno, ne smiješ slijediti ono što se događa u današnjem društvu. Kako to može biti dopušteno!

Ovdje se radi o još jednom pitanju. Kao što znate, mi praktikanti imamo *gong* u svojim tijelima. Oko 80% do 90% ljudi na ovom kursu, ne samo da će se osloboditi svojih bolesti, nego će i razviti *gong*. Zato tvoje tijelo nosi veoma snažnu energiju. *Gong* koji imaš i tvoj sadašnji *xinxing* nisu u srazmjeri. Tvoj *gong* je trenutno privremeno visok, jer je odjednom povećan. Sada se poboljšava tvoj *xinxing*. Postepeno ćeš ga moći dostići, nema sumnje da ćeš ga dostići nakon određenog vremena. Zbog toga smo to unaprijed uradili. Drugim riječima, sada imaš izvjesnu količinu *gonga*. Zbog toga što je *gong*, koji je nastao kultivacijom istinskog Fa, čist i dobrodušan, svi ovdje prisutni osjećaju spokojno i dobrodušno polje. Ja sam se kultivirao na taj način i nosim takve stvari na sebi. Svi ovdje prisutni osjećaju harmoničnu atmosferu i nemaju nikakvih loših misli u glavi, čak će zaboraviti i na pušenje. Kad u budućnosti budeš slijedio zahtjeve našeg Dafa, energija koju si kultivirao biće isto takva. Stalnim povećanjem potencije tvog *gonga*, isijavajuća energija *gonga* na tvom tijelu će također biti dosta snažna. Čak i ako nije toliko snažna, ti ćeš uticati na obične ljude koji se nalaze u području tvog polja, ili na svoje ukućane. Možeš uticati i na sve članove svoje familije. Zašto? Ne moraš misliti na to, jer je tvoje polje čisto, spokojno i dobrodušno, to je polje ispravnih misli. Zato ljudi neće lako imati loše misli ili činiti loša djela. To može imati takvo dejstvo.

Ovih dana sam rekao da "Svjetlo Bude sve osvjetljava, ispravnost i pravednost harmoniziraju sve." To znači da energija koja zrači iz naših tijela može ispraviti sva abnormalna stanja. Znači, pod uticajem tvog polja, kad ne misliš na te stvari, neprimjetno ćeš obuzdati svog supružnika. Ako ne misliš na to i nemaš takvu vrstu misli, onda ni tvoj supružnik neće moći misliti na to. Ali to nije apsolutno. U sadašnjem okruženju, ako uključiš televizor, možeš vidjeti sve i svašta, što lako može pobuditi ljudske žudnje. Međutim, pod normalnim okolnostima možeš imati takvo obuzdavajuće dejstvo. Kad u budućnosti kroz kultivaciju dostigneš visoke nivoe, znaćeš i sam šta da radiš, bez da ti ja to moram reći. Tada će se pojaviti drugo stanje, koje će osigurati da održiš harmoničan život. Zato ne trebaš te stvari uzimati previše ozbiljno. Ako se previše brineš o tome, to je također vezanost. Između

muža i žene ne postoji problem seksa, ali postoji problem požude. Dok god mu ne pridaješ naročit značaj i osjećaš se psihički uravnotežen, sve će biti u redu.

S kakvom vrstom seksualnog demona ćeš se onda susresti? Ako tvoja sposobnost koncentracije u meditaciji nije dovoljna, pojaviće se u tvojim snovima. Dok spavaš ili meditiraš, odjednom će se pojaviti: Ako si muškarac, pojaviće se prekrasna žena; ako si žena, pojaviće se muškarac tvojih snova, ali oni će biti goli. Ako samo pomisliš na seks, ejakuliraćeš i to će onda postati stvarnost. Razmislite o tome: U našoj praksi se esencija čovjekovog tijela koristi da bi se kultivirala dugovječnost. Ne možeš uvijek tako ejakulirati. Istovremeno, nisi prošao test seksualne želje i požude. Kako to može biti dopušteno? Zato vam kažem, svako će se susresti s ovim problemom, garantovano. Dok objašnjavam Fa, ja to utiskujem vrlo snažnom energijom u tvoje misli. Kad izađeš kroz ova vrata, možda se više nećeš moći sjetiti šta sam tačno rekao, ali ćeš se sjetiti mojih riječi kada zaista naiđeš na probleme. Dok god se smatraš praktikantom, odmah ćeš se sjetiti šta sam rekao i moći ćeš se suzdržati, pa ćeš moći proći taj test. Ako nisi prošao prvi test, biće ti veoma teško suzdržati se kod drugog testa. Međutim, postoji i ovaj slučaj: Prvi put nisi prošao test, ali nakon što se probudiš, stvarno se kaješ zbog toga. Takav stav ili ovo psihičko stanje vjerovatno će pojačati utisak u tvojim mislima. Kad opet budeš naišao na takav problem, moći ćeš se kontrolisati i proći test. Ali, ako neko nije prošao test i ne mari za to, poslije će mu biti još teže obuzdati se. To je garantovano tako.

Kod ove forme se radi ili o smetnji od strane demona, ili o tome da tvoj Učitelj transformiše predmete da bi te iskušao. Postoje obje forme, jer svako treba proći ovaj test. Mi se počinjemo kultivirati kao svakodnevnih ljudi i ovaj test je prvi korak. Svaki praktikant će se susresti s tim. Daću vam jedan primjer: Kad sam držao seminar u Wuhanu, tamo je bio jedan mlađi učenik u svojim 30-tim godinama. Nakon što sam govorio o ovoj temi, otišao je kući i počeo meditirati i ubrzo je utonuo u stanje mirnoće. Nakon toga, iznenada je ugledao Buda Amithabu kako se pojavljuje s jedne strane, a Lao Cea s druge. To je to što je taj praktikant napisao u svom izvještaju o sopstvenim iskustvima. Nakon što su se oni pojavili, pogledali su ga i nisu ništa rekli, a zatim su nestali. Nakon toga se pojavila Bodisatva Avalokitesvara s vazom u ruci iz koje je izlazio bijeli dim. Praktikant je sjedio i meditirao i sve je jasno vidio i to ga je prilično obradovalo. Odjednom se dim pretvorio u nekoliko ljepotica, to su bile leteće nebeske djevojke (*apsare*) i bile su veoma lijepe. Plesale su za njega s gracioznim pokretima. On je pomislio u sebi: Ja ovdje prakticiram, Bodisatva Avalokitesvara me nagrađuje transformišući nekoliko ljepotica da plešu za mene. U tom trenutku, kada se oduševio tom mišlju, te ljepotice su odjednom postale gole i, čineći raznovrsne kretnje, prišle su mu da ga grle i miluju. *Xinxing* našeg učenika se vrlo brzo poboljšavao, odmah je taj mladić postao oprezan. Prva misao koja mu je došla u glavu je bila: "Ja nisam običan čovjek. Ja sam praktikant. Ne smijete tako postupati sa mnom. Ja kultiviram Falun Dafa." Čim se ta misao pojavila, odjednom je sve nestalo, u stvari su sve to bile iluzije. Tada su se opet pojavili Buda Amithaba i Lao Ce. Pokazujući prstom na tog mladog čovjeka, Lao Ce se nasmijehao Buda Amithabi i rekao: "Ovaj momak se da naučiti." To je značilo da je taj mladić dobar i da je u stanju učiti.

Kroz istoriju, ili gledajući iz perspektive visokih dimenzija, stvari kao što su požuda i seks smatrane su veoma važnim kod procjene da li je osoba u stanju kultivirati se ili ne. Stoga zaista moramo olako uzeti te stvari. Međutim, mi se kultiviramo među svakodnevnim ljudima, pa ne tražimo od tebe da se potpuno odrekneš tih stvari. Barem u ovoj fazi trebaš olako uzeti te stvari i ne možeš se odnositi prema njima kao prije. Kao praktikant, trebaš

postupati tako. Kad god se u prakticanju pojavi bilo koja vrsta smetnje, moraš sam u sebi tražiti uzrok i pronaći šta još nisi otpustio.

Vlastito srce stvara demone

Šta znači "vlastito srce stvara demone"? Čovjekovo tijelo u svakoj dimenziji ima jedno materijalno polje. U jednom određenom polju, sve stvari iz univerzuma se odražavaju kao sjena u tvoje dimenzionalno polje. Iako su to sjene, one također materijalno postoje. Sve unutar tvog dimenzionalnog polja kontroliše svijest tvog mozga. Naime, ako gledaš svojim nebeskim okom, spokojno, bez ikakvih mentalnih aktivnosti, to što vidiš je stvarno. Čim počneš sasvim malo misliti, sve što vidiš biće pogrešno. To je "vlastito srce stvara demone" ili "transformacija prema mislima". To je upravo zbog toga što neki praktikanti ne tretiraju sebe kao praktikante i ne mogu se kontrolisati. Oni teže natprirodnim sposobnostima, svoje glavo su vezani za nevažne sposobnosti i tehnike, ili su čak svoje glavo vezani za nešto što su čuli u drugim dimenzijama, oni svoje glavo teže takvim stvarima. Zato se kod takvih ljudi najlakše dešava da "vlastito srce stvara demone" i da padnu. Koliko god visoko se neko kultivirao, čim se pojavi taj problem, pašće sve do dna i biće sasvim uništen. To je krajnje ozbiljan problem. To nije kao na drugim područjima, u kojima se čovjek, ako ovaj put ne uspije proći test *xinxinga*, još uvijek može uspraviti poslije pada i nastaviti kultivirati se. Ali ako se pojavi problem "vlastito srce stvara demone", onda to više neće ići, pa je tako cijeli njegov život uništen. Takav problem se naročito lako pojavljuje kod onih čije je nebesko oko u kultivaciji otvoreno na izvjesnom nivou. Postoje i neki ljudi čiju svijest stalno ometaju strane poruke. Šta god im strane poruke kažu, oni vjeruju u to. Pri tome se također može pojaviti ovaj problem. Zbog toga će neki naši praktikanti, nakon što je njihovo nebesko oko otvoreno, naići na smetnje porukama koje dolaze sa svih strana.

Mogu vam dati jedan primjer: Veoma je teško ostati neditnutog srca pri kultivaciji na niskom nivou. Možda nećeš jasno vidjeti kako tvoj učitelj izgleda. Jednog dana iznenada vidiš divovsko božanstvo kako dolazi. To divovsko božanstvo te pohvali i nauči te nečemu, što ti također prihvatiš, onda će tvoj *gong* biti zbrkan. Ti si sretan i prihvataš ga za svog učitelja i učiš od njega. Međutim, on isto tako nije stigao do ispravnog dostignuća. U toj dimenziji on se može povećati i smanjiti. Tako nešto se pojavljuje pred tvojim očima, ti vidiš to divovsko božanstvo i tako si uzbuđen! Kada se pojavi tvoja vezanost uzbuđenosti, zar nećeš učiti od njega? Kad se kultivator ne može kontrolisati, vrlo je teško spasiti ga, on će se lako sam uništiti. Svi nebeski ljudi su božanstva, ali nisu postigli ispravno dostignuće, pa zato također moraju slijediti šestostruki put reinkarnacije. Ako olako prihvatiš nekog za svog učitelja i budeš ga slijedio, gdje će te on odvesti? Čak ni on sam ne može postići ispravno dostignuće, zar se nisi uzaludno kultivirao? Tvoj *gong* će na kraju biti potpuno zbrkan. Ljudskim bićima je veoma teško ostati neditnutog srca. Kažem vam svima da je to vrlo ozbiljan problem i mnogi od nas će u budućnosti naići na takav problem. Objasnio sam ti Fa. Možeš li se kontrolisati zavisi u potpunosti od tebe samog. To o čemu sam govorio je jedna od situacija. Ostani neditnut kad vidiš prosvijetljena bića iz drugih škola kultivacije i kultiviraj se samo u jednoj školi. Sasvim svejedno koji Buda, Tao, božanstvo ili demon: "Ne pokušavaj me pokolebati". Na ovaj način sigurno imaš dobre šanse za uspjeh.

"Vlastito srce stvara demone" pokazuje se i u drugim oblicima: Možda vidiš preminule rođake koji ti smetaju, oni plaču i preklinju te da uradiš ovo ili ono. Svakakve stvari se mogu dogoditi. Može li tvoje srce ostati neditnuto? Veoma si naklonjen svom djetetu i voliš svoje roditelje. Ali tvoji roditelji su preminuli i sada ti kažu da uradiš nešto, nešto što ne bi smio

uraditi, bilo bi jako loše ako bi to uradio. Tako je teško biti praktikant. Ljudi kažu da je budizam u haotičnom stanju, stvari iz konfucijanizma su uvedene i u budizam; stvari kao što su poštovanje i poslušnost prema roditeljima, ljubav prema djeci itd. također su uvedene u budizam. Ali te stvari ne pripadaju budizmu. Šta to znači? Pravi život ljudskog bića je duša i majka koja je rodila tvoju dušu je tvoja prava majka. Za vrijeme šestostrukog puta reinkarnacije, broj tvojih majki koje su ljudska ili neljudska bića je bezbrojan. Koliko si djece imao u svim svojim životima? Također bezbroj. Ko je tvoja majka? Ko su tvoja djeca? Nakon smrti više niko ne prepoznaje nikoga, ali još uvijek moraš otplatiti karmu koju duguješ. Ljudska bića su izgubljena u magli i jednostavno ne mogu otpustiti te stvari. Nečija djeca su umrla, ali ih on ne može otpustiti i cijelo vrijeme govori kako su ona bila dobra, ili kako je bila dobra njegova majka, koja je također preminula. Oni su tako potišteni kao da žele slijediti umrle do kraja svog života. Jesi li pomislio da se to dešava da bi te mučilo? Na taj način ti oni život čine teškim.

Svakodnevni ljudi možda to ne mogu razumjeti. Ako si vezan za te stvari, ti se uopšte ne možeš kultivirati. Zbog toga u budizmu ne postoji tako nešto. Ako se želiš kultivirati, moraš otpustiti ljudske osjećaje. Naravno, za vrijeme kultivacije u društvu svakodnevnih ljudi, trebamo poštovati roditelje i vaspitavati našu djecu. Pod svim okolnostima trebamo biti dobri prema drugima i dobrodušno se odnositi prema drugim ljudima, a da i ne govorimo o našim rođacima. Prema svima se trebamo odnositi jednako, trebamo biti dobri prema svojim roditeljima i djeci i u svakoj situaciji biti uviđavni prema drugima. Onda tvoje srce nije sebično, nego dobrodušno - to je dobrodušnost. Osjećaji su stvari svakodnevnih ljudi, oni upravo žive za osjećaje.

Mnogi ljudi se ne mogu disciplinirati, što uzrokuje poteškoće u njihovoj kultivaciji. Neki ljudi kažu da im je Buda nešto rekao. Svi oni koji ti kažu da ćeš danas imati poteškoću, ili da će ti se nešto desiti i kako to možeš izbjeći, ili neko ko ti otkrije dobitnički loz na lutriji danas i kaže ti da ga izvučeš, osim onih koji ti kažu kako da izbjegneš životnu opasnost, svi oni koji ti kažu kako da dobiješ neke povlastice u društvu svakodnevnih ljudi, su demoni. Ako dobiješ povlastice među svakodnevnim ljudima i ne možeš prevazići tu teškoću, nećeš se moći uzdići u kultivaciji. Kako se možeš kultivirati ako vodiš udoban život među svakodnevnim ljudima? Kako tvoja karma može biti transformisana? Gdje je okolina u kojoj ćeš poboljšati svoj *xinxing* i transformisati svoju karmu? Ovo svakako morate zapamtiti. Demon te također može hvaliti i reći kako je visok tvoj nivo, kako si veliki Buda ili veliki Tao i kako te on smatra veličanstvenim. To je sve lažno. Kao praktikant, koji se istinski kultivira ka visokim nivoima, moraš se osloboditi svih raznih vezanosti. Kad naiđete na takve stvari, stvarno morate biti na oprezu.

Tvoje nebesko oko će biti otvoreno za vrijeme prakticiranja. Postoje poteškoće kod kultivacije kada je nebesko oko otvoreno. Također postoje poteškoće kod kultivacije kada nebesko oko nije otvoreno. U oba slučaja se nije lako kultivirati. Kada se nebesko oko otvori, biće ti jako teško disciplinirati se, kada ti razne poruke budu smetale. U drugim dimenzijama je sve blistavo, puno lijepih pojava, koje su veoma dojmljive i veoma dobre. Sve može dirnuti tvoje srce. Ako je tvoje srce dirnuto, to ti može zasmetati i tvoj *gong* će biti zbrkan. To se često dešava. Zato osoba čije vlastito srce stvara demone može naići na takvu situaciju, u kojoj nije u stanju kontrolisati se. Na primjer, za takvu osobu će biti vrlo opasno čim se kod nje pojave loše misli. Jednog dana, njegovo nebesko oko je otvoreno i on čak dosta jasno vidi. On misli: "Jedino moje nebesko oko je dobro otvoreno na ovom mjestu za vježbanje, možda nisam običan čovjek. U stanju sam učiti Falun Dafa Učitelja Li-ja, mogao sam ga tako dobro

naučiti, bolje nego ostali. Možda nisam samo običan čovjek?" Ta misao je već pogrešna. On misli: "Možda sam i Buda. Ah, da se pogledam." Kad se pogleda, zaista će vidjeti da je Buda. Zašto? Zbog toga što se sve supstance unutar područja dimenzionalnog polja oko njegovog tijela transformišu prema njegovim mislima, što se još naziva "transformacija prema srcu".

Sve stvari koje se odražavaju iz univerzuma transformišu se prema njegovim mislima. Jer, sve unutar područja njegovog dimenzionalnog polja nalazi se pod njegovom kontrolom, uključujući i sjene, koje isto tako materijalno postoje. On misli: "Možda sam Buda. Možda nosim i odjeću Bude." Tada će vidjeti da je ono što nosi zaista odjeća Bude. "Ah, ja sam zaista Buda." Veoma će se uzбудiti. "Možda nisam samo mali Buda." Pogledaće i vidjeće da je zaista veliki Buda. "Možda sam viši nego Li Hongzhi! Da se pogledam još jednom. Da, zaista sam viši nego Li Hongzhi." Neki čuju te stvari kroz uši, taj demon mu smeta, govoreći: "Zaista si viši od Li Hongzhija, ti si toliko i toliko viši od Li Hongzhija." I on će povjerovati u to. Jesi li razmislio o tome kako ćeš se kasnije kultivirati? Da li si se ikad kultivirao? Ko te naučio kultivaciji? Čak i pravi Buda, koji dođe dole da nešto obavi, mora se kultivirati od početka, neće mu biti dan njegov izvorni *gong*, samo će se on sada brže kultivirati. Zbog toga, kad se kod nekog pojavi takav problem, biće mu jako teško osloboditi se toga, odmah će razviti tu vezanost. Kada se ona pojavi, usudiće se reći bilo šta: "Ja sam već Buda i ne trebate više učiti od drugih, ja sam već Buda i reći ću vam šta trebate činiti." Počeće raditi takve stvari.

Nemamo li takvu osobu u Changchunu? U početku je bio prilično dobar, ali poslije je postao takav. Mislio je da je Buda i konačno je mislio da je viši nego svi ostali. To se upravo dogodilo zato što se nije mogao kontrolisati i jer se pojavila vezanost. Zašto se tako nešto pojavljuje? U budizmu se kaže: "Svejedno šta vidiš, trebaš to ignorisati, jer su to sve demonske iluzije, trebaš samo stupiti u meditaciju i kultivirati se naviše." Zašto ne dozvoljavaju da gledaš, niti da razviješ vezanosti za te stvari? Oni upravo strahuju da će se pojaviti taj problem. U budističkoj metodi kultivacije nema intenzivnih metoda kultivacije, niti u sutrama postoje upute kako se osloboditi tog problema. Shakyamuni tada nije objasnio taj Fa. Da bi izbjegao problem "vlastito srce stvara demone" i "transformacija prema mislima", nazvao je sve vidljive prizore za vrijeme kultivacije demonskim iluzijama. Čim neko ima vezanost, stvorice demonsku iluziju i jako mu je teško osloboditi je se. Čak se može desiti da ta osoba bude uništena i da krene demonskim putem. Zato što sebe naziva Budom, već je krenula demonskim putem. Na kraju može privući i posjedujući duh ili neke druge stvari, pa će biti sasvim uništena. Njeno srce je postalo loše i ona će pasti sasvim na dno. Postoji mnogo takvih ljudi. I na ovom seminaru postoje ljudi koji imaju prilično visoko mišljenje o sebi i čak govore drugačijim tonom. Kada se radi o stvarnoj situaciji jednog čovjeka, čak i u budizmu je to tabu. Ovo što sam upravo objasnio je još jedan slučaj koji se naziva "vlastito srce stvara demone" i "transformacija prema mislima". Ima takvih učenika u Pekingu, a pojavili su se i u nekim drugim oblastima. Pored toga, to je uzrokovalo ozbiljne smetnje praktikantima.

Neko me je pitao: "Učitelju, zašto ne uklonite taj problem?" Razmisli o tome, kako ćeš se kultivirati ako uklonimo sve prepreke na tvom putu kultivacije? Upravo pod tim okolnostima demonske smetnje može se vidjeti da li možeš nastaviti kultivirati se, da li stvarno možeš razumjeti Tao, da li se daš ometati i da li možeš biti istrajan na ovom putu kultivacije. Veliki valovi ispiraju pijesak, tako je to kod kultivacije. Ono što na kraju ostane biće istinsko zlato. Bez takvih vrsta smetnji, rekao bih da bi ljudima bilo previše lako kultivirati se. Čak i u mojim očima bi tvoja kultivacija bila previše jednostavna. Velika

prosvjetljena bića na visokim nivoima smatraće to još nepravednijim, kada to vide: "Šta radiš? Zar to smatraš spašavanjem ljudi? Nema više nikakvih prepreka na putu i čovjek se glatko može kultivirati do kraja, zar je to kultura? Što se dalje neko kultivira, to je ugodnije i nema nikakvih smetnji, kako je to moguće?" To je pitanje i ja također razmišljam o tome. U početku sam eliminirao mnogo takvih demona. Ali osjećao sam da ne bi bilo u redu raditi to cijelo vrijeme. Drugi mi također kažu: "Učinio si im kultivaciju previše laganom. Ljudi imaju samo malo svojih teškoća i među ljudima ima samo malo nevolja. Još uvijek ima mnogo vezanosti koje ne mogu ukloniti! Još uvijek ostaje pitanje da li mogu razumjeti tvoj Dafa usred meteža!" Postoji to pitanje, zbog toga će biti smetnji i testova. Ovo o čemu sam upravo govorio je jedna vrsta demona. Vrlo je teško stvarno spasiti čovjeka, ali je vrlo lako uništiti ga. Čim tvoje srce nije ispravno, tvoja kultura je propala.

Glavna svijest treba biti jaka

Zato što je čovjek u svojim prijašnjim životima počinio mnogo loših djela, to mu donosi nesreću, a praktikantu uzrokuje karmičke prepreke. Zato postoji rođenje, starenje, bolest i smrt. To je obična karma. Postoji još jedna jaka karma koja ima jak uticaj na praktikanata i ona se zove misaona karma. Sve dok žive, ljudi moraju misliti. Izgubljen među svakodnevnim ljudima, čovjek u sebi često razvija misli vezane za ugled, dobitak, požudu, ljutnju itd. S vremenom se iz toga formira snažna misaona karma, jer u drugim dimenzijama sve ima život, a to također važi i za karmu. Kad čovjek kultivira ispravan put, mora eliminirati svoju karmu. Eliminiranje karme znači da se karma iskorjenjuje i transformiše. Naravno, karma se odupire, pa će čovjek imati teškoće i prepreke. Međutim, misaona karma može biti direktna smetnja čovjekovom umu. Zato neko u mislima vrijeđa Učitelja i Dafu, ili mu se u glavi pojavljuju neke pokvarene misli i psovke. Kada se to dogodi, neki će praktikanata biti zbunjeni i čak će vjerovati da oni sami tako misle. Neki ljudi misle da je to posjedujući duh. Međutim, to nije posjedujući duh, već je prouzrokovano odrazom misaone karme u mozgu. Glavna svijest nekih ljudi nije tako jaka i oni slijede misaonu karmu i čine nešto loše. Oni će onda biti upropašteni i pašće na dno. Međutim, većina praktikanata se s veoma jakim sopstvenim mislima (jakom glavnom svijesću) može oduprijeti i potisnuti je. To pokazuje da ta osoba može biti spašena i da može razlikovati dobro od zla. To također znači da ona ima dobar kvalitet prosvjetljenja. Moj *fašen* će joj pomoći da odstrani najveći dio te misaone karme. To je česta pojava. Kada se to pojavi, sve zavisi od toga da li čovjek sam može nadjačati takve loše misli. Ako možeš ostati istrajan, karma može biti odstranjena.

Tvoje misli moraju biti ispravne

Šta znači imati neispravne misli? To se odnosi na onog ko sebe stalno ne može smatrati praktikantom. Praktikant će naići na poteškoće za vrijeme kulture. Kada poteškoće dođu, mogu se ispoljiti kao konflikt između dvije osobe. Pojaviće se intrige i međusobna borba itd., što će imati direktan uticaj na tvoj *xinxing*. Biće mnogo takvih situacija vezanih za ovo. Na šta ćeš još naići? Tvoje fizičko tijelo će se odjednom osjećati neprijatno. Zbog plaćanja karmičkih dugova, to će se ispoljiti u mnogim aspektima. U određenom trenutku ćeš biti doveden do toga da nećeš moći jasno razlučiti da li je nešto istina ili neistina, ispravno ili pogrešno, sumnjaćeš u to da li tvoj *gong* postoji ili ne, da li se možeš kultivirati i stvarno uspjeti u kultivaciji ili ne, da li postoje Bude ili ne i da li su pravi ili lažni. Takve situacije će se opet pojaviti u budućnosti i daće ti lažni dojam da osjećaš da te stvari ne postoje i da su sve lažne - to je upravo da bi se vidjelo da li možeš ostati odlučan. Ako kažeš da obavezno moraš

ostati odlučan, s takvom mišlju zaista možeš ostati odlučan i prirodno ćeš postupiti dobro, jer se tvoj *xinxing* već poboljšao. Međutim, trenutno si još uvijek tako nestabilan, ako dozvolimo da odmah dobiješ takve poteškoće, uopšte ih nećeš moći prepoznati i nećeš se više moći kultivirati. Poteškoće se mogu pojaviti u različitim oblicima.

Za vrijeme kultivacije, čovjek se na ovaj način mora kultivirati ka visokim nivoima. Tako će neki od nas, čim se ne budu osjećali fizički dobro negdje u tijelu, misliti da su bolesni. On sebe jednostavno ne može smatrati praktikantom. Kad naiđe na tako nešto, misliće da je to bolest. Zašto se pojavljuje toliko poteškoća? Ja vam kažem da je mnogo toga već odstranjeno i da su tvoje teškoće već dosta smanjene. Da one za tebe nisu bile odstranjene, možda bi te ta teškoća već koštala života, ili možda nikad više ne bi mogao ustati iz kreveta. Kad naiđeš na malu neprijatnost, osjećaš se loše, ali kako to može biti ugodno? Na primjer, kada sam držao predavanje u Changchunu, bio je jedan čovjek s odličnom urođenom osnovom. On je stvarno bio od dobrog materijala i ja sam ga također zapazio. Želio sam mu malo povećati teškoće, da bi mogao brže vratiti svoje karmičke dugove i stići do otvaranja *gonga*. To mi je bio plan. Jednog dana, iznenada je izgledalo kao da je doživio moždani udar, srušio se na pod i osjetio da se ne može micati, kao da su mu njegova četiri udova otkazala službu. Odvezli su ga hitno u bolnicu. Nakon toga je mogao ustati i opet je mogao hodati. Razmislite o tome, kako čovjek može tako brzo opet ustati i pomicati ruke i noge, ako je doživio moždani udar? Ali on je poslije rekao da je učenje Falun Dafa krivo za to i da mu je uzrokovalo probleme. Ali nije razmislio o tome kako se tako brzo mogao oporaviti od moždanog udara? Da danas nije prakticirao Falun Dafa, možda bi stvarno umro nakon pada, ili bi ostao paralizovan do kraja svog života i zaista dobio moždani udar.

Zaista je veoma teško spasiti ljude. Toliko toga je učinjeno za njega, ali on još uvijek ne može to shvatiti, pa još govori tako nešto. Neki stariji učenici su mi rekli: "Učitelju, zašto se po cijelom tijelu osjećam loše? Išao sam u bolnicu više puta, ali injekcije uopšte nisu pomogle, a ni tablete nisu djelovale." Čak se ni ne stidi da mi to kaže! Naravno da neće djelovati. To nije bolest, kako to može djelovati? Idi i napravi sistematski pregled. Nema nikakvih problema, a ti se jednostavno osjećaš loše. Jedan od naših učenika je otišao u bolnicu i nekoliko igala za injekcije se iskrivilo tokom uboda. Na kraju, tekući lijek je špricnuo van, a igla injekcije nije mogla prodrijeti. Tada mu je sinulo: "Ah, pa ja sam praktikant, ne želim više dobivati injekcije." Tek tada je shvatio da ne treba dobivati injekcije. Zbog toga, kad god naiđemo na poteškoće, trebamo stvarno obratiti pažnju na to. Neki ljudi misle da im ja jednostavno ne dozvoljavam da idu u bolnicu, pa misle: "Ne dozvoljavaš mi da idem u bolnicu, onda ću posjetiti *qigong* majstora." On to još uvijek smatra bolešću, pa ide posjetiti *qigong* majstora. Gdje može naći istinskog *qigong* majstora? Ako nađe lažnog *qigong* majstora, biće upropašćen za tren.

Mi kažemo: "Kako možeš razlikovati prave *qigong* majstore od varalica?" Mnogi *qigong* majstori su samozvani. Ja sam testiran i imam kod sebe dokumente s rezultatima testiranja naučno-istraživačkih institucija. Mnogi *qigong* majstori su tobožnji i samozvani i mnogi od njih varaju i obmanjuju ljude. Ti tobožnji *qigong* majstori također mogu liječiti bolesti. Kako oni to mogu raditi? Oni su zaposjednuti od strane duha, bez posjedujućeg duha ne bi mogli varati ljude! Posjedujući duh također može emitovati energiju i liječiti bolesti, jer on također postoji u obliku energije i može vrlo lako kontrolisati obične ljude. Ali, kao što sam rekao: Šta posjedujući duh šalje na tvoje tijelo kad liječi tvoju bolest? Na veoma mikroskopskom nivou sve to izgleda kao posjedujući duh. Šta možeš uraditi kad je to emitovano na tvoje tijelo? "Lako je prizvati duha, ali ga je teško ponovo poslati nazad." Ne

želimo govoriti o svakodnevnim ljudima, jer oni samo žele ostati svakodnevni ljudi i privremeno se osjećati dobro. Međutim, ti si praktikant, ne želiš li konstantno čistiti svoje tijelo? Ako su te stvari došle na tvoje tijelo, kad ćeš ih se moći osloboditi? Uz to, one također imaju izvjesnu količinu energije. Neki ljudi će pomisliti: "Kako im *falun* dozvoljava doći na tijelo? Zar nas ne štite Učiteljevi *fašeni*?" Postoji princip u našem univerzumu: Ako ti sam nešto želiš, niko se neće miješati. Ako ti sam želiš to imati, niko se neće miješati. Moj *fašen* će te zaustaviti i dati ti neke znakove. Ali ako vidi da uvijek tako postupaš, neće se više miješati. Kako se neko može natjerati na kultiviranje? Niko te ne smije natjerati ili prisiliti na kultivaciju. Ti se stvarno sam moraš povisiti. Ako se ne želiš povisiti, niko ništa ne može uraditi. Principi su ti objašnjeni i Fa ti je također objašnjen. Ako se još uvijek ne želiš sam poboljšati, koga možeš okriviti za to? Ti sam to želiš, zato se *falun* neće miješati, a ni moji *fašeni*, to je sigurno. Neki ljudi idu na predavanja drugih *qigong* majstora i kada se vrate kući, osjećaju se veoma neprijatno. Naravno da je to tako. Ali zašto te moj *fašen* nije zaštitio? Zbog čega si išao tamo? Išao si tamo i slušao, zar nisi za nečim težio? Zar je to moglo ući da nisi pustio da uđe u tvoje uši? Neki su ljudi čak deformisali svoj *falun*. Mogu vam reći da *falun* vrijedi puno više nego tvoj život. On je više biće koje se ne smije tek tako uništiti. U današnje vrijeme postoji mnogo tobožnjih *qigong* majstora i neki od njih su prilično poznati. Voditeljima Kineskog istraživačkog društva za *qigong* nauke sam rekao sljedeće: U staroj Kini, jednom se pojavila Da Ji, koja je u carskom dvoru izazvala nered i nevolje. Ta lisica je bila jako obijesna, ali ipak nije bila tako loša kao što su današnje lažne *qigong* prakse, koje su uzrokovale kaos u cijeloj zemlji. Mnogi su ljudi postali žrtve toga! Možda izgledaju sasvim dobro na površini, ali koliko mnogo ljudi nosi te stvari na svojim tijelima? Kada on to emituje, odmah će se prikačiti na tebe, to je tako divlje. Zbog toga je svakodnevnim ljudima jako teško prepoznati to na površini.

Neki ljudi možda misle: "Pohađao sam danas ovaj *qigong* seminar i nakon što sam poslušao objašnjenja Li Hongzhija, shvatio sam koliko je *qigong* opsežan i dubokouman! I idući put, kada bude bilo drugih *qigong* seminara, ići ću i na njih." Ja ti savjetujem da nikako ne ideš tamo. Ako budeš slušao nešto loše, to će ući kroz tvoje uši. Vrlo je teško spasiti osobu i također je jako teško promijeniti tvoje misli i dovesti tvoje tijelo u red. Postoji previše lažnih *qigong* majstora. I ako se radi o pravom *qigong* majstoru ispravne škole, da li je on stvarno čist? Neke životinje su veoma agresivne i, iako nemaju sposobnost prikačiti se na njegovo tijelo, on ih nije u stanju otjerati. On nema sposobnost suočiti se s tim stvarima u velikim razmjerima. Pogotovo kod njegovih učenika, dok on emituje *gong*, unutra su umiješane sve moguće stvari. Iako je sam *qigong* majstor možda prilično ispravan, njegovi učenici nisu i oni imaju svakakve vrste posjedujućih duhova i sve moguće na sebi.

Ako zaista želiš kultivirati Falun Dafa, nemoj ići tamo. Naravno, ako ne želiš kultivirati Falun Dafa, nego želiš prakticirati sve, onda idi tamo. Ja te neću zaustaviti i ti nisi Falun Dafa učenik. I ako budeš imao problema, nemoj reći da je prakticiranje Falun Dafa krivo za to. Samo ako se ponašaš prema standardu *xinxinga* i kultiviraš se prema Dafa, tek tada si istinski Falun Dafa praktikant. Neki ljudi pitaju: "Možemo li dolaziti u dodir s ljudima koji prakticiraju druge vrste *qigonga*?" Ja vam kažem da oni samo vježbaju *qigong*, dok ti kultiviraš Dafa. Nakon ovog seminara, nastaće ogromna razlika između tvog i njegovog nivoa. Ovaj *falun* je formiran kultivacijom kroz tako mnogo generacija i vrlo je moćan. Naravno, ako želiš biti u kontaktu s njima i možeš biti siguran da ništa ne prihvataš od njih i ne želiš dobiti ništa od njih i možete ostati samo obični prijatelji, neće biti nikakvih problema. Međutim, ako ta osoba uistinu ima nešto na svom tijelu, onda je to jako loše, pa je bolje da ne

dolaziš u kontakt s njom. Ako bračni partner prakticira drugu vrstu *qigonga*, mislim da ni to nije veliki problem. Ali ima jedna stvar: ti prakticiraš ispravan put, tako da, kad jedna osoba prakticira, drugi će imati koristi od toga. Ako tvoj bračni partner prakticira nešto loše, možda nosi nešto loše u svom tijelu. Zbog tvoje sigurnosti će i on biti očišćen. U drugim dimenzijama će sve biti očišćeno za tebe, i tvoje kućno okruženje će biti očišćeno. Ako okruženje nije očišćeno, kako bi uopšte mogao prakticirati sa svim vrstama smetnji?

Međutim, postoji jedan slučaj u kojem moj *fašen* ne može to očistiti. Jednog dana je jedan od mojih učenika vidio moj *fašen* kako dolazi. Bio je veoma sretan i uzbuđen: "Učiteljev *fašen* je ovdje. Učitelju, molim vas uđite." Moj *fašen* je rekao: "Tvoja soba je previše neuredna i ovdje ima previše stvari." Onda je moj *fašen* otišao. Uopšteno govoreći, ako ima previše duhova u drugim dimenzijama, moj *fašen* će ih očistiti. Međutim, njegova soba je bila puna svakakvih loših knjiga o *qigongu*. On je to razumio, pa je sredio knjige, tako što je neke spalio, a neke prodao. Moj *fašen* se tada vratio. To je ono što mi je učenik ispričao.

Ima i ljudi koji posjećuju gatare. Neko me je upitao: "Učitelju, ja sam sad praktikant Falun Dafa. Također me veoma zanimaju stvari kao što su *Knjiga Promjena* ili gatanje. Mogu li ih i dalje upotrebljavati?" Recimo to ovako: Ako imaš određenu količinu energije, tvoje riječi će imati dejstvo. Ako nešto nije tako, a ti svojim riječima učiniš da bude tako, možda si time učinio nešto loše. Običan čovjek je veoma slab. Poruke koje nosi su nestabilne i vjerovatno će se u izvjesnoj mjeri promijeniti. Ako nešto izgovoriš, ta će se nevolja možda pojaviti. Ili ako ta osoba ima mnogo karme i mora je otplatiti, a ti joj i dalje govoriš da će je pratiti sreća, zar bi to bilo u redu ako ona ne može otplatiti svoju karmu? Ne škodiš li toj osobi? Neki ljudi jednostavno ne mogu otpustiti te stvari i svojeglavo se drže toga kao da imaju neku vrstu posebnog talenta. Nije li to vezanost? Osim toga, čak i ako zaista znaš istinu, kao praktikant trebaš čuvati svoj *xinxing* i ne smiješ olako otkrivati nebeske tajne svakodnevnim ljudima. To je princip. Kako god računao pomoću *Knjige promjena*, neke od tih stvari svakako više nisu istina. Ti računaš ovako i onako i neke stvari su istinite, a neke pogrešne. Stvari kao što je proricanje sudbine smiju postojati u društvu svakodnevnih ljudi. Ti si neko ko stvarno ima *gong* i rekao bih da istinski kultivator treba slijediti više standarde. Međutim, neki pitaju druge da im gataju, govoreći: "Gataj mi kako mi idu stvari i kako napredujem u kultivaciji?" ili "Da li ću imati neke poteškoće?" Oni pitaju druge da im predkažu takve stvari. Ali, ako bi ti te poteškoće bile predskazane, kako bi uopšte mogao napredovati? Cijeli život praktikanta je preuređen. Linije na njegovom dlanu, crte lica, podaci o rođenju, kao i druge informacije u njegovom tijelu su promijenjene. Ako budeš išao gatar, vjerovaćeš joj. Zašto bi inače išao k njoj? Ono što ona može reći su samo neke površne stvari i stvari iz tvoje prošlosti, ali to se u suštini već promijenilo. Razmisli o tome, ako si išao kod gatare, zar je nisi slušao i vjerovao joj? Zar ti to nije stvorilo mentalno opterećenje? Nastalo je opterećenje i ti misliš na to, nije li to vrsta vezanosti? Kako onda možeš otkloniti tu vezanost? Nisi li sam sebi stvorio dodatnu poteškoću? Nećeš li morati pretrpiti još više teškoća da bi odstranio tu time nastalu vezanost. Kod svakog testa i svake teškoće postoji pitanje da li se možeš uzdići ili pasti u kultivaciji. Kultivacija je već sama po sebi teška, ali ti još sam sebi dodaješ te dodatne poteškoće, kako ćeš moći to savladati? Zbog toga ćeš možda naići na teškoće i neugodnosti. Drugima nije dozvoljeno vidjeti tvoj promijenjeni put. Ako bi ga neko mogao vidjeti i reći ti kada ćeš imati poteškoće, kako bi se još mogao kultivirati? Zbog toga drugima uopšte nije dozvoljeno to vidjeti. Nikome iz drugih škola nije dozvoljeno to vidjeti, čak ni učenici iste škole ne smiju to vidjeti. Niko to ne može tačno predvidjeti, jer je tvoj život već preuređen, to je život za kultivaciju.

Neki su me pitali da li mogu čitati knjige drugih religija i druge *qigong* knjige. Mi kažemo da religiozne knjige, a posebno knjige iz budizma, sve uče ljude kako da kultiviraju svoj *xinxing*. Mi također pripadamo Buda školi, pa to ne bi trebao biti problem. Međutim, ima jedna stvar: U mnogim sutrama ima nekih dijelova koji su pogrešno prevedeni, a što je još gore, mnoge sutre su bile protumačene sa raznih nivoa i proizvoljno su pravljene definicije. To je zapravo narušilo Fa. Neki ljudi koji su proizvoljno tumačili sutre bili su predaleko od nivoa Bude i uopšte nisu razumjeli pravo značenje sutri i zato su imali različita shvatanja. Nije ti lako potpuno razumjeti sutre i ti ih sam ne možeš shvatiti. Ali ti kažeš: "Mi se jednostavno interesujemo za sutre". Ako uvijek proučavaš sutre, to znači da se već kultiviraš u toj školi, jer su u sutrama također integrisani *gong* i Fa te škole. Čim ih učiš, učiš tu školu, postoji taj problem. Ako ih detaljno izučavaš i kultiviraš se prema njima, možda već slijediš tu školu kultivacije, a ne našu. Kod kultivacije se oduvijek zahtijevalo da se ne prakticiraju dvije škole istovremeno. Ako se zaista želiš kultivirati u ovoj školi, onda čitaj samo knjige ove škole.

Što se tiče knjiga o *qigongu*: nemoj ih čitati, ako se želiš kultivirati. Prije svega, nemoj čitati *qigong* knjige koje su nedavno objavljene. Što se tiče knjiga kao što su *Klasika unutrašnje medicine žutog cara*, *Istinske upute za kultivaciju prirode i dugovječnosti* ili *Tao Zang*, radi se o istom; iako one nemaju tako puno loših stvari, one nose poruke raznih nivoa. One su same po sebi metode kultivacije. Ako ih čitaš, te stvari će ti biti dodane i smetaće ti. Ako smatraš da je jedna rečenica dobra, u redu, odmah će to doći i biti umiješano u tvoj *gong*. Iako to nije nešto loše, šta misliš, kako ćeš se kultivirati ako je nešto drugo odjednom umiješano u tebe? Neće li to također prouzrokovati probleme? Šta će se desiti sa televizorom ako u elektronske dijelove u televizoru ugradiš dodatni dio? Odmah će se pokvariti. To je princip. Uz to su mnoge današnje *qigong* knjige lažne i nose svakakve poruke u sebi. Dok je jedan od naših učenika listao jednu *qigong* knjigu, ogromna zmija je iskočila iz knjige. Naravno, ne želim ići u detalje. Upravo sam govorio o tome kako praktikanti mogu sami sebi uzrokovati probleme kada nisu u stanju ispravno se ponašati. To znači da su nevolje uzrokovane jer njihovo srce nije ispravno. Mi ukazujemo na to jer je dobro za vas, tako ćete znati kako postupati s tim i kako ih prepoznati, da se u budućnosti ne bi pojavili problemi. Iako nisam jako naglasio ove riječi, morate stvarno voditi računa o tome, to je često uzrok problema, problemi se često pojavljuju oko toga. Kultivacija je izuzetno teška i vrlo ozbiljna. Ako si samo malo nemaran, možeš pasti i trenutno biti upropašten. Zato tvoje misli moraju biti ispravne.

***Qigong* borilačkih vještina**

Osim metoda unutrašnje kultivacije, postoji i *qigong* borilačkih vještina. Kada govorim o *qigongu* borilačkih vještina, želim još nešto naglasiti, naime da se danas u zajednici kultivatora mnogo toga naziva vrstom *qigonga*.

Sada su se pojavili i takozvani *qigong* slikarstva, *qigong* muzike, *qigong* kaligrafije i *qigong* plesa. Postoje svakakve vrste. Da li je sve to *qigong*? Mislim da je to veoma čudno. Rekao bih da je to kvarenje *qigonga*. To nije samo kvarenje *qigonga*, nego jednostavno uništavanje *qigonga*. Kakva je njihova teoretska osnova? Da li je to *qigong* kad kod slikanja, pjevanja, plesa i pisanja uđemo u stanje transa, u takozvano *qigong* stanje? To se ne može tako shvatiti. Rekao bih, zar to nije vrijeđanje *qigonga*? *Qigong* je široko i duboko znanje o

kultivaciji ljudskog tijela. Ah, biti u transu znači da je to *qigong*? Kako bi se onda zvalo kad bi u transu išli u toalet? Zar to nije vrijeđanje *qigonga*? Rekao bih da je to vrijeđanje *qigonga*. Na Orijentalnom sajmu zdravlja prije dvije godine tamo je bio takozvani *qigong* kaligrafije. Šta je to *qigong* kaligrafije? Otišao sam do štanda tog *qigonga* kaligrafije da pogledam i vidio čovjeka koji je pisao kistom. Nakon što bi završio s pisanjem, na svaki znak bi rukama emitovao *qi*, a to što je emitovao je sve bio crni *qi*. Njegova glava je bila ispunjena novcem i slavom. Kako bi on mogao imati *gong*? Ni njegov *qi* ne može biti dobar *qi*. Njegove kaligrafije su visile tamo i prodavale su se po visokoj cijeni, ali su ih samo stranci kupovali. Rekao bih, ko god da ih je kupio i odnio kući, imao je peh. Kako crni *qi* može biti dobar? Čak i lice te osobe je izgledalo crno. On je bio opsjednut novcem i mislio je samo na novac. Kako on može imati *gong*? Vizit-kartica tog čovjeka je bila puna titula, poput: "Međunarodni *qigong* kaligrafije", itd. Pitam se da li se to može nazivati *qigongom*?

Razmislite o tome: Osamdeset do devedeset posto ljudi koji završe ovaj moj seminar, neće samo biti oslobođeni od svih bolesti, nego će i razviti *gong*, istinski *gong*. To što tvoje tijelo nosi na sebi je prilično natprirodno. Ako sam prakticiraš, nećeš to moći razviti kultivacijom, čak i da se cijeli život kultiviraš. Kad bi mladi ljudi ovog trena počeli prakticirati, ni za cijelog života ne bi mogli razviti sve te stvari koje sam vam dao, a istovremeno još trebaš i upute istinskog mudrog učitelja. Trebalo nam je tako mnogo generacija da razvijemo ovaj *falun* i ove mehanizme i sada su sve ove stvari odjednom usađene u vaša tijela. Zato vam kažem, nemojte ih tako lako izgubiti, samo zato što ste ih lako dobili. Te stvari su izuzetno dragocjene i njihova vrijednost je neprocjenjiva. To što nosiš sa sobom nakon ovog kursa je istinski *gong*, visokoenergetska supstanca. Kad dođeš kući i napišeš par riječi, sasvim svejedno da li je tvoj rukopis lijep ili ne, one će nositi *gong*! Prema tome, da li bi nakon ovog kursa svi trebali dobiti titulu "majstora" i da li bi svi trebali postati majstori *qigong* kaligrafije? Ja bih rekao da se to ne može shvatiti na taj način. Jer, kao čovjek koji stvarno ima *gong* i energiju, ne trebaš je namjerno emitovati. Na svim stvarima koje si dodirnuo ostaće energija i one će sve blistati.

Jednom sam vidio časopis u kojem je bila vijest o održavanju kursa *qigonga* kaligrafije. Prelistao sam časopis da vidim kako će se podučavati. Tamo je stajalo: prvo treba podesiti svoje disanje, udisati i izdisati. Onda treba meditirati 15 do 30 minuta, dok se misli koncentriraju na *qi* u polju eliksira. Zatim mislima treba podići *qi* iz polja eliksira i dovesti ga do podlaktice, uzeti kist u ruku i umočiti ga u tintu, a zatim usmjeriti *qi* na vrh kista. Kad njegova misao stigne tamo, počet će pisati. Zar to nije obmana? Znači, kada se *qi* pomjeri na neko izvjesno mjesto, to je već forma *qigonga*? U tom slučaju, kad jedemo, ako prvo malo meditiramo, a zatim uzmemo štapiće, usmjerimo *qi* na vrhove štapića i jedemo, to bi se onda moglo nazvati *qigong* ishrane, zar ne? To što jedemo će čak biti energija. Samo razgovaramo o ovoj temi. Rekao bih da je to zaista vrijeđanje *qigonga*, oni smatraju *qigong* nečim tako površnim. Zato to ne možemo shvatiti na taj način.

Međutim, *qigong* borilačkih vještina se može smatrati nezavisnim *qigongom*. Zašto? Zato što je predavan tokom nekoliko hiljada godina i ima kompletan sistem teorija kultivacije i kompletan sistem kultivacijskih metoda, pa se može smatrati cjelovitim sistemom. Ipak, *qigong* borilačkih vještina je samo nešto što spada u najniži nivo naših unutrašnjih metoda kultivacije. Tvrdi *qigong* je vrsta energetske mase, supstance koja je namijenjena isključivo za udarce. Daću vam jedan primjer: Bio je jedan praktikant u Pekingu koji nije smio ništa

pritisnuti svojim rukama nakon što je prisustvovao našem Falun Dafa seminaru. Pri kupovini dječjih kolica u prodavnici, rukom je isprobavao čvrstoću kolica. Čim je malo pritisnuo, kolica su se uz glasan prasak raspala. Njemu je to bilo jako čudno. Kad je došao kući i sjeo na stolicu, također nije smio rukama pritisnuti stolicu. Kad je rukama pritisnuo stolicu, stolica se s praskom razbila u komadiće. Upitao me šta se to događa. Nisam mu objasnio jer sam se brinuo da bi se mogla pojaviti vezanost. Rekao sam da je to prirodna pojava, da slijedi prirodan tok i da se ne brine oko toga, to su sve dobre stvari. Ako se ta natprirodna sposobnost upotrijebi kako treba, kamen se rukama može pretvoriti u prah. Zar to nije tvrdi *qigong*? Međutim, on nikad nije prakticirao tvrdi *qigong*. Sve takve natprirodne sposobnosti obično se pojavljuju u metodama unutrašnje kulture. Ali zato što ljudi teško mogu dobro vladati svojim *xinxingom*, obično ti neće biti dopušteno upotrebljavati te natprirodne sposobnosti kada se razvijaju. Posebno kod kulture na niskom nivou, kada čovjekov *xinxing* još nije poboljšao, natprirodne sposobnosti, koje se pojavljuju na niskim nivoima, uopšte se neće pokazati. S vremenom tvoj nivo raste, pa takve stvari više neće biti od koristi i također se neće pokazati.

Kako se konkretno prakticira *qigong* borilačkih vještina? Kod prakticiranja *qigonga* borilačkih vještina govori se o pokretanju *qi*. Međutim, u početku nije lako pokrenuti *qi*. Ti misliš da čim želiš pokrenuti *qi*, da ga već možeš pokrenuti. Ne možeš. Šta onda oni rade? Oni moraju trenirati ruke, obje strane tijela, stopala, noge, podlaktice, nadlaktice i glavu. Kako ih oni treniraju? Neki ljudi rukama ili dlanovima udaraju u drvo. Neki ljudi rukama snažno udaraju u stijenu. Možeš zamisliti kako je to bolno kad kosti udare u to. Čim malo jače udare, njihove ruke krvare. Ipak, *qi* još uvijek ne može biti pokrenut. Šta onda treba raditi? On će početi mahati rukama da bi krv tekla u ruke, tada će šake i ruke oteći. One su zaista otekle. Nakon toga, kad udari u stijenu, njegove kosti će biti podstavljene i neće imati direktan dodir sa stijenom tako da neće biti tako bolno. Dok on prakticira, njegov učitelj će ga podučavati i s vremenom će naučiti kako usmjeravati *qi*. Međutim, nije dovoljno biti u stanju usmjeravati *qi*. Protivnik u pravoj borbi neće čekati na tebe. Naravno, kad čovjek može usmjeravati *qi*, moći će se odupirati udarcima i vjerovatno neće osjetiti bol čak ni kad ga udare debelom palicom. Nakon što je usmjerio *qi* u određeni dio tijela, taj dio tijela će oteći. Međutim, *qi* je samo sasvim primitivna stvar u početnom stadiju i dok on dalje prakticira, *qi* se transformiše u visokoenergetsku supstancu. Dok se on transformiše u visokoenergetsku supstancu, postepeno će formirati energetsku masu visoke gustoće. Ta energetska masa je inteligentna. Zato je ona također masa natprirodne sposobnosti tj. jedna vrsta natprirodne sposobnosti. Ipak, ta natprirodna sposobnost je specijalno namijenjena za udaranje i odbranu od udaraca. Neće funkcionisati ako se upotrijebi za liječenje bolesti. Ta visokoenergetska supstanca se nalazi u drugoj dimenziji i ne putuje u našoj dimenziji, zbog toga je njeno vrijeme brže nego naše. Kad želiš nekog udariti, ne trebaš usmjeravati *qi*, niti misliti na to, jer će tvoj *gong* već biti tamo. Kad te drugi krenu udariti i ti se rukom zaštitiš, *gong* će također već biti tamo. Koliko god brzo udario, *gong* je brži od tebe, jer je koncept vremena različit na obje strane. Vježbanjem *qigonga* borilačkih vještina, čovjek može razviti nešto kao Dlan željeznog pijeska, Dlan cinobera, Noga Vajre, Stopalo Arhata, što su vještine svakodnevnih ljudi. Svakodnevni ljudi mogu vježbanjem steći takve vještine.

Najveća razlika između *qigonga* borilačkih vještina i metoda unutrašnje kulture je sljedeća: *Qigong* borilačkih vještina zahtijeva prakticiranje u pokretu, pa se *qi* kreće ispod kože. Zbog toga što se prakticira u pokretu, čovjek ne može ući u stanje mirnoće i njegov *qi* ne ide u polje eliksira, već prolazi ispod kože i kroz mišiće. Zato ne može biti kultivirana

dugovječnost, niti se mogu iskultivirati visoke natprirodne sposobnosti. Naša metoda unutrašnje kulture zahtijeva da se prakticira u stanju mirnoće. Standardne metode kulture zahtijevaju da *qi* uđe u polje eliksira i u područje trbuha. One zahtijevaju prakticiranje u stanju mirnoće i transformaciju *bentija*, što omogućava kultiviranje života i kultiviranje do još viših nivoa.

Vjerovatno ste čuli za razne kung-fu sposobnosti o kojima se piše u romanima, kao što su: „štit zlatnog zvona“, „košulja od željezne tkanine“, ili „probijanje jablana sa razdaljine od sto koraka“. Sa sposobnošću levitiranja čovjek se može kretati u vazduhu. Neki čak mogu ući u druge dimenzije. Da li postoje takve sposobnosti? Da, sigurno. Međutim, ne postoje među svakodnevnim ljudima. Oni koji su stvarno iskultivirali tako visoke sposobnosti ne smiju ih pokazivati i praviti se važni time. Zato što takva osoba ne prakticira samo borilačke vještine, nego je već sasvim izašla iznad nivoa svakodnevnih ljudi, mora se kultivirati prema zahtjevima metode unutrašnje kulture. Ona mora voditi računa o svom *xinxingu* i olako uzimati stvari kao što su materijalni interesi. Iako može iskultivirati takve sposobnosti, ona ih nakon toga ne smije po volji upotrebljavati među svakodnevnim ljudima. U redu je ako ih upotrebljava kada to niko ne vidi. Sigurno ste čitali u romanima kako se likovi bore i ubijaju zbog stvari kao što su uputstva za mačevanje, zbog blaga, ili zbog žena. Ti ljudi imaju velike sposobnosti, pojavljujući se i nestajući kao bogovi. Razmislite: Nije li onaj ko zaista posjeduje takve sposobnosti to postigao unutrašnjom kultivacijom? On ih je tek mogao iskultivirati tako što je vodio računa o svom *xinxingu*, on je već odavno olako uzeo reputaciju, dobitak i sve vrste različitih želja. Kako on može ubijati druge? Kako mu novac i bogatstvo mogu biti tako bitni? To je apsolutno nemoguće. To su samo umjetnička pretjerivanja. Ljudi su samo žedni uzbuđenja i čine ono što će utoliti tu žeđ. Autori iskorištavaju to, pa će pisati bilo šta da bi utolili tvoju žeđ i da bi ti ugodili. Što nevjerovatnije on piše, to više želiš to čitati, ali to su samo umjetnička pretjerivanja. Onaj ko stvarno ima takve sposobnosti neće tako postupati i još manje ih može primijeniti da bi ih prikazao u javnosti.

Hvalisanje

Zbog toga što se kultiviramo među svakodnevnim ljudima, mnogi naši praktikanti ne mogu se osloboditi mnogih svojih vezanosti. Mnoge od tih vezanosti su im već postale prirodne, pa ih oni i ne primjećuju. Hvalisanje se može pojaviti u svakoj situaciji, može se pojaviti čak i kada čovjek radi nešto dobro. Kad neki ljudi u svakodnevnom životu dobiju male prednosti, kada se radi o ugledu ili dobitku, razglase to na sve strane i hvale se: "Ja sam sposoban i jak". I kod nas ima takvih slučajeva. Kada neki praktikanti malo bolje prakticiraju, ili ako vide nebeskim okom nešto jasnije ili malo bolje izvode vježbe, također se hvale time.

Neki ljudi kažu: "Čuo sam nešto od Učitelja Lija" i svi će ga okružiti i slušaće ga. On govori i širi glasine po sopstvenom nahodanju i još ukrašava svoju priču. Šta je njegova namjera? On se želi praviti važan. Neki ljudi šire glasine, on kaže njemu, ona kaže njoj, on govori sa velikim oduševljenjem, kao da je u toku i kao da toliko mnogo naših praktikanata nisu tako dobro razumjeli kao on, ili ne znaju toliko koliko i on. Njemu je već postalo prirodno da to čini, možda to radi nesvjesno. On u podsvijesti ima želju za hvalisanjem. Zašto bi inače širio takve glasine? Neki ljudi nagađaju o tome kada će se Učitelj "vratiti u planine". Ja nisam došao s planina. Zašto bi se vratio u planine? Drugi kažu da je Učitelj na taj i taj dan nekom nešto rekao ili tretirao nekoga posebno. Kakvo je dobro od širenja takvih stvari? To uopšte ne čini dobro. Međutim, vidjeli smo da je to njegova vezanost, jedna vrsta hvalisanja.

Ima ljudi koji me pitaju za autogram. Kakva je njihova namjera? To je običaj svakodnevnih ljudi da čuvaju nečiji autogram kao uspomenu. Ako se ne kultiviraš, neće ti ništa koristiti, čak i ako ti dam autogram. Svaka riječ u mojim knjigama je moj lik i *falun* i svaku rečenicu sam ja izgovorio. Zašto ti još treba moj autogram? Neki ljudi misle: "Kad imam autogram, štitiće me Učiteljeve poruke." Oni još uvijek vjeruju u stvari kao što su "poruke". Ali mi ne marimo za "poruke". Ova knjiga je neprocjenjiva. Šta još tražiš? Sve su to odrazi tih vezanosti. Neki ljudi promatraju učenike koji putuju sa mnom i oponašaju način njihovog govora i ponašanja, a ne znaju da li je to dobro ili loše. Zapravo nije bitno kako se ko ponaša, postoji samo jedan Fa. Samo vladanjem u skladu s Dafom može se dostići pravi standard. Ljudi koji sa mnom putuju nisu dobili nikakav specijalni tretman i isti su kao i drugi. Oni su samo članovi Istraživačkog udruženja. Nemoj dozvoliti da se pojavi ta vezanost. Kada se ta vezanost pojavi, često ćeš nehotice uzrokovati štetu za Dafa. Senzacionalan trač koji si izmislio može čak izazvati konflikte ili podstaći vezanost učenika, tako da će oni pokušavati da se približe Učitelju, očekujući da čuju nešto više, itd. Zar to nije taj problem?

Do čega još može dovesti takvo hvalisanje? Već dvije godine širim put kultivacije. Dio starijih Falun Dafa učenika vjerovatno će uskoro dostići stanje Otvaranja *gonga*, a drugi dio će ući u stanje postepenog prosvjetljenja, oni će iznenada ući u stanje postepenog prosvjetljenja. Zašto se u početku nisu pojavile takve natprirodne sposobnosti? Zato što ne bi funkcionisalo da sam te odjednom pogurao tako visoko, a da ti još nisi otpustio vezanosti svakodnevnih ljudi. Naravno, tvoj *xinxing* se već značajno povisio, ali još uvijek imaš mnogo vezanosti koje nisi odbacio. Zato ti nije dozvoljeno imati te natprirodne sposobnosti. Nakon što je taj stadij prošao i nakon što si se stabilizirao, bićeš odjednom doveden u stanje postepenog prosvjetljenja. U stanju postepenog prosvjetljenja, tvoje nebesko oko će biti otvoreno na veoma visokom nivou i kod tebe će se pojaviti mnogo natprirodnih sposobnosti. U stvari, mogu vam reći, čim se počneš istinski kultivirati pojavice se mnogo natprirodnih sposobnosti. Ti si već dostigao tako visok nivo, zbog toga imaš mnogo natprirodnih sposobnosti. Uskoro će se kod mnogih među nama vjerovatno pojaviti takvo stanje. Također, postoje i ljudi koji se ne mogu visoko kultivirati. Stvari koje ta osoba nosi u sebi, u kombinaciji sa njenom sposobnošću podnošenja patnje, su fiksne, tako da će neki ljudi doći do otvaranja *gonga* i do prosvjetljenja, do potpunog prosvjetljenja na vrlo niskom nivou. Biće i takvih ljudi.

Objasnio sam vam to, jer vam želim reći da, kada se pojave takvi ljudi, nikako ih nemojte smatrati veličanstvenim prosvjetljenim osobama. To je veoma ozbiljan problem u kultivaciji. Ispravno je samo djelovanje u skladu s Dafa. Nemoj slijediti ili slušati nekoga kada vidiš njegove natprirodne sposobnosti ili božanske moći ili nešto drugo. Naškodićeš mu, jer će se kod njega razviti vezanost oduševljenja, pa će na kraju sve izgubiti, sve će mu se zatvoriti i konačno će pasti sve do dna. Osoba koja je dostigla stanje otvaranja *gonga* također može pasti. Ako se neko ne može ponašati ispravno, on će također pasti, čak i ako je već dostigao prosvjetljenje. Čak i Buda može pasti ako se ne ponaša ispravno, a da i ne govorimo o tebi, osobi koja se kultivira među svakodnevnim ljudima! Zbog toga, koliko god natprirodnih sposobnosti razvio, koliko god da su moćne tvoje božanske moći, u svakom slučaju se moraš dobro ponašati. U novije vrijeme, među nama ima nekih koji ovdje sjede i koji na trenutak nestanu i ponovo se pojave. To je naprosto tako. Pojaviće se čak još veće božanske moći. Kako treba postupati s tim u budućnosti? Kao naš učenik i praktikant, ne trebaš ih idolizirati ili težiti za tim stvarima, bilo da se u budućnosti takve stvari pojave kod tebe ili kod drugih. Čim se tvoje srce promijeni, gotovo je i pašćeš. Možda je tvoj nivo čak viši od njegovog, samo se tvoje božanske moći još nisu pojavile. U najmanju ruku, pao si na

tom određenom problemu, zbog toga budi siguran da posebno obratiš pažnju na to. Stavili smo to na veoma važno mjesto, jer će se tako nešto uskoro pojaviti. Kad se pojavi, neće ići ako se ne možeš dobro vladati.

Kada kultivator razvije *gong*, dostigne stanje otvaranja *gonga*, ili stvarno dođe do prosvjetljenja, ne treba misliti o sebi da je nešto posebno. Ono što vidi samo je to što vidi na svom nivou. Kultivirao se do tog nivoa, što znači da su njegov kvalitet prosvjetljenja, njegov standard *xinxing* i njegova mudrost dostigli taj nivo. Zbog toga on možda neće vjerovati u stvari sa još viših nivoa. Upravo zato što ne vjeruje u to, misliće da je ono što vidi apsolutno i da je to sve. Ali to je još daleko od toga, jer je njegov nivo samo toliko visok.

Jedan dio ljudi će otvoriti svoj *gong* na ovom nivou, oni se više ne mogu uzdići kultivirajući se, tako da oni mogu otvoriti svoj *gong* i postati prosvjetljeni samo na tom nivou. Među onima koji će se u budućnosti uspješno kultivirati, neki će postati prosvjetljeni na malim zemaljskim putevima, neki će postati prosvjetljeni na raznim nivoima, a neki će postati prosvjetljeni sa ispravnim dostignućem. Samo prosvjetljenje sa ispravnim dostignućem je najviše. Ovi ljudi mogu vidjeti stvari na različitim nivoima i mogu se prikazati na različitim nivoima. Čak i oni koji su otvorili svoj *gong* i postali prosvjetljeni na najnižem nivou, nivou malih zemaljskih puteva, također mogu vidjeti neke dimenzije i neka prosvjetljena bića i mogu komunicirati s njima. Tada ne smiješ postati samozadovoljan. Sigurno je da ne možeš dostići ispravno dostignuće ako otvoriš *gong* na malim zemaljskim putevima, na niskim nivoima. Šta se onda može učiniti? On samo može ostati na tom nivou. Pitanje je budućnosti da li će se on poslije nastaviti kultivirati ka višim nivoima. Ali šta drugo učiniti nego otvoriti njegov *gong*, ako se on može kultivirati samo toliko visoko? Ako se nastavi kultivirati na taj način, uopšte neće moći napredovati dalje, zato će njegov *gong* biti otvoren, jer je on stigao do kraja svoje kultivacije. Biće mnogo takvih ljudi. Šta god da se desi, moraš održavati dobar *xinxing*. Samo vladanje u skladu s Dafa je stvarno ispravno. I tvoje natprirodne sposobnosti i stanje otvaranja *gonga* dobio si kroz kultivaciju u Dafa. Ako staviš Dafa na drugo mjesto, a svoje božanske moći na prvo mjesto, ili ako si postao prosvjetljen i misliš da je ovo ili ono tvoje shvatanje ispravno, ili čak ako sam sebe smatraš veličanstvenim i misliš da si iznad Dafe, rekao bih da si tada već počeo padati dole i to će biti veoma opasno i ti ćeš se sve više pogoršavati. Tada ćeš stvarno naići na teškoće. Čak se može desiti da padneš i tvoja kultivacija će biti uzaludna.

Ja vam još kažem: Sadržaj ove knjige je kombinacija Fa kojeg sam predavao na nekoliko seminara. Sve su to moje riječi i sve su to moje rečenice. Sve je riječ po riječ preslušano sa snimaka i riječ po riječ zapisano. Moji učenici i studenti su mi pomogli sve zapisati sa snimaka, a ja sam to onda iznova i iznova korigirao. To je sve moj Fa i ovo što objašnjavam je upravo ovaj Fa.

7. Lekcija

Pitanje ubijanja

Pitanje ubijanja je vrlo osjetljivo. Mi smo postavili striktno zahtjeve za praktikante da oni ne smiju ubijati. Bez obzira da li je to Buda škola, Tao škola ili neobična škola, bez obzira o kojoj se školi ili praksi radi, sve dok je to ispravna praksa kultivacije, smatraće bezuslovnim da je ubijanje zabranjeno - to je sigurno. Zato što ubijanje može imati vrlo ozbiljne posljedice, moramo vam to detaljno objasniti. U izvornom budizmu ubijanje se uglavnom odnosilo na ubijanje ljudi, što se smatralo najozbiljnijim. Kasnije je i ubijanje velikih živih bića, velikih životinja ili nešto većih životinja također smatrano vrlo ozbiljnim. Zašto se pitanje ubijanja uzima tako ozbiljno u krugovima kultivatora? U prošlosti, u budizmu je rečeno da će životi, koji nisu trebali umrijeti, ako budu ubijeni, postati usamljene duše i beskućni duhovi. Ceremonije spašavanja, o kojima se prije govorilo, odnosile su se na ove ljude. Bez takvih ceremonija spašavanja, ta živa bića bi patila od gladi i žeđi, nalazeći se u vrlo bolnoj situaciji. Tako se u prošlosti govorilo u budizmu.

Mi kažemo da kada neko učini nešto loše drugoj osobi, on toj osobi mora dati poprilično mnogo *de-a* kao nadoknadu. Pri tome obično mislimo na uzimanje stvari koje pripadaju drugim ljudima i tome slično. Ali ako neko nekome iznenada oduzme život, bez obzira da li se radi o životinji ili nekom drugom živom biću, to će proizvesti poprilično veliku karmu. U prošlosti se ubijanje uglavnom odnosilo na ubijanje ljudi, što bi prouzrokovalo prilično veliku količinu karme. Ali ubijanje drugih običnih živih bića ne predstavlja manji grijeh i to također direktno proizvodi mnogo karme. Posebno tebi, kao praktikantu, za vrijeme procesa tvoje kultivacije priređene su ti neke teškoće na različitim nivoima. Sve one su tvoja vlastita karma, tvoje vlastite teškoće, koje su ti postavljene na različitim nivoima da bi se poboljšao. Sve dok poboljšavaš svoj *xinxing* bićeš u mogućnosti nadvladati ih. Ali ako iznenada dobiješ tako mnogo karme, kako je možeš nadvladati? S tvojim *xinxingom* je nikako ne možeš nadvladati. To može potpuno onemogućiti tvoju daljnju kultivaciju.

Mi smo ustanovili da su, kad je osoba rođena, mnogi "on" istovremeno rođeni unutar određenog područja kosmičkog prostora. Oni svi izgledaju isto kao i on, imaju isto ime i rade manje više iste stvari. Zato se oni mogu smatrati dijelom njegove cjeline. Onda se radi o ovom problemu: ako jedno od živih bića (to također važi i za život drugih velikih životinja) iznenada umre, dok ostali "on" u drugim različitim dimenzijama još nisu okončali svoje predodređene životne puteve i imaju još mnogo godina života, osoba koja je umrla upašće u situaciju beskućnika i lebdice uokolo u prostoru univerzuma. U prošlosti se govorilo o usamljenoj duši i beskućnom duhu, koji pati od gladi i žeđi i koji se nalazi u vrlo tegobnoj situaciji. Možda je to istina. Ali mi smo zaista vidjeli da se ova osoba nalazi u užasnoj situaciji i da mora tako dugo čekati, sve dok svi "on" u svim drugim dimenzijama ne završe svoje životne puteve i tek onda zajedno s njima može naći svoje konačno počivalište. Što duže to traje, tim više ta osoba pati. Što je veća njena patnja, tim više karme koja uzrokuje tu patnju neprestano će se dodavati osobi koja ju je ubila. Razmislite o tome: koliko mnogo karme će se sakupiti? To je ono što smo vidjeli pomoću natprirodnih sposobnosti.

Također smo vidjeli ovu situaciju: Kada je čovjek rođen, forma postojanja njegovog cijelog života već postoji u određenoj dimenziji. Drugim riječima, do kojeg stadija njegov život ide i šta on treba raditi, sve je to već tamo. Ko je aranžirao cijeli njegov život? To su

očigledno uradila viša bića. Na primjer, u našem svakodnevnom ljudskom društvu, neko nakon rođenja pripada određenoj porodici, određenoj školi i nakon odrastanja određenom radnom mjestu; kroz svoj posao, on ima različite kontakte s društvom. Drugim riječima, izgled cijelog društva je aranžiran na ovaj način. Ali, zato što je ovo živo biće iznenada umrlo, ne slijedi više prvobitni određeni aranžman, znači došlo je do promjene. To više biće neće oprostiti onome ko je to poremetio. Razmislite o tome: kao praktikanti, mi se želimo kultivirati prema višim nivoima; ali ako mu to živo biće ne oprost, šta misliš, da li se ta osoba još može kultivirati. Čak ni nivoi nekih učitelja nisu toliko visoki kao nivo tog višeg bića koje je to aranžiralo. Zato će učitelj te osobe također biti pogođen time i biće bačen dole na niži nivo. Razmislite o tome: da li je to običan problem? Zbog toga, kada osoba jednom učini tako nešto, biće joj vrlo teško kultivirati se.

Među Falun Dafa praktikantima možda ima nekih koji su se borili u vremenima rata. Ratovi su stanja proizašla iz velikih promjena globalnih nebeskih pojava i ti si bio samo jedan element tih stanja. Ako se niko ne bi pomjerio pod tim promjenama nebeskih fenomena, takva stanja ne bi mogla biti prouzrokovana u običnom ljudskom društvu, niti bi se to moglo nazvati promjenama nebeskih fenomena. Takvi događaji se dešavaju u skladu s velikim promjenama i zato ti nisi sam u cjelosti odgovoran za tu stvar. Ono o čemu mi ovdje govorimo je karma koja je stvorena nečijim insistiranjem na vršenju loših djela zbog ličnih koristi ili zadovoljenja vlastitih interesa, ili kad neko želi otkloniti ono što škodi njegovim stvarima. Sve što se odnosi na promjene u cijelom velikom prostoru i velike promjene stanja društva nije tvoja greška.

Ubijanje može stvoriti ogromnu karmu. Neki onda misle: "Mi ne smijemo više ubijati, ali ja kuham kod kuće. Šta će moja porodica jesti ako ja više ne ubijam?" Ovo konkretno pitanje nije moja briga, ja predajem Fa praktikantima i ne govorim olako svakodnevnim ljudima kako da žive. S obzirom na to kako se treba odnositi prema konkretnim pitanjima, trebaš prosuđivati s Dafa. Radi onako kako misliš da je najbolje. Svakodnevni ljudi čine šta god žele i to je stvar svakodnevnih ljudi. Nije moguće da se svako istinski kultivira. Praktikanti, ipak, trebaju slijediti visoke standarde, zbog toga su to zahtjevi koji se postavljaju praktikantima.

Nemaju samo ljudska bića i životinje život, biljke također imaju život. Sve supstance se pojavljuju u formi života u drugim dimenzijama. Kad tvoje nebesko oko dostigne nivo Fa vida, otkrićeš da ti se kamenje, zidovi i sve stvari obraćaju i pozdravljaju te. Možda se neko čudi: "Znači, žitarice i povrće koje jedemo su također živi. I šta da radimo ako muhe i komarci dospiju u kuću. Ljeti komarci ujedaju i to je prilično neugodno. Znači moramo ih gledati kako nas bodu, ne pomjerajući se. Muhe dolaze na hranu, zagađujući je, ali ih mi ne smijemo ubiti." Kažem vam, mi ne smijemo proizvoljno i bez razloga ubijati živa bića, ali također ne trebamo biti niti pretjerano oprezna gospoda, uvijek obraćajući pažnju na sitnice i čak strahujući da ćemo nagaziti na mrave, tako da skaćemo uokolo dok hodamo. Rekao bih da će ti na taj način život biti prilično zamoran. Nije li to također vezanost? Iako tvojim skakanjem uokolo možda nisi ubio mrave, ipak si ubio mnogo mikroorganizama. Na mikroskopskom nivou postoje mnoga, još manja živa bića, kao što su mikrobi i bakterije, možda si također nagazio i ubio mnogo njih. U tom slučaju mi više ne bismo trebali živjeti. Mi ne želimo postati takvi ljudi jer se na taj način ne može kultivirati. Treba se koncentrisati na širu perspektivu i kultivirati se otvoreno i na čestit i dostojanstven način.

Kao ljudska bića, mi živimo i imamo pravo održavati naše ljudske živote. Zato životna okolina treba zadovoljavati potrebe ljudskog života. Mi ne smijemo namjerno povrijediti ili

ubiti živo biće, ali ne trebamo niti previše biti okupirani takvim sitnicama. Na primjer, povrće i žitarice koje uzgajamo također imaju život, ali mi ne možemo prestati jesti ili piti samo iz tog razloga, jer kako onda možemo prakticirati? Trebamo biti širokumni. Na primjer, dok hodaš, mravi ili kukci mogu utrčati ispod tvoja stopala i biti zgaženi i ubijeni. Možda onda trebaju sada umrijeti, jer ih ti nisi namjerno ubio. U svijetu organizama i mikroorganizama također postoji pitanje ekološke ravnoteže i ako ih ima previše, proširiće se nekontrolisano. Zbog toga kažemo da se trebamo kultivirati otvoreno i čestito. Kada u kući ima muha i komaraca, možemo ih protjerati ili postaviti mrežu na prozoru da bi ih spriječili da uđu unutra. Ali ako oni nekad ne mogu biti protjerani i budu ubijeni, to također ne predstavlja problem. Ako žele bosti i nauditi ljudima u prostoru gdje žive ljudi, sigurno ih treba protjerati. Ako se ne daju protjerati, ne možemo samo gledati kako bodu ljude. Tebi kao praktikantu to ne predstavlja problem jer si otporan na njih. Ali članovi tvoje porodice ne prakticiraju i oni su svakodnevni ljudi, za njih još postoji problem zaraznih bolesti. Mi ne možemo samo gledati i sjediti skrštenih ruku kad nam komarac ubode dijete u lice.

Daću vam jedan primjer. Postoji priča o Shakyamuniju u njegovim ranim godinama. Jednog dana, Shakyamuni se želio okupati u šumi i zatražio je od svog učenika da očisti kadu. Učenik je otišao do kade i vidio da je puna kukaca i ako bi očistio kadu, kukci bi bili ubijeni. Učenik se vratio Shakyamuniju i rekao: "Kada je puna kukaca". Ne pogledavši ga, Shakyamuni je rekao: "Idi i očisti kadu". Učenik je ponovo otišao do kade, ali nije znao gdje bi počeo. Jer, ako bi počeo s čišćenjem, kukci bi morali umrijeti. Obišao je jedan krug i ponovo se vratio Shakyamuniju i upitao ga: "Poštovani Učitelju, kada je puna kukaca. Ako je očistim, kukci će biti ubijeni." Shakyamuni ga je pogledao i rekao: "Ono što sam od tebe tražio je da očistiš kadu." Učenik je iznenada shvatio i odmah otišao i očistio kadu. Ova priča ima sljedeću poentu: "Mi ne trebamo prestati kupati se jer ima kukaca, niti trebamo naći drugo mjesto za život jer ima komaraca. Mi također ne trebamo stegnuti naša grla i prestati jesti i piti zbog toga što žitarice i povrće imaju život. To nije tako. Mi trebamo ispravno postupati s ovim stvarima i prakticirati kultivaciju otvoreno i dostojanstveno. U redu je, sve dok namjerno ne naškodimo nekom živom biću. Istovremeno, ljudska bića moraju imati svoj životni prostor i životne uslove koji također moraju biti održavani. Ljudska bića trebaju održati svoje živote i normalan način života.

U prošlosti su neki lažni *qigong* učitelji govorili: "Smije se ubijati prvog i petnaestog u mjesecu." Neki od njih su čak tvrdili da je dozvoljeno ubijati dvonožne životinje, kao da one nisu žive. Da li se onda ubijanje prvog ili petnaestog ne smatra ubijanjem, nego kopanjem zemlje? Neki lažni *qigong* učitelji mogu se prepoznati po njihovim riječima i ponašanju, ili po onome što govore i za čim teže. *Qigong* učitelji koji tvrde tako nešto često su zaposjednuti. Pogledajte samo način na koji *qigong* učitelj, koji je zaposjednut od lisice, jede pile. On ga halapljivo proždire i nije čak voljan ni kosti ispljunuti.

Ubijanje ne samo da stvara ogromnu karmu, nego također uključuje i pitanje dobrodušnosti. Zar mi praktikanti ne trebamo imati dobrodušnost? Kad se naša dobrodušnost pojavi, vjerovatno ćemo primjetiti da sva živa bića pate i da svaka osoba pati. Ovo će se desiti.

Pitanje ishrane mesom

Ishrana mesom je također vrlo osjetljivo pitanje, ali ishrana mesom nije ubijanje. Iako vi već duže vrijeme studirate Fa, mi nismo tražili od vas da prestanete jesti meso. Mnogi *qigong*

učitelji ti, čim dođeš na njihov seminar, kažu da prestaneš jesti meso. Možda ćeš pomisliti: "Odjednom više ne smijem jesti meso. Ja još nisam mentalno spreman na to." Danas je kod kuće za ručak možda pečeno pile ili pržena riba i miriše jako dobro, ali ti to ne smiješ jesti. Ista stvar je s religioznim metodama kultivacije, koje primoravaju praktikante da prestanu jesti meso. Uobičajene prakse u Buda školi i neke prakse u Tao školi također kažu isto i zabranjuju ishranu mesom. Mi ne tražimo od tebe da tako postupaš, ali i mi govorimo o tom pitanju. Šta mi onda zahtijevamo? Jer je naša praksa takva da Fa oplemenjuje praktikanta, to znači da će se neke situacije pojaviti kroz njegov *gong* i kroz Fa. Na putu prakticiranja, na različitim nivoima pojaviće se različite situacije. Jednog dana ili nakon moje lekcije danas, neki ljudi će ući u ovo stanje: Oni ne mogu jesti meso i ono im smrdi. Ako ga jedu, imaće nagon da povrate. Nije da te neko prisiljava, niti ti sam sebe prisiljavaš da ne jedeš meso, nego to dolazi od tvog vlastitog srca. Kad dostigneš taj nivo, od *gonga* će se odražavati da više nećeš biti u stanju jesti meso. Ako ga i pored toga progutaš, čak ćeš ga stvarno povratiti.

Naši dugogodišnji praktikanti svi znaju da će se ovo stanje pojaviti u kultivaciji Falun Dafa i da se na različitim nivoima pojavljuju različita stanja. Neki praktikanti imaju jaku želju i jaku vezanost za ishranu mesom - oni obično mogu pojesti veće količine mesa. Dok se drugima meso gadi, oni se ne osjećaju tako i još uvijek ga mogu jesti. Šta treba uraditi da bi oni uklonili ovu vezanost? Njega će boljeti stomak ako jede meso, a ako ne jede meso, neće imati bolove u stomaku. Kod njega će se pojaviti ovo stanje i to znači da on više ne treba jesti meso. Da li to znači da naša škola od danas više neće imati ništa s mesom? Ne, to nije tako. Kako se mi trebamo odnositi prema ovom pitanju. Ne biti u stanju jesti meso dolazi stvarno od vlastitog srca. Šta je svrha toga? Prinudna zabrana ishrane mesom kod kultivacije u samostanima, kao i ne biti u stanju jesti meso odraženo u našoj praksi, oboje imaju za cilj uklanjanje ove ljudske želje i vezanosti za ishranu mesom.

Neki ljudi jednostavno ne mogu ništa jesti ako u posudi nema mesa. To je žudnja svakodnevnih ljudi. Jednog jutra sam prolazio pokraj stražnjeg ulaza u Park pobjede u Changchunu. Troje ljudi je izlazilo iz parka glasno vičući. Jedan od njih je rekao: "Kakva je to vrsta *qigonga* u kojoj se ne smije jesti meso? Ja bih radije izgubio deset godina svog života, nego da se odreknem mesa!" Kako je to jaka žudnja! Razmislite o tome: zar ova žudnja ne treba biti uklonjena? Definitivno treba. U procesu kultivacije, čovjek upravo uklanja svoje različite žudnje i vezanosti. Jasno rečeno, ako želja za ishranom mesom nije uklonjena, zar onda ne znači da i vezanost nije uklonjena? Kako se onda može kultivirati do Ispunjenja? Zato, sve dok je to vezanost, ona treba biti uklonjena. Ali to opet ne znači da ti odsada više nikad nećeš moći jesti meso. Nije cilj zabraniti ishranu mesom, već da više nemaš ovu vezanost. Ako ukloniš tu vezanost u periodu u kojem ne možeš jesti meso, možda ćeš poslije ponovo moći jesti meso, ono ti svojim mirisom više neće izazivati mučninu i ukus mu neće biti tako loš. U to vrijeme ćeš ponovo moći jesti meso i to više neće predstavljati problem.

Kad ga ponovo budeš mogao jesti, više nećeš imati tu vezanost i nemaš više ni žudnju za mesom. Ali nastupiće velika promjena: kad budeš ponovo jeo meso, neće ti više biti ukusno, ako se kuha kod kuće, jednostavno jedeš s ostalima, ako ne, neće ti nedostajati, a ako ga jedeš, neće ti biti ukusno. To stanje će se pojaviti. Međutim, kultivacija među svakodnevnim ljudima je prilično komplikovana. Ako se kod kuće uvijek kuha meso, poslije nekog vremena će ti meso opet postati vrlo ukusno. To će se kasnije ponoviti, to će se mnogo puta ponoviti tokom cijelog puta kultivacije i ti iznenada ponovo nećeš moći jesti meso. Ako ga ne možeš jesti, nemoj ga jesti, ti ga stvarno nećeš moći jesti. I ako ga jedeš, povратиćeš.

Ako ga možeš jesti, jedi ga, slijedi prirodan tok. Jest i ne jesti meso nije samo po sebi svrha - ključno je otpustiti tu vezanost.

U ovoj našoj Falun Dafa školi se vrlo brzo napreduje. Sve dok poboljšavaš svoj *xinxing*, brzo ćeš se probijati kroz svaki nivo. Neki ljudi ispočetka nisu tako vezani za meso i ne mare ima li mesa ili ne. Kod takvih ljudi to traje samo jednu do dvije sedmice i ova vezanost je već prevaziđena. Za neke ljude, to traje jedan mjesec, dva mjeseca, tri mjeseca ili možda pola godine. Osim u specijalnim slučajevima, neće trebati više od godinu dana, onda oni mogu opet jesti meso. To je zato što je meso već postalo glavni sastojak ljudske ishrane. Ipak, profesionalni kultivatori u samostanima ne smiju jesti meso.

Recimo nešto o tome kako se budizam odnosi prema ishrani mesom. Najraniji, izvorni budizam nije zabranjivao ishranu mesom. Kada je Shakyamuni poveo svoje učenike u šumu da se mukotrpno kultiviraju, nije bilo takvog pravila koje bi zabranjivalo meso. Zašto ga nije bilo? Zato što je ljudsko društvo bilo vrlo nerazvijeno kada je Shakyamuni prije 2.500 godina podučavao svoj Fa i neke regije su imale poljoprivredu, dok mnoge druge još nisu. Obradenih posjeda je bilo vrlo malo i posvuda su bile šume. Žitarica je bilo malo i bile su izuzetno rijetke. Ljudi su upravo bili izašli iz primitivnog društva i živjeli su uglavnom od lova; u mnogim regijama je meso bilo glavna hrana. Da bi otpustili ljudske vezanosti koliko god je to moguće, Shakyamuni svojim učenicima nije dozvoljavao dodir s novcem ili bilo kakvim materijalnim stvarima, on je poveo svoje učenike sa sobom da prose hranu. Oni su jeli šta god im se da, jer kao kultivator, čovjek kod jela ne treba biti probirljiv; jela koja su dobijali mogla su sadržavati i meso.

Ipak, u izvornom budizmu je postojala zabrana za *hun*. Ova zabrana *huna* potiče upravo iz izvornog budizma, ali danas se za meso kaže da je *hun*. Zapravo, u to vrijeme se *hun* nije odnosio na meso, nego na stvari poput crvenog i bijelog luka, đumbira i češnjaka. Zašto je to smatrano *hunom*? Danas mnogi monasi također ne mogu to jasno objasniti, jer se mnogi od njih stvarno ne kultiviraju i mnoge stvari ne znaju. Ono što je Shakyamuni podučavao zvalo se: "Zapovijedi, Meditacija, Mudrost". Zapovijedi se odnose na uklanjanje svih žudnji svakodnevnih ljudi. Meditacija znači da se kultivatori kultiviraju u stanju duboke meditacije i sjedeći u lotosovom položaju i da trebaju potpuno utonuti u meditaciju. Sve ono što je pri tome smetalo da ljudi utonu u meditaciju i kultiviraju se, smatralo se ozbiljnom smetnjom. Ko god je jeo crveni luk, đumbir ili češnjak, imao je jak zadah. U to vrijeme, monasi su meditirali u šumi ili u pećini u grupama od sedam ili osam u krugu. Ako je neko jeo te stvari, to bi stvorilo vrlo jak i iritantan miris, što bi uticalo na meditaciju drugih i ozbiljno ometalo njihovo prakticiranje. Zbog toga je postojalo to pravilo da su takve stvari smatrane *hunom* i bilo je zabranjeno jesti ih. Mnoga živa bića, koja su kroz kultivaciju razvijena na ljudskom tijelu, gnušaju se tako jakog mirisa. Crveni luk, đumbir i češnjak također mogu stimulirati ljudske žudnje. Ako ih se jede previše, može se postati ovisnik o njima. Zbog toga su oni smatrani *hunom*.

U prošlosti, nakon što su se kultivirali do vrlo visokih nivoa i nalazili se u stanju otključanog *gonga* ili polu-otključanog *gonga*, mnogi monasi su također znali da ta pravila za vrijeme kultivacije nisu važna. Ako se odrekneмо vezanosti, materija sama po sebi nema nikakvog dejstva. Ono što zaista ometa osobu je ta vezanost. Zbog toga su kroz istoriju mnogi monasi, koji su se visoko kultivirali, također otkrili da pitanje - da li se jede meso - nije ključno. Ključno pitanje je da li ta vezanost može biti otpuštena ili ne. Bez vezanosti je sasvim svejedno šta jedemo da bi napunili stomak. Zato što se u samostanima kultivira upravo

na taj način, mnogi ljudi su se već navikli na to. Osim toga, to više nije samo pitanje zapovijedi, nego je to postao propis i pravilo u samostanima, tako da se uopšte ne može jesti meso i ljudi su se navikli na taj način kultivacije. Uzmimo monaha Jigonga za primjer. On je veoma istaknut u literarnim radovima. Monasi ne bi trebali jesti meso, ali on je jeo meso i zbog toga su ga isticali. Ali činjenica je, kada je Jigong bio izbačen iz Lingyin samostana, nalaženje hrane je za njega prirodno postalo ozbiljan problem i njegovo preživljavanje je postalo glavna briga. Da bi se prehranio, jeo je šta god mu je došlo u ruke. Kad čovjek nema vezanost za neku posebnu hranu, svejedno je šta jede da bi napunio stomak. On se kultivirao do tog nivoa, tako da je razumio taj princip. Zapravo, Jigong je samo par puta jeo meso, možda jednom ili dvaput. Nakon što su čuli da monah jede meso, pisci su se jako zainteresovali. Što je tema senzacionalnija, čitaoci će se više interesovati za nju. Književna djela se baziraju na životu, ali ga prevazilaze. Tako su ga pisci učinili popularnim. U stvari, ako je vezanost zaista odstranjena, svejedno je šta jedemo da bi napunili stomak.

U jugoistočnoj Aziji i južnoj Kini, a posebno u provincijama Guandong i Guangxi, neki budisti laici ne kažu da se kultiviraju do Bude, kao da to zvuči previše staromodno. Oni kažu da žive vegetarijanski ili da su vegetarijanci. Oni misle da se kultiviraju do Bude time što se hrane vegetarijanski. Oni smatraju kultivaciju do Bude nečim tako jednostavnim. Da li se neko time što je vegetarijanac može kultivirati do Bude? Vi znate da je to samo jedna vezanost, jedna ljudska žudnja. To je samo jedna vezanost, time se uklanja samo ova jedna vezanost. Još se treba odreći zavisti, želje za nadmetanjem, samozadovoljstva, mentaliteta isticanja sebe i raznih drugih vezanosti. Čovjek jednostavno ima tako puno vezanosti. Sve vezanosti i žudnje moraju biti otklonjene, tek tada se može kultivirati do Ispunjenja. Kako se neko može kultivirati do Bude otpuštanjem samo ove vezanosti za ishranu mesom? Ta tvrdnja je netačna.

Po pitanju hrane, ne radi se samo o ishrani mesom, nego ne treba biti vezan za bilo koju vrstu hrane. Isto je i sa drugim stvarima. Neki ljudi kažu: "Ovo baš volim jesti". To je također žudnja. Nakon što dostigne određeni nivo kultivacije, kultivator neće imati ovu vezanost. Naravno, mi podučavamo Fa na vrlo visokim nivoima i to radimo u vezi sa različitim nivoima. Nije moguće postići to odjednom. Ti kažeš da rado jedeš tu određenu hranu, ali kada se stvarno kultiviraš do trenutka kada je vrijeme da otpustiš tu svoju vezanost, nećeš više moći to jesti. Ako to jedeš, neće ti više biti ukusno ili će imati ukus kao nešto drugo. Prije, kada sam išao na posao, kantina u mom preduzeću je stalno poslovala sa gubitkom i kasnije je bila zatvorena. Nakon toga, svi su sami donosili ručak na posao. Bilo je prilično naporno ujutro kuhati i onda žuriti na posao. Ponekad bih kupio dva parena peciva i parče tofua u soja sosu. Tako lak obrok ne bi trebao biti problem, ali ipak nije bilo dobro stalno to jesti - ta vezanost je također trebala biti otpuštena. Čim bih vidio tofu, pojavila bi mi se želučana kiselina i nisam ga više mogao jesti. To se dešavalo da bi me spriječilo da razvijem vezanost. Naravno, to se događa tek kad neko dostigne određeni nivo u kultivaciji. U početku neće biti tako.

Buda škola ne dopušta konzumiranje alkohola. Da li si ikad vidio Budu kako drži bokal vina? Ne. Rekao sam da, ako ne možeš jesti meso, kasnije neće biti problem da ga ponovo jedeš, nakon što je vezanost uklonjena praksom kultivacije među svakodnevnim ljudima. Ali ako prestaneš piti alkohol, ne smiješ ga ponovo piti. Zar praktikant nema *gong* u svom tijelu? Postoje različiti oblici *gonga* i neke natprirodne sposobnosti se pojavljuju na površini tvog tijela i one su sve čiste. Čim piješ alkohol, "huš", one će sve odmah napustiti tvoje tijelo. U tom trenutku na svom tijelu nemaš više ništa, jer se sve one gnušaju tog mirisa. Jako je loše

ako stekneš tu naviku, jer konzumiranje alkohola može pomutiti tvoj razum. Zašto su neki praktikanti, koji su kultivirali veliki Tao, morali piti alkohol? Jer oni ne kultiviraju glavnu svijest i piju da bi umrtvili glavnu svijest.

Neki su tako ovisni o alkoholu da ga cijene kao svoje vlastite živote. Neki uživaju piti alkohol. Neki su već toliko pili da su već dobili trovanje alkoholom, oni bez alkohola ne mogu podići ni svoje zdjele s rižom, bez alkohola jednostavno ne ide. Mi praktikanti ne smijemo biti takvi. Konzumacija alkohola definitivno vodi ka ovisnosti. To je žudnja i stimulira živce ovisnosti; što više neko pije, postaje sve ovisniji. Razmislimo o tome: kao praktikanti, ne bi li trebali odbaciti ove vezanosti? Ova vezanost također mora biti odstranjena. Neko bi mogao pomisliti: "To je nemoguće, jer sam ja odgovoran za prijem mušterija", ili: "Ja sam odgovoran za uspostavljanje poslovnih kontakata. Nije lako zaključiti posao bez alkohola". Rekao bih da nije neophodno tako. U običnim poslovnim dogovorima, a posebno u poslovima sa strancima, ti možeš naručiti sok, dok on naručuje mineralnu vodu, a neko drugi pivo. Niko te neće tjerati da piješ alkohol. Ti piješ ono što želiš i koliko želiš. Ovo se posebno rijetko dešava među visoko obrazovanim osobama. Obično je tako.

Pušenje je također vezanost. Neki kažu da ih pušenje može osvježiti, ali ja kažem da oni zavaravaju sami sebe. Neki se osjećaju umorni od posla ili od pisanja i onda prave pauzu pušeći cigaretu. Oni misle da su svježiji nakon pušenja. U stvari to nije tako. Oni se osjećaju svježije jer su se malo odmorili. Ljudski um može stvoriti pogrešan utisak, kao i iluziju. Kasnije je zaista nastao stav ili lažni utisak i ti misliš da te pušenje zaista osvježava. Ali to uopšte nije tako, pušenje ne može imati takvo dejstvo. Pušenje ne čini ljudskom tijelu ništa dobro. Ako je osoba dugo vremena pušila, doktor će pri autopsiji vidjeti da su njegov dušnik i njegova pluća potpuno crni.

Zar mi praktikanti ne želimo očistiti naša tijela? Mi trebamo stalno čistiti naša tijela i stalno napredovati ka višim nivoima. Zašto još uvijek stavljaš to u svoje tijelo, zar to onda nije suprotno od onog što mi radimo? Osim toga je to jaka žudnja. Neki ljudi također znaju da to nije dobro, ali se ne mogu odvići toga. Mogu vam reći da je razlog zapravo u tome što oni nemaju ispravne misli da ih vode. Nije lako tek tako se odvići pušenja. Kao praktikant, od danas gledaj na to kao na vezanost koju treba ukloniti i vidi da li možeš odustati od toga. Ja ti savjetujem: ako se istinski želiš kultivirati, od danas prestani pušiti i garantovano možeš prestati. U polju ovog kursa niko ne misli na pušenje. Ako želiš prestati, garantovano možeš prestati. Kad ponovo budeš pušio, cigareta više neće imati ukusa. Ako čitaš ovu lekciju u knjizi, dejstvo će biti isto. Naravno, ako se ne želiš kultivirati, mi se nećemo više brinuti za to. Ja mislim da ti kao kultivator trebaš odustati od toga. Jednom sam upotrijebio ovaj primjer: Da li si ikad vidio jednog Budu ili Tao kako sjede s cigaretom u ustima? Kako to može biti moguće? Šta je tvoj cilj kao kultivatora? Zar ne bi trebao odustati od toga? Zato kažem, ako se želiš kultivirati, odustani od toga. To šteti tvom tijelu i to je također žudnja. To je upravo suprotno od zahtjeva za naše praktikante.

Zavist

Kada podučavam Fa, ja često iznosim problem zavisti. Zašto? To je zato što se zavist vrlo snažno ispoljava u Kini. Toliko je jaka da je to postalo prirodno i ljudi je više ni ne osjećaju. Zašto Kinezi imaju ovu jaku zavist? To ima svoje korijene. Konfucijanizam je u prošlosti jako uticao na Kineze i oni su imali jako povučen karakter. Kada su ljuti, ne pokazuju to, kada se raduju, ni to ne pokazuju. Oni vjeruju u samokontrolu i uzdržavanje. Jer

su se navikli na to, naša nacija je u cjelini razvila vrlo povučen karakter. Naravno, to ima svoje prednosti, poput nepokazivanja unutrašnjeg kvaliteta. Ali to također ima i svoje nedostatke, koji mogu sa sobom donijeti negativne situacije. Posebno u ovo Vrijeme kraja Fa, negativni aspekti toga su postali još upadljiviji i mogu pospiješiti razvijanje zavisti kod ljudi. Ako neko ima dobre vijesti i sazna se za to, drugi će odmah postati vrlo zavidni. Kada neko na poslu ili drugdje dobije nagradu ili druge prednosti, ne usuđuje se govoriti o tome, jer će se drugi osjećati neugodno kad saznaju za to. Zapadnjaci to nazivaju "istočnjačka zavist" ili "azijska zavist". Cijelo područje Azije je više ili manje pod uticajem kineskog konfucijanizma, ali se samo kod nas u Kini zavist tako snažno ispoljava.

Ova zavist je na neki način povezana s apsolutnim egalitarizmom koji smo nekad prakticirali. Ako nebo padne, svi će umrijeti zajedno; ako ima nečeg dobrog, svako bi trebao dobiti jednak udio; kad se povećavaju plate, svako treba dobiti jednak iznos, bez obzira na procenat rasta. Ova logika izgleda pravedno, svi su tretirani jednako. Ali kako zapravo svi mogu biti jednaki? Oni rade različite poslove i u različitoj mjeri izvršavaju svoje dužnosti. Postoji princip u ovom našem univerzumu, koji glasi: "bez gubitka nema dobitka". Da bi nešto dobio, moraš nešto izgubiti. Među svakodnevnim ljudima se kaže: "ko ne radi, ništa ne dobija; ko radi više, dobija više; ko radi manje, dobija manje" i ako neko da više, treba dobiti više. U vrijeme dok se prakticirao apsolutni egalitarizam, govorilo se da su svi rođeni isti i da život nakon rođenja mijenja osobu. Ja kažem da je to previše apsolutno i ako je nešto previše apsolutno, onda je pogrešno. Zašto se neki ljudi rađaju kao muškarci, a neki kao žene? Zašto imaju različit izgled? Neki su rođeni bolesni ili hendikepirani, tako da nisu jednaki. Gledano sa višeg nivoa, možemo vidjeti da nečiji cjelokupni život već postoji u drugoj dimenziji. Kako oni mogu biti isti? Svi žele biti jednaki, ali ako nešto nije dio nečijeg života, kako on može biti jednak. Ljudi nisu isti.

Ljudi u zapadnim zemljama imaju relativno otvoren mentalitet. Kada su sretni, to se vidi, kada su ljuti, to se također vidi. To ima svoje prednosti, ali i nedostatke, oni nemaju strpljenja. Razlika među mentalitetima i shvatanjima vodi ka različitim efektima kada ljudi nešto rade. Ako je Kinez pohvaljen od svog pretpostavljenog ili je na neki način povlašten, drugi osjećaju nemir u srcu. Ako neko dobije nešto veću premiju, on će je krišom staviti u džep, da niko ne sazna za to. Danas je čak teško biti uzoran radnik. "Ti si uzoran radnik i tako dobro radiš svoj posao, ti trebaš dolaziti na posao ranije i ići kući kasnije. Zašto ti ne uradiš sav taj posao? Ti si dobar u tome, ali mi nismo." Ljudi će biti sarkastični i cinični. Čak je teško biti dobra osoba.

Izvan Kine je to potpuno drugačije. Ako šef vidi da je neko danas dobro radio, on mu daje veću premiju. On će pred kolegama radosno brojati novčanice jednu po jednu. "Hej, šef mi je danas dao toliko puno novca." On to može veselo reći drugima dok broji novčanice i neće biti nikakvih posljedica. Ali ako neko u Kini dobije dodatnu premiju, čak i šef će mu reći da odmah strpa novac u džep, da drugi to ne bi vidjeli. Izvan Kine, ako dijete na testu u školi dobije 100 bodova, ono će veselo trčati kući i uzvikivati: "Dobio sam 100 bodova, dobio sam 100 bodova!" Tako će trčati cijelim putem od škole do kuće. Komšija će otvoriti vrata i reći: "Hej Tom, super si to uradio, dobar dečko." Drugi komšija će otvoriti prozor i reći: "Hej Jack, super." Ali ako se to dogodi u Kini, to će biti katastrofa. "Dobio sam 100 bodova, dobio sam 100 bodova!" Dijete trči kući iz škole. Čak i prije nego što otvori vrata, jedan od komšija već počinje psovati u kući: "Šta je tako posebno kada se dobije 100 bodova? Šta se tu ima hvaliti! Ko već nije nekad dobio 100 bodova!" Ova dva različita shvatanja proizvešće različite rezultate. To može izazvati nečiju zavist. Ljudi se osjećaju neugodno kada se nekom drugom desi nešto dobro, umjesto da se raduju za njega. Tako nešto se dešava.

Prije nekoliko godina prakticiran je apsolutni egalitarizam koji je poremetio misli ljudi. Daću vam konkretan primjer za to: Neko možda misli da na radnom mjestu niko nije tako sposoban kao on i da je on izuzetan i da sve može realizirati. On misli u sebi: "Ja sam sposoban da budem direktor fabrike ili menadžer; također ću uspjeti i ako dobijem još višu poziciju. Mislim da mogu biti čak i premijer." Rukovodstvo možda također kaže da je on zaista sposoban i da može realizirati bilo šta. I njegove kolege možda smatraju da je on zaista sposoban i talentovan. Ali u njegovoj radnoj grupi ili u njegovoj kancelariji postoji druga osoba, koja je potpuno nesposobna i šta god da radi, krene naopako. Jednog dana ova nesposobna osoba dobija unapređenje na rukovodeću poziciju. On nije unaprijeđen i ta osoba čak postaje njegov šef. On će u svom srcu osjećati da to nije fer i posvuda će se žaliti i pokušavati da nešto uradi povodom toga, vrlo uzbuđen i prilično zavidan.

Objašnjavam vam ovaj princip koji svakodnevni ljudi nisu u stanju uvidjeti: Ti možda misliš da si dobar u svemu, ali to nije sadržano u tvojoj sudbini. Taj čovjek ni u čemu nije dobar, ali je to u njegovoj sudbini i on će postati šef. Sasvim svejedno šta svakodnevni ljudi misle, to su samo razmišljanja svakodnevnih ljudi. Iz perspektive viših bića, ljudsko društvo se razvija samo prema određenim zakonitostima razvoja. Zbog toga, ono što neko radi u životu nije uređeno prema njegovim sposobnostima. U budizmu se govori o principu karmičke odmazde i te stvari su uređene u skladu s tvojom karmom. Bez obzira koliko si sposoban, ako nemaš *de*, možda nećeš imati ništa u ovom životu. Ti vidiš da je neko nesposoban za bilo šta, ali on ima mnogo *de*-a i zbog toga će postati službenik na visokoj poziciji ili steći veliko bogatstvo. Običan čovjek to ne može uvidjeti i uvijek vjeruje da treba raditi ono što odgovara njegovim sposobnostima. Zato se on čitav život bori i svađa i njegovo srce je teško povrijeđeno. On misli da je život veoma gorak i težak i u srcu se stalno osjeća neuravnoteženo. On ne može ni dobro jesti, ni spavati i tužan je i razočaran. Kad ostari, njegovo tijelo je već uništeno i pojavljuju se svakakve bolesti.

Pogotovo se mi praktikanti ne trebamo ponašati na taj način, mi praktikanti uvijek slijedimo prirodan tok. Ako je nešto tvoje, nećeš to izgubiti. Ako nešto nije tvoje, nećeš to dobiti, čak i ako se boriš za to. Naravno, to nije apsolutno. Da je to tako apsolutno, ne bi više postojalo pitanje da li neko čini loša djela. Drugim riječima, također mogu postojati neki nestabilni faktori. Ali za nas kao praktikante u pravilu se brinu Učiteljevi *fašeni*. Ako drugi ljudi žele oduzeti tvoje stvari, ne mogu to uraditi. Mi zato slijedimo prirodan tok. Ti ponekad misliš da je nešto tvoje i drugi ti također kažu da je to tvoje, ali to zapravo nije tvoje. Ti ćeš možda vjerovati da je to tvoje, ali na kraju to nije tvoje. Na ovaj način će se pokazati da li možeš to otpustiti. Ako ne možeš to otpustiti, to je vezanost. Upravo na ovaj način se otklanja tvoja vezanost za vlastiti interes, to je tako. Zato što svakodnevni ljudi ne mogu shvatiti ovaj princip, nadmeću se i bore za svoje vlastite interese.

Zavist je veoma izražena među svakodnevnim ljudima. Također je oduvijek bila vrlo upadljiva i u zajednici kultivatora. Nema poštovanja među raznim školama kutiviranja, poput "tvoja praksa je dobra" ili "njegova praksa je dobra" - daju se svakakvi komentari. Kao što vidim, svi se oni nalaze na nivou liječenja bolesti i održavanja zdravlja. Većina ovih praksi koje se međusobno bore su haotične prakse koje su donijeli posjedujući duhovi i one sve ne vode računa o *xinxingu*. Recimo da je neko prakticirao preko dvadeset godina, ali nije razvio nikakve natprirodne sposobnosti, dok ih neko drugi razvije ubrzo nakon što je počeo prakticirati. Onda se on u srcu osjeća neuravnoteženo: "Ja sam prakticirao preko dvadeset godina i nisam razvio nikakve natprirodne sposobnosti, a on ih je dobio. Kakve natprirodne sposobnosti je on dobio?" Razljutiće se: "On je opsjednut duhom ili životinjom, on ima

kultivacijsko ludilo!" Dok *qigong* učitelj drži predavanje, neko sjedi u publici s nepoštovanjem: "Pfff, kakav je on *qigong* učitelj? Uopšte nemam želju da slušam to što on govori." Taj *qigong* učitelj možda zaista ne govori tako dobro kao on. Ipak, ono o čemu govori taj *qigong* učitelj su stvari iz njegove vlastite škole. Ova osoba je studirala sve moguće i dobila gomilu svjedočanstava o završenim seminarima, ona ide na predavanja svih *qigong* učitelja. Ova osoba zaista zna mnogo, čak i više od tog *qigong* učitelja. Ali koja je korist od toga? Tu se radi samo o liječenju bolesti i održavanju zdravlja. Što se više on time puni, informacije će postati sve haotičnije i komplikovanije i biće sve teže prakticirati kultivaciju - sve je već zbrkano. Kod istinske kultivacije se govori o koncentraciji na jednu školu, da se ne bi dospjelo na stranputicu. Ovo se također pokazuje i među istinskim kultivatorima, koji se uzajamno ne poštuju i nisu odstranili vezanost za nadmetanjem s drugima, što lako može dovesti do zavisti.

Ispričaću vam jednu priču. U knjizi *Ustoličenje bogova*, Shen Gongbao je mislio da je Jiang Ziya star i nesposoban. Ali Prvobitni Bog Nebesa je Jiang Ziyu povjerio da dijeli titule Bogovima. Shen Gongbao je osjećao nepravdu u svom srcu: "Zašto je njemu povjereno da dijeli titule Bogovima? Vidi kako sam ja, Shen Gongbao, sposoban: I nakon što mi se odrubi glava, mogu je staviti nazad na ramena. Zašto nije meni povjereno da dijelim titule Bogovima?" On je bio jako zavidan i stalno je uzrokovao nevolje Jiang Ziyu.

U prvobitnom budizmu u doba Shakyamunija govorilo se o natprirodnim sposobnostima, međutim danas se u budizmu više niko ne usuđuje govoriti o natprirodnim sposobnostima. Ako govoriš o natprirodnim sposobnostima, reći će da imaš kultivacijsko ludilo. "Koje natprirodne sposobnosti?" Oni ih uopšte neće priznati. Zašto? Današnji monasi nemaju pojma šta je to. Shakyamuni je imao deset velikih učenika, od kojih se za Mujianliana govorilo da je prvi u natprirodnim sposobnostima. Shakyamuni je također imao učenice i među njima je jedna, po imenu Lianhuase, bila prva u natprirodnim sposobnostima. Isto je bilo i kad je budizam došao u Kinu. Kroz sve generacije, bilo je mnogo visoko kultiviranih monaha. Kada je Boddhidarma došao u Kinu, jahao je na stabljici trske da bi prešao rijeku. Kako se istorija razvijala, natprirodne sposobnosti su sve više odbacivane. Glavni razlog je taj što stariji sveštenici, sveštenici nadstojnici i poglavari u samostanima nisu nužno imali veliku urođenu osnovu. Iako su oni bili poglavari ili stariji sveštenici, to su samo položaji svakodnevnih ljudi. Oni su također praktikanti, samo što se profesionalno kultiviraju, dok se ti kultiviraš kod kuće u svom slobodnom vremenu. Da li će neko uspjeti u kultivaciji ili ne potpuno zavisi od kultivacije srca. To jednako važi za sve i ne smije se podbaciti ni za pedalj. Ali mlađi monah, koji pali vatru i kuha hranu, ne mora imati lošu urođenu osnovu. Što više patnji on pretrpi, to mu je lakše postići Otvaranje *gonga*. Što udobnije stariji monasi žive, to im je teže postići Otvaranje *gonga* jer postoji pitanje transformacije karme. Mlađi monah radi naporno i prolazi kroz mnogo patnji, tako da on brzo otplaćuje svoju karmu i stiže do prosvjetljenja. Možda on jednog dana sasvim iznenada postigne otvaranje *gonga*. S njegovim otvaranjem *gonga*, prosvjetljenjem ili polu-prosvjetljenjem, pojavice se njegove božanske moći. Onda svi monasi u samostanu dolaze da ga nešto upitaju i svi ga poštuju. Ali poglavar to više ne može izdržati: "Kako još mogu biti poglavar? Koje prosvjetljenje? On je poludio. Izbacite ga odavde." I tako je mlađi monah protjeran iz samostana. Kako vrijeme prolazi, više se niko u budizmu u našoj Han oblasti ne usuđuje govoriti o natprirodnim sposobnostima. Znao je Jigong bio sposoban. Nosio je debla stabala sa planine Emei i bacao te trupce jednog za drugim iz jednog bunara, ali je na kraju ipak protjeran iz Lingyin samostana.

Zavist je vrlo ozbiljna, jer se direktno radi o pitanju da li se možemo kultivirati do ispunjenja ili ne. Ako zavist nije uklonjena, sve što si kultivirao biće veoma slabo i krhko. Postoji ovo pravilo: Ako osoba pri kultivaciji ne ukloni svoju zavist, ne može dobiti ispravno dostignuće, ona nikako ne može dobiti ispravno dostignuće. Možda ste prije čuli da je Buda Amitabha govorio o odlasku u raj s karmom. Ali to se neće dogoditi ako zavist nije uklonjena. Ako nekom u nekim drugim, manjim aspektima nešto fali, on možda može s karmom doći u raj i tamo se dalje kultivirati. Ali to je apsolutno nemoguće ako zavist nije uklonjena. Danas kažem praktikantima da ne trebaju zatvarati oči pred ovim problemom. Cilj koji namjeravaš postići je kultivirati se prema višim nivoima, tako da se moraš osloboditi zavisti. Zbog toga sam izdvojio i posebno objasnio to pitanje.

O pitanju liječenja bolesti

Kada se govori o liječenju bolesti, to ne znači da vas ja učim da liječite bolesti. Niko od istinskih Falun Dafa praktikanata ne smije liječiti bolesti. Jednom kad to uradiš, moj *fašen* će sa tvog tijela uzeti nazad sve stvari koje pripadaju Falun Dafa. Zašto mi ovo pitanje shvatamo tako ozbiljno? Zato što je to pojava koja nanosi štetu Dafi. Ne samo da to šteti tvom vlastitom zdravlju, nego neki ljudi, čim su jednom liječili bolesti, žude da to ponovo urade. Oni će hvatati koga god vide da bi liječili njegove bolesti i hvalili se. Zar to nije vezanost? To će ozbiljno naškoditi njihovoj kultivaciji.

Mnogi tobožnji *qigong* učitelji iskorištavaju želju svakodnevnog čovjeka da liječi pacijente nakon što je naučio *qigong*. Oni će te naučiti te stvari i tvrde da se emitovanjem *qija* mogu liječiti bolesti. Nije li to vic? Ti imaš *qi* i on također ima *qi*. Kako ga možeš liječiti emitovanjem svog *qija*? Možda će njegov *qi* nadjačati tvoj! *Qi* i *qi* ne mogu uticati jedan na drugi. Kad osoba kroz kultivaciju na visokom nivou razvije *gong*, onda je to što ona emituje visokoenergetska supstanca, koja zaista može liječiti i suzbiti bolesti, ona može imati ograničavajuće dejstvo, ali ih ne može iz korijena odstraniti. Zbog toga, da bi se zaista izliječile bolesti, osoba mora imati natprirodne sposobnosti, tek tada bolesti mogu biti temeljito uklonjene. Za svaku bolest postoji jedna natprirodna sposobnost, koja može izliječiti upravo tu bolest. Ja kažem da postoji preko hiljadu vrsta natprirodnih sposobnosti samo za liječenje bolesti i koliko ima bolesti, tačno toliko ima natprirodnih sposobnosti za njihovo liječenje. Bez posjedovanja ovih natprirodnih sposobnosti neće djelovati, bez obzira kakve trikove koristio.

Posljednjih godina, neki ljudi su napravili priličan haos u kultivacijskim krugovima. Od *qigong* učitelja koji su došli u javnost da istinski podučavaju ljude kako da se oslobode bolesti i održe dobro zdravlje i koji su utrli put od samog početka, ko je od njih podučavao ljude da liječe bolesti? Svi oni su ili sami liječili tvoje bolesti, ili ti pokazivali kako da prakticiraš kultivaciju i čeličiš svoje tijelo. Oni bi te naučili nizu vježbi i onda si sam mogao izliječiti svoje bolesti vlastitim prakticiranjem. Kasnije su se pojavili lažni *qigong* majstori i napravili su priličnu zbrku. Ko god želi liječiti bolesti, privući će posjedujući duh, to je sigurno tako. U tadašnjim uslovima, bilo je nekih *qigong* majstora koji su zaista liječili pacijente, ali to se desilo da bi odgovaralo tadašnjim nebeskim pojavama. Ipak, to nije vještina svakodnevnih ljudi i ne može trajati vječno. To je proizašlo iz tadašnjih promjena kosmičkih pojava i to je bio samo proizvod tog vremena. Kasnije su se neki ljudi specijalizirali u podučavanju drugih da liječe bolesti i to je bila besmislica. Zar svakodnevna osoba može liječiti bolesti nakon što je učila *qigong* samo tri ili pet dana? Neko tvrdi: "Ja mogu izliječiti ovu ili onu bolest."

Kažem ti da svi ti ljudi imaju posjedujući duh. Znaju li oni šta im se zakačilo na leđima. Oni imaju posjedujući duh, ali to ne osjećaju i ne znaju. Misle da je to dobro i da imaju sposobnosti.

Istinski *qigong* majstori moraju proći mnoge godine naporne kultivacije da bi postigli taj cilj. Kad liječiš pacijenta, upitaj se da li posjeduješ tu vrstu jake natprirodne sposobnosti da eliminišeš karmu tog čovjeka? Jesi li dobio istinsko učenje? Možeš li stvarno liječiti bolesti nakon samo dva ili tri dana učenja *qigonga*? Možeš li liječiti rukama običnog čovjeka? U svakom slučaju, ti tobožnji *qigong* majstori su iskoristili tvoje slabosti i ljudske vezanosti. Ne tražiš li da liječiš bolesti? Dobro, oni će organizovati kurs o liječenju, posebno te podučavajući nekim metodama liječenja, poput *qi* igle, svjetlosne terapije, pražnjenja *qija*, nadoknađivanja *qija*, akupresure i takozvane metode hvatanja rukom. Postoji puno imena, a njihov cilj je doći do tvog novca.

Porazgovarajmo o metodi hvatanja rukom. Ono što smo vidjeli je sljedeća situacija. Zašto se ljudi razboljevaju? Osnovni uzrok nečije bolesti i svih njegovih nesreća je karma, karmičko polje te crne supstance. To spada u stvari *yina* i to je nešto loše. I loša inteligentna bića (*lingti*) su također stvari *yina* i ona su sva crna, zbog toga mogu doći na tvoje tijelo, jer im ta okolina odgovara. To je osnovni uzrok bolesti ljudi, to je glavni izvor bolesti. Naravno, postoje još dva druga oblika: Jedan je vrlo malo inteligentno biće visoke gustoće, poput nakupine karme. Drugi je kao isporučen kroz dovodnu cijev, ali je to prilično rijetko; to je sve sakupljeno od predaka. Ima također i takvih slučajeva.

Porazgovarajmo o najčešćim bolestima. Kad čovjek negdje ima tumor, infekciju, ili koštanu izraslinu, itd., znači da na tom mjestu u njegovom tijelu u drugoj dimenziji čuči jedno inteligentno biće; u jednoj vrlo dubokoj dimenziji postoji jedno inteligentno biće. Običan *qigong* majstor to ne može vidjeti, s običnim natprirodnim sposobnostima se to također ne može vidjeti; oni samo mogu vidjeti crni *qi* u nečijem tijelu. Tamo gde je crni *qi*, tamo je i bolest, to je tačno. Ali crni *qi* nije osnovni uzrok bolesti, nego inteligentno biće koje postoji u dubljoj dimenziji i koje stvara to polje. Neki govore o pražnjenju ili uklanjanju crnog *qija* - idi i probaj ga isprazniti! Kratko nakon toga, ponovo će se stvoriti. Neka bića su vrlo jaka i čim se ukloni, ona će ga ponovo povući nazad; ona ga mogu sama vratiti. Takvo liječenje ništa ne pomaže.

Ljudi s natprirodnim sposobnostima vide da se tamo nalazi crni *qi* i oni ga smatraju bolesnim *qijem*. Sa gledišta kineske medicine, energetski kanali su blokirani na tom mjestu, *qi* i krv ne cirkulišu i energetski kanali su zakrčeni. Sa gledišta zapadne medicine, na tom mjestu se nalazi čir, tumor, koštana izraslina ili upala, itd. To su forme koje se manifestiraju u ovoj dimenziji. Kad ukloniš tu stvar, ustanovićeš da na tijelu u ovoj dimenziji ničeg nema. Bilo da se radi o protruziji interverbalnih diskova ili koštanoj izraslini, kad ukloniš tu stvar i očistiš to polje, vidjećeš da je to trenutno izliječeno. Ako još jednom odeš na rentgen, neće više biti ni traga koštanoj izraslini. Osnovni razlog je što je to biće stvaralo taj efekat.

Neki ljudi tvrde da nakon tri ili pet dana možeš liječiti bolesti i da će te oni naučiti metodu hvatanja rukom. Pokaži mi kako hvataš! Ljudska bića su najslabija, dok je to inteligentno biće prilično opako. Ono kontroliše tvoj um i ti si za njega kao igračka i ono ti čak može lako oduzeti život. Ti tvrdiš da ga možeš uhvatiti, ali kako ga možeš uhvatiti? Ne možeš ga dohvatiti svojim rukama obične osobe. Dok mlataš rukama tamo-vamo, ono će te ignorisati i čak će te ismijavati, tvoje besciljno mlataranje je tako smiješno. Ali ako ga zaista

možeš dohvatiti i dotaći, ono će odmah povrijediti tvoje ruke i to će biti stvarna povreda! Prije sam vidio neke ljude, čije su ruke bile u redu i pri svim ispitivanjima nisu bile pronađene nikakve bolesti na njihovim tijelima i na njihovim rukama, ali oni nisu mogli podići svoje ruke koje su samo mlitavo visile. Naišao sam i na takve bolesnike. Njegovo tijelo u drugoj dimenziji je povrijeđeno - tada je on stvarno paralizovan. Zar nisi paralizovan ako je to tvoje tijelo povrijeđeno? Neki su me pitali: "Učitelju, da li ja mogu prakticirati *qigong*? Imao sam operaciju sterilizacije", ili „nešto je uklonjeno iz mog tijela." Rekao sam im: "To nije bitno, jer tvoje tijelo u drugoj dimenziji nije operisano, a kod prakticiranja to tijelo igra glavnu ulogu." Zato sam upravo rekao da, kad ga pokušaš uhvatiti, ako ga ne možeš dohvatiti, ono će te ignorisati. Ako ga dotakneš, može ti povrijediti ruke.

Da bi podržao velike državne *qigong* aktivnosti, ja sam sa nekoliko učenika učestvovao na Orijentalnim sajmovima zdravlja u Pekingu. Na oba sajma, mi smo se najviše istakli. Na prvom sajmu, naš Falun Dafa je proglašen za "*Zvijezdu qigong škola*." Na drugom sajmu je bilo jako puno ljudi na našem štandu. Dok na drugim štandovima nije bilo mnogo ljudi, naš je bio pretrpan. Bila su tri reda za čekanje. Oni iz prvog reda su već rano ujutro popunili sva mjesta za prijepodneve tretmane, u drugom redu su čekali na registraciju za popodnevni tretman, a u trećem redu su čekali na moj autogram. Mi ne liječimo bolesti, ali zašto smo to uradili? Mi smo to uradili da bi podržali velike državne *qigong* aktivnosti i da bi dali svoj doprinos tome. Zbog toga smo učestvovali u tome.

Ja sam podijelio svoj *gong* učenicima koje sam poveo sa sobom. Svaki je dobio jedan dio, koji je bio nakupina energije sastavljene od preko stotinu natprirodnih sposobnosti. Ja sam zapečatio njihove ruke, ali su ipak ruke nekih od njih bile izgrizene, s plikovima i krvarenjem; to se čak događalo prilično često. Ta stvar je tako jaka. Misliš li da smiješ to dotaći s rukama običnog čovjeka? Osim toga, ti ga ne možeš dohvatiti - to ne ide bez određene natprirodne sposobnosti. To je zbog toga što u drugoj dimenziji ono zna šta namjeravaš čim pomisliš na to. Kad ga želiš uhvatiti, ono je već odavno pobjeglo. Čim pacijent izađe kroz vrata, ono će se odmah vratiti nazad na njega i njegova bolest će se vratiti. Da bi se to sredilo, potrebno je imati takvu natprirodnu sposobnost, kod koje, čim ispružiš ruku - "Čak!" - ono se više ne može pomjerati. Nakon što je fiksirano, mi imamo još jednu natprirodnu sposobnost, koja se prije zvala "Velika metoda hvatanja duše" i ta natprirodna sposobnost je još moćnija. Ona može izvaditi nečiju čitavu dušu i istog trena se ta osoba više neće moći pomaknuti. Ova natprirodna sposobnost ima specifičnu namjenu i mi upravo ciljamo da zgrabimo tu stvar. Znao da, kada je Tathagata-Buda usmjerio zdjelu u svojim rukama prema Sun Wukongu, iako je Sun Wukong bio vrlo velik, on je odjednom postao jako majušan. Ova natprirodna sposobnost može imati upravo to dejstvo. Bez obzira koliko je to inteligentno biće veliko ili malo, ono će jednim potezom biti zgrabljeno u ruku i trenutno će postati vrlo malo.

Uz to, nije dopušteno da neko uvuče ruku u fizičko tijelo pacijenta i da izvadi nešto iz njega. To bi poremetilo način razmišljanja ljudi u običnom ljudskom društvu i nikako nije dozvoljeno to uraditi. I ako neko posjeduje tu sposobnost, ne smije to uraditi. Ono što je on uvukao je ruka u drugoj dimenziji. Pretpostavimo da neko ima srčanu bolest. Kad ova ruka krene prema srcu da uhvati to biće, ruka u drugoj dimenziji ulazi unutra. Nakon što je trenutno, veoma brzo uhvaćeno, vanjska ruka također grabi, obje ruke se istovremeno zatvaraju i tako je to uhvaćeno u ruku. Ono je vrlo opako, ponekad se miče u rukama i pokušava bušiti u njih, ponekad grize, a ponekad čak i vrišti. Iako izgleda vrlo malo dok je uhvaćeno u tvojim rukama, ono će postati vrlo veliko ako ga pustiš iz ruku. To nije nešto što

svako može dotaći. Bez te natprirodne sposobnosti, uopšte nije moguće dotaći ga. To uopšte nije tako jednostavno kao što ljudi misle.

Naravno, u budućnosti može biti dopušteno da postoji ova vrsta liječenja *qigongom*. U prošlosti je također uvijek postojala. Ali mora postojati uslov: Ta osoba mora biti kultivator. Tokom kultivacije je, iz suosjećanja, ovoj osobi dopušteno raditi takve stvari za nekoliko dobrih ljudi. Ali ona ne može kompletno odstraniti njihovu karmu jer ona nema dovoljno *de-a*. Zbog toga teškoća još uvijek postoji, samo je konkretna bolest izliječena. Običan, manji *qigong* majstor nije neko ko je dostigao Tao u kultivaciji. On za druge može samo odgoditi bolest za kasnije, ili je možda može transformisati. Možda je on transformiše u drugu nesreću. Ali on sam možda ništa ne zna o ovom procesu odgađanja. Ako njegova praksa kultivira pomoćnu svijest, onda je njegova pomoćna svijest to uradila. Praktikanti u nekim kultivacijskim praksama mogu biti jako poznati. Mnogi poznati, veliki *qigong* majstori nemaju *gong*, jer sav njihov *gong* raste na njihovoj pomoćnoj svijesti. To znači da je dopušteno činiti takve stvari tokom kultivacije, jer neki ljudi ostaju na ovom nivou. Oni prakticiraju preko deset godina ili nekoliko desetina godina i ne mogu prevazići ovaj nivo, tako da oni čitav život liječe bolesti. Jer se oni nalaze na ovom nivou, dopušteno im je to činiti. Ali učenici koji kultiviraju Falun Dafa nikako ne smiju liječiti pacijente. Vi možete bolesniku čitati ovu knjigu. Ako bolesnik može to prihvatiti, njegove bolesti mogu biti izliječene. Ali rezultati će se razlikovati, zavisno od količine karme svake osobe.

Bolničko liječenje i *qigong* liječenje

Razgovarajmo o vezi između bolničkog liječenja i *qigong* liječenja. Neki liječnici Zapadne medicine ne priznaju *qigong*, što se čak može reći za većinu njih. Njihovo mišljenje je: "Ako *qigong* može liječiti bolesti, šta će nam onda bolnice? Onda zamijenite naše bolnice! Vaš *qigong* može izliječiti bolest golim rukama i bez upotrebe injekcija, lijekova, ili boravka u bolnici, zar ne bi bilo lijepo da vi zamijenite naše bolnice?" Ova tvrdnja nema smisla, niti je razumna. Neki ljudi ne poznaju *qigong*. U stvari, *qigong* liječenje ne može biti isto kao i medicinske metode liječenja svakodnevnih ljudi, to nije vještina svakodnevnih ljudi, nego je nešto natprirodno. Kako nečim natprirodnom može biti dopušteno da u velikoj mjeri ometa obično ljudsko društvo? Buda je tako moćan; da jedan Buda samo jednom zamahne rukom, sve bolesti čovječanstva bi nestale. Zašto to ne učini? Osim toga, postoji mnogo Buda. Zašto oni ne pokažu svoje milosrđe i izliječe tvoje bolesti? Zato što obično ljudsko društvo upravo postoji na taj način i postoje stanja kao što su rođenje, starenje, bolest i smrt. Sva ona imaju uzročne razloge i predstavljaju karmičku odmazdu. Ako imaš dug, moraš ga otplatiti.

Ako liječiš nečiju bolest, to znači da kršiš taj princip i da svako može činiti loša djela, a da ih ne mora otplatiti. Kako to može biti u redu? Ljudima koji se kultiviraju dopušteno je liječiti bolesti iz suosjećanja, kad još nemaju dovoljno velike sposobnosti da potpuno riješe ovaj problem. Zato što se pojavilo tvoje suosjećanje, dozvoljeno ti je to činiti. Ali, ako ti zaista možeš riješiti ovu vrstu problema, neće ti biti dopušteno to činiti u velikoj mjeri. U tom slučaju bi ozbiljno naškodilo stanju običnog ljudskog društva, a to nije dopušteno. Zbog toga, uopšte ne bi funkcionisalo ako bi *qigong* zamijenio bolnice svakodnevnih ljudi, jer je to natprirodan Fa.

Pretpostavimo da je dopušteno da se osnuju *qigong* bolnice u Kini i da svi veliki *qigong* majstori dođu i učestvuju u tome, šta misliš, kako bi to izgledalo? To nije dopušteno, jer svi

održavaju stanje običnog ljudskog društva. Čim bi se osnovale *qigong* bolnice, *qigong* klinike, *qigong* zdravstveni centri i liječilišta, moć liječenja *qigong* majstora bi znatno opala i rezultati liječenja odjednom više ne bi bili dobri. Zašto? S obzirom da oni čine stvari svakodnevnih ljudi, to mora biti visoko kao Fa svakodnevnih ljudi i nalaziti se na istom nivou kao i stanje svakodnevnih ljudi. Njihova zdravstvena efikasnost mora biti ista kao i u bolnicama. Zbog toga njihovi tretmani nisu više uspješni i oni također počinju govoriti o tome kako im treba nekoliko tzv. "terapijskih tretmana" da izliječe bolest. Obično je tako.

Svejedno da li su *qigong* bolnice osnovane ili ne, niko ne može poreći da *qigong* može liječiti. *Qigong* je već dugo populariziran u javnosti i mnogi ljudi su kroz *qigong* stvarno postigli cilj liječenja bolesti i održavanja zdravlja. Bez obzira da li je bolest odložena od strane *qigong* majstora, ili kako god da je izliječena, u svakom slučaju, bolest više nije tu. Drugim riječima, niko ne može poreći da *qigong* može liječiti bolesti. Najveći broj onih koji su išli kod *qigong* majstora na liječenje imali su teške i komplikovane bolesti. Njihove bolesti nisu mogle biti izliječene u bolnici, pa su oni otišli *qigong* majstorima okušati sreću i bolesti su konačno izliječene. Oni koji mogu izliječiti svoje bolesti u bolnicama ne idu *qigong* majstorima. Posebno na početku su svi mislili na taj način. Znači, *qigong* može liječiti, samo što ne može biti primijenjen kao i druge stvari u običnom ljudskom društvu. Uplitanje u velikoj mjeri apsolutno nije dopušteno, ali činiti to u manjoj mjeri ili kad nema velikog uticaja i kada se čini neupadljivo, to je dopušteno. Ipak to neće u potpunosti izliječiti bolest, to je isto sigurno. Najbolji način da čovjek izliječi svoje bolesti je da sam prakticira *qigong*.

Postoje također *qigong* majstori koji tvrde da bolnice ne mogu izliječiti bolesti i da je efikasnost bolničkih tretmana takva i onakva. Šta da kažemo na to? Naravno, za to postoje najrazličitiji razlozi. Kako ja to vidim, glavni razlog je da je moralni standard ljudi dosegao jako nisku tačku, što je dovelo do pojave mnogih čudnih bolesti, koje ne mogu biti izliječene u bolnici, a ni lijekovi također ne djeluju. Osim toga postoje i mnogi lažni lijekovi. To je sve zbog stepena do kojeg su ljudi iskvarili ljudsko društvo. Niko ne bi trebao kriviti druge zbog toga, jer je svako dolijevao ulje na vatru. Zbog toga će se svi u kultivaciji susretati s patnjama i teškoćama.

Neke bolesti ne mogu biti dijagnosticirane u bolnici, iako stvarno postoje. Nekim ljudima su bolesti dijagnosticirane, ali niko ne zna kako se zovu, jer prije nisu videne. Bolnice ih sve nazivaju "modernim bolestima". Mogu li bolnice liječiti bolesti? Naravno da mogu. Ako bolnice ne bi mogle liječiti bolesti, zašto bi ljudi vjerovali u njih i išli tamo na tretmane? Bolnice mogu liječiti bolesti, ali njihove metode liječenja pripadaju nivou svakodnevnih ljudi, dok su bolesti natprirodne, a neke su čak i prilično ozbiljne. Zbog toga bolnice kažu da se bolesti trebaju liječiti u ranom stadiju. Ako postanu preozbiljne, bolnice ih ne mogu izliječiti i prevelike količine lijekova mogu otrovati osobu. Nivo sadašnjih medicinskih tretmana je isti kao i nivo naše nauke i tehnologije, oni su svi na nivou svakodnevnih ljudi. Prema tome, oni imaju samo takvu djelotvornost u liječenju. Pitanje koje treba razjasniti je da uobičajeno *qigong* liječenje i bolničko liječenje samo odgađaju poteškoće, koje su osnovni uzrok bolesti, za preostalu polovinu života ili za kasnije. Karma time uopšte nije dotaknuta.

Razgovarajmo sada o kineskoj medicini. Liječenje kineskom medicinom je veoma blisko *qigong* liječenju. U staroj Kini, skoro svi liječnici kineske medicine imali su natprirodne sposobnosti. Veliki naučnici, kao što su Sun Simiao, Hua Tuo, Li Shizhen, Bian Que i drugi, svi su imali natprirodne sposobnosti i to je sve zapisano u medicinskim knjigama. Ipak, sada se upravo te esencijalne stvari često kritiziraju. Ono što je kineska medicina

naslijedila su samo recepti ili iskustva iz prakse. Stara kineska medicina je bila vrlo napredna, naprednija od današnje medicinske nauke. Neki ljudi možda misle: Moderna medicina je tako napredna, s kompjuterskom tomografijom se može istraživati unutrašnjost ljudskog tijela, osim toga postoje testovi sa ultrazvukom, fotografski i rentgenski snimci. Moderna oprema je doduše prilično napredna, ali po mom mišljenju, još uvijek nije tako dobra kao stara kineska medicina.

Hua Tuo je vidio tumor u Cao Caovu mozgu i htio je izvršiti operaciju da bi odstranio tumor. Kad je Cao Cao to čuo, mislio je da ga Hua Tuo želi ubiti, pa ga je zatvorio. Kasnije je Hua Tuo umro u zatvoru. Kada se Cao Caova bolest povratila, on se sjetio Hua Tuoa i tražio ga je, ali je Hua Tuo već bio mrtav. Poslije je Cao Cao zaista umro od ove bolesti. Kako je Hua Tuo to znao? On je to vidio. To je čovjekova posebna natprirodna sposobnost koju su imali svi veliki liječnici u prošlosti. Kad je nebesko oko otvoreno, čovjek s jedne strane istovremeno može vidjeti sve četiri strane ljudskog tijela. S prednje strane on može istovremeno vidjeti stražnju, lijevu i desnu stranu. On može vidjeti sloj za slojem, ili kroz ovu dimenziju može vidjeti osnovni uzrok bolesti. Mogu li moderne medicinske metode to postići? Daleko od toga, možda za hiljadu godina! Kompjuterskom tomografijom, ultrazvukom i rentgenskim zračenjem se doduše također može istražiti unutrašnjost ljudskog tijela, ali uređaji su preglomazni i takve velike stvari nisu prenosive, niti će raditi bez struje. Ali nebesko oko ide svugdje gdje i ti i ne treba mu strujno napajanje. Kako se oni uopšte mogu porediti?

Neki ljudi kažu da je moderna medicina veličanstvena. Ja kažem da nije baš tako. Ljekovite biljke iz stare Kine mogle su zaista odmah izliječiti bolesti. Mnoge stvari su se izgubile, ali mnoge nisu izgubljene i prenose se u narodu. Kada sam imao seminar u Qiqihar, vidio sam prodajni štand na ulici, na kojem je neko ljudima vadio zube. Već na prvi pogled se vidjelo da taj čovjek dolazi s juga, jer nije bio odjeven kao ljudi na sjeveroistoku. Nije odbijao nikoga i vadio je zub svakome ko bi mu prišao. Tamo je ležala hrpa izvadenih zuba. Njegova namjera nije bila vađenje zuba, već prodaja njegovog tekućeg lijeka. Taj tekući lijek je proizvodio vrlo gusti, žuti dim. Kad je vadio zub, otvorio bi bočicu s lijekom, naslanjajući je na pacijentov obraz naspram mjesta gdje je bolesni zub i zatražio bi od pacijenta da nekoliko puta udahne dim žutog tekućeg lijeka. Lijek se pri tome vrlo malo trošio. Onda bi zatvorio bočicu s lijekom i ostavio je po strani. Zatim bi iz džepa izvadio šibicu. Dok bi pričao o svom lijeku, šibicom bi lagano gurnuo zub i zub bi već bio vani. To nije boljelo. Ostao bi samo mali trag krvi, ali nije bilo krvarenja. Razmislite o tome: šibica se može slomiti ako se pritisne velikom snagom. Ali on je izvadio zub samo laganim dodiranjem šibice.

Rekao bih da ima stvari u Kini, koje se prenose u narodu, a kojima precizni instrumenti zapadne medicine nisu dorasli. Pogledajmo čiji je tretman bolji. Taj čovjek je šibicom izvadio zub. Ako liječnik u zapadnoj medicini želi izvaditi zub, najprije mora dati pacijentu injekciju s anestheticima, s ove i s one strane, ubod igle također jako boli. Kad anestetik počne djelovati, liječnik će kliještima izvaditi zub. Vađenje traje jako dugo i ako liječnik nije pažljiv, čak se može desiti da korijen pukne unutar desni. Onda će liječnik uzeti čekić i dlijeto da ga iskopa, što pacijenta može nagnati da uzdrhti od straha. Zatim se za bušenje zuba koriste precizni instrumenti. Neki ljudi poskakuju u stolici, to jako boli i krvari, pacijent neko vrijeme pljuje krv. Dakle, šta misliš, čiji je tretman bolji? Čiji je napredniji? Mi ne bismo trebali obraćati pažnju samo na izgled alata, nego i na njegovu stvarnu efikasnost. Stara kineska medicina je bila vrlo napredna i sadašnja zapadna medicina neće biti u stanju dostići je još mnogo godina.

Nauka stare Kine razlikuje se od nauke koju smo u novije vrijeme naučili sa Zapada. Ona je išla drugim putem i mogla je dovesti do drugačijeg stanja. Zbog toga ne možemo našim sadašnjim načinom razumijevanja stvari razumjeti nauku i tehnologiju stare Kine. Zbog toga što je nauka stare Kine bila usmjerena na ljudsko tijelo, život i univerzum, jer je direktno proučavala ove stvari, išla je drugim putem. U to vrijeme su učenici u školi vježbali meditaciju i naglašavali su ispravan sjedeći stav. Kad bi u ruku uzeli kist, obraćali bi pažnju na kretanje *qija* i disanje. Ljudi u svim profesijama obraćali su pažnju na pročišćavanje srca i regulisanje disanja, cijelo društvo je bilo u takvom stanju.

Neki kažu: "Da li bismo imali auta i vozove da smo slijedili staru kinesku nauku? Da li bismo imali današnju modernizaciju?" Rekao bih da ne možeš razumjeti drugačija stanja iz perspektive ove okoline. Mora doći do revolucije u tvom razmišljanju i pogledima. Da nema televizora, ljudi bi ih imali u svojim čelima i mogli bi gledati šta god požele vidjeti i također bi imali i natprirodne sposobnosti. Da nema vozova i aviona, ljudi bi se mogli sjedeći dizati u vazduh, njima čak ne bi trebali ni liftovi. To bi dovelo do drugačijeg stanja društvenog razvoja i ne bi nužno bilo ograničeno na ovaj okvir. Leteći objekti vanzemaljaca dolaze i odlaze nevjerovatnom brzinom i mogu se povećati i smanjiti. Oni idu drugačijim putem razvoja, koji predstavlja drugačiju naučnu metodu.

8. Lekcija

Bigu

Neki su postavili pitanje *bigua*. Fenomen *bigu* postoji. On ne postoji samo u kultivacijskim krugovima, nego i kod velikog broja ljudi u cjelokupnom ljudskom društvu. Neki ljudi ne jedu i ne piju godinama ili čak više od deset godina, ali ipak dobro žive. Također postoje ljudi koji govore o *biguu* kao pokazatelju određenog nivoa, dok ga drugi smatraju znakom pročišćavanja tijela. Neki ga takođe smatraju i procesom kultivacije na visokim nivoima.

U stvari to nije ništa od toga što smo nabrojali. Šta je to onda? *Bigu* se, u stvari, odnosi na posebnu metodu kultivacije u posebnom okruženju. Pod kojim okolnostima se koristi? U drevnoj Kini, posebno prije osnivanja religija, mnogi praktikanti su prakticirali formu tajne prakse ili usamljeničke kultivacije u dalekim planinama ili pećinama, daleko udaljeni od ljudskih naselja. Kad su se jednom odlučili na taj put, postavljalo se pitanje snabdijevanja hranom. Ako ne bi koristili metodu *bigua*, oni se uopšte ne bi mogli kultivirati i umrli bi od gladi ili žeđi. Jednom sam išao od Chongqinga do Wuhana da podučavam Fa i krenuo sam brodom koji je plovio rijekom Yangtze prema istoku. Vidio sam pećine s obje strane Tri klanca u srednjem dijelu planina; u mnogim dobro poznatim planinama također postoji tako nešto. U prošlosti, nakon što bi se s užetom popeo u pećinu, praktikant bi presjekao uže i kultivirao se u pećini. Ako ta osoba ne bi uspjela u kultivaciji, umrla bi unutra. Bez hrane i vode, ona je u tim jako posebnim okolnostima koristila tu metodu kultivacije.

Mnoge prakse su prošle kroz takav proces naslijeđivanja, pa zato sadrže *bigu*. Mnoge prakse ne sadrže *bigu*. Danas većina praksi koje su objavljene u javnosti ne sadrže *bigu*. Mi kažemo da se trebaš koncentrisati samo na jednu praksu i da ne trebaš raditi sve što poželiš. Ti možda misliš da je *bigu* dobar i želiš ga raditi. Ali zašto to želiš raditi? Neki ljudi misle da je to dobro i postaju radoznali i možda misle da su njihove sposobnosti dovoljno dobre i da se tako mogu pokazati. Postoje ljudi sa svakakvim shvatanjima. Čak i ako se ta metoda koristi u praksi kultivacije, mora se trošiti vlastita energija da bi se nadoknadio manjak u tijelu. Zbog toga to nije vrijedno truda. Poznato vam je da su, posebno nakon osnivanja religija, ljudima donosili hranu i čaj za vrijeme meditacije ili usamljeničke kultivacije u hramu, tako da taj problem nije postojao. Prije svega, jer mi prakticiramo kultivaciju u običnom ljudskom društvu, ne trebaš uopšte koristiti tu metodu. Isto tako, ako tvoja škola ne sadrži tako nešto, ti ne bi smio raditi nešto po svojoj volji. Međutim, ako baš stvarno želiš to prakticirati, onda idi i prakticiraj to. Koliko znam, uobičajeno je da, kada učitelj podučava praksu sa visokih nivoa i iskreno vodi učenike i ako nečija škola sadrži *bigu*, da se tada taj fenomen može pojaviti. Ipak, nije ga dozvoljeno propagirati u javnosti; uobičajeno je da učitelj odvede učenike da prakticiraju u tajnosti ili sami.

Danas također postoje *qigong* učitelji koji podučavaju *bigu*. Da li su oni uspjeli napraviti *bigu*? Na kraju, u stvari, ne. Ko je uspio u tome? Vidio sam mnoge ljude koji su završili u bolnici, a mnogima je čak i život bio u opasnosti. Zbog čega se to dešava? Zar ne postoji taj fenomen *bigua*? Da, postoji. Ipak, ima jedna stvar: Nikome nije dozvoljeno olako narušavati stanje običnog ljudskog društva, to nije dozvoljeno. Da i ne spominjem koliko ljudi

u cijeloj zemlji ne bi trebali ni jesti, ni piti; rekao bih da bi to mnogo olakšalo stvari, ako ljudi u području grada Changchuna ne bi trebali jesti ili piti. Mi se više ne bismo trebali brinuti oko pripreme jela. Poljoprivrednici se teško znoje na poljima, a sada odjednom niko ne treba jesti. To bi stvari učinilo bitno lakšim, jer bi ljudi samo radili, bez potrebe za hranom. Kako bi to moglo biti dozvoljeno? Da li bi to bilo ljudsko društvo? To definitivno nije dozvoljeno. Nije dozvoljeno da tako nešto u velikoj mjeri remeti obično ljudsko društvo.

Kad su neki *qigong* učitelji podučavali *bigu*, mnogi ljudski životi su bili ugroženi. Neki ljudi svojeglavo teže *biguu*. Ali ta vezanost još nije otklonjena, kao i mnoge druge vezanosti među svakodnevnim ljudima. Usta takve osobe će se ovlažiti kad ugleda neku ukusnu hranu. Kada se ta želja pojavi, on je neće moći kontrolisati i biće uznemiren od želje da jede. Kada ta žudnja poraste, požeće da jede, inače će se osjećati gladnim. Ipak, ako bude jeo, povratiće. Zbog toga što ne može jesti, postaće vrlo nervozan i prilično uplašen. Mnogi ljudi su završili na bolničkom tretmanu i mnogima su životi stvarno ugroženi. Postoje ljudi koji me traže i mole da sredim takve zbrkane slučajeve, ali ja nisam voljan da to učinim. Neki *qigong* učitelji jednostavno rade stvari neodgovorno, ko je voljan da za njih rješava takve zamršene probleme.

Osim toga, ako se nađeš u nevolji prakticirajući *bigu*, zar to nije zbog tvoje vlastite težnje. Mi kažemo da taj fenomen postoji, ali on nije neka vrsta stanja na visokim nivoima ili neka posebna reakcija. To je samo jedan oblik prakticiranja koji se koristi u posebnim okolnostima, ali on ne može biti populariziran. Mnogi ljudi teže *biguu* i još ga dijele na *bigu* i polu-*bigu* i čak ga rangiraju na različite stepene. Neki ljudi kažu da samo piju vodu, dok drugi kažu da jedu samo voće. Sve je to lažni *bigu* i kako vrijeme prolazi, oni će neminovno doživjeti neuspjeh. Oni koji se stvarno kultiviraju, ostaće u pećini bez jela i pića - to je pravi *bigu*.

Krada *qija*

Kad je riječ o krađi *qija*, neki će ljudi prebljediti kao da je spomenut tigar i od straha se više ne usuđuju prakticirati *qigong*. Zbog glasina o pojavama kultivacijskog ludila, krađe *qija*, itd. u kultivacijskim krugovima, mnogi ljudi se boje prakticirati *qigong* i doći u dodir s njim. Da nema takvih glasina, vjerovatno bi još više ljudi prakticiralo *qigong*. Postoje neki učitelji sa lošim *xinxingom*, koji posebno uče te stvari i to je prouzrokovalo veliki kaos i zbrku u krugovima kultivatora. U stvari, to nije tako strašno kao što oni to opisuju. Mi kažemo da je *qi* samo *qi*, iako ga ti možeš zvati "prvobitnim *qijem*", ili takav *qi* ili onakav *qi*. Sve dok tijelo čovjeka ima *qi*, on je na nivou liječenja bolesti i održavanja zdravlja i on još ne važi za praktikanta. Dok god čovjek ima *qi*, to znači da njegovo tijelo još nije dostiglo visok stepen čistoće i da još sadrži bolesni *qi* - to je sigurno. Osoba koja krađe *qi* također se nalazi na nivou *qija*. Ko bi od nas praktikanata želio taj nečisti *qi*? *Qi* u tijelu onog ko ne prakticira je prilično nečist i može postati bistriji i svjetliji kroz prakticiranje *qigonga*. Na mjestu koje je bolesno pokazuje se velika nakupina crne supstance visoke gustoće. Ako on nastavi prakticirati i stvarno dostigne stanje odstranjivanja bolesti i održavanja zdravlja, njegov *qi* će postepeno postajati žut. Ako on i dalje nastavi prakticirati, njegove bolesti će stvarno biti odstranjene i on više nema *qija* i ušao je u stanje mliječno-bijelog tijela.

Zbog toga možemo reći da, ako neko ima *qi*, on još uvijek ima bolesti. Mi smo praktikanti - zbog čega bi jedan praktikant želio imati *qi*? Naša vlastita tijela trebaju biti pročišćena. Zbog čega bi još želio imati taj nečisti *qi*? Sigurno ga ne želimo. Neko ko želi *qi* još uvijek je na nivou *qija*. Na tom nivou, on ne može razlikovati između dobrog i lošeg *qija*, jer nema tu sposobnost. On ne može dotaći istinski *qi* u polju eliksira tvog tijela, jer taj prvobitni *qi* može pomjeriti samo neko sa visokim sposobnostima. Što se tiče nečistog *qija* u tvom tijelu, dopusti mu da ti ga ukrade - to nije problem. Za vrijeme prakticiranja, ako želim da se napunim s *qijem*, trebam samo pomisliti na to i moj trbuh će se u kratkom vremenu napuniti s tim.

Tao škola uči stojeću vježbu *tianzi zhuang* dok Buda škola uči ulijevanje *qija* kroz tjeme. U univerzumu ima mnogo *qija* i možeš se svakodnevno puniti s tim. Otvoriš *laogong* tačku i *baihui* tačku i onda možeš ulijevati *qi*, fokusiraš se na polje eliksira, ulijevaš *qi* rukama i za kratko vrijeme ćeš biti pun. Koliko god da si napunjen *qijem*, koja je korist od toga? Kad neki ljudi mnogo prakticiraju *qi*, njihovi se prsti i tijela osjećaju kao da su natečeni. Kad ostali prilaze takvoj osobi, oni osjećaju polje oko nje: "Hej, ti si stvarno dobro vježbao." Ja kažem da to nije ništa. Gdje je tu *gong*? On je samo prakticirao *qi*. Bez obzira koliko *qija* neko ima, on ne može zamijeniti *gong*. Svrha prakticiranja *qija* je da se *qi* unutar tijela zamijeni sa vanjskim dobrim *qijem*, i da se tijelo pročisti. Zbog čega bi neko sakupljao *qi*? Kada si na ovom nivou i kad nisi prošao kroz temeljne transformacije, to još uvijek nije *gong*. Bez obzira koliko si *qija* ukrao, ti si samo velika vreća puna *qija*. Koja je korist od toga? On još nije transformisan u visokoenergetsku supstancu. Pa čega se imaš bojati? Pusti ga da ti krade *qi*, ako baš to želi.

Razmisli o ovome: Ako tvoje tijelo ima *qi*, ono ima bolesti. Kad neko krade tvoj *qi*, zar ne krade također i tvoj bolesni *qi*? On uopšte ne može razlikovati te stvari, jer je onaj ko želi *qi* na nivou *qija* i nema nikakve sposobnosti. Osoba koja ima *gong* ne želi *qi* - to je sigurno. Ako ne vjeruješ u to, možemo izvesti jedan experiment. Ako neko stvarno želi ukrasti tvoj *qi*, ostani na mjestu i dopusti mu da ga ukrade. Fokusiraj svoj um na punjenje tijela *qijem* iz univerzuma, dok on stoji iza tebe i krade tvoj *qi*. Vidi kako je to dobro, on je ubrzao čišćenje tvog tijela i time ti je uštedio punjenje i otpuštanje *qija* iz tvog tijela. Zbog toga što on ima loše namjere i krade nešto od drugih, iako krade nešto loše, on ipak čini djelo kojim gubi *de*. Zbog toga ti on daje *de*. Time nastaje dvostruko strujanje u kojem ti on s jedne strane uzima *qi*, a s druge strane ti daje *de*. Osoba koja krade *qi* to ne zna - da zna, sigurno se ne bi usudila to raditi!

Svi ti ljudi koji kradu *qi* postaju modri u licu, svi su takvi. Mnogi ljudi, koji idu u parkove raditi *qigong*, žele se riješiti bolesti, oni imaju svakakve vrste bolesti. Kad neko liječi neku bolest, on mora odstraniti bolesni *qi*. Ali čovjek koji krade *qi* ga ne odstranjuje. Umjesto toga, on puni svoje tijelo s tim, sa svakakvim vrstama bolesnog *qija* i čak će i unutrašnjost njegovog tijela postati vrlo tamna. Jer on stalno gubi *de*, i spoljašnost njegovog tijela je tamna. Sa velikim poljem karme i velikim gubitkom *de*-a, on će postati taman i iznutra i spolja. Kad bi osoba koja krade *qi* znala da se kod nje dešava ta promjena i uvidjela da daje *de* drugima i da čini takvu glupost, ona to sigurno ne bi više radila.

Neki ljudi govore o *qiju* kao da je to nešto vrlo mistično: "Ako si čak i u Americi, možeš primiti *qi* koji ja emitujem". "Možeš stajati s druge strane zida i primićeš *qi* koji ja

emitujem". Neki ljudi su vrlo osjetljivi i stvarno mogu primiti *qi* kad je emitovan. Ali *qi* ne putuje u ovoj dimenziji. On se kreće u drugoj dimenziji i u toj dimenziji tamo nema zida. Zašto onda ne možeš osjetiti ništa kad neki *qigong* učitelj emituje *qi* na nekom otvorenom prostoru? Zbog toga što u drugoj dimenziji tamo postoji prepreka. Zbog toga *qi* nema tako veliku prodornu moć kao što ljudi kažu.

Ono što stvarno djeluje je *gong*. Kad praktikant može emitovati *gong*, on više nema *qija*. Ono što on emituje je visokoenergetska supstanca, koja se nebeskim okom može vidjeti kao jedna vrsta svjetla. Kad je on projiciran na neku drugu osobu, izaziva kod nje osjećaj toplote; on može direktno djelovati na obične ljude. Ipak, time se ne može postići cilj potpunog izliječenja, on na problem samo može imati efekat potiskivanja problema. Ako se istinski žele izliječiti bolesti, moraju postojati natprirodne sposobnosti, za svaku vrstu bolesti postoji različita vrsta natprirodne sposobnosti. U krajnje mikroskopskom, svaki mikroskopski dio *gonga* izgleda isto kao i ti. On može razlikovati ljude i inteligentan je, on je visokoenergetska supstanca. Ako bi ga neko ukrao, kako bi mogao ostati kod njega? On neće ostati tamo i ne može biti tamo postavljen, jer ne pripada toj osobi. Svi istinski praktikanti, jednom kad razviju *gong*, imaju učitelja koji ih nadgleda. Tvoj učitelj nadgleda šta ti radiš. Ako pokušaš uzeti stvari od druge osobe, to neće dozvoliti ni učitelj te osobe.

Sakupljanje *qija*

Krađa *qija* i sakupljanje *qija* nisu problemi koje trebamo za vas riješiti dok prenosimo put kultivacije na visokim nivoima. Jer ja imam još i ovaj cilj: obnoviti reputaciju kultivacije, učiniti nešto dobro i razotkriti takve negativne fenomene koje niko dosad nije pojasnio. Želim da ste svi upoznati s tim, tako da neki ljudi ne bi cijelo vrijeme činili loša djela i da neki ljudi, koji ne znaju istinu o *qigongu*, ne bi preblijedili čim je o tome riječ.

Postoji dovoljno *qija* u univerzumu. Neki ljudi govore o nebeskom *yang qiju* i zemaljskom *yin qiju*. Ti si također dio univerzuma i možeš ga slobodno sakupljati. Ali neki ljudi ne sakupljaju *qi* iz univerzuma. Oni su se specijalizirali da podučavaju druge u sakupljanju *qija* biljaka i oni su čak i sabrali svoja iskustva: *Qi* jablana je bijel, a *qi* bora je žut i kako i kad se može sakupljati taj *qi*. Neki kažu: "Bilo je jedno drvo ispred moje kuće i umrlo je jer sam pokupio njegov *qi*." Kakva je to vrsta sposobnosti? Zar to nije loše djelo? Poznato je svima da, ako se istinski kultiviramo, mi želimo emitovati pozitivne informacije i izjednačavati se s osobinama univerzuma. Zar ne trebaš obraćati pažnju na dobrodušnost? Da bismo se asimilirali s osobinama univerzuma, *Zhen*, *Shan*, *Ren*, mi moramo praktimirati dobrodušnost. Ako uvijek činiš loša djela, kako ćeš povećati *gong*? Kako ćeš odstraniti svoje bolesti? Zar to nije u suprotnosti s onim što bi mi praktikanti trebali raditi? To je također ubijanje i činjenje loših djela! Neko bi mogao reći: "Što više govoriš, to zvuči nevjerovatnije - ubijanje životinja je ubijanje, a ubijanje biljaka je također ubijanje". U stvari je to tako. U budizmu se govori o šestostrukom putu reinkarnacije. Ti ćeš u šestostrukom putu reinkarnacije možda postati biljka. Tako o tome govori budizam. Mi ovdje ne govorimo na taj način, ali vam kažemo da je drveće također živo. Ne samo da je živo, nego ima i misaone aktivnosti na vrlo visokom nivou.

Na primjer, postoji čovjek u Americi koji se specijalizirao u proučavanju elektronike i koji uči druge kako da koriste detektor laži. Jednog dana, iznenada mu je pala na pamet jedna ideja. Postavio je obje elektrode detektora laži na jednu agavu i zalio je. Nakon toga je

primjetio da je olovka detektora laži brzo iscrtala jednu krivu. Ta kriva je identična onoj koju proizvodi ljudski mozak kada se u jednom vrlo kratkom trenutku pojave oduševljenje i radost. U tom trenutku je ostao zapanjen kako biljke mogu imati osjećaje! On je skoro htio istrčati na ulicu i uzviknuti: "Biljke imaju osjećaje!" Ushićen tim događajem, nastavio je istraživati na tom području i izveo je mnoge eksperimente.

Jednom je postavio dvije biljke jednu pored druge i rekao jednom svom studentu da pred jednom biljkom zgazi i ubije drugu biljku. Zatim je drugu biljku odnio u sobu i spojio je na detektor laži. Nakon toga je rekao petorici studenata da jedan po jedan uđu u sobu. Biljka nije reagovala kada su ušla prva četiri studenta. Kada je ušao peti student, koji je uništio prvu biljku, čak i prije nego što se približio biljci, olovka je odmah iscrtala krivu, koja se samo pojavljuje kad je osoba prestrašena. On je zaista ostao zaprepašten! Taj eksperiment ukazuje na jedno vrlo važno pitanje: Mi smo oduvijek vjerovali da su ljudi viša bića sa čulnim funkcijama, kojima mogu razlikovati stvari i s mozgom, kojim mogu analizirati stvari. Kako biljke mogu razlikovati stvari? Zar to ne znači da one također imaju čulne organe? U prošlosti, ako bi neko rekao da biljke imaju čulne organe, misli i osjećaje i da mogu razlikovati ljude, takva osoba bi bila proglašena praznovjernom. I to još nije sve, čini se da biljke u pojedinim aspektima nadmašuju današnje ljude.

Jednog dana, on je spojio detektor laži na biljku i zamislio se: "Kakvu vrstu eksperimenta da izvedem? Hajde da zapalim njeno lišće i vidim kako će reagovati." Samo što je to pomislio - čak i prije nego što je zapalio lišće - olovka je brzo iscrtala krivu, koja se može pojaviti samo u trenutku kad neko očajnički doziva u pomoć. Ova nad-čulna sposobnost je u prošlosti nazivana čitanje misli i to je jedna urođena ljudska sposobnost i instinkt. Ali današnje čovječanstvo je iskvareno. Ti se moraš kultivirati od početka i vratiti se svom izvornom, istinskom sebi i svojoj izvornoj prirodi, tek tada ih možeš opet imati. Ali biljke ih imaju i znaju o čemu razmišljaš. To zvuči potpuno nevjerovatno, ali to je bio stvarni naučni eksperiment. On je također izveo mnoge druge eksperimente, uključujući i natprirodnu sposobnost upravljanja na daljinu. Nakon što je njegov naučni članak objavljen, izazvao je veliko uzbuđenje u javnosti.

Botaničari u raznim zemljama pokrenuli su istraživanja na tom području, i u našoj zemlji se to radi i to se više ne smatra praznovjerjem. Ovih dana sam rekao da bi ono što se danas dešava, otkriva i pronalazi u čovječanstvu bilo dovoljno da promijeni postojeće udžbenike. Ipak, zbog uticaja tradicionalnih stavova, ljudi to ne žele prihvatiti. Također, niko ne sakuplja i sistematizira te stvari.

U jednom parku na sjeveroistoku, primjetio sam da je skupina borova izumrla. Niko ne zna šta su neki ljudi tamo prakticirali: Oni su se valjali posvuda po zemlji i poslije toga su sakupljali *qi* stopalima na jedan način i rukama na drugi. Nedugo nakon toga, svi borovi su požutjeli i uvenuli. Pa, jesi li time učinio dobro ili loše djelo? Iz perspektive nas praktikanata, to je ubijanje. Ti si praktikant i zbog toga moraš biti dobar čovjek, postepeno se izjednačavati sa osobinama univerzuma i oslobađati se svojih loših stvari. Ni iz perspektive običnog čovjeka to nije dobro djelo. To je uništavanje društvene svojine, uništavanje zelene površine i narušavanje ekološke ravnoteže. Svejedno iz koje perspektive posmatrano, to nije dobro djelo. Postoji dovoljno *qi*ja u univerzumu i ti ga slobodno možeš sakupljati. Neki ljudi imaju mnogo energije i nakon što su prakticirajući dostigli određeni nivo, oni stvarno mogu jednim zamahom ruke sakupiti *qi* velike grupe biljaka. Ipak, to nije ništa više od *qi*ja. Bez obzira koliko *qi*ja sakupio, koja je korist od toga? Kad neki ljudi idu u parkove, oni ne rade ništa

drugo. Oni kažu: "Ne trebam raditi *qigong* vježbe, dovoljno je da ovako zamahujem rukama dok se šetam i završio sam s vježbanjem. Dovoljno je samo dobiti *qi*." Oni misle da je *qi* isto što i *gong*. Kad ljudi priđu toj osobi, osjećaju da je njeno tijelo sasvim hladno. Zar *qi* biljaka nema *yin* prirodu? Praktikanti trebaju održavati ravnotežu između *yina* i *yanga*. Iako tijelo te osobe miriše na borovu smolu, ona još misli da dobro prakticira.

Onaj ko prakticira dobiće *gong*

Pitanje "onaj ko prakticira dobiće *gong*" je izuzetno važno. Kad me drugi ljudi pitaju šta su prednosti Falun Dafa, kažem da Falun Dafa može omogućiti da *gong* kultivira praktikanta, čime se smanjuje vrijeme potrebno za prakticiranje; on može riješiti problem kad neko nema dovoljno vremena za prakticiranje, jer ga *gong* ipak cijelo vrijeme kultivira. Istovremeno, to je istinska kultivacijska praksa duha i tijela i ovo naše fizičko tijelo će doživjeti velike promjene. Falun Dafa ima još jednu prednost, najveću, o kojoj dosad nisam govorio. Tek danas ćemo je razjasniti. To je zbog toga što se time dodiruje vrlo veliko pitanje sa istorijskom pozadinom i ima jako velik uticaj na kultivacijske krugove. Niko se kroz istoriju nije usudio to otkriti, a nije im bilo ni dozvoljeno. Ja danas nemam drugog izbora, nego da vam to objasnim.

Neki praktikanti kažu: "Svaka rečenica koju je Učitelj Li Hongzhi izgovorio je nebeska tajna i to je otkrivanje nebeskih tajni". Ipak, mi istinski vodimo ljude prema visokim nivoma, što predstavlja spašavanje ljudi. Mi moramo biti odgovorni prema svakome i u stanju smo preuzeti takvu odgovornost, iz tog razloga to nije odavanje nebeskih tajni. Ako neko neodgovorno i olako govori o tome, to je odavanje nebeskih tajni. Danas ćemo iznijeti u javnost ovu temu: Onaj ko prakticira, dobiće *gong*. Kako ja to vidim, u svim današnjim kultivacijskim praksama, uključujući i sve prakse Buda škole i Tao škole u istoriji, zajedno sa neobičnim školama, kultivira se čovjekova sporedna duša (sporedna svijest), sporedna duša dobija *gong*. Glavna duša, o kojoj ovdje govorimo, odnosi se na naše vlastite misli. Ti moraš znati šta misliš i šta radiš, to je tvoje istinsko *ja*. Ali ti uopšte ne znaš šta tvoja sporedna duša radi. Iako je ona rođena istovremeno s tobom, ima isto ime, kontroliše isto tijelo i ima isti izgled, ona, strogo govoreći, nije ti.

Postoji jedan princip u univerzumu: Ko gubi, dobija; ko prakticira kultivaciju, dobija *gong*. Kroz istoriju, svi kultivacijski sistemi su učili ljude da budu u transu za vrijeme prakticiranja, da ne smiju razmišljati ni o čemu i da onda trebaju utonuti u duboku meditaciju, sve dok na kraju ne postanu potpuno nesvjesni svega. Neki ljudi sjede u meditaciji tri sata, a osjećaju da im je sve to prošlo u djeliću sekunde, a drugi se čak dive snazi meditacije te osobe. Da li je ona stvarno prakticirala? Ona sama to uopšte ne zna. Pogotovo u Tao školi se kaže: Svjesna duša umire, a prvobitna duša se rađa. Ono što oni nazivaju svjesna duša mi zovemo glavna duša, a prvobitnu dušu, o kojoj oni govore, mi nazivamo sporedna duša. Ako tvoja svjesna duša umre, ti ćeš stvarno biti mrtav i glavna duša stvarno više ne postoji. Neko ko prakticira jednu drugu praksu jednom mi je rekao: "Učitelju, kad prakticiram, ne prepoznajem nikog od svoje familije". Jedna druga osoba mi je rekla: "Ja ne moram prakticirati kao drugi, koji to rade rano ujutro i kasno naveče. Kad dođem kući, legnem na krevet, onda moje *ja* izlazi da prakticira. Dok ležim, posmatram ga kako prakticira." Ja mislim da je to jako žalosno, ali opet, to i nije tako žalosno!

Zašto oni spašavaju sporednu dušu? Lu Dongbin je jednom rekao: "Radije ću spašavati životinje nego ljudska bića". Zaista, ljudima je stvarno jako teško spoznati, jer su svakodnevni ljudi izgubljeni u običnom ljudskom društvu i ne mogu se odreći svojih vezanosti kada se nalaze pred praktičnim prednostima. Ako ne vjeruješ u to, vidjećeš da će neki ponovo postati svakodnevni ljudi, kad nakon našeg kursa napuste ovu salu. Ako ih neko uvrijedi ili udari, oni se neće s tim pomiriti. Nakon nekog vremena, oni se više uopšte neće ponašati kao praktikanti. U historiji su mnogi kultivatori vidjeli da je ljude jako teško spasiti, upravo jer je čovjekova glavna duša previše izgubljena. Ljudi koji imaju dobar kvalitet prosvjetljenja s jednom sugestijom će odmah shvatiti o čemu je riječ. Neki ljudi neće vjerovati, bez obzira kako im objašnjavao i misliće da preuveličavaš. Toliko smo naglašavali kultivaciju *xinxinga*, ali ipak, kad se vrati među obične ljude, taj čovjek će opet raditi šta želi. On misli da je to malo konkretnih, opipljivih i dostupnih prednosti među svakodnevnim ljudima ipak praktično i da ih on mora imati. Fa koji je Učitelj objasnio također zvuči logično, ali ga nije moguće realizirati. Glavnu dušu je najteže spasiti, dok sporedna duša može vidjeti prizore iz drugih dimenzija. Oni zato misle: "Zašto moram spasiti tvoju glavnu dušu? Tvoja sporedna duša je također ti. Zar to nije isto ako nju spasim? Obje su ti, svejedno je ko to dobije, u svakom slučaju si ti taj koji to dobija."

Opisaću vam tačno njihove konkretne kultivacijske metode. Ako neko ima sposobnost gledanja na daljinu, ta osoba će vjerovatno vidjeti ovaj prizor: Kada sjediš u meditaciji, vidjećeš da, čim uđeš u stanje meditacije, "huš" - jedan ti, koji izgleda isto kao ti, u jednom trenutku izlazi iz tvog tijela. Ali pokušaj razlučiti gdje je tvoje pravo *ja*? Ti upravo sjediš tu. Nakon što vidiš da on napušta tvoje tijelo, učitelj će ga povesti da prakticira kultivaciju u jednoj dimenziji koju je učitelj stvorio, koja može biti u obliku društva iz prošlosti, u obliku današnjeg društva, ili u obliku društva iz neke druge dimenzije. Osoba će biti podučavana kako da prakticira i proći će kroz mnogobrojne teškoće, jedan do dva sata dnevno. Kada se on vrati s prakticiranja, ti ćeš također izaći iz stanja meditacije. To se odnosi na one koji mogu vidjeti.

Još je žalosnije ako osoba ne može to vidjeti. Ona ništa ne zna o tome i meditira dva sata mutne glave, onda izlazi iz meditacije. Neki ljudi zaspu i spavaju dva ili tri sata i onda misle da su završili s prakticiranjem, ali oni se u potpunosti predaju drugima. Na ovaj način se to obavlja s prekidima, pri čemu oni svaki dan meditiraju određeno vrijeme. Također postoje neki koji to obave odjednom. Možda ste čuli da je Boddhidarma devet godina sjedio s licem okrenutim prema zidu. U historiji je bilo puno monaha koji su meditirali decenijama, najduže vrijeme sjedenja zabilježeno u historiji je preko devedeset godina. Neki su sjedili i duže, oni su imali gust sloj prašine nataložen na njihovim trepavicama i trava je već rasla po njihovom tijelu, ali oni su još uvijek sjedili tamo. I u Tao školi neki to podučavaju, a posebno u nekim neobičnim školama govori se o spavanju i oni spavaju decenijama bez izlaženja iz stanja meditacije i bez buđenja. Ali ko je prakticirao? Njegova sporedna duša je izašla i prakticirala. Ako on može vidjeti, može vidjeti da učitelj podučava njegovu sporednu dušu prakticiranju. Sporedna duša također može dugovati dosta karme, a učitelj nema sposobnost da odstrani svu karmu. Zbog toga mu učitelj kaže: "Kultiviraj se ovdje dobro. Ja sad moram ići, ali vratiću se uskoro, čekaj me."

Učitelj tačno zna šta će se dogoditi, ali ipak mora tako postupiti. Nakon toga dolaze demoni da bi ga zaplašili; ili se pretvaraju u ljepotice da bi ga zaveli, biće tu raznih stvari. Oni vide da je on stvarno ostao nedirnut. To je zbog toga što je za sporednu dušu relativno lako da se kultivira, jer ona može znati istinu. Tako demoni postaju veoma razdraženi i iz osвете ga

žele ubiti. On je zaista ubijen i sav njegov dug je odjednom otplaćen. Nakon što je ubijen, njegova sporedna duša izlazi i uzdiže se kao dašak dima. I ponovo će se reinkarnirati i roditi u veoma siromašnoj porodici. Već od djetinjstva, njegov život je veoma težak. Kad odraste i može shvatiti stvari, učitelj će doći, ali on ga naravno neće prepoznati. Koristeći natprirodne sposobnosti, učitelj će otključati njegovo pamćenje i on će se odjednom sjetiti: "Zar to nije moj učitelj?". Učitelj će mu reći: "Sad je vrijeme, sad možeš prakticirati". I tako će mu učitelj poslije mnogo godina prenijeti svoje učenje.

Nakon što je završio s podučavanjem, učitelj će mu reći: "Ti još uvijek imaš mnogo vezanosti kojih se trebaš osloboditi. Trebao bi ići i lutati okolo." Lutanje je vrlo teško - on tumara u društvu proseći hranu i susrećući svakakve vrste ljudi, koji ga ismijavaju, psuju i iskorištavaju. On nailazi na sve moguće stvari. On sebe tretira kao praktikanta i dobro postupa u odnosima s drugima, uvijek održavajući i poboljšavajući svoj *xinxing* i nije dirnut iskušenjima različitih interesa svakodnevnih ljudi. Nakon mnogo godina lutanja, vraća se nazad. Učitelj mu kaže: "Dostigao si Tao i dostigao si Ispunjenje. Ako nemaš ništa da obaviš, možeš se vratiti i spakovati se i spremiti se za odlazak. Ako ti je još nešto ostalo da obaviš, onda završi te stvari svakodnevnih ljudi. Tako se nakon mnogo godina sporedna svijest vraća. Čim se ona vrati, glavna duša na ovoj strani također izlazi iz meditacije i njegova glavna svijest se budi.

Ali on se zapravo nije kultivirao, njegova sporedna duša se kultivirala, tako da njegova sporedna duša dobija *gong*. Ali i njegova glavna duša je također patila. Na kraju krajeva, on je proveo cijelu svoju mladost sjedeći tu i njegov životni vijek običnog čovjeka je završen. Šta se onda dešava? Nakon buđenja iz stanja meditacije, on osjeća da je razvio *gong* i da je dobio natprirodne sposobnosti. Ako želi liječiti bolesti ili uraditi nešto, moći će, jer će mu sporedna duša ispuniti želje. Jer on je, na kraju krajeva, glavna duša, a glavna duša kontroliše tijelo i ima glavnu riječ. Osim toga, on je tolike godine proveo sjedeći, čitav njegov život je prošao. Kad ova osoba umre, sporedna duša odlazi i svako ide svojim putem. Prema budizmu, on još uvijek mora ići kroz ciklus reinkarnacije. Zato što se jedna velika prosvijetljena osoba uspješno kultivirala u njegovom tijelu, on je također sakupio i puno *de*-a. Šta se onda dešava? On će možda u sljedećem životu postati zvaničnik visokog ranga ili će steći veliko bogatstvo. Samo tako može biti. Zar se on onda nije uzaludno kultivirao?

Morali smo uložiti puno napora da bi dobili dozvolu da objasnimo ovo pitanje. Razotkrio sam prastaru misteriju koja je bila tajna nad tajnama, koja se nikako nije smjela otkriti. Objasnio sam korijen svih metoda kultiviranja kroz istoriju. Zar nisam rekao da to uključuje veoma duboke istorijske razloge. To su razlozi. Razmislite o tome: U kojim kultivacijskim sistemima ili školama se ne kultivira na taj način? Ti se kultiviraš i kultiviraš, ali ne dobijaš *gong*, zar nisi za žaljenje? Koga možeš okriviti za to? Ljudi su jednostavno tako izgubljeni da uopšte ne mogu shvatiti, bez obzira na koji način im skrenuo pažnju na to. Ako im se nešto objasni sa višeg gledišta, oni će to smatrati nevjerovatnim. Ako im se nešto objasni sa nižeg gledišta, oni ne mogu shvatiti ništa što je više od toga. Čak i ako objasnim stvari na taj način, neki ljudi ipak i dalje traže od mene da liječim njihove bolesti. Onda stvarno ne znam šta da kažem. Mi govorimo o kultivaciji i vodimo računa jedino o onima koji se kultiviraju prema višim nivoima.

U našoj školi kultivacije glavna svijest dobija *gong*. Ipak, da li će glavna svijest dobiti *gong* ako ti tako kažeš? Ko daje dozvolu? Nije to tako, za to postoje preduslovi. Poznato je da se u našoj školi za vrijeme kultivacije ne izbjegava obično ljudsko društvo, niti se izbjegavaju

konflikti, ne bježi se od konflikata. U ovom složenom okruženju svakodnevnih ljudi, ti si jasnog uma i potpuno svjesno gubiš po pitanju interesa. Kad drugi uzimaju tvoje vlastite interese, nećeš se boriti i svađati zbog njih kao drugi i podnosićeš gubitke, uz razne smetnje za tvoj *xinxing*. U tako teškom okruženju, ti jačaš svoju volju i poboljšavaš svoj *xinxing*. Izložen dejstvu različitih loših misli svakodnevnih ljudi, bićeš u mogućnosti da se izdigneš.

Razmisli o tome. Zar nisi ti taj ko svjesno pati? Zar nije tvoja glavna duša ta koja nešto žrtvuje? Zar ono što si izgubio među svakodnevnim ljudima nisi svjesno izgubio? Tada ovaj *gong* treba pripasti tebi, jer, ko god gubi, dobija. To je upravo razlog zašto se u našoj školi ne izbjegava kultivacija u ovom složenom okruženju svakodnevnih ljudi. A zašto se mi kultiviramo usred konflikta svakodnevnih ljudi? To je zbog toga što mi sami želimo dobiti *gong*. U budućnosti će profesionalni praktikanti, koji se kultiviraju u hramovima, morati lutati među svakodnevnim ljudima.

Neki ljudi kažu: "Zar se i druge metode kultivacije u današnje vrijeme ne prakticiraju među svakodnevnim ljudima?" Ali sve one služe samo za to da se promoviraju liječenje bolesti i održavanje zdravlja. Niko javno ne podučava pravu kultivaciju prema višim nivoima, osim u školama kod kojih se podučava samo jedan učenik. Oni koji istinski vode učenike već su odveli svoje učenike da bi ih podučavali u tajnosti. Kroz sve ove godine, ko je javno govorio o ovim stvarima? Niko to nije učinio. Naša škola podučava upravo na taj način, zbog toga jer je upravo to način na koji se mi kultiviramo i mi upravo na taj način dobijamo *gong*. Istovremeno, naša škola kultivacije daje hiljade i desetine hiljada stvari tvojoj glavnoj duši, da bi ti sam stvarno dobio *gong*. Ja sam rekao da sam uradio nešto što niko nikad do sad nije uradio i da sam otvorio najveća vrata. Neki ljudi su shvatili moje riječi, ono što sam rekao stvarno nije nešto nezamislivo. Ja imam jednu naviku: Ako imam deset, kažem samo jedan od toga. Ti ćeš čak možda reći da se razmećem, ali ono što sam rekao je u stvari samo djelić toga. Zbog velike razlike među nivoima, ja ti ne mogu otkriti niti dio još višeg i dalekosežnijeg Dafa.

U našoj školi se kultivira na taj način da bi ti sam stvarno dobio *gong*, što je prvi put od stvaranja Neba i Zemlje, možete istražiti istoriju. Ono što je dobro je da ti lično dobijaš *gong*, ali je to također vrlo teško. U složenom okruženju svakodnevnih ljudi i usred međuljudskih trvenja koja stavljaju na probu tvoj *xinxing*, ono što je najteže je biti u stanju izdići se iznad toga. Teškoća je upravo u tome što potpuno svjesno gubiš po pitanju interesa svakodnevnih ljudi. Da li si dirnut kada se radi o tvojim ličnim interesima? Da li si dirnut usred međuljudskih borbi i intriga? Da li si dirnut kada članovi tvoje porodice i tvoji prijatelji podnose patnje? I kako prosuđuješ o tome? Biti praktikant je upravo tako teško! Neko mi je jednom rekao: "Učitelju, dovoljno je biti dobra osoba među svakodnevnim ljudima, ko se može kultivirati prema gore?" Kad sam to čuo, bio sam stvarno žalostan! Nisam mu ništa rekao. Postoje svakakve vrste *xinxinga*. Čovjek razumije onoliko visoko, koliko može. Onaj ko razumije, taj i dobija.

Lao Zi je rekao: "Tao koji može biti rečen nije vječni Tao." Tao više ne bi bio vrijedan, ako bi bio rasut posvuda po zemlji i ako bi ga neko mogao jednostavno pokupiti i time se uspješno kultivirati. Naša škola ti omogućava da ti lično dobijaš *gong* kroz konflikte. Zbog toga bi se trebali prilagoditi svakodnevnim ljudima koliko god je to moguće. Ti ne moraš stvarno izgubiti nikakve materijalne stvari. Ipak, moraš poboljšavati svoj *xinxing* u ovom materijalnom okruženju. To je ono što je pogodno. Naša škola je najpogodnija, jer se možeš kultivirati među svakodnevnim ljudima, umjesto da postaneš monah ili opatica. Ali to je

također i ono najteže, da se mora kultivirati u ovom najsloženijem okruženju svakodnevnih ljudi. Ipak, to je i ono najbolje, jer ti omogućava da lično dobiješ *gong*. To je najbitniji momenat u našoj praksi i danas sam ga otkrio svima. Naravno, kad glavna duša dobija *gong*, dobija ga i sporedna duša. Zašto? Kad kod svih poruka, inteligentnih bića i ćelija u tvom tijelu raste *gong*, naravno da također raste i kod nje. Ipak, ona nikad neće biti viša od tebe; ti si gospodar, dok je ona Fa-čuvar.

Govoreći o ovoj temi, želio bih dodati još nešto. U kultivacijskim krugovima ima mnogo ljudi koji su se uvijek željeli kultivirati prema visokim nivoima. Svuda su putovali tražeći Fa i potrošili su puno novca. Nisu pronašli poznatog učitelja, iako su obišli cijelu zemlju. To što je neko čuven ne mora značiti da zaista dobro poznaje stvari. Na kraju, ti su ljudi proputovali zemlju uzduž i poprijeko, potrošili novac i trud, a nisu dobili ništa. Danas smo ti objelodanili tako dobru metodu kultivacije i ja sam je donio do tvog kućnog praga. Sad je samo do tebe da li se možeš kultivirati i uspjeti. Ako možeš to ostvariti, nastavi se kultivirati, ali ako ne možeš uspjeti i kultivirati se, od sada pa nadalje zaboravi na kultivaciju. Osim demona koji će te varati, niko te drugi neće učiti i nećeš se moći kultivirati u budućnosti. Ako te ja ne mogu spasiti, niko drugi neće moći. Zapravo, u današnje vrijeme je pronaći istinskog učitelja ispravnog Fa, koji bi te podučavao, teže nego popeti se na Nebo. Niko ne vodi brigu o tome. U vremenu kraja Fa, čak su i vrlo visoki nivoi u posljednjem *jie* i još manje mogu voditi brigu o svakodnevnim ljudima. Ovo je najpogodnija škola kultivacije, osim toga, prakticira se direktno prema osobinama univerzuma. To je najbrži i najkraći put i tačno je usmjeren na ljudsko srce.

Nebesko kolo

U Tao školi se podučava veliko i malo nebesko kolo. Objasnićemo šta je to nebesko kolo. Nebesko kolo, o kojem se obično govori, odnosi se na povezivanje dva energetska kanala *ren* i *du*. Ovo nebesko kolo je površinsko nebesko kolo i ono nema nikakvog značaja, osim u liječenju bolesti i održavanju zdravlja. To se zove malo nebesko kolo. Postoji još jedna vrsta nebeskog kola, koje se ne zove ni "malo nebesko kolo", ni "veliko nebesko kolo", to je jedna forma nebeskog kola u kultivaciji u meditaciji. Ono počinje u unutrašnjosti tijela, kruži oko *nivana* i onda se kreće prema dole, u unutrašnjosti tijela ide prema polju eliksira, kruži jednom oko njega i onda se ponovo penje prema gore. To je jedno unutrašnje kruženje. To je pravo nebesko kolo kod kultivacije u meditaciji. Nakon što se to nebesko kolo formira, ono stvara vrlo snažno energetske strujanje, koje onda preko jednog energetskog kanala dovodi u pokret stotine energetskih kanala, otvarajući sve ostale energetske kanale. U Tao školi se govori o nebeskim kolima, ali u budizmu ne. O čemu se govori u budizmu? Kad je Shakyamuni širio svoj Fa, on nije govorio o *gongu*. On doduše nije govorio o *gongu*, ali njegova praksa također ima svoj sopstveni oblik transformacije u kultivaciji. Kako se kreću energetske kanali u budizmu? Oni kreću i prolaze kroz *baihui* tačku i onda se razvijaju od vrha glave u spiralnoj formi do donjeg dijela tijela i na kraju se na ovaj način otvaraju svi energetske kanali.

Centralni energetske kanal u tantrizmu ima istu namjenu. Neki ljudi kažu da centralni energetske kanal ne postoji. Ali kako se onda u tantrizmu može kultivirati taj centralni energetske kanal? U stvari, kada se svi energetske kanali u ljudskom tijelu saberu, ima ih više od deset hiljada. Oni leže unakrsno, vertikalno i horizontalno, isto kao i krvni sudovi, ali su čak i brojniji od krvnih sudova. Nema krvnih sudova u prostoru između unutrašnjih organa,

ali ima energetskih kanala. Krenuvši od vrha glave, energetski kanali idu unakrsno, vertikalno i horizontalno do različitih dijelova tijela. Možda oni u početku nisu ravni, pa će biti otvoreni i međusobno povezani. Nakon toga se postepeno šire i polako grade jedan ravan energetski kanal. Taj energetski kanal služi kao osovina i rotira oko svoje ose i pogoni u kretanje nekoliko zamišljenih točkova, koji se horizontalno okreću. Cilj je također otvoriti sve energetske kanale u tijelu.

Kultivacijska praksa u našem Falun Dafa izbjegava upotrebu te metode da jedan energetski kanal pokreće stotine drugih energetskih kanala. Mi zahtijevamo da već od samog početka stotine energetskih kanala budu istovremeno otvoreni i da istovremeno kruže. Mi prakticiramo odmah na vrlo visokim nivoima i zaobilazimo stvari sa nižeg nivoa. Jedan energetski kanal pokreće stotine energetskih kanala - da bi ih sve otvorili, nekim ljudima možda ni cijeli život ne bi bio dovoljan. Neki ljudi moraju decenijama prakticirati kultivaciju i to je vrlo teško. U mnogim kultivacijskim praksama se kaže da jedan život nije dovoljan da bi se uspjelo u kultivaciji. Postoje mnogi ljudi koji se kultiviraju u praksama visokih i dalekosežnih velikih Fa i oni mogu produžiti svoje živote - zar oni ne govore o kultivaciji života? Oni mogu produžiti svoje živote da bi prakticirali kultivaciju i kultivacija traje jako dugo.

Malo nebesko kolo u osnovi služi za liječenje bolesti i održavanje zdravlja, dok se veliko nebesko kolo prakticira radi *gonga* - tada se osoba već istinski kultivira. Veliko nebesko kolo, o kojem je riječ u Tao školi, nije tako moćno kao naše, koje istovremeno otvara stotine energetskih kanala. Kod njih ima nekoliko energetskih kanala, koji kruže kroz tri *yin* i tri *yang* energetska kanala u rukama, kroz stopala i noge, pa sve do kose, tako oni prolaze jednom kroz cijelo tijelo. To se smatra cirkulacijom velikog nebeskog kola. Čim veliko nebesko kolo počne cirkulirati, to je istinska kultivacija *gonga*. Zbog toga neki *qigong* učitelji ne podučavaju veliko nebesko kolo i ono što podučavaju spada samo u liječenje bolesti i održavanje zdravlja. Neki ljudi također govore o velikom nebeskom kolu, ali oni nisu ništa usadili u tvoje tijelo, a ti ga sam ne možeš otvoriti. Ako ti ništa nije usađeno i ti želiš otvoriti energetske kanale oslanjajući se samo na svoje misli, to je lako reći! To je isto kao gimnastika, da li oni time mogu biti otvoreni? Kultivacija zavisi od tebe, dok transformacija *gonga* zavisi od učitelja. Tek kada ti je unutrašnji "mehanizam" u potpunosti usađen, on može imati takav efekat.

Tao škola je oduvijek smatrala ljudsko tijelo malim kosmosom: Oni vjeruju da, koliko god je kosmos velik izvana, toliko je velik i iznutra i da, kako god stvari izgledale izvan njega, isto tako izgledaju i u unutrašnjosti. To zvuči nepojmljivo i nije lako razumljivo. Univerzum je tako ogroman - kako se on može porediti sa ljudskim tijelom? Objasnićemo ovaj princip: U našoj današnjoj fizici proučavaju se sastavni dijelovi materije, od molekula, atoma, elektrona, protona, kvarkova, pa sve do neutrina. Koja je veličina, ako se ide još dalje? To se s mikroskopom više ne može vidjeti. Šta su krajnje sićušne čestice kada se ide još dalje? To nije poznato. U stvari je ono malo, što današnja fizika zna o tome, jednostavno vrlo daleko od najmanjih čestica ovog univerzuma. Kad čovjek nema fizičkog tijela, njegove oči mogu uvećati stvari pri gledanju i vidjeti na mikroskopskom nivou. Što je nečiji nivo viši, veći je i mikroskopski nivo koji on može vidjeti.

Na nivou na kojem se nalazio, Shakyamuni je iznio teoriju o tri hiljade velikih svjetova, što znači da u našem Mliječnom putu postoje ljudi sa fizičkim tijelima, kao i u našem čovječanstvu. On je također spomenuo da zrno pijeska sadrži tri hiljade velikih svjetova. I to

se slaže sa spoznajama današnje moderne fizike. Ima li razlike između forme kruženja elektrona oko jezgre atoma i forme kruženja Zemlje oko Sunca? Zbog toga je Shakyamuni rekao da na mikroskopskom nivou zrno pijeska sadrži tri hiljade velikih svjetova. To je kao kosmos, u kojem postoje život i materija. Ako je to tačno, razmislite o ovome: Postoji li pijesak u tim svjetovima unutar tog zrna pijeska? I da li i u zrnu pijeska unutar tog zrna pijeska također postoji tri hiljade svjetova? Da li i u tih tri hiljade svjetova u zrnu pijeska unutar tog zrna pijeska ima pijeska? Ako se ovo pitanje nastavi dalje, to ide u beskonačnost. Zbog toga je Shakyamuni, čak i kada je dostigao nivo Tathagate, rekao: "To je tako veliko, da nema spoljašnosti i tako malo, da nema unutrašnjosti." To je tako ogromno, da on nije mogao vidjeti vanjski rub univerzuma, i tako malo, da nije mogao vidjeti najsitnije čestice izvorne materije.

Neki *qigong* majstori kažu: "U jednoj pori se nalaze gradovi i u njima putuju vozovi i automobili". To zvuči teško za povjerovati, ali ako to stvarno razumijemo i proučavamo sa naučnog gledišta, ustanovićemo da ta izjava i nije nemoguća. Kad sam prije neki dan govorio o otvaranju nebeskog oka, mnogi ljudi su, dok im se otvaralo nebesko oko, vidjeli sljedeću pojavu: Primjetili su da trče prema vani kroz tunel u svom čelu i izgledalo je kao da nikad neće moći stići do kraja. Svaki dan za vrijeme prakticiranja, oni trče ovom širokom ulicom prema vani, s obje strane su rijeke i planine, oni također trče kroz gradove i vide jako mnogo ljudi. Oni misle da je to iluzija. Šta je to onda? Oni su vidjeli potpuno jasno i to nije bila iluzija. Rekao bih da, ako je ljudsko tijelo stvarno tako ogromno u mikroskopskom, to onda nije iluzija. Tao škole su oduvijek smatrale ljudsko tijelo univerzumom. Ako je ono zaista univerzum, onda je razmak između čela i epifize veći od 108 hiljada lija. Idi i trči prema vani, to je jako daleko.

Kad je veliko nebesko kolo kroz kultivaciju potpuno otvoreno, ono će praktikantu dati jednu natprirodnu sposobnost. Koju natprirodnu sposobnost? Poznato vam je da se veliko nebesko kolo također naziva "meridijansko nebesko kolo", "rotacija Neba i Zemlje" ili "*heche* rotacija". Već na vrlo niskom nivou, rotacija velikog nebeskog kola stvara energetski tok, koji postepeno postaje sve gušći, transformiše se prema višim nivoima i postaje veliki, vrlo gusti energetski pojas. Taj energetski pojas ima kružno kretanje. Dok on kruži, s nebeskim okom na vrlo niskom nivou možemo vidjeti da on uzrokuje da *qi* unutar tijela mijenja poziciju. *Qi* iz srca ide prema crijevima, *qi* iz jetre ide prema stomaku, itd. U mikroskopskom možemo vidjeti da je to što on prenosi nešto vrlo veliko. Ako se taj energetski pojas prenese izvan tijela, to je onda sposobnost teleportacije. Neko sa jakim *gongom* može prenositi velike stvari i to se naziva sposobnost velike teleportacije. Neko sa slabim *gongom* može prenositi male stvari i to se naziva sposobnost male teleportacije. To su vrste teleportacije i način njihovog formiranja.

S velikim nebeskim kolom već direktno prakticiramo *gong*. Zbog toga ono dovodi do različitih stanja i oblika *gonga*. Ono također može dovesti i do jednog vrlo posebnog stanja. Koje je to stanje? Možda ste u starim knjigama, kao što su *Biografije besmrtnika*, *Tekstovi o eliksiru*, *Tao Zang* ili *Važna uputstva za kultivaciju tijela i duha* pročitali frazu: "lebdjeti usred bijela dana". To znači da čovjek može lebdjeti usred bijela dana. U stvari, moram vam reći da osoba već može lebdjeti čim je njeno veliko nebesko kolo otvoreno - to je tako jednostavno. Neki misle da postoji ne tako mali broj ljudi kojima je, nakon toliko mnogo godina prakticiranja, veliko nebesko kolo otvoreno. Rekao bih da nije nemoguće da su već desetine hiljada ljudi mogli dostići taj nivo, jer je veliko nebesko kolo, konačno, tek početni korak u kultivaciji.

Ali zašto niko nije vidio te ljude da lebde ili polijeću u zrak? Stanje običnog ljudskog društva ne smije se remetiti, nije dozvoljeno proizvoljno remetiti ili mijenjati društvenu formu ljudskog društva. Kako bi moglo biti dozvoljeno da svi lete u vazduhu? Da li bi to još bilo obično ljudsko društvo? To je glavni aspekt. Drugi je da ljudska bića ne žive među svakodnevnim ljudima da bi bila ljudi, nego da bi se vratila svom izvoru, istinskom sebi. Zbog toga postoji pitanje kvaliteta prosvjetljenja. Ako neko vidi da mnogi ljudi zaista mogu lebdjeti, on će se također htjeti kultivirati, ali onda više ne postoji pitanje kvaliteta prosvjetljenja. Zbog toga, ako si to postigao kroz kultivaciju, ne smiješ to proizvoljno pokazivati, niti demonstrirati drugima, jer se drugi također trebaju kultivirati. Zbog toga, nakon što je tvoje veliko nebesko kolo otvoreno, nećeš moći lebdjeti ako je zaključan čak i vrh prsta na ruci ili nozi, ili bilo koji dio tvog tijela.

Kad je naše veliko nebesko kolo skoro otvoreno, često se pojavljuje stanje da se tijela nekih ljudi za vrijeme sjedeće meditacije stalno naginju prema naprijed. Zbog toga što su leđa bolje otvorena, osjećaju da su im leđa vrlo laka, dok je prednja strana tijela teška. Neki ljudi se naginju prema nazad, to onda znači da osjećaju su im leđa teška, dok je prednja strana tijela laka. Ako ti je cijelo tijelo dobro otvoreno, osjetićeš da se izdižeš i lebdiš iznad zemlje. Ali čim stvarno budeš mogao lebdjeti, to ti neće biti dozvoljeno, ali to nije apsolutno. Oni koji imaju natprirodne sposobnosti obično se pojavljuju na oba kraja: Djeca nemaju vezanosti, kao ni stariji ljudi - posebno starije žene. Kod njih se lako pojavljuju natprirodne sposobnosti i oni ih mogu lako zadržati. Kada muškarci, prije svega mlađi muškarci, jednom dobiju sposobnosti, oni ne mogu izbjeći vezanost hvalisanja. U isto vrijeme, oni će ih možda upotrijebiti kao sredstvo za nadmetanje među svakodnevnim ljudima. Zato nije dozvoljeno da postoje i čak i ako su razvijene kroz kultivaciju, moraju biti zaključane. Ako je jedan dio tijela zaključan, ta osoba neće moći lebdjeti. Ali to ne znači da ti apsolutno nikad neće biti dozvoljeno biti u tom stanju. Možda će ti biti dozvoljeno da ga malo isprobaš, a neki ljudi će ga moći i zadržati.

Ovo se dešava svaki put kad držim predavanja na raznim mjestima. Kada sam držao predavanje u Shandongu, bilo je praktikanata iz Pekinga i Jinana. Neko je upitao: "Učitelju, šta mi se to dešava? Dok hodam, imam osjećaj da se odvajam od tla, kad kod kuće spavam u krevetu, počinjem lebdjeti. Čak i pokrivač lebdi, uvijek lebdim poput balona." Kad sam imao predavanje u Guiyangu, tamo je bila jedna dugogodišnja praktikantica, starija žena iz Guizhoua. Ona je imala dva kreveta u svojoj sobi i jedan je bio pored jednog zida, a drugi pored drugog. Ona je sjedila u meditaciji na krevetu i osjećala ja da lebdi. Otvorila je oči i primjetila da je lebdeći prešla na drugi krevet. Pomislila je: "Moram se vratiti nazad." Tada je ponovo odlebdjela nazad.

Bio je jedan praktikant u gradu Qingdao, koji je za vrijeme pauze za ručak sjedio u meditaciji na krevetu, dok nikog nije bilo u njegovoj kancelariji. Čim je počeo meditirati, izdigao se u vazduh, skakao je snažno prema gore, preko jednog metra u visinu. Nakon toga je opet padao dole. Plumps, plumps, nastavio je skakati gore-dole, tako da je i pokrivač pao na pod. On je bio malo uzbuđen i također pomalo uplašen. On je tako skakao gore-dole za vrijeme cijele pauze za ručak. Konačno je kancelarijsko zvono zazvonilo i on je pomislio: „Ne smijem dozvoliti drugima da to vide. Šta ja to radim? Moram odmah prestati.“ I onda je prestao. To je razlog što se stariji ljudi mogu dobro kontrolisati. Da se to desilo mlađoj osobi, kad bi kancelarijsko zvono zazvonilo, ona bi pomislila: "Dođite svi da vidite, ja letim." To je primjer kad osoba ne može lako kontrolisati svoju želju za pokazivanjem: „Pogledajte kako sam dobro prakticirao - mogu da letim.“ Čim on to pokaže, sposobnost će nestati, jer nije

dozvoljeno da postoji na taj način. Mnogo je takvih slučajeva i to se pojavilo među praktikantima na raznim mjestima.

Mi zahtijevamo da svi energetske kanali već na samom početku budu otvoreni. Do današnjeg dana, osamdeset do devedeset posto naših praktikanata su postigli stanje u kojem su njihova tijela vrlo lagana i bez bolesti. U isto vrijeme, rekli smo da u ovom kursu niste samo dovedeni u to stanje u kojem su vaša tijela potpuno pročišćena, nego će također mnogo stvari biti usađeno u vaša tijela, da bi već za vrijeme ovog kursa mogli razviti *gong*. To znači da vas ja podižem prema gore i osim toga vas guram prema naprijed. Ja sam predavao Fa svima na kursu i *xinxing* svakog od vas se neprekidno mijenjao. Nakon što izađu iz sale, mnogi od vas će se osjećati kao drugačiji ljudi. Tvoj pogled na svijet se sigurno već promijenio. Ti već znaš kako se trebaš ponašati u budućnosti i da ne možeš više biti tako smušen. To je sigurno tako. Znači da je tvoj *xinxing* već uhvatio korak s tim.

Govoreći o velikom nebeskom kolu, iako ti nije dozvoljeno lebdjeti, osjećać ćeš da ti je tijelo lagano, kao da hodaš po vazduhu. Prije bi se već nakon nekoliko koraka umorio, ali sada se osjećáš vrlo lagano, bez obzira koliko si dugo hodao. Čini ti se kao da te neko gura prema naprijed dok voziš bicikl i nisi umoran kad se penješ uz stepenice, bez obzira koliko stepenica ima. To je garantovano tako. Oni koji čitaju knjigu i samostalno prakticiraju kultivaciju također mogu dostići to stanje koje trebaju dostići. Ja sam takav čovjek: Ono što ne želim reći, ne moram reći, ali ono što kažem mora biti istina. Posebno kad predajem Fa, ako ne kažem istinu, ako kažem nešto što je nemoguće ili ako govorim proizvoljno i bez određenog cilja, onda bi to bilo širenje heretičnog Fa. Meni nije lako raditi ovu stvar, cijeli univerzum posmatra i ne smije doći do zastranjivanja.

Običan čovjek jedino zna za to nebesko kolo i to je to. U stvari, to nije dovoljno. Da bi tijelo što prije bilo potpuno promijenjeno i transformisano pomoću visokoenergetske supstance, mora postojati još jedna cirkulacija u obliku nebeskog kola, koja pokreće sve energetske kanale u tijelu. Ona se zove "*maoyou* nebesko kolo" i o tome samo mali broj ljudi nešto zna. Taj pojam se ponekad spominje u knjigama, ali ga niko nije objasnio, oni ti ne govore o tome. Svi raspravljaju samo u teoriji, jer je to tajna nad tajnama. Ovdje ćemo vam je potpuno razotkriti: Ono može početi od *baihui* tačke (ono također može početi i od *huiyin* tačke), ono izlazi i kreće se duž granične linije između *yin* i *yang* strane tijela, od uha naniže prema ramenima i ide duž svakog od prstiju. Onda ide uz jednu stranu tijela, ispod tabana i uz unutrašnjost bedra prema gore. Onda uz unutrašnju stranu drugog bedra ide prema dole, ispod drugog stopala i penje se gore drugom stranom tijela. Ono se zatim ponovo kreće duž svakog od prstiju i dostiže vrh glave, zatvarajući kompletan krug. To je *maoyou* nebesko kolo. Drugi mogu o tome napisati knjigu, a ja sam vam to ovdje objasnio u par riječi. Također mislim da se to ne bi trebalo smatrati nebeskom tajnom, ali drugi smatraju te stvari vrlo dragocjenim i uopšte ne govore o tome. Oni objašnjavaju *maoyou* nebesko kolo samo kad istinski podučavaju učenike. Međutim, iako sam ga ja objasnio, niko od vas ga ne treba voditi ili kontrolisati kod prakticiranja. Ako tako prakticirate, to onda više nije naš Falun Dafa. Istinska kultivacija prema visokim nivoima je u stanju nedjelovanja i bez bilo kakvih misaonih aktivnosti, sve je već ugrađeno u vaša tijela, spremno za upotrebu. Sve ove stvari se automatski formiraju, ti unutrašnji mehanizmi te kultiviraju i razvijaju, pa će kada dođe vrijeme samostalno kružiti. Jednog dana će se za vrijeme prakticiranja tvoja glava naginjati sa jedne na drugu stranu. Ako se glava naginje u jednu stranu, to znači da oni kruže u tom smjeru. Ako se naginje u drugu stranu, onda oni kruže u drugom smjeru. Oni kruže u oba smijera.

Nakon što je veliko ili malo nebesko kolo otvoreno, glava će ti početi klimati za vrijeme meditacije, što je manifestacija prolaska energije. Isto važi i za Falun nebesko kolo, kojeg mi prakticiramo. Mi prakticiramo na taj način. U stvari, i kad ne prakticiraš, ono samostalno kruži. Ono će vječno kružiti. Kad prakticiraš, ti jednostavno pojačavaš taj mehanizam. Zar nismo rekli da Fa oplemenjuje praktikanta? Možeš primjetiti da tvoje nebesko kolo stalno kruži. Iako ne prakticiraš, taj sloj energetskih mehanizama postavljenih izvan tvog tijela, to jest sloj vanjskih velikih energetskih kanala, dovodi tvoje tijelo u prakticiranje - to se sve dešava automatski. Ono može kružiti i u obrnutom smjeru. Ono kruži u oba smjera i neprekidno otvara tvoje energetske kanale.

Šta je onda svrha otvaranja nebeskog kola? Otvaranje nebeskog kola samo po sebi nije svrha prakticiranja. Čak i kad je tvoje nebesko kolo otvoreno, kažem ti da to nije ništa. Ako se kultiviraš dalje, cilj je kroz formu nebeskog kola, pomoću jednog energetskog kanala otvoriti stotine energetskih kanala i otvoriti sve energetske kanale u tijelu. Mi smo već počeli to raditi. Kada se budete dalje kultivirali, neki od vas će primjetiti da kod kruženja velikog nebeskog kola energetski kanali postaju vrlo široki, kao prst, i oni su vrlo široki iznutra. Zbog toga što je energija već postala vrlo jaka, nakon što se formirao energetski tok, oni postaju vrlo široki i vrlo svijetli. To ipak i dalje nije ništa. Do kojeg stepena se onda mora prakticirati? Svi energetski kanali će postepeno postajati sve širi, dok će energija postajati sve jača i sve svjetlija. Na kraju se deset hiljada energetskih kanala spajaju u jedan, čime se postiže stanje bez energetskih kanala i akupunkturnih tačaka, oni se u cijelom tijelu spajaju u jednu cjelinu, to je konačan cilj otvaranja energetskih kanala. Cilj je postići potpunu transformaciju ljudskog tijela u visokoenergetsku supstancu.

U toj fazi prakticiranja, njegovo tijelo je u osnovi već transformisano u visokoenergetsku supstancu, što znači da je on dostigao najviši nivo kultivacije Fa-unutar-trostrukog-svijeta. Ljudsko tijelo od krvi i mesa je kultivirano do krajnje tačke. U to vrijeme, osoba će biti dovedena u jedno određeno stanje. Koje je to stanje? Ta osoba je razvila vrlo bogat *gong*. Sve ljudske natprirodne sposobnosti (urođene sposobnosti) kod kultivacije tijela običnog čovjeka, ili za vrijeme kultivacije Fa-unutar-trostrukog-svijeta su se razvile, sve se razvilo, ali je kod kultivacije među svakodnevnim ljudima većina njih zaključana. Osim toga, stup njegovog *gonga* je već narastao vrlo visoko. Svi oblici *gonga* su jako pojačani moćnim *gongom*. Ali one mogu djelovati samo u ovoj našoj dimenziji i ne mogu djelovati na stvari u drugim dimenzijama, jer su to samo natprirodne sposobnosti koje su nastale kultivacijom tijela od krvi i mesa običnog čovjeka. Ipak, one su vrlo obilne i bogate u različitim dimenzijama i različite forme egzistencije tijela u različitim dimenzijama također doživljavaju velike promjene. Stvari koje to tijelo ima na sebi, koje tijela u svakoj dimenziji imaju na sebi, jako su obilne i bogate i izgledaju prilično zastrašujuće. Neki ljudi imaju oči po cijelom tijelu i sve njihove pore su postale oči. Oni imaju oči na cijelom području njihovog dimenzionalnog polja. Zbog toga što je to sistem kultivacije Buda škole, neki ljudi nose likove Bodisatve ili Bude po cijelom tijelu. Forme različitih vrsta *gonga* su već postale jako obilne i bogate, a osim toga, pojavljuju se i mnoga živa bića.

U to vrijeme se pojavljuje još jedno stanje, koje se zove "tri cvijeta se sakupljaju na tjemenu". To je vrlo jasno stanje i veoma je upadljivo. Može ga vidjeti čak i neko sa nebeskim okom na niskom nivou. Osoba ima tri cvijeta na tjemenu. Jedan od njih je lotosov cvijet, ali to nije lotosov cvijet u našoj materijalnoj dimenziji. Ostala dva cvijeta su također iz drugih dimenzija i izuzetno su lijepi. Ta tri cvijeta kruže na tjemenu u smjeru kazaljke na satu, ili u smjeru suprotnom od smjera kazaljke na satu i uz to još rotiraju. Svaki cvijet ima veliki stup

širok kao promjer cvijeta. Ta tri stupa će dosegnuti sve do vrha neba, ali oni nisu stupovi *gonga* - oni su samo u tom obliku i izuzetno su mistični i čudnovati. Ako ih možeš vidjeti, prepašćeš se. Kad se neko kultivira do tog stadija, njegovo tijelo će biti bijelo i čisto, a koža će biti nježna. Tada je dostignuta najviša forma kultivacije u Fa-unutar-trostrukog-svijeta, ali to još uvijek nije vrhunac. Ti se trebaš dalje kultivirati i nastaviti ići naprijed.

Kad osoba ide dalje, ući će u prelazni nivo između Fa-unutar-trostrukog-svijeta i Fa-izvan-trostrukog-svijeta, koji se zove stanje čisto-bijelog tijela (ili kristalno-bijelog tijela). Kada je tijelo kultivirano do najviše forme u Fa-unutar-trostrukog-svijeta, to samo znači da je čovjekovo fizičko tijelo transformisano u najvišu formu. Kad ono zaista stupi u tu formu, njegovo cijelo tijelo je u cjelosti sastavljeno od visokoenergetske supstance. Zašto se ono zove čisto-bijelo tijelo? Zato što je to tijelo već dostiglo apsolutnu čistoću najvišeg stepena. Kada se gleda nebeskim okom, cijelo tijelo je providno - kao providno staklo i nema ničeg u njemu. Ovo stanje će se pojaviti. Jasno rečeno, to tijelo je već Buda-tijelo. To je zato što je tijelo sastavljeno od visokoenergetske supstance već drugačije od našeg fizičkog tijela. U tom stadiju, sve natprirodne sposobnosti i tehnike, koje su se pojavile na tijelu, biće odjednom odbačene. One će biti stavljene u jednu vrlo duboku dimenziju, one su neupotrebljive i od tog trenutka više nemaju nikakvu namjenu. One služe samo za to da onog dana u budućnosti, kad uspiješ u kultivaciji i postigneš Tao, možeš pogledati unazad na svoj put kultivacije, izvaditi ih i još jednom ih pogledati. U to vrijeme, samo će dvije stvari preostati: *gong* stup je još uvijek tamo i kultivirano besmrtno dijete je naraslo jako veliko. Ali ove dvije stvari postoje u veoma dubokoj dimenziji. Čovjek sa nebeskim okom na ne tako visokom nivou ih ne može vidjeti. Sve što on može vidjeti je da je tijelo te osobe providno.

Stanje čisto-bijelog tijela je prelazni nivo. Kad se neko dalje kultivira, on stvarno ulazi u kultivaciju Fa-izvan-trostrukog-svijeta, koja se također naziva kultivacijom Buda-tijela. Cijelo tijelo će biti sastavljeno od *gonga* i od tada je *xinxing* tog čovjeka stabilan. On tada iznova počinje s kultivacijom i njegove natprirodne sposobnosti će se ponovo početi pojavljivati, ali one se više ne nazivaju natprirodne sposobnosti, nego "božanske moći Buda Fa". One mogu djelovati u svim dimenzijama i bezgranično su moćne. Kad budeš produžio s kultivacijom u budućnosti, i sam ćeš znati kako kultivirati stvari na višim nivoima i kakve su postojeće forme kultivacije.

Oduševljenje

Govorićemo o jednoj temi koja pripada vezanosti oduševljenja. Mnogi ljudi već duže vremena prakticiraju *qigong*. Također postoje ljudi koji nikad nisu prakticirali *qigong*, ali koji cijeli svoj život tragaju za istinom i traže smisao ljudskog života i razmišljaju o tome. Čim on počne učiti naš Falun Dafa, odjednom će razumjeti mnoga pitanja koja je želio razumjeti, ali na koja nije pronalazio odgovor. Vjerovatno će uporedo s rastom razumijevanja oni postati vrlo uzbuđeni, to je sigurno. Ja znam da pravi praktikant razumije značaj toga i on to zna cijeliti. Ali tu se često javlja jedan problem: iz njegove radosti, kod njega se razvija nepotrebno oduševljenje, koje uzrokuje da se on ponaša nenormalno u načinu na koji radi stvari, u ophođenju sa drugim ljudima u društvu svakodnevnih ljudi i u okruženju društva svakodnevnih ljudi. Ja kažem da je to neprihvatljivo.

Najveći dio naše škole kultivacije kultivira se u običnom ljudskom društvu, ti se ne možeš odvojiti od običnog ljudskog društva, ti moraš prakticirati kultivaciju s bistrim umom. Odnosi među ljudima trebaju ostati normalni. Naravno, tvoj *xinxing* je jako visok i ti imaš

jako ispravno stanje duha, ti poboljšavaš svoj *xinxing* i povisuješ svoj nivo, ne činiš ništa loše, nego samo dobro, tako se to ispoljava. Neki se ponašaju kao da su mentalno poremećeni i kao da im je dosta ovog zemaljskog svijeta i ono što govore, drugi ne mogu razumjeti. Drugi onda kažu: "Kako to da je ovaj čovjek koji prakticira Falun Dafa postao takav? Izgleda da on ima mentalnih problema." Zapravo to nije tako. On je samo previše uzbuđen, nije razuman i ne ponaša se normalno. Razmisli o ovome: Ako tako postupaš, to je također pogrešno, otišao si u drugu krajnost i to je također vezanost. Ti trebaš to otpustiti i trebaš sasvim normalno živjeti i kultivirati se među svakodnevnim ljudima kao i svi ostali. Ako te među svakodnevnim ljudima svi smatraju duhovno poremećenim, neće htjeti da imaju posla s tobom i izbjegavaće te. Niko ti neće pružiti priliku da poboljšaš svoj *xinxing* i niko te neće smatrati normalnom osobom, rekao bih da to nije u redu! Zbog toga morate obavezno obratiti pažnju na to i u svakom slučaju se ponašati dobro.

Naša kultivacijska praksa nije poput uobičajenih praksi koje čine ljude odsutnim, u transu, ili zanesenim. Naša kultivacijska praksa zahtijeva od tebe da se kultiviraš pri punoj svijesti. Neki uvijek kažu: Učitelju, čim zatvorim oči, tijelo mi se počinje klatiti. Ja kažem da ne mora biti tako. Ti si već razvio naviku da se odričeš svoje glavne svijesti. Čim zatvoriš oči, ostavljaš svoju glavnu svijest i ona nestaje. Ti si već razvio tu naviku. Zašto se tvoje tijelo ne klata kad sjediš ovdje? Zadrži stanje u kojem si kada su tvoje oči otvorene, onda lagano zatvori oči, da li se tvoje tijelo klata? Sigurno ne. Ti misliš da se *qigong* treba prakticirati na taj način i već si formirao takvo shvatanje i čim zatvoriš oči, nestaješ i ne znaš gdje se nalaziš. Mi kažemo da tvoja glavna svijest obavezno mora ostati svjesna, zato što ova kultivacijska praksa kultivira upravo tebe. Moraš napredovati pri punoj svijesti. Mi također imamo mirnu meditacijsku vježbu. Kako se prakticira ova vježba? Mi zahtijevamo od tebe da, bez obzira koliko duboko utonuo u meditaciju, moraš znati da ti ovdje prakticiraš. Apsolutno ti je zabranjeno biti u stanju transa u kojem nisi ničeg svjestan. Koja će se onda konkretna stanja pojaviti? Desiće se da ćeš se osjećati predivno kad sjedneš, kao da sjediš u ljusci od jajeta, jako ugodan osjećaj; ti znaš da prakticiraš vježbe, ali imaš osjećaj da ti se cijelo tijelo ne može pomaknuti. Sve se to mora pojaviti u našoj kultivacijskoj praksi. Postoji također i jedno drugo stanje: ti sjediš duže vremena i onda osjećaš da su ti noge nestale, ne možeš se više sjetiti gdje su ti noge; i tvoje tijelo je nestalo, tvoje ruke su nestale i tvoji dlanovi su također nestali, jedino je još glava preostala. Ako nastaviš dalje prakticirati, primjetićeš da je i glava također nestala, ostaju jedino tvoje misli, jedna mala misao zna da ovdje prakticiraš. Dovoljno je da postignemo to stanje. Zašto? Kad prakticiraš u tom stanju, tijelo se nalazi u potpunom stanju transformacije i to je najbolje stanje. Zato mi zahtijevamo od tebe da za vrijeme mirne meditacije stupiš u takvo stanje. Ipak, ne smiješ zaspati ili postati zamućene glave, jer bi neko drugi mogao prakticirati i uzeti dobre stvari.

Svi naši praktikanti stvarno trebaju paziti na to da se ne ponašaju nenormalno među svakodnevnim ljudima. Ako ne igraš dobru ulogu među svakodnevnim ljudima, oni će reći: „Zašto se ljudi koji uče Falun Dafa tako ponašaju?“ To bi onda bilo isto kao da narušavaš ugled Falun Dafe. Zato budi siguran da obraćaš pažnju na to. I u drugim aspektima, ili u procesu kultivacije, trebate paziti na to da ne razvijete vezanost oduševljenja, takva vezanost može vrlo lako biti iskorištena od strane demona.

Kultivacija govora

U prošlosti su i religije govorile o kultivaciji govora. Ali kultivacija govora, o kojoj su govorile religije, uglavnom se odnosila na one koji se profesionalno kultiviraju - monahe i

taoiste koji su držali svoja usta zatvorenim i nisu govorili ništa. Zbog toga što su oni profesionalni praktikanti, njihov cilj je bio u još većoj mjeri se odreći ljudskih vezanosti. Oni su vjerovali da karma nastaje čim neko misli. Religije su podijelile karmu na dobru i lošu karmu. Bez obzira da li je to dobra ili loša karma, po praznini u Buda školi ili ništavnosti u Tao školi, to se ne treba činiti. Zbog toga oni kažu da neće raditi ništa. To je zbog toga što oni ne mogu sagledati uzročne veze stvari i da li je ta stvar dobra ili loša i koje uzročne veze postoje. Običan praktikant, koji još nije dostigao visok nivo, ne može vidjeti takve stvari, pa će se on bojati da neka stvar na površini izgleda dobra, ali da bi ipak mogla biti loša kada je uradi. Zbog toga se on trudi praktcirati nedjelovanje i ne čini ništa, da bi izbjegao i dalje stvarati karmu. Jer, kad je karma jednom proizvedena, mora se odstraniti i on mora patiti. Na primjer, za naše praktikante je već predodređeno na kojem stadiju će im se otvoriti *gong*; ali ako ti sam sebi bez potrebe nešto ubaciš na put, to će izazvati poteškoće za tvoju cjelokupnu kultivaciju. Zbog toga oni praktciraju nedjelovanje.

Kultivacija govora, o kojoj se govori u Buda školi, znači da čovjekovim govorom upravljaju čovjekove misli. Prema tome, njegove misli nose namjere u sebi. Ako nečiji um nešto pomisli, želi nešto reći ili uraditi, ili upravlja ljudskim čulima ili udovima, to samo po sebi već može biti vezanost među svakodnevnim ljudima. Na primjer, postoje konflikti među ljudima, kao na primjer: "ti si dobar, dok on nije dobar", ili "ti si se dobro kultivirao, ali on nije". To su već sami po sebi konflikti. Razmotrimo nešto što je uobičajeno, poput - "ja želim uraditi ovo ili ono", ili "to bi se sada trebalo uraditi na ovaj ili na onaj način". To bi već moglo nenamjerno povrijediti nekoga. Zbog toga što su međuljudski konflikti vrlo komplikovani, moguće je da neko nenamjerno proizvede karmu. Iz tog razloga, oni drže usta potpuno zatvorena i ništa ne govore. U prošlosti su religije kultivaciju govora uzimale veoma ozbiljno i to se tako podučava u religiji.

Većina naših Falun Dafa praktikanata kultivira se među svakodnevnim ljudima (izuzimajući profesionalne praktikante). Zbog toga je neizbježno voditi normalan život običnog čovjeka u društvu svakodnevnih ljudi i imati kontakte s društvom. Svako ima svoj posao i mora ga dobro obavljati. Nekim ljudima je posao da govore. Da li je to onda problem? Nije. A zašto nije? Kultivacija govora, o kojoj mi govorimo, veoma je različita od one, o kojoj oni govore. Zbog razlike u kultivacijskim školama, zahtjevi su također različiti. Kada mi otvaramo usta i govorimo, govorimo u skladu sa *xinxingom* jednog praktikanata i ne govorimo ništa što bi moglo sijati razdor i ne govorimo ništa loše. Kao kultivatori, mi se moramo mjeriti sa Fa standardima kada odlučujemo da li da nešto kažemo ili ne. Ako se nešto treba reći, to nije problem, sve dok je u skladu sa *xinxing* standardom praktikanata, mjereno sa Fa. Osim toga, mi moramo govoriti o Fa i širiti Fa, pa je nemoguće ne govoriti. Kultivacija govora, o kojoj mi govorimo, odnosi se na ugled i ličnu korist, kojih se ne možeš odreći među svakodnevnim ljudima, na ono što nema veze sa konkretnim poslom praktikanata u društvu, na besmisleno čavrljanje među praktikantima unutar iste škole kultivacije, na razmetanje zbog neke vezanosti, na širenje tračeva i glasina, ili da neko rado i s oduševljenjem razgovara o nekim drugim temama u društvu. Smatram da su to sve vezanosti svakodnevnih ljudi. Također mislim da bi mi u tim područjima trebali kultivirati govor. To je kultivacija govora o kojoj mi govorimo. Monasi su u prošlosti te stvari uzimali vrlo ozbiljno, jer se karma stvara čim se jedna misao pokrene. Zbog toga su oni govorili o "tijelu, govoru i mislima". Kultivacija tijela, o kojoj su oni govorili, znači da se ne smiju činiti loša djela. Kultivacija govora znači da se ne smije govoriti. Kultivacija misli znači da se ne smije čak ni misliti. U prošlosti su postojali strogi zahtjevi u pogledu ovih stvari u profesionalnoj kultivaciji u

hramovima. U redu je ako možemo dobro postupati po pitanju toga šta trebamo reći, a šta ne i ako se ponašamo u skladu sa *xinxing* standardima jednog praktikanta.

9. Lekcija

Qigong i fizičke vježbe

Na običnom nivou, ljudi lako dovode u blisku vezu *qigong* i fizičke vježbe. Naravno, ako govorimo o tome na niskom nivou, kada se radi o postizanju zdravog tijela, *qigong* i fizičke vježbe su isto. Ipak, njegove specifične metode vježbanja i metode koje se koriste značajno se razlikuju od fizičkih vježbi. Za postizanje zdravog tijela kroz fizičke vježbe, mora se povećati količina vježbi i pojačati fizički trening. *Qigong* kulivacija je upravo suprotno, ne zahtijeva kretanje. Ako postoje pokreti, oni su nježni, spori i zavojiti. Nekad je čovjek čak nepokretan i miran - što se poprilično razlikuje od načina na koji se izvode fizičke vježbe. Sa perspektive visokog nivoa, *qigong* nije ograničen samo na liječenje i održavanje zdravlja, nego sadrži nešto sa viših nivoa i ima dublji sadržaj. *Qigong* nije samo to malo stvari na nivou svakodnevnih ljudi. On je nešto natprirodno i ima različite manifestacije na različitim nivoima. To je nešto što daleko prevazilazi obične ljude.

Što se tiče prirode vježbi, među njima također postoje ogromne razlike. Od sportista se zahtijeva da povećavaju trajanje vježbi, a posebno današnji sportisti moraju tijelo uvijek održavati u vrhunskoj formi, da bi im tijelo bilo spremno za savremene uslove takmičenja i da bi ispunili date kriterije. Da bi se postigao taj cilj, mora se povećavati količina vježbi, da bi došlo do odgovarajuće cirkulacije krvi u tijelu, da bi se pojačao metabolizam i da bi se tijelo stalno unapređivalo. Zašto se metabolizam treba pojačavati? Zato što se tijelo sportiste mora stalno unapređivati i biti u najboljoj formi za takmičenje. Čovjekovo tijelo je sastavljeno od mnogobrojnih ćelija. Sve one prolaze sljedeći proces: nove ćelije, koje su nastale podjelom, veoma su vitalne i pokazuju tendenciju rasta. Kada dostignu svoj najviši nivo, ne mogu se više dalje razvijati i mogu jedino padati dole i kad stignu do svog najnižeg nivoa, biće zamijenjene novim ćelijama. Na primjer, hajde da za opis uzmemo dvanaest sati jednog dana. U 6 sati ujutro podjelom nastaje jedna nova ćelija i stalno pokazuje tendenciju rasta. U 8, 9 ili 10 sati je za nju jako dobar period. U podne više ne može dalje rasti i može jedino padati prema dole. U ovo vrijeme, ćelija ima još samo pola životne energije i ova preostala polovina je za kondiciju jednog sportiste nedovoljna.

Šta onda treba uraditi? Treba pojačati treninge i povećati cirkulaciju krvi, tada nastaju nove ćelije i zamjenjuju stare. To je njihova metoda. Drugim riječima, ćelija biva zamijenjena prije završetka svog životnog vijeka, ili već na polovini svog životnog puta. Zbog toga tijelo ostaje uvijek snažno i poboljšava se. Ipak, čovjekove ćelije se ne mogu ovako dijeliti u nedogled, broj dioba ćelija je ograničen. Pretpostavimo da se tokom ljudskog života čovjekove ćelije mogu podijeliti sto puta - zapravo se mogu podijeliti više od milion puta - i pretpostavimo da, kada se ćelije podijele sto puta, jedan običan čovjek može živjeti sto godina. Ali sada su njegove ćelije živjele samo pola svog života, i tako ta osoba može živjeti samo pedeset godina. Ipak, nismo vidjeli neke veće probleme kod sportista, jer se današnji sportisti povlače već prije nego što navršše trideset godina. Prije svega, takmičarski nivo u današnje vrijeme je vrlo visok i broj sportista koji su izbačeni iz konkurencije je također velik. Nakon toga, oni opet vode normalan život, pa ne izgleda kao da je to naročito uticalo na njih. Teoretski, u osnovi je tako da to omogućava zadržavanje zdravog tijela, ali skraćuje život. Prema izgledu, sportisti u svojim pubertetskim godinama izgledaju kao da su u dvadesetim godinama, dok oni u dvadesetim izgledaju kao da su u tridesetim. Sportisti obično na druge

ostavljaju utisak kao da brže odrastaju i brže stare nego drugi ljudi. Gdje ima prednosti, ima i mana, trebamo gledati stvari sa obje strane. U stvari, to ide tim tokom.

Qigong kultivacija je upravo suprotna fizičkim vježbama. Pokreti ne trebaju biti snažni. Ako ima pokreta, oni su nježni, spori i zavojiti. Oni su jako spori, ili čak uopšte nema pokreta i osoba je potpuno mirna. Vi poznajete kultivacijsku metodu duboke meditacije, pri kojoj se osoba nalazi u stanju mirnoće, a otkucaji njenog srca, kao i cirkulacija krvi i druge stvari se usporavaju. U Indiji postoje mnogi joga-majstori koji danima mogu sjediti u vodi ili ostati zakopani u zemlji. Oni se mogu dovesti do potpune mirnoće i čak mogu kontrolisati i otkucaje svog srca. Pretpostavimo da se čovjekove ćelije dijele jednom dnevno. Onda se ćelije jednog praktikanta dijele jednom svaka dva dana, jednom sedmično, jednom u pola mjeseca ili čak nakon još dužeg perioda. On je onda već produžio svoj život. To se odnosi samo na one puteve kultivacije kod kojih se kultivira *xinxing*, a ne kultivira se tijelo. Oni također mogu to postići i mogu produžiti svoje živote. Možda neki misle: "Nisu li život i životni vijek jednog čovjeka predodređeni? Kako neko može živjeti duže, ako ne kultivira svoje tijelo?" To je tačno, ali ako praktikant dostigne nivo iznad Tri sfere, njegov život može biti produžen, iako će on spolja izgledati jako star.

Kod puteva kultivacije koji istinski kultiviraju tijelo, sakupljena visokoenergetska supstanca stalno će se pohranjivati u ćelijama tijela i kako njena gustoća stalno raste, ona postepeno potiskuje ćelije običnog čovjeka i polako zamjenjuje ove ćelije. Tada će doći do kvalitativne promjene i ova će osoba ostati zauvijek mlada. Naravno, proces kultivacije je veoma spor i mora se puno toga žrtvovati. Nije lako čeličiti tijelo i volju. Možeš li ostati miran u srcu kada se nalaziš usred konflikata koji testiraju tvoj *xinxing*? Možeš li ostati miran u srcu kada su tvoji lični interesi u pitanju? To je jako teško postići. Nije da možeš postići ovaj cilj samo ako to želiš. To možeš postići samo ako se tvoj *xinxing* i *de* poboljšaju kroz kultivaciju.

Uvijek je bilo mnogo ljudi koji *qigong* i obične fizičke vježbe stavljaju u isti koš, ali razlika je zapravo ogromna i oni uopšte nisu isto. Samo na najnižem nivou, kada se prakticira *qi* zbog odstranjivanja bolesti i održavanja zdravlja, znači kada se želi dobiti zdravo tijelo, *qigong* i fizičke vježbe imaju zajednički cilj. Ali na visokom nivou to uopšte nije tako. Pročišćavanje tijela u *qigongu* ima svoju svrhu i osim toga, od praktikanata se zahtijeva da postupaju prema natprirodnim principima, umjesto prema principima svakodnevnih ljudi. Ali fizičke vježbe su samo stvar svakodnevnih ljudi.

Namjere

Kada je o namjerama riječ, misli se na čovjekove misaone aktivnosti. Kako se gleda na misaone aktivnosti u čovjekovom mozgu u zajednici kultivatora? Kako se gleda na različite forme ljudskog razmišljanja (misli)? I kako se one ispoljavaju? Moderna medicina još uvijek ne može odgovoriti na mnoga pitanja u svom proučavanju ljudskog mozga, jer to nije tako jednostavno kao proučavanje površine naših tijela. Na dubljim nivoima, u različitim dimenzijama postoje različite forme. Ali to se također razlikuje od onog što su rekli neki *qigong* majstori. Neki *qigong* majstori čak ni sami ne znaju šta se događa i ne mogu to dobro objasniti. Misle da čim koriste svoje umove i nastane jedna misao, da već mogu nešto učiniti. Onda tvrde da su njihove namjere, ili njihove misli to uradile. Zapravo, to uopšte nisu napravile njihove namjere.

Razgovarajmo najprije o izvoru ljudskih misli. U staroj Kini je postojala fraza "misliti srcem". Zašto se to zvalo misliti srcem? Stara kineska nauka je bila vrlo napredna, jer je njeno istraživanje bilo usmjereno direktno na stvari kao što su ljudsko tijelo, život i univerzum. Neki ljudi zaista osjećaju da je njihovo srce to koje misli, dok drugi osjećaju da njihov mozak misli. Zašto je to tako? Zaista je prihvatljivo to što neki ljudi govore da se misli srcem, jer mi vidimo da je glavna duša kod svakodnevnih ljudi veoma mala i prave poruke, koje se šalju iz ljudskog mozga, nisu djelo samog ljudskog mozga - ne šalje ih ljudski mozak, već čovjekova glavna duša. Glavna duša ne ostaje samo u *nivan* palači. *Nivan* palača, o kojoj se govori u Tao školi, je ono što naša moderna medicina naziva epifizom. Ako je glavna duša u *nivan* palači, onda zaista osjećamo da mozak razmišlja ili šalje poruke. Ali ako se ona nalazi u srcu, zaista osjećamo da srce razmišlja.

Ljudsko tijelo je mali univerzum. Mnoga živa bića u tijelu praktikanta mogu mijenjati mjesto. Kada glavna duša mijenja svoje mjesto, ako se premjesti u trbuh, on će zaista osjećati da trbuh razmišlja. Ako se glavna duša premjesti u potkoljenicu ili petu, on će osjećati da potkoljenica ili peta razmišljaju. Sigurno je tako, iako može zvučati prilično nevjerovatno. Čak i ako tvoj kultivacijski nivo još nije tako visok, možeš osjetiti postojanje takvih pojava. Da ljudsko tijelo nema dušu, da nema temperament, karakter i osobine, da nema takve stvari, bilo bi samo komad mesa i ne bi moglo biti kompletna osoba sa samostalnom individualnošću. Kakvu onda funkciju ima ljudski mozak? Kako ja to vidim, u ovoj našoj materijalnoj dimenziji, ljudski mozak je samo fabrika za preradu. Prave poruke šalje duša, ali to što šalje nije jezik, nego jedna vrsta kosmičke informacije koja ima određeno značenje. Nakon što mozak primi tu vrstu naredbi, prerađuje ih u naš sadašnji jezik, u tu vrstu izražavanja i mi to izražavamo gestikulacijom rukama, pogledom i govorom tijela. Mozak ima takvo dejstvo. Istinske naredbe i istinske misli dolaze od čovjekove duše. Ljudi obično misle da mozak djeluje direktno i samostalno. Zapravo, duša je ponekad u srcu, pa neki ljudi zaista osjećaju da srce misli.

Ljudi koji u današnje vrijeme istražuju ljudsko tijelo vjeruju da ljudski mozak emituje nešto kao električni val. Zasad nećemo govoriti o tome šta se zaista emituje, ali oni svakako priznaju da je to vrsta materije. Prema tome, to nije praznovjerje. Kakvo dejstvo ima to što se emituje? Neki *qigong* majstori tvrde: "Ja mogu pomjerati stvari svojim mislima", ili „Ja mogu svojim mislima otvoriti tvoje nebesko oko“, ili „Mislama mogu izliječiti tvoje bolesti“, itd. U stvari, neki *qigong* majstori uopšte ne znaju koje natprirodne sposobnosti imaju i to im je prilično nejasno. Oni samo znaju da ako žele nešto učiniti, dovoljno je da pomisle na to i to već djeluje. Zapravo su njihove namjere postale aktivne, natprirodne sposobnosti su upravljane namjerama mozga i one pod komandom namjera obavljaju određene stvari, ali namjere ne mogu ništa napraviti same. Kada praktikant napravi nešto određeno, to čine njegove natprirodne sposobnosti.

Natprirodne sposobnosti su urođene sposobnosti ljudskog tijela. S razvojem našeg ljudskog društva, misli u ljudskom umu su postajale sve komplikovanije i ljudi poklanjaju sve više pažnje "realnosti", postajući ovisniji o takozvanim modernim alatima. I tako ljudske urođene sposobnosti sve više atrofiraju. Tao škola govori o povratku prvobitnom, istinskom *ja*. U procesu kultivacije treba tražiti istinu i na kraju se vratiti svom pravom, prvobitnom, istinskom *ja* i urođenoj prirodi. Tek tada se tvoje urođene sposobnosti mogu ponovo pojaviti. Danas ih zovemo "natprirodne sposobnosti", dok su one sve u stvari samo čovjekove urođene sposobnosti. Ljudsko društvo naizgled napreduje, ali u stvari nazaduje i sve se više udaljava od osobina univerzuma. Prije neki dan sam spomenuo da je Zhang Guolao jahao sjedeći

naopako na magarcu, ali ljudi možda ne razumiju šta to znači. On je shvatio da je ići naprijed, u stvari, vraćanje natrag i da se ljudsko društvo sve više udaljava od osobina univerzuma. U toku razvoja univerzuma, a posebno danas, kada su se ljudi uključili u trend potrošačkog društva, mnogi ljudi su se moralno iskvarili i oni se još dalje udaljavaju od *Zhen, Shan, Ren*, osobina univerzuma. Oni koji slijede trend svakodnevnih ljudi ne mogu osjetiti razmjere propadanja ljudskog morala, pa neki čak misle da je to dobro. Samo ljudi čiji je *xinxing* poboljšan kroz kultivaciju, gledajući unatrag, mogu primjetiti do kojeg strašnog stepena se ljudski moral iskvario.

Neki *qigong* učitelji tvrde: "Ja mogu razviti tvoje natprirodne sposobnosti". Koje natprirodne sposobnosti on može razviti? Bez energije, nečije natprirodne sposobnosti neće djelovati. Kako ih možeš razviti ako se nisu pojavile? Kada nečije natprirodne sposobnosti nisu formirane i pojačane vlastitom energijom, kako ih možeš razviti? To je sasvim nemoguće. To što on smatra razvojem natprirodnih sposobnosti samo se odnosi na spajanje već formiranih natprirodnih sposobnosti s tvojim mozgom, tako da će one djelovati na zapovijed namjera tvog mozga. I on misli da to već predstavlja razvijanje tvojih natprirodnih sposobnosti. U stvari on za tebe nije razvio nikakve natprirodne sposobnosti, već je samo obavio ovo malo posla.

Kod jednog praktikanta, njegove namjere upravljaju natprirodnim sposobnostima da čine stvari. Kod običnog čovjeka, njegove namjere upravljaju s četiri uda i čulnim organima da čine stvari. To je kao u fabrici, gdje kancelarija upravnika proizvodnje ili kancelarija direktora donose naredbe, a različite, određene operativne službe zatim izvršavaju zadatke. Ili kao u vojsci, gdje glavni štab daje naredbe i upravlja s cijelom vojskom u izvršenju zadataka. Dok sam držao predavanja u drugim regionima, često sam diskutirao o ovom pitanju sa rukovodiocima lokalnih *qigong* društava. Oni su svi bili vrlo iznenađeni: "Mi smo čitavo vrijeme proučavali koliko potencijalne energije i potencijalne svijesti ljudski um ima." U stvari nije tako, oni su već od samog početka skrenuli s pravog puta. Rekao sam, da bi se proučavalo ljudsko tijelo, način čovjekovog razmišljanja stvarno mora biti promijenjen, logika svakodnevnih ljudi i njihov način razumijevanja stvari ne mogu se koristiti za razumijevanje ovih natprirodnih stvari.

Kad je riječ o namjerama, one imaju još nekoliko formi. Na primjer, neki ljudi govore o latentnoj svijesti, podsvijesti, inspiraciji, snovima, itd. Govoreći o snovima, ni jedan *qigong* majstor nije voljan objasniti ih. Prilikom tvog rođenja, mnogi „ti“ su istovremeno rođeni u mnogim dimenzijama univerzuma, oni zajedno s tobom čine kompletnu cjelinu i u međusobnom su odnosu, čak su i njihove misli povezane. Osim toga imaš i svoju glavnu dušu, sporedne duše, u tvom tijelu postoje i pojave raznih drugih bića, svaka ćelija i svi tvoji unutrašnji organi predstavljaju forme egzistencije poruka tvojih pojava u drugim dimenzijama. Zbog toga je to jako složeno. U snu stvari mogu biti ovakve u jednom trenutku i drugačije u idućem trenutku. Odakle one ustvari dolaze? U medicinskoj nauci se kaže da se čovjekova moždana kora promijenila. To je reakcija prikazana u ovoj materijalnoj formi, ali u stvari je to rezultat uticaja poruka iz drugih dimenzija. Zato kad sanjaš osjećaš zbrku u glavi. Ali te stvari nemaju nikakve veze s tobom i ne trebaš obraćati pažnju na njih. Postoji jedna vrsta snova koja se direktno tiče tebe i ovakve snove ne možemo zvati snovima. Tvoja glavna svijest, odnosno tvoja glavna duša vidi u snu da ti prilazi član porodice, ili si zaista nešto doživio, ili nešto vidiš ili učiniš. To onda znači da je tvoja glavna duša stvarno nešto učinila ili vidjela u drugoj dimenziji; ona je to učinila i tvoja svijest je bila sasvim jasna i ti si to stvarno doživio. Ove stvari zaista postoje, samo postoje u drugim dimenzijama i uradio si ih u

drugim vremenskim prostorima. Možeš li onda to zvati snom? Ne možeš. Ali tvoje fizičko tijelo na ovoj strani je definitivno spavalo, zato se to samo može nazvati snom. Samo ovakvi snovi imaju direktno nešto s tobom.

Govoreći o ljudskoj inspiraciji, podsvijesti, latentnoj svijesti i tako dalje, rekao bih da ove pojmove nisu izmislili naučnici. Ove pojmove su izmislili pisci i baziraju se na uobičajenim stanjima svakodnevnih ljudi - oni nisu naučni. Šta je onda latentna svijest o kojoj ljudi govore? To je teško objasniti i prilično je nejasno, jer su sve razne vrste čovjekovih poruka previše komplikovane i izgleda da se radi o par mutnih sjećanja. Što se tiče podsvijesti o kojoj ljudi govore, to lako možemo objasniti. Prema definiciji stanja koje se naziva podsvijest, to se obično odnosi na to da osoba nešto radi mutne glave. Drugi ljudi će obično reći da je ta osoba to napravila podsvjesno ili nenamjerno. Ova podsvijest je potpuno isto što i sporedna svijest, o kojoj govorimo. Kada se glavna svijest opušta i prestaje kontrolisati mozak, osoba nema jasnu svijest, skoro kao da je zaspala; ili kad osoba stvarno spava, dok se nalazi u tom nesvjesnom stanju, lako može biti pod kontrolom sporedne svijesti ili sporedne duše. Tada sporedna svijest može uraditi neke stvari, ili drugim riječima, radiš stvari bez jasnog uma. Ipak, ovakve stvari obično neće biti napravljene loše, jer sporedna svijest može vidjeti suštinu stvari u drugoj dimenziji i nije obmanuta običnim ljudskim društvom. Zbog toga, kada se opet vratiš u jasno stanje i pogledaš šta si uradio, reći ćeš: "Kako sam mogao to napraviti tako loše? Ne bih to napravio tako s jasnim umom." Međutim, iako sada kažeš da je to loše, ako nešto kasnije, nakon deset ili petnaest dana, ponovo pogledaš na to, reći ćeš: "Super, to je napravljeno tako dobro! Kako sam to tada napravio?" To se često dešava. Jer sporedna svijest ne mari za posljedice u tom trenutku, ali će to što radi ipak dati dobre rezultate u budućnosti. A postoje također i neke stvari koje nemaju nikakve posljedice u budućnosti, već samo imaju efekta u tom trenutku. Kada sporedna duša čini takve stvari, vjerovatno će ih na licu mjesta veoma dobro obaviti.

Postoji još jedna forma, kod koje oni sa vrlo dobrom osnovom mogu lako biti upravljani od strane viših bića da bi nešto uradili. Naravno, to je nešto drugo i nećemo ovdje govoriti o tome. Uglavnom govorimo o svijesti koja potiče od samog čovjeka.

Što se tiče inspiracije, i to je pojam koji su izmislili pisci. Obično ljudi misle da inspiracija ima veze sa svim znanjem koje je čovjek sakupio u svom životu i da ona u trenutku izbija kao iskra. Rekao bih, ako se na to gleda sa stanovišta materijalizma, što više znanja neko sakupi u svom životu i što više koristi svoj um, njegov mozak bi trebao biti sve oštroumniji. Kada se koristi, ona bi trebala neprestano nadolaziti i pri tome više nije riječ o inspiraciji. Sve što ljudi nazivaju inspiracijom, ili kada se inspiracija pojavljuje, ne dolazi u ovom stanju. Ona često dolazi kada neko napreže mozak, on misli i misli i na kraju osjeća da je njegovo znanje iscrpljeno i izgleda kao da više nema ideja. Ili ona dolazi kada čovjek pri pisanju nekog članka dospije do tačke gdje više ne može dalje, ili kada mu ponestane ideja prilikom komponiranja pjesme, ili kada radeći na naučno-istraživačkom projektu više ne može napredovati. Obično je u tom trenutku čovjek već tako umoran da mu bubnja u glavi, a opušci od cigareta su razasuti svuda po podu. Glava ga boli od naprezanja, ali mu još uvijek ništa ne pada na pamet. U kojem je on stanju kada inspiracija konačno dolazi? Ako je umoran, pomisliće: "Pusti to, napravi pauzu." Jer, što jače glavna svijest kontroliše mozak, to se manje druga bića mogu umiješati. Ali ako on napravi pauzu, opusti svoj um i ne misli više na to, iznenada u tom stanju bez namjere pomišlja na nešto, ili mu neka ideja padne na pamet. Obično inspiracija dolazi na ovaj način.

Zašto inspiracija dolazi u tom trenutku? Zato što kada čovjekova glavna svijest kontroliše njegov mozak, što više on koristi mozak i što ga jače kontroliše, to se manje sporedna svijest može umiješati. Kada on tako intenzivno razmišlja da dobije glavobolju i kad je frustriran, jer mu ne dolaze nikakve ideje, sporedna svijest, koja je također dio njegovog tijela i koja je istovremeno rođena iz majčine utrobe i kontroliše dio njegovog tijela, također pati i ima veoma bolne glavobolje. Međutim, kada se glavna svijest opusti, sporedna svijest će u njegov mozak projicirati ono što zna, jer ona može vidjeti suštinu stvari u drugim dimenzijama. Tako je posao obavljen, rad napisan, ili je pjesma komponovana.

Neki ljudi kažu: "U tom slučaju trebamo koristiti sporednu svijest." To je kao na cedulji koju mi je neko upravo dostavio, sa pitanjem: "Kako kontaktiramo sporednu svijest?" Ne možeš doći u kontakt s njom, jer si tek počeo s kutiviranjem i nemaš nikakvih sposobnosti. Za tebe je bolje da ne uspostavljaš nikakav kontakt, jer je tvoja namjera sigurno vezanost. Možda neki od vas misle: "Možemo li upotrijebiti našu sporednu svijest da stvorimo više blagostanja i ubrzamo razvoj ljudskog društva?" Ne! Zašto ne? Zato što je ono što tvoja sporedna svijest zna još uvijek vrlo ograničeno. Dimenzije su tako kompleksne i broj nivoa je ogroman, struktura univerzuma je veoma kompleksna, tako da ona može jedino znati ono što je u njenoj dimenziji i ne zna ništa izvan te dimenzije. Povrh toga, postoji jako puno dimenzija na različitim vertikalnim nivoima. Razvoj ljudskog društva može biti kontrolisan samo od viših bića na vrlo visokim nivoima i ono napreduje prema zakonitostima razvoja.

Obično ljudsko društvo napreduje prema zakonima istorijskog razvoja. Možda ti želiš da se razvija u određenom smjeru, ili da postigne određeni cilj, ali ta viša bića ne misle tako. Zar ljudi u starim vremenima nisu mogli misliti na današnje avione, vozove i bicikle? Rekao bih da nije isključeno da jesu. Nisu ih mogli izumiti jer se istorija nije bila razvila do tog stadija. Površno gledano, prema uobičajenim teoretskim shvatanjima svakodnevnih ljudi i prema znanju koje čovječanstvo danas posjeduje, razlog zbog kojeg nisu mogli izumiti ove stvari leži u tome što se ljudska nauka u to vrijeme još nije razvila do tog nivoa. U stvari, kako god se ljudska nauka razvijala, ona se zapravo samo razvijala u skladu s aranžmanom istorije. Kada sam želiš postići neki cilj, ne možeš ga postići. Naravno, postoje ljudi čija sporedna svijest lako može doći do izražaja. Jedan pisac je rekao: "Kada pišem knjigu, mogu napisati desetine hiljada riječi dnevno, a da se nimalo ne umorim. Ako želim nešto napisati, mogu to napisati veoma brzo i kada drugi to pročitaju, dopada im se." Zašto je to tako? To je rezultat združenih napora glavne i sporedne svijesti, jer njegova sporedna svijest može preuzeti pola posla. Ali to nije kod svih ljudi tako. Kod većine se sporedna svijest uopšte ne miješa i ako želiš da uradi nešto za tebe, to neće ispasti dobro i na kraju ćeš postići suprotan rezultat.

Čist i jasan um

Mnogi ljudi za vrijeme prakticiranja ne mogu postići smiren um i traže svugdje *qigong* učitelje i pitaju ih: "Učitelju, zašto ne mogu postići mirnoću kad radim vježbe. Čim se pokušam smiriti, počinjem misliti na sve i svašta, fantaziram o svemu." To je stvarno kao nabujala rijeka i more, sve izranja na površinu i ti uopšte ne možeš postići mirnoću. Zašto ne možeš postići mirnoću? Neki to ne razumiju i misle da postoje neki tajni trikovi i onda traže poznate učitelje: "Molim te, pokaži mi neke napredne trikove tako da mogu steći miran um." Prema mom viđenju, oni još uvijek traže vani. Ako se želiš povisiti, trebaš tražiti unutar sebe i raditi naporno na svom srcu - samo se onda možeš istinski povisiti i postići mirnoću u

meditaciji. Sposobnost da se postigne mirnoća je vještina. Dubina meditacije je odraz nečijeg nivoa.

Može li običan čovjek postići mirnoću po volji? Ne, nikako ne može, osim ako ima odličnu urođenu osnovu. Drugim riječima, temeljni razlog zašto čovjek ne može postići mirnoću nisu ni ručne tehnike, niti neki specijalni trikovi, nego to što tvoje srce i um nisu čisti. U običnom ljudskom društvu i u međuljudskim konfliktima, nadmećeš se i boriš za vlastiti interes, zbog svih vrsta osjećaja i žudnji i zbog raznih vezanosti. Ne možeš otpustiti sve te stvari i uzeti ih olako, a želiš postići mirnoću, kako to može biti tako jednostavno? Dok prakticira *qigong*, neko tvrdi: "Ja ne vjerujem u to. Moram se smiriti i ne smijem misliti na sve i svašta." Ali čim to izgovori, te misli opet naviru. To znači da tvoj um nije čist i zato nisi u stanju postići mirnoću.

Možda se neki ne mogu složiti s mojim stanovištem: "Zar neki *qigong* majstori ne podučavaju ljude da koriste određene tehnike? Možeš se koncentrirati na neku stvar, vizualizirati nešto, koncentrirati se na polje eliksira (*dantian*), posmatrati polje eliksira, recitirati ime Bude, itd." To su tehnike, ali ipak, to nisu samo tehnike, nego i odraz nečijih sposobnosti. Prema tome, ove sposobnosti su u direktnoj vezi s kultivacijom našeg *xinxinga* i povisivanjem nivoa. Mirnoća se ne može postići koristeći samo takve tehnike. Ako ne vjeruješ, možeš pokušati. Sve te želje i vezanosti koje imaš su tako jake i nisi u stanju otpustiti ih, vidi sam da li možeš postići mirnoću. Neki kažu da recitiranje imena Bude djeluje. Možeš li postići mirnoću samo recitirajući ime Bude? Neki tvrde: "Lako je prakticirati praksu škole Bude Amitabhe, samo treba recitirati ime Bude." Zašto ga ne pokušaš recitirati? Ja bih to nazvao sposobnošću. Kažeš da je to lako, ali ja kažem da nije, nijedna škola nije laka.

Znamo da je Shakyamuni podučavao "meditaciju". Ali šta je podučavao prije meditacije? Podučavao je "zapovijedi" i odricanje od svih želja i ovisnosti, sve dok ništa ne ostane - tek onda se može ući u stanje meditacije. Nije li to takav princip? „Meditacija“ je isto tako sposobnost i ti se ne možeš odjednom odreći svega. S postepenim odricanjem od svih loših stvari, tvoja sposobnost koncentracije će se također poboljšati. Kada neko recitira ime Bude, on mora recitirati bez ijedne ometajuće misli, ništa drugo ne smije biti na umu i on će recitirati sve dok svi drugi dijelovi mozga ne otupe i dok se ne postane nesvjestan svega, jedna misao zamjenjuje deset hiljada drugih i svaki znak od "Buda Amitabha" se pokazuje pred očima. Nije li to sposobnost? Može li se to postići već na samom početku? Ne može. Ako se to ne može postići, sigurno se neće postići mirnoća. Ako ne vjeruješ, pokušaj. Dok ti usta neprekidno recitiraju Budino ime, tvoj um misli na sve i svašta: "Zašto me šef na poslu ne cijeni. Ovaj mjesec mi je dao tako malu premiju." Što više misliš na to, postaješ sve ljući, ali tvoja usta još uvijek recitiraju Budino ime. Misliš li da možeš tako prakticirati? Nije li to stvar sposobnosti? Ne znači li to da ti je um nečist? Nekim ljudima je nebesko oko otvoreno i mogu promatrati polje eliksira unutar svog tijela. Elikzir se sakuplja u području donjeg trbuha i što je čišća ova energetska materija, to je eliksir svjetliji. Što je manje čista, to je tamniji i crniji. Možeš li onda postići mirnoću samo gledanjem u eliksir i u polje eliksira? Ne možeš. To nije do same tehnike - ključ je u tome što čovjekov um i njegove misli nisu čisti. Kada promatraš polje eliksira, blistavi eliksir izgleda jako lijepo, ali već trenutak kasnije, ovaj eliksir se transformiše u stan: "Ova soba će biti za mog sina kada se oženi. Ova soba je za moju kćer. Moja supruga i ja ćemo živjeti u ovoj sobi, a u sredini je dnevna soba. Sjajno! Hoće li taj stan biti dodijeljen meni? Moram smisliti način da ga dobijem. Šta bi mogao uraditi?" Ljudi su naprosto vezani za te stvari. Misliš li da možeš tako postići mirnoću? Drugi

kažu: "Dolazim u obično ljudsko društvo kao u hotel. Ostajem tu samo nekoliko dana i onda odlazim u žurbi." Neki ljudi su tako vezani za ovo mjesto i zaboravili su svoje vlastite domove.

U pravoj kultivaciji moraš kultivirati vlastito srce i moraš se kultivirati prema unutra. Treba tražiti u sebi, a nikako izvan sebe. U nekim školama se kaže da je Buda u tvom srcu i u tome ima nešto istine. Ali neki ljudi su pogrešno shvatili ovu izreku i kažu da je Buda u njihovim srcima, kao da su oni sami Bude ili kao da u njihovim srcima ima Buda. Oni to tako shvataju, ali nije li to pogrešno? Kako se to može tako shvatiti? To zapravo znači da moraš kultivirati svoje srce, to je jedini način da uspiješ u kultivaciji - to kaže taj princip. Gdje je Buda u tvom tijelu? Moraš raditi na sebi, tek tako se možeš uspješno kultivirati.

Razlog zbog kojeg ne možeš postići mirnoću je što tvoj um nije prazan i tvoj nivo nije dovoljno visok. To ide od površine u dubinu i povezano je s nivoom tvog poboljšanja. Kada otpustiš svoje vezanosti, tvoj nivo raste, a poboljšava se i tvoja sposobnost koncentracije. Ako želiš postići mirnoću nekim tehnikama i metodama, rekao bih da tražiš pomoć izvana. Pri kultivaciji dospjeti na krivi put ili na heretičan put, upravo se odnosi na ljude koji traže pomoć izvana. Posebno ako u budizmu tražiš pomoć izvana, reći će da si krenuo demonskim putem. U pravoj kultivaciji treba kultivirati srce i samo ako povisiš svoj *xinxing*, tvoje srce može postati čisto i jasno i postići stanje slobodno od namjera (*wuwei*). Samo ako povisiš svoj *xinxing* možeš se izjednačiti s osobinama univerzuma i osloboditi se svih raznih ljudskih žudnji, vezanosti i loših stvari, tek tada ćeš biti u stanju otresti loše stvari sa svog tijela i isplivati sve do gore. Onda više nećeš biti ograničen osobinama univerzuma i tvoja *de* supstanca može biti transformisana u *gong*. Ne ide li to ruku pod ruku? To je taj princip!

To je subjektivni razlog koji sprječava čovjeka da postigne mirnoću, a to je što on nije u stanju da zadovolji kriterije za standard praktikanta. Objektivno gledano, u današnje vrijeme postoji i situacija koja te ozbiljno ometa, tako da se ne možeš kultivirati na visoke nivoe i ona stvarno ozbiljno utiče na praktikante. Znamo da je sa ekonomskim reformama i otvaranjem ekonomija postala fleksibilnija, a politika manje restriktivna. Uvedene su mnoge nove tehnologije i standard ljudi se poboljšava. Svi svakodnevni ljudi smatraju da je to dobro. Ali gledano dijalektički, s obje strane, s reformama i otvaranjem unesene su također i loše stvari. Ima ih svih vrsta. Izgleda kao da se knjige i magazini neće prodavati ako u njima nema seksualnog sadržaja, jer se vodi računa o tiražu. Izgleda kao da niko ne bi gledao filmove ili televizijske programe ako se u njima ne prikazuju scene iz spavaće sobe, jer se pridaje važnost zaradi i broju gledalaca. U pogledu likovnih djela, ko zna da li je to prava umjetnost ili nešto drugo. Nije bilo takvih stvari u našoj staroj tradicionalnoj kineskoj umjetnosti. Tradiciju naše kineske nacije nije izumio ili stvorio neki čovjek. Kada sam govorio o predistorijskoj kulturi, spomenuo sam da sve ima svoj izvor. Moralni standardi ljudi su iskrivljeni i promijenjeni, a promijenjeni su i standardi s kojima se prosuđuje dobro i loše. To je stvar svakodnevnih ljudi. Međutim, osobine univerzuma Zhen, Shan, Ren su jedini standard kojim se prosuđuje da li je čovjek dobar ili loš, i on se ne mijenja. Kao praktikant, ako se želiš izdići iznad svega ovog, moraš koristiti ovaj standard za prosuđivanje stvari, a ne standard svakodnevnih ljudi. Prema tome, postoji i objektivno takva smetnja. I ne samo to, pojavile su se svakakve zbrkane stvari, kao što su homoseksualnost, seksualna sloboda, zloupotreba droga, itd.

Ljudsko društvo se razvilo do današnjeg stadija, razmisli, kako će izgledati ako se i dalje bude tako razvijalo? Može li biti dozvoljeno da zauvijek tako ostane? Ako ljudska bića

ništa ne preduzmu u vezi toga, preduzeće Nebo. Uvijek kada je čovječanstvo doživjelo katastrofu, to je bilo u ovakvim okolnostima. U tako mnogo lekcija nisam govorio o velikoj *jie*-katastrofi čovječanstva. U religiji se govori o tome, a i mnogi ljudi diskutiraju o ovoj vrućoj temi. Objasniću vam ovo pitanje: Razmislite, u običnom ljudskom društvu se moralni standard ljudi tako promijenio! Međuljudski odnosi su već do te mjere zategnuti! Razmislite, nije li došlo do krajnje opasne situacije? Zato ova sadašnja, objektivno postojeća okolina ozbiljno smeta praktikantima u kultivaciji prema visokim nivoima. Fotografije golotinje vise tamo ili su postavljene posred puta. Čim podigneš glavu, vidjećeš ih.

Lao Zi je jednom rekao sljedeće: "Kada plemenita osoba čuje Tao, ona će ga marljivo prakticirati." Kada plemenita osoba čuje Tao, ona misli: "Napokon sam dobila istinski Fa, ako ga sad ne prakticiram, a kad onda?" Po mom mišljenju, komplikovano okruženje je dobra stvar. Što je komplikovanije, tim će se lakše pojaviti veliki ljudi. Ako se neko ovdje može izdići iznad svega, njegova kultivacija će stvarno biti solidna.

Rekao bih da je to upravo dobra stvar za one koji su zaista odlučili prakticirati kultivaciju. Da nema konflikta ili mogućnosti da povisiš svoj *xinxing*, uopšte ne bi mogao ići niže. Ti si ljubazan, ja sam ljubazan i sve je u redu, kako se onda može kultivirati? Obični praktikanti spadaju u grupu: "Kada prosječna osoba čuje Tao..." i njima je svejedno da li se kultiviraju ili ne; takvi ljudi najvjerojatnije neće uspjeti. Neki ovdje prisutni misle da to što učitelj govori ima smisla, ali kad se vrate u obično ljudsko društvo, opet će misliti da su ti praktični i trenutni interesi zaista realniji. Oni su stvarno realni. Ali ne samo ti, nego i mnogi bogataši i milioneri na zapadu otkrivaju da nakon smrti više ništa ne posjeduju. Materijalna bogatstva se ne mogu donijeti kod rođenja i ne mogu se ponijeti sa sobom nakon smrti i oni osjećaju prazninu u sebi. Ali, zašto je *gong* tako dragocjen? Zato što ostaje uz tvoju dušu i dolazi s tobom prilikom rođenja i odlazi s tobom nakon smrti. Rekli smo da duša ne umire i to nije praznovjerje. Kada se ćelije ovog našeg materijalnog tijela raspadnu, manje molekularne čestice, koje postoje u drugim materijalnim dimenzijama, ne odumiru. Samo je ljuska otpala.

Sve o čemu sam vam upravo govorio spada u pitanje *xinxinga*. Shakyamuni je rekao sljedeće, a i Boddhidarma je rekao: "Ova zemlja Kina na Istoku je oblast gdje se pojavljuju ljudi sa velikim vrlinama." Kroz istoriju, mnogi monasi i mnogi Kinezi su bili veoma ponosni zbog toga. Oni misle da to znači da oni mogu kultivirati *gong* na visokom nivou i zato su mnogi Kinezi radosni i osjećaju se polaskani: "To smo mi, Kinezi! U Kini se pojavljuju ljudi sa sjajnom urođenom osnovom i velikim vrlinama." U stvari mnogi ljudi ne razumiju značenje toga. Zašto se u Kini pojavljuju ljudi sa velikim vrlinama i zašto se ovdje može razviti *gong* na visokom nivou? Mnogi ljudi ne znaju pravo značenje toga što su ljudi sa visokih nivoa rekli i ne razumiju horizont i način razmišljanja onih koji se nalaze na visokim nivoima. Naravno, nećemo govoriti o tome šta to znači, ali razmislite o tome: samo u najkomplikovanijoj grupi ljudi i u najkomplikovanijem okruženju može se kultivirati *gong* na visokom nivou - to se podrazumijeva pod tim.

Urođena osnova

Urođena osnova je određena količinom supstance *de* u tijelu osobe u drugoj dimenziji. Ako osoba ima malo *de*-a i puno crne supstance, njeno karmičko polje je veliko, a urođena osnova slaba. Ako ona ima mnogo *de*-a i mnogo bijele supstance, njeno karmičko polje je malo, a njena urođena osnova dobra. Bijela i crna supstanca osobe mogu biti transformisane jedna u drugu. Kako se transformišu? Dobrim djelima se stvara bijela supstanca. Bijelu

supstancu dobijaš kada izdržavaš teškoće, patiš, ili činiš dobra djela. A crnu supstancu stvaraš čineći loša djela ili stvari koje nisu dobre i to je karma. Postoji takav transformacijski proces. Međutim, one također mogu biti naslijeđene, jer idu direktno s dušom i nisu iz jednog života, već su sakupljane dugi niz godina. Zbog toga ljudi govore o sakupljanju karme i sakupljanju *de*-a. Uz to, mogu biti naslijeđene od predaka. Ponekad se sjetim riječi Kineza u starim vremenima, ili starijih ljudi: Oni kažu da su nečiji "preci sakupili *de*", ili da je neka osoba „sakupila *de*“ ili da joj „fali *de*“. Njihove riječi su tako ispravne! One su zaista jako ispravne.

Čovjekova dobra ili loša urođena osnova mogu odrediti da li je njegov kvalitet prosvjetljenja dobar ili loš. Loša urođena osnova može učiniti kvalitet prosvjetljenja jedne osobe također vrlo lošim. Zašto je to tako? Zato što čovjek sa dobrom urođenom osnovom ima puno bijele supstance i ova bijela supstanca je u perfektnoj harmoniji s našim univerzumom, ona se može sjediniti s osobinama Zhen, Shan, Ren, nema jaza između njih. Osobine univerzuma se mogu direktno manifestirati na tvom tijelu i u direktnoj su vezi s tvojim tijelom. Ali crna supstanca je upravo suprotno, dobija se čineći loša djela i u suprotnosti je s osobinama našeg univerzuma, zbog toga postoji jaz između crne supstance i osobina našeg univerzuma. Kada ima puno crne supstance, ona formira polje oko tijela osobe i obmotava ga. Što je polje veće, to je veća njegova gustoća i debljina i to čini njegov kvalitet prosvjetljenja lošijim, jer on ne može primiti osobine univerzuma Zhen, Shan, Ren, a i zbog toga što je čineći loša djela stvorio crnu supstancu. Obično takav čovjek još manje vjeruje u kultiviranje. Što je njegov kvalitet prosvjetljenja lošiji, njegova karma će ga više blokirati. Što više pati, to će manje vjerovati i teže će mu biti kultivirati se.

Lako je nekome sa mnogo bijele supstance kultivirati se, jer, sve dok se u procesu kultivacije izjednačava s osobinama univerzuma i može povisiti svoj *xinxing*, njegov *de* se direktno transformiše u *gong*. Ali za nekoga sa puno crne supstance postoji dodatni proces, kao kod proizvodnje u fabrici: Dok ostali imaju pripremljen materijal, on ima samo sirovi materijal i prvo treba preraditi taj sirovi materijal, on mora proći kroz taj proces. Zato on mora prvo patiti, da bi smanjio karmu i transformisao je u bijelu supstancu. Tek kad nastane supstanca *de*, on može razviti *gong* visokog nivoa. Ali takva osoba obično ima slab kvalitet prosvjetljenja; ako je pustiš da pati još više, ona će još manje vjerovati i biće još manje u stanju to izdržati. Zato je osobama sa puno crne supstance teško kultivirati se. Prije se u taoističkim školama i u školama u kojima se stvari predaju samo na jednog učenika govorilo da učitelj traži učenika, a ne učenik učitelja. Oni su birali ljude na osnovu toga koliko ovih stvari tijelo učenika nosi.

Urođena osnova određuje kvalitet prosvjetljenja, ali to nije apsolutno. Neki ljudi imaju jako lošu urođenu osnovu, ali njihovo familijarno okruženje je vrlo dobro, mnogi članovi porodice se kultiviraju, ili su možda neki od njih religiozni i duboko vjeruju u kultivaciju. Život u ovakvom okruženju može ih dovesti do toga da počnu vjerovati u to i da im se poboljša kvalitet prosvjetljenja, tako da to nije apsolutno. A ima i nekih koji imaju vrlo dobru urođenu osnovu, ali imaju jako ograničeno razmišljanje, zbog to malo znanja koje su dobili kroz obrazovanje u našem realističnom društvu, a prije svega kroz apsolutne metode ideološkog obrazovanja od prije nekoliko godina, tako da ne vjeruju u ništa što prevazilazi njihovo znanje. To može ozbiljno uticati na njihov kvalitet prosvjetljenja.

Navešću vam jedan primjer. Na jednom seminaru sam drugi dan objašnjavao otvaranje nebeskog oka. Tamo je bio jedan čovjek sa dobrom urođenom osnovom i njegovo nebesko oko se odmah otvorilo na vrlo visokom nivou. Vidio je mnogobrojne scene, koje drugi ljudi

nisu mogli vidjeti. Rekao je drugima: "Super, vidio sam kako *faluni* padaju kao snježne pahuljice na tijela ljudi u cijelom auditorijumu. Vidio sam kako izgleda Istinsko tijelo Učitelja Lija, vidio sam auru oko Učitelja Lija, kako *falun* izgleda i koliko mnogo *fašena* ima. Vidio sam kako Učitelj Li objašnjava Fa na različitim nivoima i kako *faluni* podešavaju tijela učenika. Vidio sam također, dok je Učitelj govorio, da su Učiteljeva *gong* tijela nivo za nivoom, na različitim nivoima objašnjavala Fa. A vidio sam i nebeske vile kako posipaju cvijeće, itd." Vidio je tako prekrasne stvari, što znači da je njegova urođena osnova bila prilično dobra. On je govorio i govorio i na kraju je rekao: „Ja ne vjerujem u te stvari.“ Neke od tih stvari su već dokazane od strane današnje nauke, a mnoge stvari se mogu objasniti modernom naukom, i neke stvari smo već iscrpno objasnili. Jer, ono što se može shvatiti kroz *qigong* zaista prevazilazi spoznaje moderne nauke - to je sigurno. S ovog stanovišta, nečija urođena osnova ne određuje u potpunosti njegov kvalitet prosvjetljenja.

Prosvjetljenje

Šta je prosvjetljenje? Prosvjetljenje je pojam iz religije. U budizmu se to odnosi na kultivatorovo razumijevanje Buda Fa, na prosvjetljenje u pogledu razumijevanja i konačno prosvjetljenje, naime prosvjetljenje mudrosti. Ali u današnje vrijeme se taj pojam već koristi među svakodnevnim ljudima kada se za neku osobu želi reći da je vrlo pametna i da zna šta je na umu njenog šefa. Ona to može odmah shvatiti i zna kako treba postupati sa svojim šefom. Ljudi kažu da ona ima dobar kvalitet prosvjetljenja i obično se tako shvata. Ali ako izadeš iz nivoa svakodnevnih ljudi i nalaziš se na nešto višem nivou, vidjećeš da su principi svakodnevnih ljudi obično pogrešni. Za nas je prosvjetljenje nešto sasvim drugačije od te vrste prosvjetljenja. Zapravo, kvalitet prosvjetljenja lukavih ljudi nije dobar, zato što će osoba koja je previše lukava obavljati posao samo površno da zadovolji svog šefa ili rukovodstvo. Zar neće onda drugi ljudi morati obaviti stvarni posao? Onda će ova osoba dugovati drugima nešto. Zato što je lukava i zna kako udovoljiti drugima, dobiće više koristi, dok će ostali biti u gubitku. Zato što je lukava, neće trpjeti gubitke, niti će joj biti lako nešto izgubiti, pa onda drugi moraju trpjeti gubitke. Što više obraća pažnju na ove sitne, praktične dobitke, postaje sve više proračunata i sve više misli da su materijalni dobici svakodnevnih ljudi nešto što ne treba otpustiti. Smatraće se vrlo praktičnom i da nikad ne podnosi gubitke.

Neki ljudi čak zavide tom čovjeku. Kažem vam da mu ne zavidite. Ne znate kako zamoran život on vodi: ne može ni jesti, ni dobro spavati, čak i u snu se boji gubitka ličnih interesa. Kada se radi o ličnim interesima, sve će uraditi čak i zbog najtrivijalnijih stvari. Zar ne bi rekao da on vodi zamoran život? On čitav život živi za to. Mi kažemo, ako učiniš korak nazad u konfliktu, vidjećeš da su more i nebo beskrajni i to će sigurno biti drugačija situacija. Ali ovakva osoba neće popustiti i vodi najzamorniji život, nemoj učiti od nje. U krugovima kultivatora se kaže: "Ovaj čovjek je potpuno izgubljen. Zbog materijalnih interesa se totalno izgubio među svakodnevnim ljudima." Neće biti lako reći mu da čuva svoj de! Ti mu kažeš da se treba kultivirati, ali on ne vjeruje u to: "Kultivacija? Vi praktikanti ne uzvraćate udarac, kada vas neko udari, a kada vas psuju, ne odgovarate. Kada vas drugi dovedu u jako lošu situaciju, umjesto da na isti način postupate s njima, vi im čak morate zahvaliti. Vi ste svi kao Ah Q! Svi ste mentalno bolesni!" Takav čovjek ne može razumijeti kultivaciju. Reći će da si neshvatljiv. Reći će da si glup. Zar ne misliš da ga je teško spasiti?

To nije prosvjetljenje o kojem mi govorimo. Upravo to što ova osoba naziva "glupim" u pogledu ličnih interesa, predstavlja prosvjetljenje o kojem mi govorimo. Naravno, mi nismo stvarno glupi, mi jednostavno olako uzimamo lične interese, dok smo u drugim oblastima

prilično vješti i sposobni. Kada radimo na nekom naučno-istraživačkom projektu, ili kada izvršavamo zadatke koje nam dodjeljuje rukovodstvo, ili kada obavljamo neki posao, mi smo veoma oštroumni i veoma dobro obavljamo posao. Samo kada se radi o tim beznačajnim, ličnim interesima ili međuljudskim konfliktima, samo tada uzimamo to olako. Ko će reći da si zbog toga glup? Niko. To je sigurno tako.

Razgovarajmo o stvarno glupom čovjeku. Principi su potpuno suprotni na visokim nivoima. Glup čovjek vjerovatno neće počinuti veće loše djelo među svakodnevnim ljudima i neće se nadmetati i boriti za lični interes. On ne teži ugledu i ne gubi *de*. Ali drugi će mu dati *de*. Kada ga tuku ili psuju, daju mu *de* i ova supstanca je veoma dragocjena. U ovom našem univerzumu postoji princip: Bez gubitka nema dobitka; da bi dobio, moraš izgubiti. Kada drugi vide ovu glupu osobu, vrijeđaće je: "Glupane!" Kada otvaraju usta i psuju, biće mu dobačen komad *de*-a. Kada nekog uvrijediš, ti si dobio nešto od toga, pa onda moraš i nešto izgubiti. Neko dođe i udari ga: "Evo ti, glupane jedan!" Dobro, još jedan veliki komad *de*-a će mu biti dobačen. Kada ga neko zadirkuje ili udari, njega to ne brine i on će to prihvatiti smijući se: "Samo naprijed, ono što je bitno je da mi daješ *de*. Neću odbiti ništa od toga!" Dakle razmislite, ko je pametniji prema principima sa visokih nivoa? Nije li ova osoba pametnija? Ona je najpametnija. Ona ne gubi ni malo *de*-a. Kada dobacuješ *de* toj osobi, ona ne odbija ništa od toga i sve prihvata sa smiješkom. On je glup u ovom životu, ali neće biti u idućem - njegova duša nije glupa. U religiji se kaže da ako osoba ima mnogo *de*-a, onda će u idućem životu postati službenik visokog ranga ili će imati veliko bogatstvo. Sve je to zamijenjeno za njen *de*.

Rekli smo da se *de* može transformisati direktno u *gong*. Ne zavisi li visina do koje ćeš se kultivirati od transformacije tvog *de*-a? On se može direktno transformisati u *gong*. Nije li *gong*, koji određuje visinu tvog nivoa i jačinu tvoje *gong* potencije, transformisan iz ove supstance? Ne bi li rekao da je on vrlo dragocjen? On se može donijeti s rođenjem i ponijeti prilikom umiranja. U budizmu se kaže da koliko god visoko si se kultivirao, to je tvoj status dostignuća. Koliko uložiš, toliko ćeš i dobiti - to je princip. U religiji se kaže da ako osoba ima mnogo *de*-a, onda će u idućem životu postati službenik visokog ranga ili će imati veliko bogatstvo, dok neko s malo *de*-a ne može dobiti ništa, čak i ako prosi, jer nema *de* za razmjenu. Bez gubitka nema dobitka! Kada neko nema nimalo *de*-a, umrijeće mu i tijelo i duša, onda je zaista mrtav.

Postojao je jedan *qigong* učitelj čiji je nivo bio prilično visok kada se prvi put pojavio u javnosti. Taj *qigong* učitelj je kasnije postao opsjednut slavom i bogatstvom, tako da je njegov učitelj odveo njegovu sporednu dušu, jer je on bio jedan od onih kod kojih se sporedna duša kultivira. Dok je njegova sporedna duša još bila tu, sporedna duša ga je kontrolisala. Daću vam jedan primjer: Jednog dana su u njegovom preduzeću dodjeljivali stan. Rukovodstvo je reklo: "Svi kojima treba stan, dođite, opišite uslove u kojima živite i objasnite zašto vam je potreban stan." Dok su svi iznosili svoje razloge, ovaj čovjek nije rekao niti riječ. Na kraju je rukovodstvo odlučilo da je on bio u težoj situaciji od drugih i da njemu treba dodijeliti stan. Ali neko drugi je rekao: "To nije u redu, stan ne treba dati njemu, nego ga treba dati meni, sad mi je stan stvarno prijeko potreban." On je na to rekao: "U redu, onda ga uzmi." U očima svakodnevnih ljudi, ovaj čovjek je glup. Neki ljudi su znali da je on kultivator, pa su ga upitali: "Ti kao kultivator ne želiš ništa. Pa šta onda želiš?" Odgovorio je: "Ja želim ono što drugi ne žele." U stvari on uopšte nije glup, već je vrlo pametan. Samo kad su u pitanju njegovi lični interesi on postupa na taj način - on slijedi prirodni tok. Drugi su ga opet upitali:

"Šta današnji ljudi ne žele?" Rekao je: "Kamenje na zemlji šutiraju tamo-vamo i niko ga ne želi. Onda ću ja uzeti to kamenje." Za svakodnevnog ljude je to neshvatljivo, oni ne mogu razumjeti kultivatore. Oni to ne mogu razumjeti, jer je razlika među nivoima njihovog razmišljanja jednostavno prevelika i razmak između nivoa je prevelik. Naravno, on neće stvarno sakupljati kamenje. Ali on je izgovorio princip koji svakodnevni ljudi ne mogu shvatiti: "Ja ne težim stvarima svakodnevnih ljudi." Razgovarajmo o kamenju. Zna da u budističkim sutrama piše da je u Sukhavati svijetu drveće od zlata, zemlja je od zlata, ptice su od zlata, cvijeće je od zlata, kuće su od zlata i čak je i tijelo Bude zlatno i sjajno. Tamo se ne može naći nijedan kamen. Kaže se da se tamo kamenje koristi kao novac. Naravno, on neće tamo nositi kamenje, ali je izgovorio jedan princip koji svakodnevni ljudi ne mogu shvatiti. Zaista, kultivatori će reći: "Svakodnevni ljudi imaju svoje težnje, ali mi ne težimo za tim. Nas ne interesuje šta svakodnevni ljudi imaju. Ali ono što mi imamo svakodnevni ljudi ne mogu dobiti, čak i ako žele."

U stvari se prosvjetljenje o kojem smo upravo govorili odnosi na prosvjetljenje za vrijeme kultivacije i to je upravo suprotno od prosvjetljenja među svakodnevnim ljudima. Prosvjetljenje na koje mi mislimo u stvari se odnosi na to da li mi za vrijeme kultivacije možemo shvatiti i prihvatiti Fa podučavan od Učitelja ili Tao podučavan od taoističkog Učitelja, da li se možemo smatrati praktikantima kad nastupe poteškoće i da li se možemo pridržavati Fa dok prakticiramo kultivaciju. Neki ljudi neće vjerovati u ove stvari, bez obzira kako im se objasni i stvari među svakodnevnim ljudima su za njih ipak realnije. Oni se drže svojih tvrdoglavih uvjerenja i ne mogu ih otpustiti i zbog toga ne mogu vjerovati u to. Neki ljudi samo žele izliječiti bolesti. Čim kažem da *qigong* uopšte ne služi za liječenje bolesti, kod njih odmah nastaje netrpeljivost i neće vjerovati u ništa od onog što podučavamo kasnije.

Kvalitet prosvjetljenja nekih ljudi jednostavno se ne može poboljšati. Neki po sopstvenoj volji počnu praviti bilješke u mojim knjigama. Oni među nama, čije je nebesko oko otvoreno, mogu vidjeti da ova knjiga svijetli u svim bojama i da ima zlatni sjaj i svaka riječ ima oblik mog *fašena*. Ako bih rekao nešto što nije istina, varao bih vas, zato vam kažem: Te bilješke koje si napravio su tako tamne, kako se usuđuješ proizvoljno praviti bilješke u knjizi? Da li znaš šta mi ovdje radimo? Zar te ne vodimo u kultiviranju prema visokim nivoima. O nekim stvarima trebaš malo razmisliti. Ova knjiga može voditi tvoju kultivaciju - razmisli, nije li ona dragocjena? Može li ti obožavanje Bude omogućiti da se istinski kultiviraš? Ti si veoma pobožan i ne usuđuješ se niti dotaknuti statuu Bude i svaki dan pališ tamjan za nju, ali se usuđuješ vrijeđati Dafa, koji može istinski voditi tvoju kultivaciju.

Kada je riječ o kvalitetu prosvjetljenja, time se misli na to, do koje mjere razumiješ, u procesu kultiviranja, određene stvari koje se pojavljuju na različitim nivoima, ili određene stvari ili Fa koje je Učitelj podučavao. Ipak, to još uvijek nije temeljno prosvjetljenje o kojem govorimo. Temeljno prosvjetljenje, o kojem mi govorimo, znači da se neko u svom životu od početka svoje kultivacije stalno povisuje, otpušta svoje ljudske vezanosti i sve različite želje i njegov *gong* stalno raste, sve dok on konačno ne stigne do zadnjeg koraka svoje kultivacije. Njegova *de* supstanca se potpuno preobrazila u *gong* i on je stigao do kraja puta kultivacije koji je aranžirao njegov učitelj; U tom trenutku će sve brave s jednim "bum!" biti raznešene i otvorene. Njegovo nebesko oko će dostići najvišu tačku nivoa na kojem se nalazi i on vidi stvarnu pojavu različitih dimenzija, forme postojanja različitih života u različitim vrijeme-prostorima, forme postojanja materije u različitim vrijeme-prostorima na nivou na kojem se nalazi i on vidi istinu našeg univerzuma. Njegove božanske moći se veličanstveno prikazuju i

on može komunicirati s različitim živim bićima. Nije li on tada veliki prosvjetljeni? Nije li on osoba prosvjetljena kroz kultivaciju? Kada se prevede na staroindijski jezik, to je Buda.

Ta vrsta prosvjetljenja o kojem mi govorimo, dakle temeljno prosvjetljenje, predstavlja formu „naglog prosvjetljenja“. Kod naglog prosvjetljenja se osoba cijeli život kultivira u zaključanom stanju i ona ne zna koliko je visok nivo njezinog *gong* i u kojim formama se pojavljuje njezin kultivirani *gong*. Ne osjeća ništa i čak su i ćelije u njenom tijelu zaključane. Sav *gong* kojeg je kultivirala je također zaključan i biće otvoren tek pri zadnjem koraku njene kultivacije. Samo neko sa odličnim urođenim kvalitetom može to napraviti i kultivacija je veoma teška. On započinje kao dobra osoba, ustrajava u poboljšavanju svog *xinxing*, ustrajava u podnošenju patnji, ustrajava u uzdizanju u kultivaciji i ustrajava u nastojanju da poboljša svoj *xinxing*, ali ne može vidjeti svoj *gong*. Kultivacija takve osobe je najteža i ona mora biti osoba sa odličnim urođenim kvalitetom i ona ne zna koliko će se godina kultivirati.

Postoji još jedna vrsta prosvjetljenja koja se zove „postepeno prosvjetljenje“. Već na samom početku mnogi ljudi osjećaju okretanje *faluna*, a u isto vrijeme vam otvaram nebesko oko. Iz raznih razloga, neki ljudi sada nisu u stanju vidjeti, ali će biti u stanju vidjeti u budućnosti. Od nemogućnosti vidjeti jasno do mogućnosti vidjeti jasno, od neznanja kako to koristiti do znanja kako to koristiti i njihovi nivoi će stalno rasti. S poboljšavanjem tvog *xinxing* i odbacivanjem različitih vezanosti, pojavljuju se razne natprirodne sposobnosti. Sve promjene za vrijeme procesa tvoje kultivacije i proces transformacije tvog tijela dešavaju se pod okolnostima da ih možeš vidjeti ili osjetiti. Na ovaj način stižeš do posljednjeg koraka, kada potpuno shvataš istinu univerzuma i tvoj nivo dostiže najvišu tačku koju trebaš dostići u svojoj kultivaciji. Transformacija *ben-tija* i pojačavanje natprirodnih sposobnosti su dostigle određeni stepen i postepeno postižeš ovaj cilj. To je „postepeno prosvjetljenje“. Kultivacijska metoda postepenog prosvjetljenja također nije laka. Kada neki ljudi dobiju natprirodne sposobnosti, jednostavno se ne mogu odreći svojih vezanosti i lako će se razmetati s tim ili činiti neka loša djela. Na taj način tvoj *gong* opada, kultivirao si se nizašta i na kraju ćeš biti upropašten. Neki ljudi mogu vidjeti i oni mogu vidjeti pojave raznih živih bića na različitim nivoima. Možda će ta bića pokušati da vas navedu da uradite ovo ili ono, ili će pokušati da vas navedu da kultivate njihove stvari ili će pokušati uzeti vas za svoje učenike, ali ona vam ne mogu pomoći da dostignete ispravno dostignuće, jer ni ona sama nisu u stanju dostići ispravno dostignuće.

Pored toga, sva bića u višim dimenzijama su božanstva, ona mogu postati jako velika i mogu veličanstveno prikazati svoje natprirodne moći. Ako tvoje misli nisu ispravne, nećeš li ih slijediti? Čim ga počneš slijediti, tvoja kultivacijska praksa će završiti uzalud. Sve i da je to istinski Buda ili istinski Tao, ipak ćeš se ponovo morati kultivirati ispočetka. Nisu li sva bića na različitim nivoima Neba božanska bića? Samo kada se neko kultivirao do krajnje visokih nivoa i postigao svoj cilj, može se potpuno probiti vani. U očima svakodnevnih ljudi, to božansko biće ipak stvarno izgleda visoko i ogromno i ima veoma jake sposobnosti. Ipak, to biće možda nije postiglo ispravno dostignuće. Kada si ometan raznim porukama i iskušavan raznim pojavama, može li tvoje srce ostati nedirnuto? Zbog toga je također teško prakticirati kultivaciju sa otvorenim nebeskim okom i još je teže kontrolisati svoj *xinxing*. Srećom, kod nekih od naših praktikanata će njihove natprirodne sposobnosti biti otključane tek na pola puta i oni će onda stupiti u stanje postepenog prosvjetljenja. Nebesko oko će svima biti otvoreno, ali kod mnogih ljudi nije dozvoljeno da se pojave natprirodne sposobnosti. Kada tvoj *xinxing* postepeno dostigne određeni nivo i tvoje stanje duha je stabilno i možeš dobro vladati sobom, tada će sve one za tebe jednom eksplozijom biti odjednom otvorene. Od

jednog određenog nivoa, dozvoljeno je da se kod tebe pojavi stanje postepenog prosvjetljenja, jer će ti u to vrijeme biti lakše dobro vladati sobom, pojavice se razne natprirodne sposobnosti i kultiviraćeš se dalje naviše, sve dok konačno sve ne bude otključano. Dopuštamo da se one pojave na pola puta tokom tvoje kultivacijske prakse. To je slučaj kod mnogih od nas, tako da ne trebaš biti nestrpljiv da vidiš stvari.

Možda ste čuli da Zen škola također govori o razlikama između naglog i postepenog prosvjetljenja. Huineng, šesti poglavar u Zen školi, govorio je o naglom prosvjetljenju, dok je Shenxiu iz sjeverne škole Zen budizma govorio o postepenom prosvjetljenju. Rasprava između njih dvojice o budističkom učenju trajala je vrlo dugo u prošlosti. Ali ja bih rekao da je to besmisleno. Zašto? Zato što se to, na šta su oni mislili, odnosi samo na razumijevanje jednog principa u procesu kultivacije. Taj jedan princip je neko razumio odjednom, dok ga je neko drugi postepeno shvatio i spoznao. Zar to nije isto, bez obzira kako se on shvati? Bolje je kada se razumije odjednom, ali je u redu i ako ga neko postepeno spozna. Nisu li ga obojica spoznali? Obojica su ga spoznali, pa nijedan način nije pogrešan.

Osoba sa odličnim urođenim kvalitetom

Šta je „osoba sa odličnim urođenim kvalitetom“? Postoje razlike između nekoga sa odličnim urođenim kvalitetom i nekoga sa dobrom ili lošom urođenom osnovom. Izuzetno je teško pronaći osobu sa odličnim urođenim kvalitetom. Samo nakon dugog historijskog perioda se rađa takva osoba. Naravno, neko sa odličnim urođenim kvalitetom mora najprije imati veliku količinu *de*-a. Polje ove bijele supstance mora biti jako veliko, to je sigurno. Istovremeno, on treba biti u stanju izdržati patnju u patnji i mora imati srce velike tolerancije, on mora biti u stanju odricati se, sačuvati svoj *de*, imati dobar kvalitet prosvjetljenja, itd.

Šta su patnje u patnji? U budizmu se vjeruje da biti čovjek znači patiti - sve dok si ljudsko biće, moraš patiti. Oni kažu da živa bića u svim drugim dimenzijama nemaju takva tijela kao svakodnevni ljudi i zbog toga se ne razboljevaju i nema ni problema rođenja, starenja, bolesti i smrti. Oni jednostavno nemaju tu vrstu patnji. Ljudi u drugim dimenzijama mogu lebditi i nemaju težinu, to je tako čudesno. Upravo zbog toga što svakodnevni ljudi imaju ovo tijelo, oni imaju ove probleme: Ne mogu podnijeti hladnoću, ne mogu podnijeti vrućinu, ne mogu podnijeti žeđ, ne mogu podnijeti glad i ne mogu podnijeti umor, a osim toga postoje još i porođaj, starenje, bolest i umiranje. U svakom slučaju im nije ugodno.

Čitao sam u novinama da je, kada se desio zemljotres u Tangshanu, veliki broj ljudi poginuo, ali neki su bili vraćeni u život. S ovom grupom ljudi je provedena posebna anketa i oni su upitani kako su se osjećali u stanju umiranja?“ Ali, suprotno od svih očekivanja, svi ovi ljudi su govorili o jednoj jedinstvenoj situaciji - i oni su svi bili složni oko toga - naime, u trenutku umiranja oni uopšte nisu osjećali strah, već upravo suprotno, odjednom su imali osjećaj olakšanja s jednom vrstom podsvjesnog uzbuđenja. Neki od njih su osjećali kao da više nisu zatvoreni u tijelu i mogli su lebdjeti veoma lagano i čudesno i još su vidjeli svoja sopstvena tijela; neki od njih su vidjeli živa bića iz drugih dimenzija, a neki su čak išli na razna mjesta. Svi su rekli da su u tom trenutku imali osjećaj olakšanja i jednu vrstu podsvjesnog uzbuđenja, bez osjećaja patnje. To nam govori da već samo posjedovanje ovog fizičkog ljudskog tijela predstavlja patnju. Ali, s obzirom da svi na isti način dolazimo na svijet iz majčine materice, ne znamo više da je to patnja.

Rekao sam da čovjek mora izdržati patnju u patnji. Neki dan sam spomenuo kako je koncept vrijeme-prostora našeg čovječanstva drugačiji od onog koji postoji u drugom, većem

vrijeme-prostoru. Ovdje kod nas je jedan *shichen* dva sata, ali u tom prostoru je to jedna godina. Ako osoba prakticira kultivaciju u ovom grubom okruženju, smatraće je stvarno izvanrednom. Taj čovjek želi pronaći Tao i želi prakticirati kultivaciju, on je za njih jednostavno zadivljujući. On tako puno pati, ali nije izgubio svoju izvornu prirodu i još se želi kultivirati i vratiti se. Zašto se praktikantima može bezuslovno pomoći? Upravo iz ovog razloga. Kada ovaj čovjek čitavu noć sjedi u meditaciji u dimenziji svakodnevnih ljudi, kada to vide, oni će reći da je on zaista izvanredan, jer sjedi tamo već šest godina. To je zato što je jedan naš *shichen* jednak jednoj godini na toj strani. Dimenzija našeg čovječanstva je veoma posebna.

Šta je „izdržavanje patnje u patnji? Daću vam jedan primjer. Jednog dana čovjek ide na posao. Njegovo preduzeće je u krizi i zbog manjka produktivnosti nešto se mora preduzeti. Preduzeće će biti restrukturirano i koristiće se radnici na ugovor, a višak radnika će biti otpušten. On je također jedan od onih čije su rižine zdjele nenadano oduzete. Kakav je to osjećaj? On više nema izvora prihoda - kako će prehraniti familiju? Ne zna raditi ništa drugo, pa tužno odlazi kući. Kad stigne kući, saznaje da mu je jedan od roditelja, koji živi s njim, bolestan i to teško bolestan. Zabrinut i užurban, brzo će odvesti roditelja u bolnicu. Uz velike napore uspijeva posuditi nešto novca da bi svom roditelju obezbijedio krevet u bolnici. Onda se vraća kući da pripremi neke stvari za roditelja. Samo što je stigao kući, školski učitelj stoji na vratima i kaže: "Vaš sin je povrijedio nekoga u tučnjavi, bolje požurite i pogledajte šta se desilo." Nakon što se pobrinuo za to, vraća se kući. Čim je sjeo, zvoni telefon i neko mu govori: "Vaša supruga ima aferu." Naravno, nećete dospjeti u takvu situaciju. Obična osoba ne može podnijeti ovakve patnje i misliće: "Zašto da još živim? Uzeću uže i objesiću se, dosta mi je svega! Vrijeme je da okončam sve ovo!" Ja kažem da čovjek treba biti u stanju izdržati patnju u patnji. Naravno, one ne moraju biti u ovakvom obliku. Ipak, intrige među ljudima, trvljenja *xinxinga* i borba za sopstvenu korist nisu ništa lakše od tih problema. Koliko ljudi živi samo za čast i objesiće se kada više ne budu mogli izdržati. Dakle, mi se moramo kultivirati u tako složenom okruženju i moramo biti u stanju izdržavati patnju u patnji, a istovremeno moramo imati i srce velike trpeljivosti.

Šta je "srce velike trpeljivosti"? Praktikant kao prvo ne treba uzvratiti udarac kada ga udare i ne treba uzvratiti psovkom kada ga psuju, on mora moći otrpiti. U suprotnom, zar se možeš nazivati praktikantom? Neki kažu: "Ovu trpeljivost je teško postići, moj temperament je prilično loš." Ako tvoj temperament nije dobar, onda ga promijeni, praktikanti moraju biti trpeljivi. Neki ljudi će izgubiti živce čak i kod odgoja njihove djece, deraće se na njih i stvorice pravu scenu. Ti ne bi trebao biti takav kod odgoja djece, niti bi se trebao ljutiti. Trebaš ih odgajati razumno, samo tako ih zaista možeš dobro odgojiti. Ako čak ni sitnice ne možeš prevazići i ljutiš se zbog toga, kako možeš očekivati da ti *gong* raste? Neki kažu: "Ako me neko udari dok hodam ulicom i niko me od prisutnih ne poznaje, mogu to otrpiti." Kažem da to nije dovoljno dobro. Možda će te u budućnosti neko ošamariti par puta upravo pred osobom, pred kojom najmanje želiš izgubiti obraz, da bi bio ponižen. Kako ćeš postupiti s tim? Po tome se vidi možeš li to otrpiti ili ne. Ako možeš to otrpiti, ali te to ipak muči u mislima, to još uvijek nije dovoljno dobro. Kao što znate, kada osoba dostigne nivo Arhata, svejedno s čim se susretne, ništa ne uzima k srcu. Ona ne uzima k srcu nikakve stvari svakodnevnih ljudi i uvijek ostaje dobre volje. Bez obzira koliki gubitak pretrpjela, ona ostaje dobre volje i ne brine se. Ako zaista možeš to postići, već si dostigao početni status dostignuća Arhata.

Neki kažu: "Ako do te mjere prakticiramo toleranciju, svakodnevni ljudi će reći da smo slabi i da nas se lako može iskoristiti." Ja to ne zovem slabošću. Razmislite, čak i među svakodnevnim ljudima ćete naći starije ljude i ljude sa višim stepenom obrazovanja koji također primjenjuju samosvladavanje i ne spuštaju se na nivo drugih ljudi. Onda bi to još više trebalo važiti za nas praktikante. Kako se to može smatrati slabošću? Ja bih rekao da je to odraz velike trpeljivosti i odraz tvoje jake volje. Samo praktikanti mogu imati takvo srce velike trpeljivosti. Postoji izreka: "Kada je obična osoba ponižena, odmah će izvući svoj mač da bi uzvratila." On je običan čovjek, pa je naravno tako: „Ti me vrijeđaš, i ja ću tebe vrijeđati; ti me udaraš, odmah ću ti uzvratiti udarac.“ To je upravo obična osoba. Može li se ona zvati praktikantom? Ako ti kao praktikant nemaš čeličnu volju i nisi u stanju uzdržavati se, nećeš biti u stanju to postići.

Vi znate da je u stara vremena živio čovjek po imenu Han Xin, za koga se govorilo da je bio vrlo sposoban. On je bio glavni general imperatora Liu Banga i oslonac države. Zašto je imao tako velika dostignuća? Govorilo se da je Han Xin već u mladim danima bio izuzetna osoba. Postoji priča prema kojoj je Han Xin bio ponižen tako što je morao puzati kroz nečije noge. Već u mladosti je Han Xin prakticirao borilačke vještine, a praktikanti borilačkih vještina uvijek su sa sobom nosili mač. Jednog dana dok je hodao ulicom, lokalni nitkov mu je blokirao put rukama podbočenim na pojasu: "Zašto nosiš mač? Da li bi se usudio ubiti čovjeka? Ako da, odrubi mi glavu." Dok je to govorio, ispružio je glavu prema naprijed. Han Xin je mislio: "Zašto bih ti odrubio glavu?" I u to vrijeme se ubistvo prijavljivalo vlastima i za to se moralo platiti životom. Kako bi mogao ubiti čovjeka po volji? Kada je nitkov vidio da se Han Xin ne usuđuje ubiti ga, rekao je: "S obzirom da se ne usuđuješ ubiti me, moraš mi puzati kroz noge." Han Xin mu je zaista puzao kroz noge. To pokazuje da je Han Xin imao zadivljujuće srce velike trpeljivosti i nije bio kao i svakodnevni ljudi, zbog toga je mogao ostvariti tako velike stvari. „Čovjek se mora boriti za svoju čast.“ - to su riječi svakodnevnih ljudi. Živjeti zbog časti, razmislite o tome - nije li takav život naporan? Nije li to patnja? Je li to vrijedno toga? Na kraju krajeva, Han Xin je bio običan čovjek - kao kultivatori, mi bi trebali biti puno bolji od njega. Naš cilj je dostići nivo koji prevazilaze svakodnevnih ljude i kročiti ka još višim nivoima. Nećemo dospjeti u ovakvu situaciju, ali kada je kultivator uvrijeđen ili ponižen među svakodnevnim ljudima, to nije neophodno lakše od toga. Rekao bih da trvenja *xinxing* među ljudima nisu ništa lakša od toga, ona su čak i gora i prilično je teško spraviti se s njima.

Istovremeno, kultivator mora biti u stanju odricati se, odricati se svih različitih vrsta vezanosti i želja svakodnevnih ljudi. To se ne može postići odjednom, ali mi to možemo postići postepeno. Da to možeš odmah postići danas, onda bi već danas bio Buda. Za kultivaciju treba vremena, ali ti ne smiješ popuštati. Ti kažeš: "Učitelj je rekao da za kultivaciju treba vremena - onda učinimo to polako." Ali tako neće ići! Moraš postaviti stroge zahtjeve na sebe. U kultivaciji Buda Fa trebaš marljivo i postojano kročiti naprijed.

Osim toga, moraš biti u stanju čuvati svoj *de*, moraš čuvati svoj *xinxing* i ne smiješ činiti stvari po volji. Ne možeš raditi šta god želiš i moraš čuvati svoj *xinxing*. Postoji izreka koja se često čuje među svakodnevnim ljudima: "Sakupljaj *de* čineći dobra djela." Mi praktikanti ne govorimo o sakupljanju *de*-a, već o čuvanju *de*-a. Zašto govorimo o čuvanju *de*-a? Zato što smo vidjeli sljedeće: Svakodnevni ljudi pridaju važnost sakupljanju *de*-a i ako su sakupili *de* i činili dobra djela, dobiće dobre stvari u svom idućem životu. Ali kod nas više nema ovog pitanja. Ako si se uspješno kultivirao, dostići ćeš Tao i više neće postojati pitanje idućeg života. Ali postoji i jedno drugo značenje „očuvanja *de*-a“, o kojem ovdje govorimo. Naime,

ove dvije vrste supstanci koje nosimo u našim tijelima nisu sakupljene u jednom životu, već su prenošene kroz jako dug vremenski period. Ti se možeš voziti biciklom kroz cijeli grad, ali možda nećeš naići ni na jednu mogućnost da učiniš dobro djelo. Sve i da to radiš svaki dan, možda još uvijek nećeš naići na takvu priliku.

To ima još jedan nivo značenja. Kada se trudiš da sakupljaš *de*, možda misliš da je nešto dobro djelo, ali ako to učiniš, možda će se to pokazati kao loše djelo. Ili možda vidiš nešto što izgleda kao da je loše i umiješaš se da bi to zaustavio, ali možda je to ustvari bilo dobro. Zašto je to tako? Zbog toga što ne možeš vidjeti njihovu sudbinsku vezu. Zakoni regulišu stvari svakodnevnih ljudi, što nije problem. Međutim, kao praktikant si natprirodan, pa kao natprirodna osoba, na tebe se moraju postavljati zahtjevi natprirodnih principa i ne možeš se mjeriti s principima svakodnevnih ljudi. Ako ti nije poznata sudbinska veza nečega, vjerovatno ćeš postupiti pogrešno. Zato mi govorimo o nedjelovanju (*wuwei*) i ti ne možeš jednostavno raditi šta želiš. Neki ljudi kažu: "Ja samo želim disciplinirati loše ljude." Rekao bih da je onda bolje da postaneš policajac. Ali s tim opet ne mislimo da trebaš sjediti skrštenih ruku kada vidiš da se dešava ubistvo ili da neko podmeće vatru. Kažem vam, kada se pojavi međuljudski konflikt i čak jedna osoba udari nogom drugu osobu, ili neko nekoga udari šakom, može biti da ta osoba duguje nešto drugoj osobi i oni sada poravnavaju dug. Ako se umiješaš, oni neće moći poravnati dug i moraće to ponoviti idući put. To znači da ne možeš vidjeti sudbinsku vezu i lako možeš učiniti loša djela i tako izgubiti *de*.

Nije problem ako se obična osoba umiješa u stvari svakodnevnih ljudi. Ona koristi principe svakodnevnih ljudi za prosuđivanje stvari. Ali ti moraš prosuđivati stvari natprirodnim principima. Postoji problem sa tvojim *xinxingom* ako ne učiniš ništa kada vidiš ubistvo ili podmetanje vatre. Kako ćeš inače pokazati da si dobar čovjek? Ako ništa ne učiniš kada vidiš ubistvo ili podmetanje vatre, u vezi čega bi onda nešto učinio? Ali ima još nešto: Takve stvari nemaju ništa s našim praktikantima, tako da je malo vjerovatno da su one uređene za tebe i malo je vjerovatno da ćeš naići na njih. Kada mi govorimo o očuvanju *de*-a, to je zbog toga da bi izbjegao činiti loše stvari. Čim počneš nešto raditi, može biti da si učinio nešto loše i onda ćeš izgubiti *de*. Ako izgubiš *de*, kako ćeš povisiti svoj nivo? Kako ćeš postići svoj krajnji cilj? To sadrži takva pitanja. Osim toga trebaš imati dobar kvalitet prosvjetljenja. Ako imaš dobru urođenu osnovu, možda će ona učiniti da imaš i dobar kvalitet prosvjetljenja, a i uticaj okruženja također može imati učinka.

Također kažemo da ako se svako od nas kultivira prema unutra i traži razloge u svom sopstvenom *xinxingu*, ako svako traži razloge kod sebe i pokušava postupati bolje idući put, nakon što nešto loše uradi, i ako svako uvijek prvo misli na druge ljude kada nešto radi, ljudsko društvo će se promijeniti nabolje, moral će ponovo porasti, a i duhovna civilizacija i javna sigurnost će se također poboljšati, možda čak više neće biti ni potrebe za policijom. Nikog više ne treba kontrolisati i svako se sam kontroliše i traži rješenje problema u svom sopstvenom srcu. Zar to ne bi bilo sjajno? Znae da se zakoni sve više upotpunjuju i usavršavaju. Ali zašto neki ljudi još uvijek čine loša djela? Zašto oni ne poštuju zakone? Zato što ne možeš obuzdati njihova srca. Kada niko ne gleda, opet će činiti loša djela. Ali ako bi se svi kultivirali prema unutra, onda bi bilo sasvim drukčije i ne bi više morao braniti druge zbog nepravde.

Ovaj Fa može biti podučavan samo do ovog nivoa. Ono što je još više možeš dobiti samo sopstvenom kultivacijom. Pitanja nekih ljudi postaju sve konkretnija. Ako bi ti odgovorio na sva pitanja iz tvog svakodnevnog života, šta bi ti još preostalo da kultiviraš?

Moraš sam sebe kultivirati i samostalno shvatiti. Da sam sve izgovorio, ništa ti ne bi preostalo za kultivaciju. Na sreću, Dafa se već širi i ti već možeš postupati u skladu sa Dafom.

* * *

Mislim da se vrijeme u kojem širim Fa uglavnom bliži kraju, zato vam želim ostaviti istinske stvari, da bi imali Fa koji će vas voditi u budućoj kultivacijskoj praksi. Cijelo ovo vrijeme u kojem širim Fa odgovoran sam za vas, a istovremeno sam odgovoran i za društvo i mi smo zaista slijedili ovaj princip. Neću govoriti o tome da li smo to dobro ili loše uradili, javno mnjenje će dati svoj sud. Moja želja je da proširim Dafa u javnosti da bi on koristio još većem broju ljudi i da bi se oni ljudi koji se zaista žele kultivirati mogli, slijedeći Fa, kultivirati ka višim nivoima. Šireći Fa, istovremeno smo objasnili i principe kako se jedan čovjek treba ponašati i nadam se da će nakon kursa i oni među vama koji se ne mogu kultivirati prema Dafa barem biti dobri ljudi, to će koristiti našem društvu. U stvari, ti sada već znaš kako biti dobar čovjek i nakon kursa možeš biti dobar čovjek.

Za vrijeme širenja Fa bilo je i stvari koje nisu išle glatko i smetnje sa svih strana su bile jako velike. Ali zahvaljujući velikoj podršci organizatora i lidera raznih krugova, kao i trudu naših saradnika, naši kursevi su bili prilično uspješni.

Sve što sam podučavao u lekcijama namijenjeno je da vas vodi u kultivaciji ka visokim nivoima. U prošlosti, niko to nije objasnio pri svom podučavanju Fa. Ono što smo podučavali je vrlo jasno i objašnjeno je uključujući modernu nauku i današnju nauku ljudskog tijela, a osim toga, objašnjeno je na vrlo visokim nivoima. To sam uradio prvenstveno za vas, da bi vam pomogao da u budućnosti istinski dobijete Fa i kultivate se navise - to je moja polazna tačka. Za vrijeme našeg širenja Fa i vježbi, mnogi misle da je Fa dobar, ali da je vrlo težak za ostvariti. U stvari, ja mislim da to zavisi od osobe da li je teško ili ne. Obična, svakodnevna osoba, koja se ne želi kultivirati, smatraće da je kultivacija jednostavno preteška i nezamisliva i da se čovjek ne može uspješno kultivirati. To je obična osoba i ona se ne želi kultivirati, tako da će je smatrati vrlo teškom. Lao Zi je rekao: "Kada uzvišenija osoba čuje Tao, ona će ga marljivo prakticirati. Kada prosječna osoba čuje Tao, pola će prihvatiti, pola će sumnjati. Kada ga niža osoba čuje, glasno će mu se smijati. Da mu se ona ne smije naglas, to ne bi bio Tao." Rekao bih da je to za istinskog praktikanta vrlo lako i nije previsoko i nedostižno. U stvari, mnogi dugogodišnji praktikanti koji su ovdje, a i mnogi od njih koji danas nisu prisutni, već su se kultivirali do jako visokih nivoa. Nisam vam to prije rekao, jer sam se bojao da ćete razviti vezanosti ili da ćete postati samozadovoljni i tako dalje, tako da bi to naškodilo rastu vaše *gong* potencije. Čovjek koji se zaista odlučno kultivira može izdržati i otpustiti vezanosti za razne lične interese, on ih može veoma olako uzeti. Dokle god možeš uspjeti u tome, nije teško. Neki ljudi kažu da je to teško, upravo jer ne mogu otpustiti te stvari. Raditi vježbe samo po sebi nije teško, a nije teško ni podizanje sopstvenog nivoa, samo oni ne mogu otpustiti ljudske misli i zato kažu da je teško. Razlog je što je stvarno jako teško otpustiti kada se radi o stvarnim interesima. Interesi su upravo tu pred tobom, šta misliš, kako možeš otpustiti tu vezanost? Kada oni kažu da je teško, onda je upravo to razlog teškoće. Kada dospijemo u međuljudski konflikt, ako ne možemo biti trpeljivi i čak nismo u stanju tretirati sebe kao praktikante, rekao bih da je to neprihvatljivo. Prije, dok sam se kultivirao, mnogi veliki ljudi su mi rekli: "Kada je teško izdržati, možeš izdržati, kada nešto izgleda nemoguće uraditi, možeš to uraditi." I stvarno je tako. Možeš probati kada se vratiš kući. Kada se suočavaš sa velikim problemima ili prevazilaziš teškoće, pokušaj. Kada je teško izdržati, pokušaj izdržati. Kada izgleda nemoguće i kažu da je nemoguće, pokušaj i vidi da li

je moguće. Ako stvarno uspiješ u tome, vidjećeš: "Nakon prolaska sjenovitih vrba, pred tobom će se pojaviti sjajno cvijeće i iduće selo!"

S obzirom da sam tako puno objašnjavao, biće vam jako teško sve zapamtiti. Želim vam samo reći nekoliko zahtjeva: Nadam se da ćete u svojoj budućoj kultivaciji postupati kao praktikanti i istinski se nastaviti kultivirati. Nadam se da će se i novi učenici, kao i dugogodišnji učenici moći kultivirati u Dafa, uspjeti u tome i postići Ispunjenje! Nadam se da ćete nakon odlaska kući najbolje iskoristiti vrijeme i stvarno se kultivirati.

.....

Na površini, *Zhuan Falun* nije tako elegantan u pogledu jezika i čak nije u skladu s modernom gramatikom. Međutim, da sam preradio ovu Dafa knjigu uz pomoć moderne gramatike, pojavio bi se ozbiljan problem: Jezik i gramatička struktura teksta bi odgovarali normama i bili bi elegantni, ali ne bi obuhvatili dublji i viši sadržaj. To je zato što moderna, standardizovana terminologija uopšte nije u stanju izraziti vođenje Dafe na različitim višim nivoima i manifestacije Fa na svakom nivou, što je potrebno da bi se postigla transformacija *bentija* i *gonga* praktikanta, ili druge takve temeljne promjene.

.....

Li Hongzhi
05.01.1996.

Lista nepoznatih riječi

Ah Q	Glupa osoba u kineskom romanu.
Arhat	Prosvijetljeno biće sa statusom dostignuća u Buda školi, koje je izvan Tri sfere.
Asura	"Zlonamjerni duhovi" (iz sanskrt).
Baihui tačka	Akupunkturna tačka smještena na vrhu glave.
Benti	Bukvalno prevedeno: „pravo tijelo“; Materijalno tijelo i tijela u drugim dimenzijama.
Bian Que	U istoriji dobro poznati doktor kineske medicine.
Bigu	"Izbjegavanje žitarica"; drevni izraz za apstinenciju od hrane i vode.
Bodisatva	Prosvijetljeno biće sa statusom dostignuća u Buda školi, koje je više od Arhata, ali niže od Tathagate.
Bodisatva Avalokitesvara	Poznata po svojem suosjećanju, ona je jedna od dviju starijih Bodisatvi u Raju konačnog blaženstva.
Božica Kraljica majka	U kineskoj mitologiji, žensko božanstvo najvišeg nivoa unutar Tri sfere.
Cao Car	Car jednog od tri kraljevstva (220. - 265.).
Car žada	U kineskoj mitologiji, božanstvo koje nadzire Tri sfere.
Changchun	Glavni grad pokrajine Jilin.
Chongqing	Najveći grad u jugozapadnoj Kini.
Da Ji	Zla konkubina posljednjeg cara dinastije Shang (1765. p.n.e. - 1122. p.n.e.). Vjeruje se da je ona bila zaposjednuta od strane duha lisice i da je uzrokovala propast dinastije Shang.
Dafa	Veliki Fa; Veliki kosmički zakon
Dan	Nakupina energije u tijelu kultivatora, sakupljena iz drugih dimenzija.
Dan Jing	Klasični kineski tekst kultivacijske prakse.
Dantian	Polje eliksira; područje donjeg abdomena.
De	Vrlina, odlika; dragocjena bijela supstanca.

Ding	Meditacija; apsolutna koncentracija; Stanje praznog, a ipak svjesnog uma.
Dlan željeznog pijeska, Dlan cinobera, Noga Vajre, Stopalo Arhata	Vrste tehnika kineskih borilačkih vještina.
Duhovna civilizacija	Popularni naziv u savremenoj Kini koji se odnosi na uzdizanje ljudskog razmišljanja i morala. U Kini, ovaj pojam je suprotan od pojma "materijalna civilizacija".
Energetski kanali	Meridijani; u kineskoj medicini se kaže da su to provodnici <i>qija</i> koji obuhvaćaju složenu mrežu za cirkulaciju energije.
Fa	Zakon i principi u Buda školi.
Falun	Zakonski točak, simbol Falun Dafa (vidi sliku u boji).
Falun Dafa	Veliki put (kultivacije) zakonskog točka.
Fašen	Zakonsko tijelo; tijelo sastavljeno od <i>gonga</i> i Fa.
Fengshui	Kinesko gatanje, vještina čitanja pejzaža.
Gong	1. Kultivacijska energija; 2. Praksa koja kultivira takvu energiju.
Gongshen	Tijelo sačinjeno od <i>gonga</i> .
Guanding	Ulijevati energiju u vrh glave; ritual inicijacije.
Guangdong	Pokrajina u južnoj Kini.
Guangxi	Pokrajina u južnoj Kini.
Guanyin škola	Škola nazvana po Bodisatvi Avalokitesvari, "Boginji milosrđa".
Guiyang	Glavni grad pokrajine Guizhou.
Guizhou	Pokrajina u jugozapadnoj Kini.
Han	Većinska etnička skupina u Kini.
Han Xin	Glavni general Liu Banga.
Heche	"Riječno vozilo".
Hegu tačka	Akupunkturna tačka na vanjskoj strani ruke, između palca i kažiprsta.
Hetu	Kao predistorijski dijagram, on otkriva promjene puta prirode.

Hinayana	"Mala kola budizma".
Hua Tuo	U istoriji dobro poznati doktor kineske medicine.
Huiyin tačka	Akupunkturna tačka u sredini perineuma (područje između anusa i genitalija).
Hun	Hrana koja je zabranjena u budizmu.
Jiang Ziya	Karakter u romanu <i>Ustoličenje bogova</i> .
Jie	Jako dug period, odgovara periodu od dvije milijarde godina. <i>Jie</i> također označava teškoće ili katastrofe, koje nakon određenog vremena nastupaju kod jednog čovjeka, u cjelokupnom društvu ili u još većoj oblasti
Jigong	Dobro poznati budistički monah u južnoj Song dinastiji (1127. - 1279.).
Jinan	Glavni grad pokrajine Shandong.
Karma	Vrsta crne supstance u drugim dimenzijama.
Knjiga promjena	Drevna kineska knjiga proricanja koja potiče iz Zhou dinastije (1100. p.n.e. - 221. p.n.e.).
Lama	Titula učitelja u tradiciji tibetanskog budizma.
Lao Zi	Osnivač Tao škole i autor djela <i>Dao De Jing (Tao Te Ching)</i> , smatra se da je živio i podučavao u Kini oko 5. ili 4. stoljeća prije naše ere.
Laogong tačka	Akupunkturna tačka u sredini dlana.
Lei Feng	Kineski moralni uzor u 1960-tim godinama.
Li	Kineska jedinica za udaljenost (=0.5 km). U kineskom "108 hiljada li-ja" predstavlja uobičajen izraz za opis vrlo velike udaljenosti.
Li Shizhen	U istoriji dobro poznati doktor kineske medicine.
Lianhuase	Jedna od deset glavnih učenica Bude Shakyamunija.
Liu Bang	Vladar i osnivač Han dinastije (206. p.n.e. - 23.).
Lu Dongbin	Jedno od osam božanstava u Tao školi.
Luoshu	Kao predistorijski dijagram, on otkriva promjene puta prirode.
Lunyu	Izjava, tumačenje.

Mah Jong	Tradicionalna kineska igra za 4 igrača.
Mahayana	"Velika kola budizma".
Maoyou	Granica između <i>yin</i> i <i>yang</i> strana tijela.
Ming dinastija	Razdoblje između 1368. i 1644. g. u kineskoj historiji.
Mingmen tačka	"Vrata života"; akupunkturna tačka smještena u sredini donjeg dijela leđa.
Mliječno-bijelo tijelo	Pročišćeno tijelo bez <i>qija</i> .
Mo ding	Prema tvrdnji nekih <i>qigong</i> učitelja, dodirivanje vrha glave da bi se dala energija.
Nanjing	Glavni grad pokrajine Jiangsu.
Nebesko oko	Također poznato kao "treće oko".
Nirvana	[Iz sanskrt] Odlazak iz ljudskog svijeta bez fizičkog tijela, metoda dovršenja kultivacije u školi Bude Shakyamunija.
Nivan palača	Taoistički izraz za epifizu.
Osam božanstava	Dobro poznati Tao-i u kineskoj historiji.
Osam trigrama	Iz <i>Knjige promjena</i> , predistorijski dijagram za koga se smatra da otkriva promjene puta prirode.
Pet elemenata	Metal, drvo, voda, vatra i zemlja.
"Stavljanje tignja na peć", "Sakupljanje trava i oplemenjivanje eliksira"	Taoistička metafora za unutrašnju alhemiju.
Qi	U kineskoj kulturi se vjeruje da je to "vitalna energija"; u poređenju s <i>gongom</i> , to je niži oblik energije.
Qianmen	Jedna od značajnijih šoping oblasti u Pekingu.
Qiao	Taoistički stručni izraz za akupunkturne tačke
Qigong	Moderni naziv za tradicionalnu kultivaciju.
Qimen škola	"Neobična škola".
Qin Hui	Zao dužnosnik kraljevskog dvora južne Song dinastije (1127. - 1279.).
Qingdao	Luka u pokrajini Shandong.
Qiqihar	Grad u sjeveroistočnoj Kini.

Ren	Strpljenje, tolerancija, trpeljivost, izdržljivost, samokontrola.
Shakyamuni	Istorijski Buda, Guatama Siddhartha.
Sanskrt	Stari indijski jezik, sveti jezik.
Shan	Suosjećanje, dobrodušnost, ljubaznost, dobrota, milosrđe.
Shangen tačka	Akupunkturna tačka smještena između obrva.
Shen Gongbao	Zavidan karakter u romanu "Ustoličenje bogova".
Shenxiu	Osnivač sjeverne škole Zen budizma u Tang dinastiji.
Shichen	Kineska jedinica vremena u trajanju od dva sata.
Svastika ili srivatsa	"Točak svjetla" iz sanskrta, simbol star preko 2.500 godina, pronađen u iskopinama u kulturnim spomenicima u Grčkoj, Peruu, Indiji, Kini i drugim zemljama. Stoljećima označava dobru sreću, predstavljao je sunce i gledalo se pozitivno na njega.
Status dostignuća	Nivo nečijeg dostignuća u Buda školi, tj. Arhat, Bodisatva, Tathagata, itd.
Sun Simiao	U istoriji dobro poznati doktor kineske medicine.
Sun Wukong	Poznat i kao "kralj majmuna", lik u klasičnom djelu kineske fantastike: <i>Putovanje na Zapad</i> .
Svijet-deset-smjerova	Budističko shvatanje univerzuma.
Taiji	Simbol Tao škole, popularno poznat na Zapadu kao "yin-yang simbol".
Taiyuan	Glavni grad pokrajine Shanxi.
Tang dinastija	Jedno od najuspješnijih razdoblja u kineskoj istoriji (618.-907.).
Tangshan	Grad u pokrajini Hebei.
Tanzhong tačka	Akupunkturna tačka smještena otprilike u sredini grudi.
Tao	1. Također poznat kao "Dao", taoistički izraz za "Put prirode i univerzuma"; 2. Prosvijetljeno biće koje je postiglo ovaj Tao.
Tao Zang	Klasični kineski tekst o praksi kultivacije.

Tathagata	Prosvijetljeno biće sa statusom dostignuća u Buda školi, koje je više od nivoa Arhata i Bodisatve.
Tiananmen	Vrata nebeskog mira ispred zabranjenog grada u Peking.
Tianzi zhuang	Forma stajaćih <i>qigong</i> vježbi u Tao školi.
Učitelj	Također se kaže majstor, učtiv način za oslovljavanje učitelja u Kini. Kineski izraz je <i>Shifu</i> . Direktno prevedeno to znači: "učitelj" i "otac".
Ustoličenje bogova	Klasično djelo kineske fantastike.
Velika kulturna revolucija	Komunistički politički pokret koji je javno žigosao tradicionalne vrijednosti i kulturu (1966. - 1976.).
Vrijeme kraja Fa	Prema Budi Shakyamuniju, Vrijeme kraja Fa počće petsto godina nakon njegove smrti i nakon toga njegov Fa više neće moći spašavati ljude.
Wuhan	Glavni grad pokrajine Hubei.
Wuwei	Nedjelovanje, mirovanje; bez namjere.
Xingming Guizhi	Klasični kineski tekst za kultivacijsku praksu.
Xinjiang	Pokrajina u sjeverozapadnoj Kini.
Xinxing	Priroda uma ili srca; moralni karakter.
Yin i yang	Tao škola vjeruje da sve sadrži suprotne sile <i>yina</i> i <i>yang</i> koje su uzajamno isključive, a ipak međusobno ovisne, npr. žensko (<i>yin</i>) nasuprot muškog (<i>yang</i>).
Yuan	Jedinica kineskog novca.
Yuzhen tačka	Akupunkturna tačka smještena u donjem stražnjem dijelu glave.
Zhang Guolao	Jedno od osam božanstava u Tao školi.
Zhen	Istina, istinitost.
Zhen, Shan, Ren	Zhen (istina, istinitost); Shan (suosjećanje, dobrodušnost, ljubaznost, dobrota, milosrđe); Ren (strpljenje, tolerancija, trpeljivost, izdržljivost, samokontrola).